

SU'ESU'EGA O LE TUSI PA'IA MAI LE
FA'ANAUNAUGA O TUPULAGA

MAI KETESEMANE
E O'O I LE MAMALU

"O le fa'amoemoe mo i latou uma e su'esu'e i lenei ta'iala ia maua ai se fa'amafanafanafaga ma mautinoa ai o le alofa o le Atua e o'o i mea uma na Ia foafoa. O lo'o Ia vala'au mai pea e sauniuni mo Lona afio mai, auā e naunau o Ia e tatou te fa'atasi ma Ia e fa'avavau."

V.C. Darmody

O Ketesemane i le Mamalu

Su'esu'ega o le Tusi Pa'ia mai le

Fa'anaunauga o Tupulaga

Copyright (C) 2008 by Revelation Publications. All rights reserved world-wide.

www.RevelationPublications.com

ROHM@Juno.com 800-952-4457

Mata'upu ua fa'atatauina i fa'amatalaga mai mata'upu mulimuli e 14 o le

Fa'anaunauga o Tupulaga tusia e Elena Uaita.

O Fesili ma Tu'u'fa'atasiga e V.C. Darmody

Fa'atonu - Merlin Beerman

Fa'ata'otoga o le A'ano e Nikki Beerman

Fa'a-Samoaina e Abbie Lam Yuen Watt

Fa'amalamalama Lesona (C) Tusi Ata Randall May www.randallmayfineart.com

Ata o le Fa'ava'a e Tusi Ata Harry Anderson

Cover Digital Edits and Copyright (C) Justinen Creative Group, Inc., Nampa, ID

Lolomiina i le U.S.A.

ISBN 978-0-9668482-9-8

O Ketesemane

Lesona 1

(1) O LE Ā LE SAUNIGA TĀUA SA FA'APOTOPOTO MAI AI TAGATA IUTAIA, E AOFIA AI MA IESU MA ŌNA SO'O, I IERUSALEMA I LENEI VAITAIMI O LE TAUSAGA?

Ua latalata le tausamiga o le areto e lē fa'afefeteina, e ta'ua o le Paseka.

Luka 22:1

Na fa'atasi le Fa'aola ma Ōna so'o a o latou aga'i lemū i le fa'ato'aga o Ketesemane. O lo'o susulu matagofie le masina, ua leai fo'i se ao i le lagi. Ua filemū le 'a'ai o lo'o ua fa'atumulia i fale 'ie o ē ua fa'atasi mai i sauniga o le Paseka.

(2) O FEA LE NOFOĀGA E MASANI ONA ASIASI I AI IESU SA IA MALIU I AI MA ŌNA SO'O I LENEI PŌ FA'APITOA?

Ua fetalai atu ia 'upu, ona maliu atu ai lea o Iesu ma Ōna so'o i le tasi itu o le alia o Ketarono, ua i ai le fanua, ua latou ō i ai ma Ōna so'o.

Ioane 18:1

Sa talatalanoa lava Iesu ma Ōna so'o i mea tāua ma le uigā, ma sa Ia fa'atonu atu iā i latou. Peita'i ina ua latalata i Ketesemane, na uiga 'ese Lona lē gagana. E masani ona Ia asiiasi i lenei laufanua e manatunatu ma tatalo ai; peita'i e le'i o'o muamua i se loto ua matuā fa'atumulia i le fa'anoanoa e pei o lenei pō o Ōna puapuagā mulimuli. O Lona soifuāga a o i le lalolagi na Ia savali i le malamalama o le fa'atasi mai o le Atua. I taimi o fete'ena'iga ma tagata o ē ua fa'ala'ei'au e le agaga o Satani, na Ia fetalai atu, "O Ia fo'i ua 'auina mai A'u o lo'o iā te A'u Ia; e lē tu'ua A'u e to'atasi e le Tamā, auā 'Ou te faia pea lava o mea e lelei iā te Ia" (Ioane 8:29).

(3) INA UA LATA ATU IESU MA ĀNA UŌ I LE FA'ATO'AGA, O LE Ā LANA ALAGA NA FA'AILOA AI LONA MAFATIA TELE?

Ona fetalai atu lea o Ia iā te i latou, "O lo'o matuā tigā lava Lo'u loto e o'o i le oti; inā nonofo ia outou i inei ma mataāla.

Mareko 14:34

A o nei e foliga ua tapunia o Ia mai le malamalama o le fa'atasi mai o le Atua. O lenei ua faitauina o Ia fa'atasi ma ē solitulafono. E tatau ona Ia tau'aveina le nofotala a le fanua a tagata. O Ia e leai se agasala, o le a fa'ae'e i ai a tatou amio leaga uma lava. Na mata'utia foliga o le agasala sa fesaga'i ma Ia; na matuā mamafa le solitulafono e tatau ona Ia tau'aveina, o lea sa tofotofoina ai o Ia ia fefe ina ne'i punitia e fa'avavau o Ia mai le alofa o Lona Tamā. Ona ua Ia lagona le mata'utia o le to'asā o le Atua e tete'e ai le solitulafono, na Ia fetalai ai, "O lo'o matuā tigā lava Lo'u loto e o'o i le oti."

(4) INA UA TAUNU'U LE 'AU SO'O FA'ATASI MA KERISO I LE FA'ATO'AGA, O LE Ā LE MEA SA MATUĀ FA'APOPLEINA AI I LATOU A O LATOU VA'AIA ŌNA FOFOGA FA'ANOANO?

Na fa'asauāina o Ia, sa tigāina fo' i o Ia, a e e lē tautala mai o Ia. E pei o le tama'i mamoe, ua ta'ita'iina ia fasia; e pei o le mamoe fo'i i luma o ē e sele lona fulufulu, ua fa'alologo ia, o ia fo'i ua lē tautala mai.

Isaia 53:7

Ina ua latou latalata atu i le fa'ato'āga, na mātauina e le 'au so'o le suiga ua i fofoga o lo latou Matai. Latou te le'i va'aia muamua o Ia fa'apenei, ua matuā fa'anoanoa lava ma ua lē gagana. A o Ia aga'i pea i luma, na fa'ateleina lenei va'aiga fa'anoanoa; a e latou te le'i fesiligia o Ia i le mafua'aga. O Lona tino ua foliga vaivai, e pei o le a pa'ū Ia i le 'ele'ele. Ina ua taunu'u i le fa'ato'āga, na tau va'ava'ai ma le popole le 'au so'o mo Lona nofoāga masani, ina ia mālōlō ai lo latou Matai. E foliga mai ua faigatā ona aga'i i luma. Ua lagona le leo o le ōi e pei o lo'o tau'ave se 'avega mamafa. E fa'alua ona fesoasoani iā te Ia Ōna so'o auā se manū e pa'ū i le 'ele'ele.

(5) O LE Ā LE MEA NA TALOSAGA ATU AI KERISO IA FAIA E ŌNA SO'O FILIFILIA E TO'ATOLU A O IA MALAGA FA'AITIITI 'ESE MA I LATOU E TATALO?

Ona Ia fetalai atu ai lea o Ia iā te i latou: “Ua matuā tigā Lo'u loto e o'o i le oti. Ia outou nonofo pea i inei, ma ia tatou mataāla fa'atasi ma A' u.”

Mataio 26:38

Na tu'ua e Iesu Ōna so'o e latalata i le faitoto'a o le fa'ato'āga, a e ua na o le to'atolu na latou ō, ma na Ia fetalai atu ina ia latou tatalo mo i latou lava fa'apea fo'i Ia. Na o Peteru, Iakopo, ma Ioane na latou ō atu i le mea tu'ufua. O so'o nei e to'atolu sa aupito latalata iā te Ia. Na latou va'aia Lona mamalu i luga o le mauga na liliu 'eseina ai o Ia, ma latou va'aia ai Mose ma Elia o lo'o tautala ma latou fa'alogi i le si'ufofoga mai le lagi; a o nei ua feagai o Ia ma faigatā, ma ua mana'omia e Keriso le mafutaga ma ē e latalata iā te Ia. Sa masani ona latou fa'atasi ma Ia i po i lenei nofoāga tu'ufua. I taimi ia pe a mae'a a latou talosaga, ona latou momoe lea ma mālōlō e lē mamao mai ma lo latou Matai se'ia o'o ina malama le taeao ma latou aga'i atu i le galuega e pei ona feagai ai. A o nei ua Ia naunau ina ia fa'aaogā lenei po latou te tatalo fa'atasi ai. Peita'i na faigatā iā te Ia ona manatu i le molimauina e le 'au so'o le puapuagā o le a o'o iā te Ia.

Sa Ia fetalai atu iā i latou, “Nonofo ia outou i inei ma mataāla” **(Mare. 14:34).**

Na malii 'ese Iesu e lē mamao ma i latou, na latou mafai ona iloa atu ma lagona pea o Ia ua pa'ū i le ele'ele. Sa Ia lagona o le agasala ua vavae 'ese ai o Ia mai Lona Tamā. O le vanu e matuā lautele, loloto ma pogisā na mafatia tele ai Lona finagalo. O lenei faigatā e lē fa'aaogāina ai Lona mana fa'ale-Atua e sola 'ese ai. Talu ai o Ia o le tagata, e ao ona Ia talia le i'uga o le agasala a le tagata. Talu ai o Ia o le tagata e tatau ona Ia fesāga'i ma le to'asā o le Atua e fa'atatau i le agasala.

(6) INA UA IA FILIFILI E MAFATIA I LALO O LE TO'ASĀ O LE SOLITULAFONO, O LE Ā LE 'AVEGA UA TAU'AVEINA E KERISO MO I TATOU UMA LAVA?

O i tatou uma ua sē i tatou e pei o mamoe; ua ta' itasi ma fa'asaga i lona lava ala; a ua fa'ao'o iā te Ia e Ieova le amio leaga o i tatou uma.

Isaia 53:6

Ua o'o nei Keriso i se uiga e le'i i ai muamua. O Ōna puapuagā e fa'amatalaina i 'upu a le perofeta, “'Ala mai ia, le pelu e, i lo'u leoleo mamoe, ma le tagata ma te fa'atasi ma A'u,” ua fetalai mai ai Ieova o 'au” **(Saka. 13:7).** Talu ai o Keriso le sui o le tagata agasala, o Ōna puapuagā ua i lalo ifo o le fa'amasinoga tonu fa'alelagi. Na Ia silasila i le uiga o le fa'amasinoga tonu. O Ia sa fai ma fautua mo isi, a o nei ua Ia mo'omo'o iā i ai se fautua mo Ia.

(7) O FEA NA MUĀ'I FA'AOSOOSAINA AI E SATANI KERISO E FA'ATATAU I LE I'UGA O LE AIGĀ TAGATA?

Sa i ai fo'i o Ia i le vao i pō e fāgāfulu, ma ua fa'aosoosoina ai e Satani. Sa i ai manufe' ai, a e sa 'au'auna fo'i agelu iā te Ia.

Mareko 1:13

A o lagona e Keriso le mafutaga ma Lona Tamā ua motusia, na atuatuva'e o Ia ina ne'i 'avea Lona uiga fa'ale-tagata ma mafua'aga e lē mafai ai e Ia ona lavātia le fete'ena'iga o le a o'o mai ma mālōsi o le pōuliuli. I le fa'aosoosoga i le vao na lē mautinoa ma fesiligia le tulaga o le aigā tagata, a o Keriso na manumalō i inā. O lenei ua toe o'o mai lē e fa'aosooso mo le tauiviga mata'utia mulimuli. Na ia sauniuni i le tolu tausaga a o feagai Keriso ma Lana galuega. O mea uma ua tū i le lē mautinoa mo ia. Afai e to'ilalo nei, o lona fa'amoemoega i le 'avea ma ali'i o le lalolagi o le a lē iloa, o mālō o le lalolagi o le a 'avea mo Keriso; o le a fa'ato'ilaloina o ia ma tuli 'esea. A e afai e to'ilalo Keriso, o le lalolagi e 'avea ma mālō o Satani ma o le fanau a le tagata o le a i lalo o lana pule'aga. A o fesaga'i Keriso ma fete'ena'iga i Ōna luma, na fa'atamulia Lona finagalo i le ātu ona o le motusia o le La mafutaga ma Lona Tamā. Na tu'u atu e Satani afai o Ia e fa'amaonia le totogiina o le sala a le lalolagi, o le mafutaga ma Lona Tamā o le a motusia e fa'avavau. O le a fa'atasi o Ia i le mālō o Satani, ma e lē toe tasi ma Lona Tamā e fa'avavau.

(8) INA UA SAU SATANI MO LENEI TAUUA MATA'UTIA MULIMULI, O LE Ā LE TU'UA'IGA NA IA FAIA IĀ I LATOU O Ē NA AFIO MAI KERISO E LAVEA'I MA LĒ NA FA'AILOA MAI E KERISO?

²⁵ *A e peita'i ia taunu'u ai le 'upu ua tusia i la latou Tulafono, "Ua latou 'ino' ino mai fua lava iā te A' u.”*

Ioane 15:25

O le ā se mea e maua e Ia i lenei taulaga ofo? E fa’ailoa mai e leai se fa’amoemoe ona o le agasala ma le loto lē fa’afetai o tagata! Na matuā u’una’i e Satani lenei tulaga i le Fa’aola: O tagata ua fai mai e sili atu i latou i isi tagata uma i fa’amanuiāga fa’aletino ma le fa’aleagaga ua latou te’ena 'Oe. Ua latou sa’ili e fa’aumatia 'Oe, le fa’avae, le totonugalemū ma le fa’amaufa’ailoga o folafolāga na faia o tagata fa’apitoa i latou. O le tasi o Ōu lava so’o, o lē na fa’alogo i Āu fa’atonuga, o se tasi na taulāmua i fa’agaioiga o sauniga, o le a fa’alataina 'Oe. O le tasi na sili lona ma’elegā o ē na mulimuli iā te 'Oe, o le a fa’afitia 'Oe. O le a tu’ua 'Oe e i latou uma. Na matuā lē fīafia o Ia i nei manatu, ona o i latou o ē na la taumafai e laveā’i, o ē na la matuā alofa i ai, ua 'au fa’atasi i fuafuāga a Satani, o lea na tuia ai Lona finagalo. E mata’utia le fete’ena’iga. O lona fua fa’atatau o le ta’usala’ina o Lona mālō, o ē molia o Ia ma le fa’alata, o le fa’asalaga o le lalolagi ua ufitia i le amio leaga. O agasala a tagata ua matuā mamafa i luga o Keriso, ma o le manatu i le to’asā o le Atua i le agasala ua nutimomoia ai Lona soifua.

(9) O LE Ā LE TAGI E MATUĀ FA’ANOANO LAVA NA 'ALAGA AI KERISO I LONA TAMĀ A O MANATU LOLOTO IFO I LE TAU O LE FA'AOLATAGA?

⁴² *Ua fa’apea atu: “Lo’ u Tamā e, a E finagalo i ai, ia ave’ese lenei ipu mai iā te A’ u. Peita’ i, e lē o Lo’ u loto, a e ia faia Lou finagalo.”*
Luka 22:42

Ia tatou va’ai atu a o Ia manatunatu loloto i le tau e ao ona togiina mo le agaga o le tagata. I Ōna puapuagā na Ia pipi’i i le ‘ele’ele mālūlū, e pei e mafai ona taofia ai o Ia mai le ‘ave’esea mamao mai le Atua. Na to’ulu ifo le sau mālūlū i lenā po a o Ia to’otuli, peita’i na Ia lē lagona. Mai Ōna fofoga na fa’alogoina Lana ‘ai’oi, “Lo’u Tamā e, afai e mafai, ia ave’ese lenei ipu iā te A’u; a e’aua le faia Lo’u nei loto, a o Lou finagalo.”

(10) E UI INA O LO’O TIGĀ MA MAFATIA LONA LAVA FINAGALO, A E ONA O LE POPOLE MO ŌNA USO, O LE Ā LE MEA NA IA TALOSAGA ATU E LATOU TE FAIA?

⁴⁶ *Ona fetalai atu lea o Ia iā te i latou: “Se ā le mea tou te momoe ai? Inā tula’ i ia, inā tatalo, ina ne’ i o’o mai fa’aosoosoga iā te outou.”*
Luka 22:46

O le agaga o le tagata e mo’omo’o i ‘upu fa’amaise pe a i ai puapuagā. O le naunauta’iga lea na lagona e Keriso na o’o ifo i le loloto o Lona finagalo. I le tumutumuga o Ōna puapuagā na iā te Ia se lagona naunauta’i ina ia maua ni ‘upu fa’amafanafana mai iā i latou sa Ia fa’amanuia ma fa’amafanafanaina so’o, ma puipuia mai fa’anoanoāga ma le atuatuva’e. O Lē e masani ona i ai ‘upu fa’amafanafana mo i latou, o lenei ua mafatia i faigatā e sili atu i puapuagā e o’o i tagata, ma ua la naunau e mautinoa o lo’o tatalo i latou mo Ia fa’apea fo’i mo i latou lava. E foliga pōuliuli le mata’utia o le agasala! E mata’utia le tofotofoga na fa’atagaina le aigā tagata ina ia tau’aveina le i’uga o lana lava amio leaga, a o Ia tula’i e lē sala i luma o le Atua. Pe ana Ia silafia ua malamalama Ōna so’o ma latou talisapaia Lona fa’amoemoe, se manū e fa’amalosia ai o Ia.

(11) E UI INA 'AI'OI KERISO MO ŌNA SO'O E TO'ATOLU IA MATAĀLA MA TATALO FA'ATASI MA IA I SE TAIMI O LO'O MATUĀ MAFATIA AI LONA AGAGA, O LE Ā LE MEA NA TUPU IĀ I LATOU?

³⁷ *Ona maliu ane lea o Ia, ua maua i latou o momoe; ona fetalai atu lea o Ia iā Peteru: “Simona e, ua e moe ea? E te lē lavā ea ona mataāla i le itu pō e tasi?”*
Mareko 14:37

Na Ia tula’i ma le mafatia, ua Ia tau tevateva atu i le mea na Ia tu’ua ai Ōna so’o. Peita’i ua Ia “maua i latou o momoe.” Pe ana maua atu i latou o tatalo, se manū ua Ia maua se mapusaga. Ana latou sa’ili lafitaga i le Atua, e lē manumālō ‘au a Satani iā te i latou, ma e maua e Ia le fa’amafanafanaga mai lo latou tumau i le fa’atuatua. Peita’i latou te le’i fa’alogo i le lapata’iga na tu’uina atu, “Ia outou mataāla ma tatalo” (**Mata. 26:41**). Na latou popole muamua i lo latou va’aia o lo latou Matai e masani ona to’afilēmū, o lo’o ua fesaga’i nei ma se fa’anoanoāga ua sili atu le lē malamalama i ai. Na latou tatalo a o latou fa’alogoina le ‘ai’oi fa’atauānau a Lē ua puapuagātia. Latou te le’i manatu e tu’ulafoā’i lo latou Matai, peita’i na pei ua gagase i le lē lavā atonu sa mafai ona fa’ate’a ‘ese pe ana fa’aauau pea lo latou ōle atu i le Atua. Latou te le’i iloa le mana’omia o le mataāla ma le tatalo fa’atauānau e mafai ai ona mālō i fa’aosoosoga.

(12) E UI INA TA'UTINO LE 'AU SO'O O KERISO I LE MATUĀ MAUTŪ O LO LATOU FA'AMAONI IĀ TE IA, O LE Ā LE MANATU SA FA'AALIA E KERISO E FA'ATATAU I LENEI PŌ O LE FA'ALUMAINA ONA O MEA O LE A TUTUPU?

²² *Ona fetalai atu lea o Iesu iā te i latou: “Tou te tausuai uma ona o A’u i lenei pō; auā ua tusia, ‘Ou te taia le leoleo mamoe, ona ta’ape’ape ai lea o mamoe.”*

Mareko 14:27

A o le’i aga’i atu Keriso i le fa’ato’āga, na Ia fetalai atu i Ōna so’o, *“E tausuai outou uma ona o A’u i lenei lava pō” (Mata. 26:31).* Na latou ta’utino ma tu’uina atu iā te Ia le mautinoāga e latou te ō ma Ia e o’o lava i le falepuipui ma le oti. Na fa’aopoopo atu fo’i Peteru, *“E ui lava ina tausuai o tagata uma, ‘ou te lē fa’apea lava a’u.”* Peita’i o le ‘au so’o na fa’atuatua latou iā i latou lava. Latou te le’i va’ai atu i le Fesoasoani e pei ona fautuaina ai i latou e Keriso. O lea ina ua mana’omia tele e le Fa’aola Ia latou fa’amafanafaga ma tatalo, a ua maua mai i latou o momoe. E o’o iā Peteru ua moe fo’i ia.

(13) O LE Ā LE FESILI A IESU IĀ IAKOPO MA IOANE MA O LE Ā LE LA TALI NA FA’AILOA AI LO LA’UA LĒ MALAMALAMA I O LA UIGA VAIVAI?

²² *Ona tali atu ai lea o Iesu, ua fa’apea atu: “Lua te lē iloa le mea lua te ōle mai ai. Lua te mafaia ea ona inu i le ipu o le a O’ u inu ai, ma ia papatisoina oulua i le papatisoga o le a papatisoina ai A’u?” Ua la fai mai iā te Ia: “Ma te mafaia.”*

Mataio 20:22

O Ioane fo’i, le so’o pele na fa’alagolago i le fatafata o Iesu, ua moe. E moni lava, o le alofa o Ioane i lona Matai sa tatau ai ona mataāla o ia. O ana tatalo fa’atauānau sa tatau ona ō a’e fa’atasi ma tatalo a lona Fa’aola pele i le taimi o Ōna puapuagā. O le Fa’aola na alu nisi po’atua o tatalo mo Ōna so’o, ina ia lē mavae lo latou fa’atuatua. Pe ana tu’uina atu nei e Iesu iā Iakopo ma Ioane le fesili na Ia fesiligia ai i la’ua, *“Lua te mafaia ea ona inu i le ipu o le a A’u inu ai, ma ia papatisoina oulua i le papatisoga o le a papatisoina ai A’u?”* se manū e lē tali mai, “ma te mafaia.”

(14) E UI INA FA’AALIA E NEI SO’O E TO’ATOLU LO LATOU VAIVAIGA INA UA FA’ASINO I SE MALOSI E LĒ O IĀ I LATOU, O LE Ā LE TALI ALOFA A KERISO I AI?

⁴¹ *Ia outou mataāla ma tatalo, ina ne’ i o’o mai fa’aosoosoga iā te outou. Ua mana’o i ai le loto, a o le tino ua vaivai.”*

Mataio 26:41

Na ala le ‘au so’o ina ua fa’alogoina le si’ufofoga o Iesu, a e sa latou tau lē iloa o Ia, ona ua suia Ōna fofoga i le tigā. Na Ia fetalai atu iā Peteru, *“Simona e, ua e moe ea? E te lē lava ea ona mataāla i le itū po e tasi? Inā mataāla ia, ma tatalo, ne’i o’o mai le fa’aosoosoga iā te outou; ua mana’o i ai le loto a o le tino ua vaivai” (Mare. 14:37).* O le vaivai o le ‘au so’o na fafaguina ai le alofa mutimutivale o le Fa’aola. Na ātu o Ia ne’i latou lē mafai ona lavātia faigatā e o’o mai iā te i latou i Lona fa’alataina ma Lona maliu. Sa na Ia le’i a’oa’i i latou a e ua fetalai atu, *“Mataāla ma tatalo, ne’i o’o mai le fa’aosoosoga iā te outou.”* E o’o lava i Ōna puapuagā, sa Ia sa’ili pea se ‘alofaga mo o latou vaivaiga. Ua fetalai o Ia, *“Ua mana’o i ai le loto, a o le tino ua vaivai.”*

(15) E FA’APEI ONA VALO’IA E ISAIA FA’ATATAU I LENEI LAVA TAIMI, SA FA’APEFEA ONA IA FA’AMATALAINA LE AFIO MAI O KERISO?

¹⁴ *E pei ona va’ava’ai atu ma le ofo le to’ atele iā te Ia, auā ua fa’aleagaina fa’apea Ōna fofoga e sili atu i lo o se isi tagata, ma Lona tino e sili atu i tino o se isi tagata.*

Isaia 52:14

Na toe maua le Ālo o le Atua i puapuagā e sili atu i faigatā e o’o i tagata ola, na mafatia o Ia ma ua matuā lagona le vaivai. Sa Ia toe aga’i atu i le nofoāga o Lana fetaua’iga muamua. O Lona puapuagā ua sili atu i lo le taimi muamua. *“O Lona afu fo’i ua pei o alualu toto ua pa’ū ifo i le ‘ele’ele.”* O arasi ma la’au pama ua molimau lē leoa i Ōna puapuagā. Na to’ulu le sau mai o latou lau i luga o Lona tino mafatia, peiseā’i ua tagi fa’avauvau mea uma na Ia foafoaina ona ua tu’ua to’atasi ia fetaia’i ma ali’i o le pōuliuli.

(16) O Ā TOE 'UPU A KERISO, I LE FA’AI’UGA O LENEI ITULĀ O PUAPUAGĀ MA LE MALOSI O LE POGISĀ, SA FA’ALOGOINA E SO’O UA MATUĀ TULEMOMOE LAVA?

³⁹ *Ua maliu fa’aititi atu i luma, ona fa’apa’ ū faō ai lea o Ia ma tatalo, ua fa’apea atu: “Lo’ u Tamā e, afai e mafai, ia ave’ese lenei ipu iā te A’ u. A e ‘aua le faia Lo’ u loto a o Lou finagalo.”*

Mataio 26:39

I se taimi e le'i mamao atu, sa tula'i Iesu e pei o se arasi mālōsi, na fesāga'i ma afā o le tete'e mālōsi mai iā te Ia. O loto ma'a'a na fa'atumulua i manatu leaga e tau fa'amailei, na taumafai e fa'afenumia'i ma fa'ato'ilalo ai iā te Ia a e le'i manumālō ai. Na Ia tula'i mai i Lona mamalu fa'ale-lagi, o le Ālo o le Atua. A o nei o Ia ua pei o se ū gapēpē mai le afā mata'utia. Na Ia latalata atu i le tau fa'ai'uga o Lana galuega o Lē manumālō, sa fa'ato'ilaloina le mālōsi o le pōuliuli i ōna la'asaga uma. Auā o Ia Lē ua uma ona fa'amamaluina, na Ia ta'utino e tasi i La'ua ma le Atua. I gagana matagofie na Ia sasa'a atu vi'iga o le fa'amanū. Na Ia fetalai atu i Ōna so'o i 'upu fa'amalosi ma le alofā. O lenei ua o'o mai le itūlā o le mālōsi o le pōuliuli. Ua fa'alogoina nei Lona si'ufofoga i le afiafi pāganoa, e lē o le leo o le manumālō, peita'i ua tumu i le mafatia fa'ale-tagata. O 'upu a le Fa'aola ua fa'alogoina e le 'au so'o o lo'o tau tulimomoe, *“Lo'u Tamā e, a E finagalo i ai, ia E ave'ese lenei ipu iā te A'u; a e 'aia le faia Lo'u loto a o Lou finagalo.”*

(17) SA FA'APEFEA ONA AFĀINA LE TINO O KERISO A O MATUĀ MAFATIA LAVA I LE MATA'UTIA O ŌNA PUAPUAGĀ, NA ALA AI ONA POPOLE LE 'AU SO'O?

⁴⁴ *Ua puapugātia o Ia, ma ua atili ai Lana tatalo; o Lona afu fo'i ua pei o 'alu' alu toto ua pa' u ifo i le 'ele'ele.*
Luka 22:44

O le lagona muamua na o'o i le 'au so'o o lo latou fia o'o atu lea iā te Ia; peita'i na Ia poloa'i ia latou nonofo iinei ma ia mataāla ma tatalo. Ina ua maluu mai Iesu iā te i latou, na Ia maua i latou o momoe. Na Ia toe lagona le mana'omia o le mafutaga, mo ni 'upu fa'amafanafana mai Ōna so'o ia aumai ai le mapusaga, ma motusia ai le mailei a le pōuliuli ua lofitiina ai o Ia. Peita'i ua ma'a'a o latou laumata; "ua latou lē iloa fo'i pe se a latou te tali atu ai iā te Ia" (**Mare. 14:40**). Sa fafaguina i latou i Lona fa'atasi ai. Na latou va'aia i Ōna fofoga ua i ai fa'aailoga o le afu toto ona o Ōna puapugā ma sa fa'atumulua ai i latou i le mata'u. O le mafatia o Lona finagalo na latou lē malamalama i ai. *“Ua fa'aleaga fa'apea Ōna fofoga e sili i mata o tagata, ma Lona tino e sili i tino o tagata”* (**Isa. 52:14**).

(18) E UI INA UA FA'ATIGĀINA LONA AGAGA FA'ALETAGATA ONA O LE TAU E AO ONA IA TOTOGI, O LE Ā LE I'UGA O LE FILIFILIGA A KERISO IA USIUSITA'I I LE FINAGALO O LE TAMĀ MO LE AIGĀ TAGATA UA AGASALA?

¹⁴ *Ona o le “fanau” ua i ai toto ma 'a'ano, na fa'apea fo' i ona i ai iā te Ia o toto ma 'a'ano, ina ia mafai ona Ia fa'aumatia e ala i Lona maluu, o Lē ua i ai le malosi e fa'ao'o ai le oti, o le ti'apolo lea;* ¹⁵ *ina ia mafai ai ona Ia fa'asa' o lotoina i latou uma o ē na fa'apologaina i o latou olaga atoa, ona o le fefe i le oti.*
Eperu 2:14, 15

Na liliu Iesu ma Ia toe fo'i i le nofoāga e tatalo ai, sa fa'apa'ū i le 'ele'ele ma ua fa'atumulua i le mata'utia o le pogisā tele ua i ai. O le itū tagata o le Ālo o le Atua ua gatete i lea taimi faigatā. Ua Ia tatalo nei, e lē mo Lona 'au so'o ina ne'i mavae lo latou fa'atuatua, peita'i ua tatalo mo Lona finagalo mafatia ua tofotofoina. Ua o'o mai le itūlā mata'utia--o le taimi lea e tatau ona filifili ai le i'uga o le lalolagi. O le taunu'uga o le fanau a tagata ua lē mautonu i le fua fa'atautau. E mafai e Keriso ona Ia te'ena le inuina o le ipu 'o'ona, o le tofi o le tagata nofosala. O lea lava e le'i tuai. E mafai ona Ia soloi le āfu toto mai Ōna fofoga, ma tu'u ai le tagata ia fano i lana solitulafono. E mafai ona Ia fa'apea ane, Ia maua e le tagata solitulafono le fa'asalaga o lana ia lava agasala, ma o le a 'Ou fo'i i Lo'u Tamā. Pe o le a inu ea e le Ālo o le Atua le ipu 'o'ona o puapugā ma le fa'alumaina? O le a togisala ea Lē e mamā ona o le fetu'u o le agasala, ina ia laveā'i ai le tagata ua ta'usalaina? O 'upu na pa'ū mai i fofoga o Iesu, *“Lo'u Tamā e, a E finagalo i ai ia E ave'ese lenei ipu iā te A'u; a e 'aia le faia Lo'u loto, a o Lou finagalo.”*

(19) I LE TOE TAIMI O PUAPUAGĀ A O LĒ O MAUTINOĀ LE MEĀ E I'U I AI LE LALOLAGI, O Ā 'UPU FA'ATOSINA NA FETALAI ATU AI KERISO MA SUIA AI LE TULAGA FAIGATĀ O LE MILIONA O Ē O LE A FANO?

⁴² *Ua toe maluu fa'alua atu fo' i o Ia ma tatalo atu e fa'apea: “Lo' u Tamā e, a lē mafai ona 'ave'ese o lenei ipu iā te A'u se'ia 'Ou inu ai, ia faia Lou finagalo.”*
Mataio 26:42

E fa'atolu ona Ia tu'uina atu lenei tatalo. E fa'atolu ona Ia manatu pe o le a 'alo 'ese mai le fa'ataunu'uina o le taulaga ofo silisili. Peita'i o le tala fa'asolopito o le aigā tagata ua o'o a'e nei i luma o le Fa'aola o le lalolagi. Ua silasila mai o Ia, pe afai e tu'u pea ē solitulafono iā i latou lava, o le a tatau ona fa'aumatia ai i latou. Na te silafia e lē mafai e le tagata ona faia se mea. Na Ia silafia le mālōsi o le agasala. O puapugā ma le auē o le lalolagi ua fa'amalaiaina sa alu a'e i Ōna luma. Ua Ia silafia lona i'uga mata'utia o lo'o fa'amālumālu mai, ma na faia loa Lana filifiliga. O le a Ia laveā'i le tagata e tusa lava pe o le ā le tau na te togotia. Na Ia talia

Lona papatisoga i le toto, ma e ala iā te Ia o le a maua e le lalolagi o le a fāno le ola e fa'avavau. Ua Ia tu'ua maota o le lagi, o mea uma e mamā 'ato'atoa, e i ai le fiafia, ma le mamalu, ina ia laveā'i le mamoe e tasi na lē iloa, o le lalolagi e tasi na pa'ū i le agasala. Ma o le a lē fultua i Lana galuega. O le a 'avea o Ia ma leleiga mo le aigā tagata na loto malie e agasala. Ua mānavaina nei Lana tatalo i le agaga e na o le gaua'i, "A lē mafai ona ave'ese o lenei ipu se'ia 'Ou inu ai, ia faia Lou finagalo."

(20) AISEĀ NA LĒ FA'ATASI AI LE ATUA LE TAMĀ MA KERISO LONA ĀLO I LENEI TAIMI MATUĀ TĀUA LAVA?

A e peita'i o a outou amio leaga ua fai ia ma pupuni i le vā o outou ma lo outou Atua, o a outou agasala fo'i ua 'alo ai Ōna fofoga iā te outou ua Ia lē fa'afofoga mai ai.

Isaia 59:2

Ua uma ona faia Lana filifiliga, ma ua toe pa'ū ifo i le 'ele'ele na Ia fa'ato'ā tula'i mai ai. O fea nei o i ai Ōna so'o, ina ia tu'u atu o latou lima alofa e fa'amālū i le āo ua vaivai o lo latou Matai, ma fa'amamā Ōna fofoga ua so'ona fa'aleagaina e sili i lo tagata uma? Na solia to'atasi e le Fa'aola le soligāvine, ma sa leai se isi tagata a e ua na o Ia lava.

A e peita'i ua puapuagātia le Atua fa'atasi ma Lona Ālo. Na maimoa le 'au agelu i mafatiāga o le Fa'aola. Sa latou va'aia lo latou Ali'i ua si'omia e 'au a Satani, o Lona uiga moni ua tanumia i lagona o le mata'u ma le lē mautinoa. Na lologo le lagi, ua leai ni pesega. Pe ana va'ai tagata ola i le maofa o 'au a le lagi ua lē leoa a o latou mata'i ma le fa'anoanoa le Tamā ina ua motusia Ōna 'ave malamalama, o Lona alofa, ma le mamalu mai Lona Ālo pele, se manū ua latou malamalama i le 'inosia o le agasala i Lana silafaga.

(21) AISEĀ NA 'AUINA MAI AI SE AGELU MAI LE LAGI INA UA FAIA LE FILIFILIGA MULIMULI A KERISO MA UA LATALATA LAVA LE TAIMI O LONA MALIU?

⁴³ *Ona fa'aali mai ai lea iā te Ia o le agelu mai le lagi, ua fa'amalosi iā te Ia.*

Luka 22:43

Na mata'ia mai e lalolagi e le'i pa'ū'ū ma agelu o le lagi le tau fa'ai'uga o le finauga tele. O Satani ma ana 'au o le amio leaga, o lekeona o ē tete'e, na latou mata'i lenei faigatā tele i le galuega o le fa'aolataga. O mālōsi o le lelei ma le leaga ua fa'atalitali ma va'ai po o le ā le tali o le a maua e Keriso mai le tatalo na fa'atolu ona ʻōle atu ai i Lona Tamā. Sa fa'anaunau agelu ia latou aumai le mapusaga i le Fa'aola, peita'i e le'i mafai ona faia. E leai se 'auāla fa'asao na maua mo le Ālo o le Atua. I lenei faigatā matuitui, ua fa'alētonu ai mea uma, a o i le 'a'ao o Lē puapuagātia le ipu, na matala le lagi, sa fa'apupula mai ai se malamalama i le pogisā o le itūlā faigatā, ma o le agelu fa'amalumalu o lo'o tū i luma o le Atua, o lē ua sui tulaga ina ua pa'ū Satani, na o'o mai ia i tafatafa o Keriso. Na sau le agelu na te lē 'ave'ese le ipu mai le 'a'ao o Keriso, peita'i ia fa'amalosi iā te Ia ina ia inu i ai, ma le mautinoāga o le alofa o Lona Tamā. Na ia sau e tu'uina le mālōsi i le Atua-tagata o lo'o tatalo. Na ia fa'asino Ia i le lagi o lo'o matala, ma ta'u iā te Ia agaga o le a fa'aolaina ona o Ōna puapuagā. Na ia ta'utino iā te Ia o le mana o Lona Tamā e silisili ma maoā'e i lo Satani, o Lona maliu o le a matuā fa'ato'ilalo ai Satani, ma o mālō o lenei lalolagi o le a tu'uina atu i le 'au pa'ia a le Silisili 'Ese. Na ia ta'u iā te Ia o le a Ia iloa le tigā o Lona finagalo, ma o le a malie i ai, auā o le a Ia silasila i le to'atele o le aigā tagata e laveā'iina e fa'avavau.

(22) O LE Ā LE MEA NA VALO'IA E LE PEROFETA O ISAIA E FA'ATATAU I LE TAULAGA OFOFOGIA A KERISO MO LE AIGĀ TAGATA?

¹¹ *Ona o le tigā o Lona agaga Na te iloa ai Lana fanau, e malie ai o Ia. O le malamalama mai iā te Ia, e ta' uamiotonuina ai tagata e to'atele e La'u 'au'auna ua amiotonu, auā e tau'aveina e Ia a latou amio leaga.*

Isaia 53:11

E le'i mavae le mafatia o Keriso, peita'i o Lona finagalo vaivai ma le fa'aletonu ua mavae atu. E le'i fa'aititia le mālōsi o le afā, a e ua Ia maua le lototele e fa'afetaia'i ai a'o agi mālōsi mai. Na Ia tula'i mai ua to'afilēmū. O se filēmū fa'ale-lagi ua va'aia i Ōna fofoga. Ua Ia tau'ave le 'avega e leai se tagata ola na te mafai ona 'aveina; auā ua Ia tofoina puapuagā o le oti mo tagata uma.

(23) E UI INA SA VA'AIA MA FA'ALOGO SO'O I LE LEO O LE AGELU SA FA'AMAFANAFANA IĀ KERISO, O LE Ā LE TULAGA 'ESE NA IA MAUA ATU AI I LATOU I LONA TOE FO'I ANE FA'ATOLU?

⁴³ *Ona maliu ane ai lea o Ia ua maua i latou ua toe momoe, auā ua vaivai.*

Mataio 26:43

Na fa'ate'ia fa'afuase'i le 'au so'o i le malamalama ua si'omia ai le Fa'aola. Sa latou va'aia le agelu o punou ifo i lo latou Ali'i o lo'o fa'apa'u fa'o i le 'ele'ele. Na latou va'ai ua ia si'i le ao o le Fa'aola i lona fatafata, ma sa fa'asino lona lima i le lagi. Na latou fa'alogi i lona leo, e pei o se pese mālīe, o tautala i 'upu fa'amafanafana ma le fa'amoemoe. O so'o ua toe manatu i le va'aiga na latou iloa i le mauga na liua ai Iesu. Na latou manatua le mamalu sa si'omia ai Keriso ma le si'ufofoga o le Atua na fetalai mai i le ao. O lenei ua toe fa'aalia mai lea pupula, ma ua latou lē toe fefefe ai mo lo latou Ali'i. O Ia ua i lalo o le tausiga a le Atua; ua 'auina mai le agelu e puipui iā te Ia. Peita'i na lagona e le 'au so'o le vaivai ma sa manumālō lo latou fia moe. Ua toe maua mai i latou e Iesu o momoe.

(24) INA UA LĒ MAFAI LAVA ONA MATAĀLA LE 'AU SO'O, AISEĀ NA FETALAI ATU AI LOA KERISO IA LATOU TUTŪ I LUGA?

⁴² *Inā tutū ia, ia tatou ò. Fa'auta! Ua latalata mai o ia na te fa'alataina A' u.*
Mareko 14:42

“Na ia silasila atu ma le fa'anoanoa ma fetalai atu, 'Se ā le mea tou te momoe ai? Fa'auta ua tu'uina atu le Atali'i o le tagata i lima o tagata agasala.'”

A o Ia fetalai atu i ia upu, na fa'alogoina le pa'ō o vae o le motu o tagata o lo'o sa'ili iā te Ia. Na Ia fetalai atu loa i Ōna so'o, “Inā tutū ia, ia tatou ò, fa'auta, ua latalata mai lē na te fa'alataina A'u” (**Mata. 26:45**).

(25) INA UA TAUNU'U LE MOTU O TAGATA I LE MEA O LO'O I AI KERISO MA ŌNA SO'O MA UA FA'AILOA ATU E KERISO O IA LAVA LEA, O LE Ā LE MEA NA TUPU I LE MOTU O TAGATA?

⁶ *Ua fa'apea atu Iesu iā te i latou: “O A' u lenei,” ona tu'umuli ai lea o i latou, ua pa' u' ū fo'i i le 'ele'ele.*
Ioane 18:6

E lē o toe va'aia i fofoga o Iesu le mafatiāga na i ai a o Ia aga'i atu e fa'afetaia'i i lē o le a fa'alata iā te Ia. Na muamua o Ia i luma o Lona 'au so'o ma sa Ia fetalai atu i le motu o tagata, “O ai ea tou te sa'ili na? Ua latou tali mai, 'O Iesu le Nasareta.’” Ua fetalai atu Iesu, “O a'u lenei.” A o fetalai atu ia 'upu i le motu o tagata, o le agelu na 'au'auna iā Iesu ua tū nei i Lona vā ma le motu o tagata. O se pupula fa'ale-lagi na va'aia i fofoga o le Fa'aola, ma o se faitino e pei o se lupe ua fa'amalumalu iā te Ia. O le pupula o Lona mamalu na tu'umuli ai i latou; o faitaulaga, ta'ita'i, fitafita, e o'o lava ia luta, ua pa'ū'ū i le 'ele'ele pei o tagata oti. Ua latou lē mafai ona fa'afesaga'i ma Ia.

Ua tu'umuli le agelu, ma ua mavae le pupula. Na i ai le avanoa e afio 'ese ai Iesu; peita'i na Ia tumau ma le to'afilēmū. Ua tula'i o Ia i le ogātonu o le motu o tagata loto ma'a'a, o lea ua pa'ū'ū ma fāō i le 'ele'ele i lalo o Ōna 'a'ao. O le 'au so'o ua va'ai atu ma le maofa tele.

(26) ONA E SILAFIA E IA E VAIVAI LE FA'ATUATUA O ŌNA SO'O MA UA FINAGALO IA PUIPUA I LATOU, O LE Ā LE TALOSAGA A KERISO NA FAI I Ē NA PU'E IĀ TE IA?

⁸ *Ua tali atu Iesu: “Na 'Ou fai atu, o A' u lenei. Afai o A' u lea o lo'o outou sa' ilia, ia tu'u atu i latou nei e ò.”*
Ioane 18:8

A e peita'i sa vave ona suia le va'aiga. Ua toe tula'i le motu o tagata. O fitafita Roma, o faitaulaga ma luta ua si'omia Keriso. Na peiseā'i ua māsiasi ona o lo latou vaivai, ma ua popole ne'i sola 'ese Iesu. Ua toe fesili atu le Fa'aola, “O ai ea tou te sa'ili na?” Sa iā i latou fa'amaoniga o Lē o lo'o tū i o latou luma, o le Ālo lava o le Atua; peita'i ua lē mafai ona fa'atalitonuina latou. I le fesili, “O ai ea tou te sa'ili na?” sa toe tali i latou, “O Iesu le Nasareta.” Ona fetalai atu lea o le Fa'aola, “Ua uma ona 'Ou fai atu iā te outou o A'u lenei, afai tou te sa'ili mai iā te A'u, tu'u pea iā i latou nei, ia latou ò” -ma tusi fa'asino i le 'au so'o. Na Ia silafia le vaivai o lo latou fa'atuatua, ma Ia sa'ili se 'auāla e puipua ai i latou mai fa'aosoosoga ma tofotofoga. Ua Ia sauni e ofo atu Ia lava mo i latou.

(27) O LE Ā LE FA'AILOGA NA TA'U E IUTA I Ē NA TULILOA KERISO INA IA MAUTINO A E SA'O LE TAGATA UA LATOU PU'EINA?

⁴⁴ *Ua tu'uina e lē na fa'alataina o Ia le fa'ailoga ua uma ona fuafuaina iā i latou e fa'apea: “O lē 'ou te sogi i ai, o Ia lenā; ia outou pu' e iā te Ia ma ta' ita' i 'ese atu e leoleo.”*
Mareko 14:44

E le'i galo iā luta lana vaega e tatau ona fa'ataunu'u. Ina ua ulu atu le motu o tagata i le fa'ato'āga, na ia ta'ita'i le ala, ma mulimuli atu ai le faitaulaga sili. Na ia tu'uina le fa'a'ailoga i ē na sa'ili iā Iesu, "O lē 'ou te sogi i ai, o ia lea tou te pu'e iā te Ia, ma ta'ita'i iina atu, ma taofi mauina" (**Mata. 26:48**). Ua foliga mai nei o ia e leai se vaega fa'atasi ma le motu o tagata. Sa ia fa'alatalata atu iā Iesu, ua tago i Lona 'a'ao e pei o se uō e masani ai. Na fa'apea mai luta iā Iesu, "Rapi e, si o'u alofa!" ua sogi iā te Ia, e foliga mai o lo'o tagi o ia ona o le alofa iā Iesu i Ōna puapugā.

Ua fetalai atu Iesu, "*Sole, se ā le mea ua e sau ai?*" Na Ia fetalai atu ma Lona si'ufofoga fa'anoanoa, "*Iuta e, e te fa'alataina ea le Atali'i o le tagata ma le sogi?*" (**Luk. 22:48**). O lenei ōlega sa tatau ona fafagu ai le loto fuatiaifo o le fa'alata ma 'o'otia ai lona loto ma'a'a, peita'i o le mamalu, o le fa'amaoni i lē ua fa'atuatua i ai, ma le alofa moni ua mavae 'ese iā te ia. Ua ia tula'i ma le loto mālōsi ma le lē salamō, ma fa'aali lona lē toe fo'i i tua. Ua tu'uina o ia lava iā Satani, ma ua leai sona mālōsi e tete'e ai. E le'i te'ena e Iesu le sogi a le fa'alata.

(28) O LE Ā LE GAOIOIGA E LE'I FUAFUAINA NA FAIA E PETERU INA UA IA TAUMAFAI E PUIPUI I LONA ALI'I?

O Simona Peteru fo'i, ua i ai le pelu, ua se'i e ia, ma taia a'i le 'au'auna a le ositaulaga sili, ua tipi'esea lona taliga taumatau; o Maliko le igoa o le 'au'auna.

Ioane 18:10

Na manatu le 'au so'o e lē fa'atagaina e lo latou Ali'i ina ia pu'eina o Ia. O le mana lava lea na mafua ai ona pa'ū'ū le motu o tagata i le 'ele'ele e pei o tagata oti, e mafai fo'i ona taofia ai le motu o tagata a e se'i sosola 'ese i latou ma lo latou Matai. Na fa'anoanoa ma lē fiafia ina ua latou va'aia maea e fusifusi ai 'a'ao o Lē e latou te alolofā i ai. O Peteru i lona ita, ua se'i i lana pelu ma na taumafai e lavea'i i lona Ali'i, peita'i na ia tipi'esea na o le taliga o le 'au'auna a le faitaulaga sili. Ina ua silasila atu Iesu i le mea ua faia, na la fa'asa'oloto ona 'a'ao, e ui ina taofia e lima mālōlosi o fitafita Roma, ma ua fa'apea atu, "*Tu'u mai ia, se'i faia lenei mea*" (**Luk. 22:51**). Na fa'amālōlō e Iesu le taliga o le 'au'auna a le faitaulaga sili. Ona Ia fetalai atu lea iā Peteru, "*Inā toe sulu ia o lau pelu i lona fa'amoega; auā o i latou uma e tago i le pelu, e oti i latou i le pelu. Fa te 'oe ea 'Ou te lē mafaia ona 'ai'oi atu nei i Lo'u Tamā, ona auina mai ai lea e Ia iā te A'u o agelu e sili ona to'atele i lekeona e sefulu ma le lua?*" (**Mata. 26:52, 53**).

(29) INA IA TU'U I LE 'AU SO'O SE FA'AMAONIGA O LO'O IA FAIA E TONU MA LE FINAGALO O LONA TAMĀ, O LE Ā LE FESILI NA IA TU'U ATU E TOFOTOFOINA AI LO LATOU FA'ATUATUA VAIVAI?

Fa te 'oe ea 'Ou te lē mafaia ona 'ai'oi atu nei i Lo'u Tamā, ona a'auina mai ai lea e Ia iā te A'u o agelu e sili ona to'atele i lekeona e sefulu ma le lua?"

Mataio 26:53

O le lekeona mo so'o ta'ito'atasi. Ua manatu le 'au so'o, pe aiseā e lē laveā'i ai e Iesu Ia lava fa'atasi ai ma i tatou? Na silafia e Iesu o latou mafaufauga, ma Ia fa'aopopo atu, "*Ona fa'apefa lea ona taunu'u o Tusi, e tatau ona o'o ia mea?*" (**F. 54**). Sa fetalai o Ia, "*Ou te lē inu ea i le ipu ua aumai iā te A'u e Lo'u Tamā?*" (**Ioā. 18:11**).

(30) O LE Ā LE MOLIAGA NA AUMAIA E KERISO E TETE'E AI I FAITAILAGA MA TA'ITA'I E FA'AILOA AI LO LATOU FA'AMOEMOE MA FUAFA'AGA FA'ASATANI?

Sa tatou i le malumalu ma outou i aso fai so'o, e le'i o'o mai lava o outou lima iā te A'u; a o lo outou itū pō lenei, ma le pule a le pouliuli.

Luka 22:53

O le mamalu o ta'ita'i lutaia na le'i taofia ai i latou mai le 'auai fa'atasi ma ē na lamalama iā Iesu. O le pu'eina o Ia na matuā tāua tele ma e lē tu'ulafā'iina i tagata e tulaga maualalo; o faitaulaga ma ta'ita'i faitogafiti ua latou 'au fa'atasi ma leoleo o le malumalu ma tagata lē taupulea e mulimuli iā luta i Ketesemane. Pagā se potopotoga ua so'ofa'atasi i ai nei tagata e tulaga fa'amamaluina, -o se motu o tagata o lo'o sa'ili mea e fa'afiafia ai, ua fa'aa'upegaina i mea 'ese'ese, e pei o lo'o latou tuliloa se manu fe'ai!

Na liliu atu Keriso i faitaulaga ma ta'ita'i, ua silasila atu iā te i latou, ona fetalai atu lea i 'upu e lē mafai ona fa'agaloina i aso uma e latou te ola ai. Sa pei o ū ma'ama'ai a Lē Silisili 'Ese, ua Ia fetalai atu ma Lona mamalu, "*Ua outou ō mai ma pelu ma uatogi, peiseā'i o se pu'ega o se faomea? Sa tatou i le malumalu ma outou i aso fai so'o, e le'i o'o mai lava o outou lima iā te A'u. A o lo outou po lenei, ma le pule a le pōliuli.*"

I Luma o Ana ma le Fa'amasinoga a Kaiāfa

Lesona 2

Ua sopo'ia le ālia o Ketarono, ua tuana'i fa'ato'āga ma togā olive. Sa latou aga'i fa'atinati atu i 'auāla ua ta'aligoligoa o le 'a'ai, a o ta'ita'i atu Iesu. Ua mavae le tulua o po, ma ua lagona le pisapisaō o le motu o tagata na mulimuli mai iā te Ia. O le Fa'aola ua saisaitia ma leoleoina ma le fa'aeteete, ma sa lagona le tigā i Ōna itūtino. Peita'i ona o le popole ma le fa'avavevave o ē na pu'e iā te Ia, sa latou ta'ita'iina ai o Ia i le maota o Ana, o le faitaulaga sili ua mavae lona taimi i le galuega.

(1) O AI NA MUAMUA 'AVE E IUTAIA IESU IA LA FA'AFEAGAI A E LE'I O'O IA I LE FAITAUTLAGA SILI?

¹² *Ona latou avatu muamua lea o Ia iā Ana, o ia o le tamā o le avā a Kaiāfa, o lē ua avea ma ositaulaga sili i lenā tausaga.*

Ioane 18:13

O Ana o le ūlu o le aiga o faitaulaga, ma o ia o se faitaulaga ua matua, a e na taualoa e tagata o le faitaulaga sili. O lana fautuāga na sa'ilia ma e latou te fa'alogo iā te ia e pei o le si'ufōfōga o le Atua. E tatau ona ia mua'i va'ai tino iā Iesu o se pagotā, i lalo o le pule'aga fa'a-faitaulaga. E tatau ona ia fa'atasi ai a o faia su'esu'ega o le pagotā, ona o le popole ne'i i lē iloa e Kaiāfa le mea e ao ona faia ona ua lē lava lona poto masani ma lē mautū ai le tumutumuga o la latou taumafaiga. O lona poto e tau fa'asesē, o le faitogafiti, ma le fa'alialia o le fiapoto e mana'omia e fa'aogā i le taimi lenei; ona, e mo mea uma o le a tutupu, ia mautinoa e ta'usalaina ai Keriso.

(2) O LE Ā LE FESILI NA FAIA E NIKOTEMO I SE TAIMI UA MAVAE I LE FONO FAITULAFONO NA LATOU MANATU E LĒ TOE AUMAIA INA NE'I LĒ FA'ATAUNU'UINA AI A LATOU FUAFUĀGA?

⁵¹ *“Pe e fa'amasinoina i la tatou tulafono se tagata, a e e le' i fa'alogologo muamua iā te Ia ma iloa Lana mea na fai?”*

Ioane 7:51

Sa tatau ona faia le fa'amasinoga o Iesu i luma o le Fono Faitulafono; peita'i i luma o Ana ua fa'amalosia o Ia i se ulua'i su'esu'ega. I lalo o le pule'aga a le mālō o Roma e lē mafai e le Fono Faitulafono ona fa'asala se tagata i le oti. E na ona latou faia le fa'amasinoga ma le fa'ai'uga, a e fa'amaonia e sui o le mālō o Roma. O lea e mana'omia ia i ai se moliaga e mafai ai ona ta'usala Iesu e le mālō o Roma. O se solitulafono fo'i e tatau ona fa'asala ai i le va'ai a Iutaia. Na i ai nisi o faitaulaga ma ta'ita'i na talitonu ma liua i a'oa'oga a Keriso, a o le fefefe i le fa'ate'aina mai o latou tofiga na mafua ai ona lē fa'ailoa atu o Ia. Na manatua lelei e faitaulaga le fesili a Nikotemo, “Pe fa'asalaina ea se tagata i la tatou tulafono, a o lē mua'i fa'alogologo iā te ia, ma iloa ana mea ua faia?” O lenei fesili na ta'ape ai le fono mo se taimi ma lē taunu'u ai a latou fuafuāga. O Iosefa le Arimataia ma Nikotemo e lē o vala'auina ma fesiligia nei, peita'i atonu e i ai nisi na mafai ona latou tautala mālōsi i le faia o mea tonu.

(3) O LE Ā LE AGASALA SA TAUMAFAI FAITAUTLAGA E MOLIA AI IESU INA IA TALITONU IUTAIA E LATOU TE MAUA AI LE AIĀ FA'ALETULAFONO E TA'USALAINA AI O IA?

²⁹ *A o lē 'upu leaga i le Agaga Pa'ia, e lē fa'amagaloina o ia e fa'avavau, a e peita'i e tatau iā te ia le sala e fa'avavau.*

Mareko 3:29

O le fa'amasinoga e tatau ona faia i se tulaga ia loto gatasi uma ai le Fono Faitulafono ma tete'e iā Keriso. E lua moliaga sa naunau faitaulaga ia fa'atumauiina. Afai e fa'amaonia o Iesu ua faifai i le Atua, e ta'usalaina o Ia e Iutaia. Afai e sala ona o le fa'atupu fa'alavelave, ua mautinoa le ta'usalaina e Roma. O le moliaga lona lua na taumafai Ana ia fa'avaeina. Na ia fesiligia Iesu e uiga i Lona 'au so'o ma Āna a'oa'oga, ma le fa'amoemoe o le a tu'uina mai e Iesu ni matā'upu mo lana galuega lē tonu. O lona manatu ia tu'u mai e Iesu se 'upu na te fa'amaonia ai Lona taumafai e fa'avae se fa'alapotopotoga fa'alilolilo, ma o le mafua'aga ia fa'atūina se mālō fou. Ona mafai lea ona tu'uina atu Ia iā Roma, ona o Ia se tagata e fa'avevesi le filēmū ma fouvale i le mālō.

(4) O LE Ā LE TALI A KERISO E FA'ATATAU I LE MOLIAGA LONA LUA FA'APEA UA IA FA'APOTOPOTO ŌNA SO'O MO SE FOUVALEGA?

²⁰ *Ua tali atu Iesu iā te ia: “Ua 'Ou tautala atu i luma o tagata i le lalolagi. E masani fo' i ona 'Ou a' oa' o atu i sunako ma i le malumalu, o i inā e ō mai uma i ai tagata lutaia; ma 'Ou te le' i tautala fa'alilolilo fo' i i se mea.*

Ioane 18:20

Na faitau e Iesu mafaufauga o faitaulaga e pei se tusi o lo'o matala mai. E peiseā'i a fa'aapea o le mātāuina o manatu loloto a lē o lo'o fesiligia o Ia, Na te fa'afiti e leai se so'otaga lilo o Ia faia ma ē o mulimuli iā te Ia, po o lo'o Ia fa'apotopoto fa'alilolilo i se mea pogisā ina ia fa'alilo ai ni Āna fuafuāga. E leai se mea fa'alilolilo o Ia faia e fa'atatau i Lana galuega po'o a'oa'oga. “*Sa tatou nonofo ma outou i le malumalu ma 'Ou a'oa' o atu ai i aso fai so'o, a e tou te le'i pu'eina ai A'u.*”

Na fa'aailoa e le Fa'aola le 'ese'esega o le 'auāla e faia ai Lana galuega ma ē ua molia o Ia. E tele se taimi na latou sa'ili ma taumafai e lamalama ina ia molia ai o Ia i fono fa'alilolilo, atonu latou te maua ni 'auāla e fa'amaonia mea ua lē mafai ona maua i ala tonu. A o lenei ua fa'ataunu'u a latou fuafuāga. O le pu'eina o Ia e le motu o tagata i le tulua o pō ma ao, o le tauemuina ma le fa'asāuaina a e le'i ta'usaina o Ia, po o le fa'amaonia o le moliaga, o le 'auāla lea e faia ai la latou galuega, e lē o Lana 'auāla lea. O a latou gaoioiga ua solia ai le tulafono. O a latou tulafono e fa'aapea mai o tagata uma e lē sala vaganā ua fa'amaonia le solitulafono. E ta'usaina faitaulaga i a latou lava tulafono.

(5) O LE Ā LE TALI A KERISO NA FA'ASINO ATU AI I FESILI FA'AFIAAMIOTONU O LO'O FESILIGIA AI O IA?

²¹ *"Pe se ā le mea e te fesili mai ai iā te A' u? Ia e fesili i ē na fa'alog o ai, se mea na 'Ou tautala atu ai iā te i latou. Fa'auta, ua latou iloa mea na 'Ou fai atu ai."*

Ioane 18:21

Ua silasila atu Iesu i lē ua fesiligia o Ia, ma fa'aapea atu, “*Pe se ā le mea e te fesili mai ai iā te A'u?*” E le'i 'auina ea e faitaulaga ma tusi'upu tagata e tau lamalama i Āna gaoioiga, ma Āna a'oa'oga uma? E lē o i latou nei e masani ona fa'atasi i fa'apotopotoga o tagata, ma 'ave atu i faitaulaga fa'amatalaga o Āna a'oa'oga ma mea uma na fai? “*Ia e fesili i ē na fa'alog o ai, se mea na 'Ou tautala atu ai iā te i latou; fa'auta ua latou iloa mea na 'Ou fai atu ai.*”

(6) O LE Ā LE MEA NA FAI MA SA TAUTALA ATU AI SE TASI FITAFITA E TALI AI 'UPU A KERISO?

²² *Ua uma ona fetalai atu o Ia i nei mea, ona pō lea o fofoga o Iesu e se leoleo o lē na tū ai i inā, ma fai mai: “E te tautala ea fa'apena i le faitaulaga sili?”*

Ioane 18:22

Sa fa'alog le faitaulaga sili o Ana i le fa'ai'uga o le tali. Ona o le popole i fa'aalia e Keriso se mea e fa'atatau i lana fuafuāga o lo'o tau fa'alilolilo, o lea na ia lē toe fai atu ai se 'upu iā te Ia. O le tasi o ana 'au'auna, ona ua tigā i le lē mautali o le faitaulaga, ua ia pō i fofoga o Iesu ma fa'aapea atu, “E te tali atu ea fa'aapea i le ositaulaga sili?”

(7) INA IA FA'AIOLOA ATU LONA MAMALU FA'ALE-ATUA, O LE Ā LE TALI FILEMŪ NA TU'U ATU E KERISO?

Ona tali atu lea o Iesu iā te ia, Afai ua leaga La'u 'upu, ia molimau i lona leaga; a e afai ua lelei, se ā le mea ua e pō mai ai iā te A'u?”

Ioane 18:23

Na tali filēmū atu Iesu, “*Afai ua leaga La'u 'upu, ia molimau i lona leaga; a e afai ua lelei, se ā le mea ua e pō mai ai iā te A'u?*” E le'i fetalai atu Ia i ni 'upu fa'atigā e tau ai; o Lana tali filēmū na sau mai Lona finagalo e mamā, onosa'i, ma agamalū.

Na matuā mafatia Keriso i le tauemuina ma le sauāina mai lima o tagata na la foafoaina, o ē na Ia faia le togiola ina ia ola ai. Ma ua Ia mafatia ina ia totogiina i Lona 'ato'atoa ma Lona pa'ia le tau e fa'atusatusa i Lona 'ino'ino i le agasala. O Lona fa'amasinoga na faia e tagata na fa'afoliga mai o ni uō, ua tusa iā te Ia o se taulaga faifaiepa. O le si'omia o Ia e tagata ua pulea e Satani na pei o se fouvalega iā te Ia. A e na Ia silafia e mafai i se taimi fa'atauva'a ona fa'aalia Lona itū Atua ma e mafai ona pa'ū ai i le 'ele'ele i latou o lo'o sauāina o Ia. O lea ua atili faigatā ai ona feagai o Ia ma le fa'amasinoga.

(8) O LE Ā LE 'UPU MONI NA TU'U ATU E PAULO I TAGATA ROMA E FA'AFESO'OTA'I AI KERISO I LE AIGĀ TAGATA NA IA AFIO MAI E LAVEĀ'I?

⁵⁴ *E fa'apena fo' i i tatou, e ui ina tatou to' atele, a e e tasi le tino i lo tatou 'autasi ma Keriso, ma e fa'alagolago le tasi i le tasi.*
Roma 12:5

Na fa'atalitali lutaia i se Mesia e fa'aalia i le va'aiga i fafo. Na latou tulimata'i o Ia na te mafai ona pulea mafaufau o tagata ia suia ai manatu o lo'o i ai, ma fa'amalosi i latou e fa'ailoa atu Lona silisili 'ese. O lea ua latou talitonu ai e fa'amaui e Ia Lona fa'aeaina, ma fa'ataunu'uina ai o latou fa'amoemoe. O le mea lea a o tauemu i latou ia Keriso, na tofotofoina o Ia ina ia fa'aalitino Lona uiga Atua. Na Ia silafia e na o Sana fetalaiga, o Ōna fofoga, e mafai ona fa'atosina i latou o lo'o sauaina o Ia e ta'utino o Ia le Ali'i e sili i tupu ma ta'ita'i, o faitaulaga ma le malumalu. Peita'i o Lana galuega e faigatā e tatau ona fa'ataunu'u, auā o le tulaga na Ia filifilia e tasi o Ia ma le aigā tagata.

(9) O LE Ā LE ITU'AIGA SAUĀ MA LE TO'ASĀ NA MOLIMAUINA E LE LAGI NA LAVĀTIA MA ONOSA'IA E KERISO A O IA TAU'AVEINA AGASALA A LE AIGĀ TAGATA UA PA'Ū?

⁵⁵ *A e ua manu'a o Ia ona o a tatou solitulafono; ua momomo o Ia ona o a tatou amio leaga. O le a' oa' iga e filemū ai i tatou sa i Ōna luga lea, o Ōna fa'alavalava fo'i ua mālōlō ai i tatou.*
Isaia 53:5

Na molimauina e agelu o le lagi gaioiga uma na fai e tete'e ai i lo latou Ta'ita'i. Sa latou matuā naunau e lavea'i Keriso. O agelu a le Atua e i ai le mana. O se tasi taimi, ona o le usita'i i le fa'atonuga a Keriso, sa latou fa'aumatia le 'autau e to'a selau valusefulu lima afe a Suria i le po e tasi. E matuā faigofie i agelu o lo'o maimoa i le va'aiga o le fa'alumaina o Keriso i Lona fa'amasinoga, ma molimauina lo latou tigā ona fa'aumatia o fili o le Atua! Peita'i e le'i fa'atonuina i latou ia faia lea tulaga. O Ia lea e mafai ona fa'aumatia Ōna fili i le oti, na onosa'i i lo latou sauā. O Lona alofa i Lona Tamā, ma Lana folafolaga na faia a o le'i fa'avacina le lalolagi, Na te tau'aveina agasala a le lalolagi, na mafua ai ona onosa'i ma lē muimui ona o le agaleaga o i latou na Ia afio mai e lavea'i. O le vaega o Lana galuega i Lona itū tagata e onosa'i ona o tauemuga ma le sauaina e fa'ae'e e tagata i Ōna luga. O le fa'amoemoe e tasi o le fanau a tagata o le gaua'i o Keriso ma Lona onosa'i i mea uma e faia e tagata ia te Ia.

(10) A O FA'ATAGĀ FA'AILOA ATU LE MEATONU O LO'O LATOU FAIA, O LE Ā LE MEA UA ILOA E TA'ITA'I E TATAU ONA LATOU MAUA IA LĒ FA'ATUAI AI LE FASIOTIA O KERISO?

⁵⁶ *A o le ' aufaitaulaga sili, ma toea'ina, ma le taupulega uma, ua latou sa'ili ni ē molimau pepelo ia Iesu, ina ia latou fasioti ia te Ia.*
Mataio 26:59

E le'i tu'uina e Keriso i ē na molia o Ia se avanoa, na Ia lē tali atu ia te i latou; peita'i o Ia ua noanoatia, e fa'ailoa ai o Ia ua nofosala. A e tatau ona i ai se foliga na faia se fa'amasinoga tonu. E mana'omia le faia pea o se fa'amasinoga aloa'ia. Sa taumafai ta'ita'i i ia vave ona fa'ataunu'u. Na latou iloa le manatu o le tele o tagata e fa'atatau ia Iesu, ma ua popole ina ne'i salalau le tala ma iloa lautele, atonu o le a i ai se taumafaiga mo se lavea'iga. E lē gata i lea afai e tuai le fa'amasinoga ma le fa'asalaga ma fa'atuatua le fa'ataunu'uina i le aso lava lea, e 'atoa le vaiaso e toe fa'atali ai ona o le fa'amanatuina o le Paseka. O inā o le a lē taunu'u ai a latou fuafuāga. O le fa'amauiina o le fa'asalaina o Iesu, e fa'alagolago tele i latou i le vevesi o le motu o tagata, o le to'atele o i latou o ē e lē taupulea i Ierusalem. Afai e 'atoa le vaiaso e fa'atali ai, o le a fa'agae'etia tagata ma toe mau manatu ai. E to'atele o le a osofia lo latou fiafia ma le alofa ia Keriso; e to'atele o le a fa'ailoa a latou molimau e uiga i le lē sa'o o moliaga, e tula'i mai ma fa'amaoniga o galuega lelei ma le ofoofogia na faia e Iesu. E mafai ona tupu ai le lē malilie o le nu'u i Faipule Faitulafono. O le a ta'usalaina i latou a e fa'asa'oloto Iesu, ma Ia toe maua ai le fa'aaloaloga e tagata. Na atili ai ona maumaututū lo latou naunau ia taunu'u a latou fuafuāga a o le'i iloa e le tele o tagata, e tatau lava ona tu'uina atu Iesu i luma o le mālō o Roma.

(11) ONA E LE'I MAFAI E 'ANA LE TA'USALAINA O IA I LALO O LE TULAFONO, O AI NA IA 'AUINA I AI KERISO?

⁵⁷ *O ē na pu' e ia Iesu ua latou ta' ita' i ia te Ia ia Kaiafa le ositaulaga sili, na fa'apotopoto ai le ' au tusi'upu ma le ' au toea'ina.*
Mataio 26:57

Peita'i o le mea e muamua, e tatau ona maua se moliaga. O le taimi lea e le'i maua lava se mea e molia ai o Ia. Na fa'atonu atu Ana ia tu'uina Iesu iā Kaiafa. O Kaiafa o se tasi o le 'au Satukaio, o nisi o i latou o fili o Iesu. O Kaiafa o le tagata sauā, e lē alofa, ma o se tagata amio lē fa'amaoni e pei o Ana. Na ia taumafai i 'auāla uma e fa'aumatia ai Iesu. Ua aga'i i le vaveao, ua matuā pogisā lava, a e na fa'amalamalama i molī ma sulu a o latou ta'ita'i atu le pagotā aga'i i le maota o le faitaulaga sili. A o fa'apopototo le Fono Faitulafono, na toe fesiligia Iesu e Ana ma Kaiafa, a e le'i tali o Ia.

(12) O FEA NA FA'APOTOPOTO AI LE FONO FAITULAFONO I LENEI TAEAO PŌ I SE MEA E LĒ MAFAI ONA ULUFALE I AI SE IUTAIA ONA O TULAGA FA'ASĀINA O LE PASEKA?

²⁸ *Ona latou ta'ita'iina lea o Iesu mai iā Kaiafa i le maota o le ali'i; ua ao fo'i. A e e le' i ulufale i latou i le maota o le ali'i, ne' i leaga i latou, ona lē mafai lea ona 'a'ai i le paseka.*

Ioane 18:28

Ina ua potopoto le fono i le fale fa'amasino, na nofo loa Kaiafa i le nofoa o le ta'ita'i fono. O lo'o nonofo i ōna itū o fa'amasino, a e maise i latou e fia matamata i le fa'amasinoga. O fitafita Roma ua tutū i le tulaga i lalo ifo o le nofoali'i, a o Iesu o lo'o tula'i i luma o le nofoali'i. Ua pulato'a uma tagata iā te Ia. Sa fa'atumulia tagata i lagona o le fiafia e fia iloa le mea o le a tupu. I lenei fa'apopotoga o tagata vevesi, sa na o Iesu na to'afilēmū. Na pei e si'omia o Ia i le mamalu mai le lagi.

(13) O LE Ā LE MEA NA FEFE AI KAIĀFA ONA O LONA MATAŪ'A MA NA TALITONU AI E PEI ONA FA'AILOA E LE FONO?

⁴⁸ *"Afai tatou te tu'u ai pea o Ia, o le a fa'atuatua tagata uma iā te Ia, ona ō mai lea o tagata Roma ma ave'ese o tatou fale ma lo tatou nu'u."*

Ioane 11:48

Na manatu Kaiafa o Iesu o lo'o tauvā mai iā te ia. O le naunau o tagata e fia fa'alogi i le Fa'aola, ma lo latou sauni e talia Āna a'oa'oga, na fa'aosofia ai le matau'a o le faitaulaga sili. Peita'i a o va'ava'ai atu nei Kaiafa i le pagotā, na ia lagona le alofa ma le mamalu o Iesu. Na o'o ane i lona manatu o lenei Tagata e pei o le Atua. O le taimi na soso'o ai, na ia ave'ese ai lea manatu. Sa fa'alogoina loa lona leo fa'amauauma ma le fa'atauemu ma ia fa'atonu Iesu ina ia faia se vavega ofoofogia i o latou luma. Peita'i o Āna afioga na foliga e le'i lagona e Iesu. Na fa'atusatusa e tagata le 'ese'esega o uiga vevesi ma le 'ele'elea na fa'aalia e Ana ma Kaiafa i le to'afilēmū ma le mamalu o Iesu. E o'o lava i manatu o ia tagata loto ma'a'a ua oso a'e ai le fesili, Pe o le a fa'asalaina ea lea tagata amio Atua e pei o se pagotā?

(14) O Ā VASEGA E LUA O LENEI FONO NA ILOA E KAIĀFA E TATAU ONA IA PULEA ONA O LE MASEIGA I LO LATOU VĀ E O'O LAVA I LE TAIMI O LE APOSETOLO O PAULO?

² *Ua fai atu e ia lenā 'upu, ona tupu ai lea o le fefinaua' i i le ' au Faresaio ma le ' au Satukaio, ona vaeluaina lea o le fa'apopototoga.*

Galuega 23:7

Ua iloa e Kaiafa le mea o le a tupu ma ia fa'avave loa ona faia le fa'amasinoga. Sa matuā femēmēa'i fili o Iesu. Ua latou matuā naunau ia mautinoa le fa'asalaina o Ia, a e latou te lē iloa pe o le a fa'apefea ona fa'ataunu'uina. O tagata o le fon o na vaeluaina i Faresaio ma Satukaio. Na i ai i lo latou vā le faitaga'i ma le fefinaua'i; a e i ai nisi vaega e latou te lē fia talanoaina ni matā'upu ona o le popole e tupu ai fete'ena'iga. Sa mafai e Iesu ona fetalai atu ni nai 'upu ia fa'atupu ai manatu lē lelei i lo latou vā, ma liliu 'ese ai lo latou ita mai iā te Ia. Na iloa lea mea e Kaiafa, ma sa ia manatu ia 'alo 'ese mai se finauga. E to'atele tagata e mafai ona molimau e fa'amaonia o Keriso na ta'uleagaina faitaulaga ma tusi'upu, ma Ia ta'uina i latou o tagata pepelo ma le fasioti tagata; a o nei molimau e lē vave ona maua mai. Na fa'aaogāina e Satukaio i a latou finauga ma Faresaio ia lava fa'a'upuga e tasi. O nei itū'aiga molimau e lē fa'aaogāina e Roma, ma e latou te ino'ino i le fa'afoliga o Faresaio. E tele fa'amaoniga i le fa'aleaogāina e Iesu o 'uputu'u a lutaia, ma Ia lē fa'amamaluina le tele o a latou sauniga; peita'i o le mata'upu i aganu'u na matuā fete'ena'i ai Faresaio ma Satukaio; ma o lenei fo'i fa'amaoniga e lē fa'amamafaina e le mālō o Roma. E lē mafai e fili o Keriso ona tu'ua'ia o Ia i le soli o le sapati, ina ne'i su'esu'eina ma fa'aailoa ai le uiga o Lana galuega. Afai e fa'aailoa Āna vavega fa'amālōlō na faia i le Sapati, o le a lē fa'aaogāina le matā'upu a faitaulaga.

(15) INA UA FETALAI KERISO I SE TAIMI UA MAVAE, "'OU TE MAFAI ONA LEPETI LE MALUMALU O LE ATUA, MA 'OU TOE FAIA I ASO E TOLU," O LE Ā LE SESĒ NA TA'UINA E SE MOLIMAU NA TOTOGI I TUPE?

⁶¹ *Ua fa'apea mai: "Na fai mai lenei tagata, 'Ou te mafaia ona lepeti i lalo o le malumalu o le Atua, ma 'Ou toe faia i aso e tolu.'"*

Mataio 26:61

Na totogi molimau pepelo ina Ia molia ai Keriso e fa'apea ua Ia fa'atupu le vevesi ma sa'ili ia fa'atūina se isi mālō. Peita'i o a latou molimau na fete'ena'i ma lē manino. Ina ua toe fesiligia sa 'ese'ese tali na tu'uina mai.

I le amataina o le galuega a Keriso, na Ia fetalai atu, *"Inā lepetia ia o lenei malumalu ona 'Ou toe faia lea i aso e tolu."* I le gagana fa'atusa o valo'aga, na Ia valo'ia ai Lona lava malii ma Lona toe tū, "A o Lona tino, o le malumalu lea na ia fetalai mai ai" (**Ioa. 2:19, 21**). Na malamalama Iutaia o 'upu nei e fa'atatau i le malumalu i Ierusalem. O afioga uma na fetalai atu ai Keriso, e le'i maua e faitaulaga se mea e mafai ona fa'aaogā e fa'asaga iā te Ia. O le fa'auiga 'eseina o 'upu nei na latou fa'amoemoe e maua ai se mea e molia ai o Ia. Na aofia Roma i le fa'afouina ma le teuteuina o le malumalu ma sa latou mitamita tele i lenā galuega; ma pe afai e i ai sē na te fa'aalia se manatu fa'atauva'a i ai, e fa'aosofia ai lo latou lē fiafia. Oinei e mafai ona 'au fa'atasi ai Roma, Iutaia, o Faresaio ma Satukaio ona latou te manatu maua tele i le malumalu. O molimau e to'alu na maua, na lē fete'ena'i a la'ua molimau e pei o isi molimau muamua. O le tasi o molimau sa totogi ia molia Iesu na ia fa'apea mai, "Na ma fa'alogi atu iā te ia ua fa'apea mai, 'Ou te lepetia lenei malumalu na faia e lima ma 'Ou toe faia se tasi i aso e tolu e le'i faia e lima." Sa fa'apea ona fa'auiga 'eseina fetalai a Keriso. Pe ana fai e latou te fa'amatalaina tonu 'upu na Ia fetalai atu ai, se manū e lē mafai ona latou fa'amautūina le fa'asalaina o Ia e o'o lava i le Fono Faitulafono. Pe ana fai o Iesu ua na o se tagata e pei ona fai mai ai Iutaia, o Lana fa'aaliga e ta'u mai ai Lona lē fa'autauta ma le agaga mitamita vale ma e lē fa'auiga 'ese o le 'upu leaga i le Atua. E ui lava ina tu'uina mai fa'amatalaga lē sa'o e molimau, o Āna afioga e leai se mafua'aga e manatu ai Roma o se solitulafono e tatau ona oti ai sē tasi.

(16) ONA E LE'I TALI KERISO I NEI MOLIAGA LĒ TONU, O LE Ā LE FESILI NA TU'U ATU E KAIĀFA MA LE ITA TELE?

⁶² *O lea, ua tula' i ai le ositaulaga sili ma fa'apea mai iā te Ia: "E te lē tali mai ea? O le ā lenei mea ua molia ai 'Oe e nei tagata?"*

Mataio 26:62

Na fa'afofoga ma le onosa'i Iesu i molimau e fete'enai. Na te le'i fetalai atu i se 'upu e puipui ai Ia lava. Mulimuli ane ua lē mautonu i tulaga fenumia'i ē na molia o Ia ma ua lē aga'i i luma le fa'amasinoga. Ua foliga mai o le a lē manuia a latou taupulepulega. Ua popole nei Kaiāfa. O le taumafaiga mulimuli e tatau lava ona fa'amalosia Keriso ia ta'usalaina e Ia iā te Ia lava. Na tula'i le faitaulaga sili ua suia lana pupula ona o le ita, o lona leo ua fa'aailoa ai e iā te ia le pule e na te taia ai le pagotā o lo'o i ōna luma. "E te lē tali mai ea sina 'upu," o lona fesili lea, "pe se ā le mau a nei tagata iā te 'Oe?."

(17) O LE Ā LE PULE NA FA'AAOGĀ E KAIĀFA INA IA TAU FA'ATOGAFITIA AI KERISO IA TALI I LANA FESILI?

⁶³ *A e ua lē tali atu Iesu. Ona fa'apea mai lea o le ositaulaga sili iā te Ia: "Ou te fai atu iā te 'Oe, ia e tautō i le Atua soifua e te tautala i le mea moni, ma ta' u mai iā i matou po o 'Oe o le Keriso, le Alo o le Atua!"*

Mataio 26:63

Na leai se tali a Iesu. "Na fa'asauāina o Ia, sa tigāina fo'i o Ia, a e le'i tautala mai o Ia; e pei o le tama'i mamoe ua ta'ita'iina e fasia; e pei o le mamoe fo'i i luma o ē sele lona fulufulu, ua fa'alologo ia, o ia fo'i ua lē tautala mai" (**Isa. 53:7**).

Mulimuli ane ua si'i e Kaiāfa lona lima i le lagi, ua fa'apea mai iā te Ia, "Ou te fai atu iā te 'Oe, ia e tautō mai iā te i matou i le suafa o le Atua soifua, po o 'Oe ea le Keriso, le Alo o le Atua."

O lenei fesili na lē mafai e Keriso ona lē tali i ai. E i ai le taimi e lē tali ai, e i ai fo'i taimi e fetalai ai. E lē tali lava o Ia vaganā ua fesili sa'o mai iā te Ia. Na Ia silafia o Lana tali lea ua mautinoa e fa'asalaina ai o Ia. A o le fesili ua tu'uina mai e le pule e aupito maua luga e taua o le mālō, ma i le suafa o le Silisili 'Ese. E lē fa'atamala Keriso i le fa'aailoa o Lona fa'aaloalo i le tulafono, a e sili atu i lenā o Lona vā feagai ai ma Lona Tamā ua fesiligia. E ao ona fa'aailoa Lana amio ma Lana galuega. Na Ia fetalai i Ōna so'o, *"O sē ta'uta'u A'u i luma o tagata, o A'u fo'i 'Ou te ta'uta'u o ia i luma o Lo'u Tamā o i le lagi."* O nei o Lana Ia lava fa'ata'ita'iga ua toe fa'amanatuina.

(18) INA IA FA'AALI LONA UIGA FA'AALOALO MO LE TULAFONO, O LE Ā LE TALI A KERISO I LE FESILI A KAIĀFA?

Ona fetalai atu lea o Iesu, O a'u lava lea; tou te iloa foi le Atalii o le tagata e nofo i le itu taumatau o Le e ona le mana, e sau foi o ia i ao o le lagi."

Mareko 14:62

O tagata uma ua fa'alologo, o mata uma fo'i ua pulato'a i Ōna fofoga a o Ia fetalai atu iā te ia, *"O lea lava."* O le pupula mai le lagi na pei ua malamalama ai Ōna fofoga, ma Ia toe fa'apea atu, *"Ou te fai atu fo'i iā te outou, e mulimuli ane tou te iloa le Atali'i o le tagata e nofo i le itu taumatau o lē ōna le mana, e sau fo'i o Ia i ao o le lagi."*

Na fa'afuase'i ona pei ua fa'aalia le itū Atua o Keriso. Na mata'u le faitaulaga sili i le silafaga ati a le Fa'aola. O le silafaga a Keriso ua pei ua ati ma faitauina ai ona manatunatuga lilo, ma e pei ua mu ai lona loto. E le'i toe galo ia Kaiafa le mea na ia va'aia ai le silafaga ati a le Ālo sauāina o le Atua.

"E mulimuli ane" na fetalai ai Iesu, *"tou te iloa ai le Atali'i o le tagata e nofo i le itu taumatau o lē ōna le mana, e sau fo'i o Ia i ao o le lagi."* O nei afioga a Keriso na fete'ena'i ma le va'aiga o lo'o tutupu i lea taimi. O Ia le Ali'i o le ola ma le mamalu, o le a nofo i le itu taumatau o le Atua. O Ia o le fa'amasino o le lalolagi 'atoa, ma o Lana fa'aiuga e lē toe suia. O mea lilo uma o le a fa'aalia i le malamalama o fofoga o le Atua, ma o le a fa'amasinoina tagata ta'ito'atasi e tusa ma āna mea na fai.

(19) ONA O IA O SE SATUKAIO, AISEĀ NA MATUĀ FEFE AI KAIĀFA I LE FETALAIGA A KERISO?

Auā e fa'apea le 'au Satukaio, e leai se toe tū mai, e leai fo'i se agelu, po o se agaga; a ua taofi e le 'au Faresaio ia mea uma e lua.

Galuega 23:8

O afioga a Keriso na mata'u ai le faitaulaga sili. O le manatu e i ai le toe tutū o ē ua oti, e tula'i uma i luma o le Atua, e tauti ai e tusa ma a latou galuega, o lea se manatu na fefe ai Kaiafa. Na ia lē mana'o e talitonu o le lumana'i o le a maua ai lona i'uga e tusa ma āna galuega. Na ia va'ai fa'alemafaufau e pei o se ata fa'asolo va'aiga o le fa'amasinoga mulimuli. Mo sina taimi na ia mata'u i le va'aiga o tu'ugamau ua tu'uina a'e o latou tagata oti fa'atasi ai ma mea lilo na ia fa'amoemoe ua nātia e fa'avavau. Mo se taimi na ia lagona e pei ua ia tula'i i luma o le Fa'amsino e fa'avavau, o Lana silafaga ati e silafia mea uma, o lo'o faitauina lona loto, o lo'o aumaia i le malamalama mea lilo na ia manatu ua nātia fa'atasi ma ē ua oti.

(20) O LE Ā LE FETALAIGA A KERISO NA MAFUA AI LE ITA TELE FA'A-SATANI O KAIĀFA MA NA TA'USALAINA AI O KERISO UA FĀIFĀI I LE ATUA?

⁶² *Ona fetalai atu lea o Iesu: "O lea lava; ma o le a outou vā'ai i le Atali'i o le tagata o lo'o nofo i le itu taumatau o Lē e Malosi, ma e sau fo' i o Ia i ao o le lagi."*

Mareko 14:62

Ua mavae le va'aiga mai le faitaulaga. Ua lagona e ia afioga a Keriso, o ia o le Satukaio. O Kaiafa sa na te'ena le talitonuga i le toe tū, o le fa'amasinoga, ma le ola i le lumana'i. O lea ua matuā osofia o ia i le ita fa'a-satani. O lenei tagata, o se pagotā o lo'o tū i ōna luma, ua osofa'ia ōna talitonuga e aupito tāua iā te ia? Ua ia saei ōna ofu, atonu o le a va'ai mai tagata i lona mata'u fa'afoliga, ua ia fa'atonu atu e lē toe mana'omia se fa'amasinoga a e ua tataua ona fa'asalaina Iesu ona o Lona fa'atauemu i le Atua. "Se ā se toe aogā o molimau iā te i tatou? Fa'auta ua outou fa'alogo nei i Āna afioga leaga i le Atua! Pe ni ā fā outou?" Ua latou manatu uma e tataua ona oti o Ia.

(21) O LE Ā LE TULAFONO A MOSE MO SĀLEVĪ UA TA'USALAINA AI KAIĀFA I LE TULAGA O LE FAITaulaga SILI ONA O LONA UIGA FOUVALE?

⁶ *Ona fai atu lea o Mose iā Arona ma isi ona atali'i o Eleasaro ma Itamaro: "'Aua ne' i lē teuina o outou lauulu, ma 'aua ne' i outou saeia o outou ofu ne' i outou oti, ne' i to' asā fo' i o Ia i le fa'apotopotoga atoa; a o o outou uso, o le fa'apotopotoga atoa o Isaraelu, latou te fetagisi ona o le fa'afanoina lea na faia e Ieova e ala i le afi.*

Levitiko 10:6

O le loto naunau o Kaiafa ia nofo sala Iesu na ia faia ai lana fa'aiuga. Na ita tele o ia iā te ia lava i lona talitonu i afioga a Keriso, peita'i ua lē saeia lona loto ina ua ia iloa le mea moni ma ta'u atu o Iesu le Mesia, a e ua saeia lona ofu fa'afaitaulaga e fa'ailoa

ai lona matuā tete'e. O lenei gaoioiga e matuā uigā. E lē iloa e Kaiafa le tāua tele o lona uiga. I lenei mea ua ia faia, ina ia a'afia ai fa'ai'uga a fa'amasino ma mautū ai le fa'asalaga o Keriso, ua ta'usalaina ai lava e le faitaulaga sili ia lava. I le tulafono a le Atua ua leai sona agava'a mo le tofi o le faitaulaga. Ua tu'u e ia i ōna lava luga le fa'asalaga o le oti. O le faitaulaga sili e lē tataua ona saeia ōna ofu. O le tulafono a-Sā Levi, e fa'asāina ai ma e i lalo ifo o le fa'asalaga o le oti. E leai se taimi po o se tulaga e tataua ai ona saeia e le faitaulaga ōna ofu. O le aganu'u a lutaia e saeia ofu i le maliu o se uō, a o lenei tū e lē fa'aaogāina e faitaulaga. Na fa'aailoa mai e le Atua iā Mose lenei fa'atonuga.

(22) O LE Ā LE TUSITUSIGA A LE PEROFETA O IOELU E FA'ATATAU I LE TALIAINA E LE ATUA O LE TULAGA E FA'AALIA AI LE SALAMŌ?

¹³ *Ia saeia o outou loto, a e e lē o o outou ofu; ma ia fo' i mai iā Ieova lo outou Atua, auā e alofa fua ma alofa mutimutivale, e telegese Lona to' asā ma e tele lona alofa fa'amaoni, ma e fa'anoanoa o Ia ona o le malaia.*

Ioelu 2:13

O ofu uma o faitaulaga e tataua ona 'ato'atoa ma ia mamā. O nei ofu matagofie e fa'atusa i ai le amio a lē e fa'asino i ai ata, o Iesu Keriso lea. E ao ona 'ato'atoa mea uma, i ofu, o le amio, i 'upu ma le agaga, ina ia talia e le Atua. O Ia e pa'ia ma o Lona mamalu ma Lona 'ato'atoa e suia e sauniga i le lalolagi. E na o le 'ato'atoa e mafai ma talafeagai ai ona 'avea ma sui o le pa'ia o sauniga fa'alelagi. O le tagata e mafai ona saeia lona loto ia fa'aalia ai le agaga salamō ma le loto maualalo, o lenā e fia silasila i ai le Atua. A o ofu o faitaulaga e lē saeia auā e fa'alcagaina ai le fa'atusa o mea fa'alelagi. O le faitaulaga e aofia i le sauniga o le malumalu, ma lona ofu ua saeia, o le a va'aia o ia o se tagata ua vavae 'eseina ia lava mai le Atua. Ina ua saeia ōna ofu ua vavae'eseina ai o ia mai lona tulaga o se sui. O le a lē toe talia o ia e le Atua o se faitaulaga. O lenei uiga ua fa'aailoa i gaoioiga a Kaiafa, ua fa'aalia ai tu'inanau fa'ale-tagata ma uiga lē 'ato'atoa o le tagata.

(23) E FA'APEI ONA FA'ATONU LE FANAUGA A ISARA'ELU E MOSE, O LE Ā LE FETALAIGA A LE ATUA E FA'ATATAU I LONA SUAFA I LE VĀ MA KERISO O LEA UA TA'USALAINA AI KAIĀFA LAVA IA, O IA O SĒ UA FĀIFĀI I LE ATUA?

Ia e fa'aeteete 'oe iā te 'oe i Ōna luma, ma ia e fa'alogi i Lona leo, 'aia le fa'a'ono'ono iā te Ia, auā na te lē fa'amagaloina o outou solitulafono; auā fo'i o lo'o iā te Ia Lo'u nei igoa.

Esoto 23:21

O le saeia o ōna ofu na fa'aalia ai e Kaiafa lona lē amana'ia o le tulafono a le Atua a e mulimuli i 'uputu'u a tagata. O le tulafono na faia e tagata e fa'apea, afai e 'upu leaga se tasi i le Atua e mafai ona saeia e le faitaulaga ōna ofu ona o le mata'utia o le agasala, a e lē sala le faitaulaga. Ua fa'alēaogāina le tulafono a le Atua ona o tulafono a tagata.

O gaoioiga uma a le faitaulaga sili na mātāuina e tagata; ma na manatu Kaiafa na te fa'aalia o ia o le tagata pa'ia. Peita'i i lenei mea na faia ma le fuafuāga ia molia ai Keriso, ua ia ta'uleagaina ai Lē na fetalai mai ai le Atua, *“O lo'o iā te Ia Lo'u nei igoa.”* O ia lava lea ua 'upuleaga i le Atua. Ua i lalo nei Kaiafa i le fa'asalaga a le Atua, a e ua ia ta'usalaina Keriso ua faifai i le Atua.

(24) A O LATA INA MALIU KERISO I LUGA O LE SATAURO, O LE Ā LE FOLAFOLAGA NA IA FA'AILOA ATU, MA NA VAVAE'ESE AI E FA'AVAVAU LE MALŌ O IUTAIA MAI LE ATUA?

³⁰ *Ua talia e Ia le uaina 'o'ona, ona Ia fetalai atu lea: “Ua taunu'u!” ua fa'agaugau lona ao, ona tō ai lea o Lana mānava.*

Ioane 19:30

Ina ua saei e Kaiafa ōna ofu ua fa'aailoa i lana gaoioiga le tulaga ua i ai le nu'u o lutaia ma le tulaga e i ai i le vā feagai ai ma le Atua. O le nu'u na filifilia e le Atua, ua vavae'ese i latou mai iā te Ia, ma ua vave lava ona aga'i atu o tagata ua fa'atō e Ieova. A o tautau Keriso i luga o le satauro na Ia alaga, *“Ua taunu'u!”* na saelua le 'ie pupuni o le malumalu, ma na fa'aailoa mai e le Mātā'i Pa'ia le te'ena o Ia e tagata Iutaia, o Ia o le ata o a latou gaoioiga uma, o le faitino o fa'ata'ita'iga uma. Atonu ua tonu ona saeia e Kaiafa ofu o lona tofiga, ona e fa'aailoa ai o ia le sui o le faitaulaga Sili; auā ua lē toe i ai se uiga mo ia po o le nu'u. Ua pei ua saeia ōna ofu o le faitaulaga sili ona o le mata'u mo ia fa'apea ma le nu'u.

(25) SA FA'APEFEA LE FAIGA O KERISO E LE MOTU O TAGATA LĒ TAUPULEA MA LE VĀLEA INA UA UMA ONA TA'USALAINA IA E LE FONO FAITULAFONO IA FASIOTIA?

⁶⁷ *Ona latou taufaiifeanu ai lea i Ōna ʻōfoga, ua taufaitu'i fo'i iā te Ia; ua taufaipō atu fo' i isi....*

Mataio 26:67

Na fa'ailoa e le Fono Faitulafono o Iesu ua tatau i ai le oti; peita'i sa fete'ena'i ma le tulafono fa'a-lutaia ona fa'amasinoina se pagotā i le pō. I tulafono o fa'asalaga, e leai se mea e mafai ona faia vaganā ua malamalama le aso ma e tatau ona aofia uma le Fono. E ui i lea, ua tu'uina atu nei le Fa'aola ma so'ona faia pei o se pagotā solitulafono, ma ua fa'asauāina e i latou e aupito leaga ma lē taupulea o le fanau a tagata. O le maota o le faitaulaga sili e si'osi'o e le lotoā o lo'o potopoto ai fitafita ma le motu o tagata. Na ta'ita'iina atu Iesu mai le maota e ui atu i le lotoā ma aga'i atu i le potu e taofia ai, a o Ōna itū uma ua fetaia'i ai o Ia ma le tauemuina i Lona fa'ailoa atu o Ia o le Ālo o le Atua. O Āna lava fetalaiga, *“E nofo i le itū taumatau o Lē ōna le mana”* ma, *“e sau fo'i o Ia i ao o le lagi.”* na latou fiafia e 'alalaga ai. E le'i puipuia o Ia i le potu e leoleoina ai a o fa'atali Lona fa'amasinoga fa'alemālō. O tagata amio lē taupulea na latou va'aia le sauāina ma le agaleagaina o Ia i luma o le fono, ma latou manatu ai fo'i e fa'ailoa a latou amio fa'asatani. O Keriso ma Lona agamalū ma le amio Atua na fa'atupuina ai lo latou 'ino'ino tele. O Lona agamalū, onosa'i, ma Lona fa'apalepale ua fa'atumulia ai i latou i le ita e mafua mai iā Satani. Na solipalaina le alofa tunoa ma le fa'amasinoga tonu. E le'i faia muamua fa'a'apea se tagata i uiga e lē tatau ona faia i se tagata ola, o le faiga lenā sa latou faia i le Ālo o le Atua.

(26) O LE Ā LE 'UPU NA FA'AFOFOGA KERISO O FAIA E PETERU O LO'O TŪ LATALATA I LE AFI FA'ATASI MA LE MOTU O TAGATA TO'ATAMA'I LAVA, MA NA MATUĀ MAFATIA AI LONA FINAGALO?

⁷¹ *Ona ia tautō lea ma fai atu ma le maumaua' i: “Ou te lē iloa lava lenei tagata o lo'o outou fai mai ai.”*

Mareko 14:71

Peita'i o se mafatiāga e sili atu na o'o i le finagalo o Iesu; o le pō na matuā tigā ai o Ia e lē mafai e se tagata ona fa'ao'o iā te Ia. A o feagai o Ia ma se su'esu'ega e lē tūsa i a e na o le tauemuga i luma o Kaiafa, a e o Keriso ua fa'afitia e se tasi o Ōna Ia lava so'o.

Ina ua mavae ona latou tu'ua lo latou Fa'aola i le fa'ato'āga, e to'alua so'o na taumafai e mulimuli mamao atu i le motu o tagata na ta'ita'i 'ese Iesu. O so'o nei e to'alua o Peteru ma Ioane. Ua mātāuina e faitaulaga o Ioane o se so'o lauiloa o Iesu, na latou fa'ataga o ia i le maota, ma le fa'amoemoe afai e va'ai o ia i le fa'alumaina o lona ta'ita'i, o le a ia manatu fa'atauva'a i le talitonuga o lea tagata o le Ālo o le Atua. Na talanoa Ioane e uiga iā Peteru ma sa maua ai fo'i lona avanoa i le maota.

I le lotoā na tafu ai le afi, ona o le taimi aupito mālūlū lea o le po, ua lata ona ao. Ua potopoto ai nisi tagata i le afi, ma sa fa'atasi ai Peteru ma i latou. E le'i mana'o Peteru e iloa o ia o se so'o o Iesu. Na ia fa'afefiloi fa'atasi ma le motu o tagata ma lona fa'amoemoe ia faitāuina o ia o se tasi o tagata na aumaia Iesu i le maota.

(27) SA FA'APEFEA ONA ILOA O PETERU O SE TASI O SO'O O KERISO?

⁷³ *Ua toe itiiti, ona ō ane ai lea o ē na tutū mai ma fa'a'apea mai iā Peteru: “E moni, o 'oe o se tasi o i latou, auā ua iloa 'oe i lau gagana.”*

Mataio 26:73

Peita'i ina ua sulugia foliga o Peteru i le malamalama, na iloa o ia e le 'au'auna teine e va'aia le faitoto'a. Na ia mātāuina sa Ia ō mai fa'atasi ma Ioane, ua na va'aia mata o le tagata ua matuā fa'anoanoa, ma ia manatu atonu o ia o se tasi o le 'au so'o o Iesu. O ia o se tasi o 'au'auna i le aiga o Kaiafa, ma sa ia fia iloa. Sa ia fa'a'apea atu iā Peteru, *“E lē o 'oe ea le tasi so'o o lenā Tagata?” (Ioa. 18:17).* Na fefe Peteru ma lē mautonu; o mata o tagata na latou fa'atasi ua pulato'a mai iā te ia. Na ia fa'atagā lē malamalama i le mea ua ia fai mai ai; peita'i o ia ua atili ona fa'a'apea atu o lenei tagata sa fa'atasi ma Iesu. Na iloa e Peteru e tatau ona tali atu, ma ua fa'a'apea atu ma le ita, *“Funa e, 'ou te lē iloa o Ia, 'ou te lē iloa fo'i le mea ua e fai mai ai na” (Luk. 22:57).* O le fa'afiti muamua lenei a Peteru, ma ua vivini mai moa. Peteru e, ua vave ona e māsiasī ona o lou Matai! Ua matuā vave ona e fa'afiti i lou Ali'i!

(28) E FA'APEFEA ONA FA'AMATALAINA E LENEI MAU LE VĀ FEAGAI AI O IOANE MA KERISO, MA NA FA'AGAE'ETIA AI O IA E NOFO FA'ALATALATA IĀ IESU PE A MAFAI?

²³ *Ua ta'oto ane fo'i i le fatafata o Iesu le tasi o Ōna so'o, o lē ua alofaina e Iesu.*

Ioane 13:23

O le so'o o Ioane, ina ua o'o i le fale fa'amasino, na te le'i taumafai e fa'alilo o ia na mulimuli iā Iesu. E le'i fefiloi fa'atasi ia ma tagata ulavavale o lo'o sauāina lona Ali'i. E le'i fesiligia o ia auā na te le'i fa'aalia se uiga fa'afoliga ma masalomia ai o ia. Na ia

sa'ili e malōlō i se tulimanu e puipuia mai le va'aiga a le fa'alapotopotoga o tagata lē taupulea, a e ina ia latalata pea iā Iesu. O inā na mafai ai ona va'ai ma lagona mea uma o lo'o tutupu i le fa'amasinoina o lona Ali'i.

(29) I LE TAIMI A O I LE FA'ATO'AGA, O LE Ā LE LAPATA'IGA FA'ATATAU I FA'AOSOOSOGA NA FETALAI ATU AI KERISO A E UA LĒ MAFAI E PETERU ONA FAIA?

⁴¹ *Ia outou mataāla ma tatalo, ina ne' i o'o mai le fa'aosoosoga iā te outou; ua mana'o i ai le loto, a o le tino ua vaivai.*

Mataio 26:41

E le'i manatu Peteru ia iloa lana amio moni. Ina ua fa'aalia uiga fa'afoliga na ia tu'uina loa ia lava i le itū 'au a le fili, ma ua tuliloaina e fa'aosoosoga. Pe ana fai e vala'auina o ia e tau mo lona Ali'i, se manū o ia e 'avea o se fitafita loto tele; peitai, ina ua tusilima atu le manatu fa'atauemu iā te ia, na ia fa'amaonia lava o ia e pala'ai. E to'atele e lē 'alo 'ese mai le taua mo lo latou Ali'i, e ta'ita'iina i latou e tauēmuga e fa'afitia ai lo latou fa'atuatua. O le 'au'aumea fa'atasi ma ē sa tatau ona latou 'alo 'ese ai, ua latou tu'uina i latou i le āla o tofotofoga. Ua latou vala'auina le fili ina ia fa'aosoosoina i latou, ma ua ta'ita'iina i latou ia tautala ma faia mea e lē masani ona latou faia ma sa lē tatau ona ta'usalaia ai. O le so'o o Keriso i ōna po nei e fa'afoliga lona fa'atuatua ona o le fefe i sauāga po'o tu'ua'iga, ua fa'afitia lona Ali'i e pei ona faia e Peteru i le fale fa'amasino.

Na taumafai Peteru e fa'aali e lē tāua iā te ia le fa'amasinoga o lona Matai, peita'i o lona agaga na matuā mafatia a o ia fa'alogo atu i 'upu tauemu ma va'ai i Ōna puapugā. E sili atu i lenā, na ia ofo ma tigā lona loto ona o le fa'atagaina e Iesu ia fa'alumaina o Ia fa'apea ē mulimuli iā te Ia. I le taumafai ina ia lilo ōna lagona moni, na ia tinoū e 'auai ma ē o lo'o sauāina Iesu ma a latou tauēmuga. A o Peteru e iloa atu lava e lē o sana masani lea. Ua ia fa'atinoina le pepelo, ma e ui ina o fa'afoliga mai e lē tāua iā te ia mea o lo'o tutupu, e lē o nātia ōna foliga tigā ona o mafatiāga ua o'o i lona Matai.

(30) INA UA FESILIGIA FA'ATOLU PETERU MA UA TALI ATU I LE FETU'U MA 'UPU LĒ TATAU, O Ā 'UPU E MATUĀ OGAOGA LAVA NA FETALAI AI KERISO I SE TAIMI UA MAVAE UA MANATUA NEI E PETERU A O VIVINI MOA?

³⁰ *Ona fetalai atu lea o Iesu iā te ia: “E moni, 'Ou te fai atu iā te oe, o lenei aso, o le pō nei lava, a o le' i o'o i le vivini fa'alua o moa, e te fa'afiti fa'atolu mai iā te A' u.”*

Mareko 14:30

Na toe mātā'itūina fa'alua o ia, ma ta'ua ai o ia sa mulimuli iā Iesu. Ona toe fa'afiti lea o ia ma tautō mai, “Ou te le'i iloa lea tagata!” (**Mata. 26:72**). Na ia toe maua se isi avanoa. Ua mavae se itūla, a e ua toe fesili mai le tasi 'au'auna a le faitaulaga sili, e tau i le 'au'auna na tipiese e Peteru lona taliga, “Ou te le'i va'ai atu ea iā te 'oe fa'atasi ma Ia i le fanua?” “E moni, o 'oe lava lo latou; auā o le Kalilaia 'oe, ua tusa ai lau gagana” (**Ioa. 18:26; Mare. 14:70**). Ona matua tigā lea o Peteru. O le 'au so'o o Iesu na iloa i latou i le mamā o Ia latou gagana, a e ina ia fa'aseseina ē na fesili, ma fa'amaonia ai o ia, na fa'afiti Peteru ma tautō. Ua toe vivini fo'i moa. Ua lagona nei e Peteru, ma ua ia manatua le fetalaiga a Iesu, “*A o le'i o'o i le vivini fa'alua o moa, e te fa'afiti fa'atolu iā te A'u.*”

A o i ai pea i laugutu o Peteru le 'o'ona o āna 'upu tautō, ma fa'ato'ā uma ona vivini moa, o le Fa'aola ua liliu 'ese mai le 'au fa'amasino, ma ua silasila mai i Lona so'o. O le taimi fo'i lea ua tepa atu Peteru ma va'ai i lona Ali'i. O Ōna fofoga alofa na iloa atu e Peteru, o fofoga alofa mutimutivale ma le fa'anoanoa, peita'i e leai se foliga to'otama'i.

(31) UA SILASILA IFO MA FOFOGA MAFATIA LĒ E FA'AALI PEA LE AGALELEI, MA ILOA ATU AI LONA IA LAVA UIGA AGASALA, O LE Ā LE MEA NA FAIA LOA E PETERU?

²⁵ *Ua manatua lea e Peteru le 'upu na fetalai atu ai Iesu iā te ia: “E lē vivini moa se'ia e fa'afiti fa'atolu mai iā te A'u.” Ona ulufafo ai lea o ia, ua tagi lotulotu.*

Mataio 26:75

O le va'aiga i lea fofoga puapugātia, o le fofoga alofa mutimutivale ma le fa'amagalo, na tuia ai lona loto e pei o se 'aū. Na fafaguina ai lona loto fuatia ifo. Ua toe fa'agaioi ai lona mafaufau. Sa toe manatua e Peteru lana folafolaga e le'i tele ni itūlā talu ona faia, e la te ō ma lona Ali'i i le falepuipui, e o'o lava i le oti. Na ia manatua lona fa'anoanoa ina ua fetalai le Fa'aola iā te ia i le afeafe aupitoaluga o le a ia fa'afitia fa'atolu lona Ali'i i le pō lava lea e tasi. Ua fa'ato'ā uma atu ona ia fa'afiti e na te lē iloa Iesu, peita'i ua ia fa'ato'ā iloa nei ma lona loto matuā mafatia, e silafia lelei e le Ali'i o ia, ma le sa'o o Lana faitauina o lona loto o le sesē na te le'i iloa e ia lava.

O lona mafaufau ua fa'atumulia ina ua ia manatua mea na tutupu. O le alofa mutimutivale o le Fa'aola, o Lona agalelei ma le fa'apalepale, o Lona uiga tausa'afia ma le onosa'i mo ia le so'o ua sesē,—ua manatua uma lava. Sa ia toe manatu i le lapata'iga, “*Simona e, Simona e! Fa'auta, ua mana'o tele Satani iā te outou, ia lulū iā te outou pei o le saito; a ua 'Ou fa'atoga mo 'oe, ina ne'i*

mavae lou fa'atuatua" (Luk. 22:31, 32). Na ia manatua lona mata'u, lona lē fa'afetai, o lona sesē, ma lona fa'afiti. Na ia toe tepa i lona Matai, ma ia va'aia se lima o si'i e pō i Ōna fofoga. Na ia lē mafai ona 'onosa'ia lenei va'aiga, ua momomo lona loto, ma ua fa'avave ona alu i fafo mai le lotoā o le maota.

(32) O SE TIGĀALOFA FA'ALE-ATUA NA OSO A'E I LE LOTO O PETERU A O SOLA'ESE ATU I LE ITŪ O LE FA'ATO'AGA NA PUAPUAGĀTIA MA MAFATIA AI LONA ALI'I?

¹⁰ *Auā o le tigā e tusa i le Atua, e tupu ai le salamō e o'o i le ola e lē toe salamō ai; a o le tigā fa'alelalolagi e tupu ai le oti.*

II Korinito 7:10

Na ia alu 'ese atu na o ia i le mea tu'ufua ma le pogisā, na te le'i iloa po o fea ma lē popole i ai. Ua o'o o ia i Ketesemane. O le va'aiga i mea na tutupu i itulā ua mavae o lo'o manino i lona mafaufau. O fofoga mafatia o lona Ali'i ua pisia i Lona toto, ua alu a'e nei i ōna luma. Ua ia manatua ma le fa'anoanoa tele le taimi a o Ia puapuagātia ma tigāina a o tatalo to'atasi, ma o ē sa tatau ona fa'atasi ma Ia i Ōna puapuagā o lo'o momoe. Na manatua e Peteru Lana fetalaiga, *"Ia outou mataāla ma tatalo, ne'i o'o mai fa'aosoosoga iā te outou"* (Mata. 26:41). Sa ia toe molimauina le va'aiga i le fale fa'amasino. Na atili tigā lona loto i le iloa o ia na fa'aopopo atu i le mamafa o le 'avega a le Fa'aola o le fa'alumaina ma le fa'anoanoa. I le nofoāga tonu na sasa'a atu ai e le Fa'aola Ōna mafatiāga i Lona Tamā, ua fa'apa'ū ai Peteru i le 'ele'ele ma ia mo'omo'o ia oti.

(33) INA UA TU'UA E KERISO ŌNA SO'O I LE FA'ATO'AGA MA LE LAPATA'IGA IA TATALO MO IA MA I LATOU LAVA, O LE Ā LE TULAGA NA I AI I LATOU I LONA TOE FO'I ANE?

³² *Ona malii ane lea o Ia, ua maua i latou o momoe; ona fetalai atu lea o Ia iā Peteru: "Simona e, ua e moe ea? E te lē lavā ea ona mataāla i le itulā pō e tasi?"*

Mareko 14:37

O le taimi na moe ai Peteru a o lo'o mana'omia ina ia mataāla ma tatalo, o inā na saunia ai o ia mo lana agasala ma'oa'e. O so'o uma, ina ua momoe i lea taimi aupito uigā, sa tele ai se afāina o i latou. Na silafia e Keriso puapuagā mata'utia o le a feagai ma i latou. Na silafia e Iesu le 'auāla a Satani e maua ai i latou ma lē saunia ai mo taimi faigatā. O lea na Ia lapata'iina ai i latou. Ana latou fa'aalu itulā na latou i ai i le fa'ato'āga e mataāla ai ma tatalo, se manū e lē fa'alagolago Peteru i lona ia lava mālōsi fa'atauva'a. Se manū na te lē fa'afitia lona Ali'i. Pe ana fai e mataāla fa'atasi ma Keriso i Ōna mafatiāgā, se manū ua saunia i latou e va'ai i Ōna puapuagā i luga o le satauro. Se manū o le a i ai sina latou malamalama itiiti i le mata'utia o Ōna tigā. Atonu e mafai ai ona latou manatua Āna afioga na Ia fetalai atu ai e uiga i Ōna puapuagā, o Lona malii ma Lona toe tū a'e. I totonugalemū o le taimi o Ōna tigā, sa i ai 'ave o le fa'amoemoe se manū e fa'amalamalama ai le pogisā ma fa'amalosia ai lo latou fa'atuatua.

(34) INA UA TOE FA'APOTOPOTO LE FONO FAITULAFONO, O LE Ā LE FESILI NA LATOU TU'U ATU PEA IĀ KERISO ATONU O LE A LAGONA MAI E TAGATA UMA ĀNA FETALAIGA?

⁶⁷ *"Afai o 'Oe o le Keriso, ia ta' u mai iā i matou." A e ua Ia fetalai atu: "E tusa lava po 'Ou te ta' uina atu, a e tou te lē talitonu lava."*

Luka 22:67

Ina ua ao, na toe fa'apotopoto mai le Fono Faitulafono, ma ua toe aumai Iesu i le potu fono. Na Ia fa'aailoa atu o Ia lava le Ālo o le Atua, ma sa latou fa'aiga'ese Āna fetalaiga. O lea ua molia ai o Ia. Peita'i sa lē mafai ona latou ta'usalaina o Ia i lenei moliaga, auā o le to'atele o latou e le'i i ai i le fa'atasiga o le pō, ma latou te le'i fa'alogi i Āna fetalaiga. Na latou iloa fo'i o le a lē maua i le fa'amasinoga a Roma se mafua'aga e tatau ona oti ai o Ia. A e peita'i, afai Na te fetalai i nei 'upu ina ia mafai ona fa'alogi i ai latou uma, atonu o le a manuia a latou taumafaiga. O Lana fa'aailoaina mai o Lona tulaga fa'a-Mesia atonu e mafai ona fa'aiga'eseina o se tete'e i le faigāmālō.

"O 'Oe ea o le Keriso?" ua latou fai atu ai, a e ua lē gagana o Ia (Mare. 14:61). Na latou taumafai atili i a latou fesili. Mulimuli ane i Lona si'ufofoga fa'anoanoa, na Ia fetalai atu, *"Pe afai 'Ou te tali atu iā te outou, tou te lē talitonu mai lava; afai fo'i 'Ou te fesili iā te outou, tou te lē tali mai lava, pe tatala mai iā te A'u."* Peita'i ina ia leai se mea latou te 'alo i ai, na Ia fa'aopopo atu ma le lapata'iga, *"E amata i nei ona po ona nofo o le Atali'i o le tagata i le itū taumatau o le Atua mana."*

(35) INA UA TALI ATU KERISO I LE FESILI FAIFAPEA MAI TA'ITA'I IUTAIA "O 'OE EA O LE KERISO?" MA UA FETALAI ATU, "O A'U LAVA LEA," O LE Ā LE MEA NA LATOU FA'AILOA ATU IA FAIA ONA O LENEI TALI?

⁶⁴ *Ua outou fa'alogo i le 'upu leaga i le Atua. Pe ni a fa outou?" Ona fai mai lea o i latou uma, "E tatau ona oti o Ia.*
Mareko 14:64

“O 'Oe fo'i ea le Ālo o le Atua?” na latou toe fesili atu ai. Ua ia fetalai atu iā te i latou, “*O a'u lea ua outou fai mai ai na.*” Ona latou 'alalaga mai ai lea, “Se ā ea le toe aogā iā te i tatou o molimau? Auā o i tatou lava, ua tatou fa'alogo i Lana lava 'upu.”

O le fa'atolu o moliaga e le pule'aga a Iutaia, ua fa'asalaina ai Iesu i le oti. E pau le mea o lo'o mana'omia, o lo latou manatu lea, o le fa'amaonia e Roma o la latou fa'asalaga ma tu'uina atu o Ia i o latou lima.

Ua fa'atolu nei ona o'o mai o tauemuga ma 'upu faifai, e sili atu i faiga a tagata lē taupulea. I luma o faitaulaga ma ta'ita'i, o nei mea uma e tutupu na latou malilie i ai. Ua mavae 'ese le agaga alofa fa'atagata ola i o latou loto. Afai ua vaivai ai latou finauga ma e lē mafai ona taofia ai Lona si'ufofoga, e i ai nisi a'u'upega, e pei fo'i ona faia i augā tupulaga ua mavae e vavao ma lē toe lagona ai le leo o tagata e tete'e i tulafono o tapua'iga,--o le sauāina, fa'amalosia e pulega leaga, ma le oti.

(36) O LE Ā LE VALO'AGA A ISAIA UA FA'ATAUNU'UINA NEI I LUMA O LALOLAGI UMA O I LE VĀTEATEA?

⁵ *A e ua manu'a o Ia ona o a tatou solitulafono; ua momomo o Ia ona o a tatou amio leaga. O le a' oa' iga e filemū ai i tatou sa i Ōna luga lea, o Ōna fa'alavalava fo'i ua mālōlō ai i tatou.*

Isaia 53:5

Ina ua lauina le fa'asalaga o Iesu e fa'amasino, sa osofia le fa'apotopotoga o tagata e Satani, o o latou leo ua pei o manu fe'ai. Ua latou laga mai iā Iesu ma 'alalaga, O Ia e nofosala, ia o'o iā te Ia le oti! Pe ana leai fitafita Roma, se manū e lē o'o Iesu i le satauro i Kalevario. Se manū e fa'amatia o Ia e lima o tagata sauā i luma o fa'amasino, pe ana lē fa'alavelave i ai ta'ita'i Roma, ma lima mālōlosi na taofiofia le sauā o le motu o tagata.

(37) O LE Ā LE ITU'AIGA FA'ALUMAINA MA SAUĀGA NA FA'APUAPUAGĀTIA AI KERISO E FAITAILAGA MA TA'TTA'I INA UA IA FA'AILOA ATU O IA O LE MESIA?

⁶⁵ *Ona tu'ufeanu lea o nisi iā te Ia ma ufiufi i Ōna fofoga ma tu' i iā te Ia, ma fa'apea mai: “Ia e vavalo mai!” O le 'au au'auna fo'i ua taufaipō i Ōna fofoga, ona ave lea o Ia i le fa'amasinoga.*

Mareko 14:65

O tagata fa'apaupau na latou ita i le so'ona sauāina o se tagata e le'i fa'amaonia se solitulafono. Na fa'ailoa e ta'ita'i Roma ina ua tu'uina mai e Iutaia le ta'usalaina o Iesu, ua latou sopo'ia le pule'aga o le mālō o Roma, ma o le tulafono a Iutaia lava ia e lē fa'asalaina se tagata i le oti ona o lana ia lava molimau. O lenā na maua ai le filemū mo sina taimi; peita'i o ta'ita'i Iutaia ua matuā leai se agaga ola e fa'atatau i le alofa ma le masiasi.

O faitaulaga ma ta'ita'i Iutaia ua galo iā te i latou le mamalu o o latou tofiga, ma ua sauāina le Ālo o le Atua i a latou 'upu faifai. Na latou fa'alumaina o Ia ona o Ōna mātua. Na latou fa'alauiloa o Lona fa'afiapoto ma lē āva i le tala'i o Ia o le Mesia ua tataua lava iā te Ia le oti e sili ona matagā. O tagata aupito amio leaga ua latou fa'asauā i le Fa'aola. Ua latou ufiufi i Lona āo, ma ua pō i Ōna fofoga ma fesili iā te Ia, “Inā i'ite mai ia; po'o ai na na po atu iā te 'Oe?” Ua 'ave'ese le 'ie na ufifufi ai Lona āo ona tau fai feānu ai lea i Ōna fofoga.

(38) O LE Ā LE MEA OFOFOGIA O LE A TUPU I SE ASO A E O LE A MATATA'U AI LOTO O Ē NA FA'ATAUGĀ MA SAUĀ IĀ KERISO, PEITA'I O LEA LAVA FO'I TAIMI O LE A AUMAIA AI LE 'OLI'OLI MA TAU I LE 'AU FA'ATUATUA?

²⁷ *Auā e afio le Atali'i o le tagata i le mamalu o Lona Tamā fa'atasi ma Āna agelu, ma e Na te tauia tagata ta' ito' atasi e tusa ma lana amio.*

Mataio 16:27

O agelu a le Atua o lo'o fa'amaoni i le fa'amauiina o pupula 'ino'ino, o 'upu tauemu, ma amio uma sa faia e fa'asaga tete'e i lo latou Ta'ita'i'au. E sau le aso o i latou uma na tauemu ma feanu i fofoga o Keriso, o le a latou va'aia Ōna fofoga i Lona mamalu e sili le pupula i lo le lā.

O Iuta

Lesona 3

O le tala fa'asolopito o Iuta o lo'o ta'ua ai le i'uga fa'anoanoa o se olaga sa tataua ona vi'ia ai le Atua. Pe ana fai e oti Iuta a'o le'i o'o lana malaga mulimuli i Ieruselema se manū e ta'ua o ia o se tasi e tataua ona i ai sona nofoāga fa'atasi ma le to'asefulu ma le to'alua, ma o le a misia lava ia. Se manū e lē mulimuli atu iā te ia i tausaga e tele le tulaga na fa'aalia i le fa'ai'uga o lona olaga. Peita'i e i ai le mafua'aga na ala ai ona fa'aioa lana amio ia fa'amatala atu i le lalolagi. Ia 'avea o se lapata'iga mo i latou uma, e pei o ia, e lē tausia le pa'ia ma le tāua o le fa'atuatuaina.

(1) O LE Ā LE FOLAFOLAGA MATA'UTIA NA TU'UINA MAI E KERISO FA'ATATAU I LE TAGATA O LE A FA'ALATA IĀ TE IA MA E FA'ASINO IĀ I LATOU UMA E LĒ FA'AMAONI I LE TAUSIGA O MEA PA'IA?

²⁴ E moni, e pei ona tusia e fa'atatau iā te Ia, e alu lava le Atali'i o le tagata, a o lē na te fa'alataina le Atali'i o le tagata, oi talofa iā te ia! Sa sili ai pe ana lē fanau mai o ia."

Mataio 26:24

A o latalata i le Paseka, na fa'afou ai e Iuta lana feagaiga ma le 'au faitaulaga e na te tu'uina atu Iesu i o latou lima. Ona taupulepule lea o le a pu'eina Iesu i se tasi o nofoāga malōlō sa masani ona tatalo ai. Talu mai le tausama'aga na faia i le fale o Simona, e tele avanoa na maua e Iuta ia mafaufau ai i lana galuega na fai ai le feagaiga ina ia fa'atinoina, a e le'i suia lava lona fa'amoemoe. Mo le tolugafulu tupe siliva - o le tau o le pologa - na ia fa'atau ai le Ali'i o le mamalu i le fa'alumaina ma le oti.

(2) O LE Ā LE UIGA VAIVAI NA FA'AALIA E IUTA ONA UA IA TU'U ATU IA IĀ SATANI MA O LO'O LAPATA'I AI PAULO IĀ TIMOTEO IA TETE'E I AI?

¹⁰ Auā o le mana' o i tupe, o le pogai lea o mea leaga uma lava; ua manana' o tele i ai nisi, ona sesē ai lava lea o i latou i le 'upu o le fa'atuatua, ua tu'ia ai ua ati i latou e i latou i puapuagā e tele.

I Timoteo 6:10

O Iuta na i ai le mana'o tele i tupe; peita'i e le'i o'o muamua o ia i se leaga maoa'e na te faia ai se amioga fa'apea. Na ia fa'apelepeleina le agaga o le matape'ape'a se'ia o'o ina pulea lona olaga. O le alofa i le tupe ua sili a'e i le alofa iā Keriso. O le 'avea ma pologa o se uiga leaga e tasi ua tu'uina atu ai o ia iā Satani ina ia fa'asaga e faia so'o se agasala.

Na 'auai fa'atasi Iuta i le 'au so'o a o mulimuli le motu o tagata iā Keriso. O a'oa'oga a le Fa'aola na fa'agae'etia ai o latou loto a o fa'alologologo i Āna afioga i le sunako, i 'autafa o le sami, ma luga o le mauga.

Na va'aia e Iuta tagata mama'i, o pipili, ma tauaso o lolofi atu iā Iesu mai nu'u ma 'a'ai. Na ia va'aia tagata ua latalata i le oti o avatu iā te Ia. Sa ia molimauina galuega ofoofogia a le Fa'aola i le fa'amālōlōina o ē mama'i, tutūli i temoni, ma fa'atutū i ē ua oti. Sa lagona fo'i e ia lava fa'amaoniga o le mana o Keriso. Na ia iloa o a'oa'oga a Keriso e sili i a'oa'oga uma na ia fa'alogo muamua i ai. Na alofa o ia i le A'oa'o Sili, ma ia naunau ia la fa'atasi. Sa ia lagona le fa'anaunau e suia lona olaga, ma fa'amoemoe o lona feso'otai atu iā Iesu e mafai ai. E le'i te'ena e Iesu Iuta. Na faitauina o ia o se tasi o le 'au so'o e to'asefulu ma le to'alua. O ia sa fa'amoemoeina e faia le galuega o le tala'i atu. Na tu'uina atu iā te ia le mana e fa'amālōlō ai ma'i ma tutūli temoni. Peita'i e le'i tu'uina atu 'ato'atoa e Iuta o ia iā Keriso. Na te le'i tu'u'eseina lona naunau i le lalolagi ma lona alofa i tupe. A o ia talia le tulaga o le 'au'auna iā Keriso, sa na lē tu'uina atu o ia ia suia e le mana fa'alelagi. Na ia manatu e taofia pea ana lava filifiliga ma manatu, ma atia'e pea uiga o le tautu'ua'i ma le faitio.

(3) O LE Ā LE TULAGA FA'APITOA NA FA'ATAGAINA E IESU IUTA NA TE FAIA?

²⁹ Auā ua masalo isi ua fetalai atu Iesu, ina ua iā Iuta le ato tupe: "Inā fa'atau mai ia ni mea e tataua iā te tatou i le tausamiga, pe avatu se mea i ē e matitiva."

Ioane 13:29

Na manatu maualuga le 'au so'o iā Iuta, ma sa tāua tele iā te i latou ōna manatu. O ia na manatu maualuaga i ōna ia lava agava'a, ma na va'ai maualalo i isi ōna uso i lo latou iloa ma le faia o fa'ai'uga. Ua manatu Iuta latou te lē o iloa o latou avanoa, ma le aga'i i luma e fa'atatau i mea o lo'o tutupu. O le ekalesia e lē mafai ona manuia pe afai o ta'ita'i e va'ai latalata mai. O Peteru e oso vale; e gaoioi e aunoa ma le mafaufau lelei. O Ioane, o lē e fa'atāuaina 'upu moni o lo'o pa'ū mai fofoga o Keriso, o le va'aiga a Iuta e

lē agava'a i mea tau tupe. O Mataio, lē na a'oa'oina ia tonu mea uma, e matuā tāua iā te ia le fa'amaoni, ma e manatunatu loloto i fetalaiaga a Keriso, o le mea lea na manatu ai luta e lē fa'atuatuaia o ia i le va'ai mamao i le faiga o le galuega. Ona fai lea o le fa'ai'uga a luta e fa'atatau i le 'au so'o, ma ua fa'afefeteina ai o ia ona o le ekalesia o le a i se tulaga lē mautonu ma masiasi ai pe ana leai lona agava'a fa'ata'ita'i. Na manatu luta o ia e i ai le agava'a e lē mafai e se tasi ona 'ausia. I lana ia la fuafuāga o ia na fa'amanuiaina ai le galuega ma e tatau ona ia tau'aveina pea lea tulaga.

(4) O LE Ā LE FETALAIGA A KERISO IĀ IUTA A O I LE AFEAFE AUPITOALUGA O LE PASEKA NA LĒ MALAMALAMA I AI LE 'AU SO'O?

²⁷ *Ua mavae atu le mea e 'ai, ona ulutinoina lea o lea tagata e Satani. Ona fa'aapea atu lea o Iesu iā te ia: "O le mea e te faia, ia vave ia ona fai."*

Ioane 13:27

Na tauaso luta i vaivaiga o lana lava amio, ma sa tu'uina o ia e Keriso i le tulaga e maua ai le avanoa na te va'aia ma fa'asa'o ai lona sesē. Talu ai o ia e va'aia tupe a le 'au so'o, ua vala'auina o ia e sauniuni e fa'asoaso mo mana'oga o la latou fa'apotopotoga, ma fesoasoani i ē matitiva. I le tausamiga o le Paseka ina ua fetalai atu Iesu, "*O le mea e te faia, ia vave ia ona fai*" (**Io. 13:27**), na manatu le 'au so'o ua la fa'atonu atu luta e fa'atau mea o lo'o mana'omia mo le tausamiga, pe avatu se mea mo ē matitiva. I lana 'au'aunaga i isi, sa tatau ona atia'e ai iā luta le lē manatu fa'apito. Peita'i a o fa'alologologo o ia i a'oa'oga a Keriso i aso ta'itasi ma molimauina lona soifuāga lē alofa fa'apito, sa lē fa'amalieina lava e luta lona uiga mana'o tele. O nai tupe iti na o'o mai i ōna lima sa fai ma fa'aosoosoga faifai pea. O lana masani afai na te faia se galuega mo Keriso, po o se taimi e fa'aaogā mo mea tau tapua'iga, na te totogi ia lava mai se tupe itiiti o lo'o i ai. I lana lava va'ai o nei gaoioiga e sa'o ma e fai ma 'alofaga i lana amio lea ua fai; peita'i i le silafaga a le Atua, o ia o le gaioi.

(5) E TUSA MA LE 'UPU A LUKA, INA UA LĒ FA'AALIA E KERISO SE "FA'AIOGA" MAI LE LAGI PEI ONA FA'ATONUINA E FAITAILAGA, O LE Ā LE FILIFILIGA SA LATOU FAIA NEI LOA?

² *Ona sa'ili lea e le 'au faitaulaga sili ma le 'au tusi'upu pe fa'aapea ona latou fasioti iā te Ia, auā ua latou matat'u i le nu'u.*

Luka 22:2

O le fetalaiaga a Keriso o lona mālō e lē mai le lalolagi, sa lē fiafia ai luta. Na ia fa'atulaga le laina e tatau ona fa'ataunu'uina ai le galuega a Keriso. O lana fuafuāga e tatau ona tatalaina loane le Papatiso mai le fale puipui. A e paga, sa tu'ua lava loane ia vavae 'ese lona ao. A o Iesu e le'i fa'aaogāina lona mana e taui ma sui ai le fasiotia o loane, peita'i ua tu'umuli atu ma Ōna so'o i le nofoāga tu'ufua. Na mana'o luta e fa'aali le mālōsi e fa'asagatau ai ma ē tete'e mai. Na ia manatu pe ana fai e lē taofia le 'au so'o mai le fa'ataunu'uina o a latou fuafuāga, se manū o le a manuia le galuega. Na ia mātāuina le fa'atupu tele o le faifili mai o ta'ita'i lutaia, ma va'aia la latou lu'iga ua lē talia ina ua latou fa'atonu Keriso mo se fa'aioiga mai le lagi. Sa ia tatala lona loto i le lē talitonu, ma o le fili ua fa'atupuina manatu masalosalo ma le fouvale. Ai se ā ua tumau ai Iesu i le tulaga e maua ai le loto fa'avaivai? Ai se ā na la valo'ia ai faigatā ma sauāga e o'o iā te Ia fa'aapea fo'i Ōna so'o? O le manatu o le a i ai se tulaga maualuga i le mālō fou ua ta'ita'i ai luta e na te sapaapaia le galuega a Iesu. O le a lē taunu'u ea lona fa'amoemoe? E le'i i ai sana fa'ai'uga o Iesu e lē o le Ālo o le Atua; peita'i sa ia fesiligia ma sa'ili ina ia maua ni fa'amalamalama o Āna galuega ofoofogia.

(6) O LE Ā LE FETALAIGA A KERISO NA FA'AIOGA MANINO MAI AI E LĒ TUMAU PEA IA I LE LALOLAGI, A E SA LĒ TALIAINA E IUTA?

²⁹ *'Ou te fai atu fo'i iā te outou, Ou te lē toe inu lava i lenei fua o le vine, se' ia o'o i lea aso 'Ou te inu le uaina fa'atasi ma outou i le mālō o Lo' u Tamā."*

Mataio 26:29

E ui i a'oa'oga a le Fa'aola lava ia, na fa'aauu pea e luta le manatu o Keriso e nofo tupu i Ierusalem. I le fafagaina o le lima afe na taumafai luta ia fa'ataunu'u lea fuafuāga. I lenei vavega na fesoasoani luta i le tufatufaina o mea'ai i le motu o tagata matelāina. Na ia maua le avanoa e va'ai ai i le manuia e mafai i lona mālōsi ona tufa atu i nisi. Ua ia lagona le loto fa'amalieina e masani ona maua i le 'au'auna atu i le Atua. Na ia fesoasoani e aumai ē mama'i ma puapuagātia mai le motu o tagata iā Keriso. Na ia va'aia le mapusaga, o le fiafia ma le 'oli'oli e o'o i le loto o le tagata e 'auāla mai i le mana fa'amālōlō o le Fa'aola. Se manū na mafai ona ia maua le malamalama i 'auāla a Keriso. Peita'i na fa'atauasoina o ia i ōna ia lava mana'oga fa'apito. O luta na muamua 'ave le avanoa ina ua fa'agae'etia tagata i le vavega o areto. O ia fo'i na amataina le manatu o le a fa'amalosia Keriso e fai ma tupu. O ōna fa'amoemoe e maualuga. A e na matuā 'o'ona ōna fa'amoemoe ina ua lē taunu'u.

(7) O LE Ā LE FA'AMATALAGA A KERISO NA MATUĀ ILOA LELEI AI E IUTA O LE MALŌ O KERISO E LĒ FA'ATŪINA I LE LALOLAGI?

⁵³ *Ona fetalai atu lea o Iesu iā te i latou: “E moni, e moni, 'Ou te fai atu iā te outou, Afai tou te lē 'a'ai i le tino o le Atali'i o le tagata, a lē inu fo'i i Lona toto, ua lē i totonu iā te outou le ola.”*

Ioane 6:53

O le a'oa'oga a Keriso i le sunako e fa'atatau i le areto o le ola, o inā sa liliu ai le tala fa'asolopito o Iuta. Na ia fa'alogo i le fetalaiaga a Iesu, “*Afai tou te lē 'a'ai i le tino o le Atali'i o le tagata, a lē inu fo'i i Lona toto, ua lē i totonu iā te outou le ola*” (**Io. 6:53**). Na ia va'ai o Keriso e ofoina mea fa'ale-agaga a e lē o le 'oa fa'ale-lalolagi. Sa manatu Iuta o ia e va'ai mamao, ma fa'apea e na te iloa atu o Iesu o le a leai se mamalu, ma e lē mafai e Ia ona tu'uina atu ni tulaga maua luga i ē mulimuli iā te Ia. Na ia manatunatu e fa'amamao ia mai iā Keriso, ma ia mafai ona ia vavae 'ese mai. O le a ia mātā'iina. Ma na ia matuā tulimata'i.

(8) O LE Ā LE FINAUGA FA'APITOA NA FOFOAINA E IUTA I LE VĀ O LE 'AU SO'O SA FA'AALIA AI ŌNA UIGA LEAGA INA IA LATOU LAGOLAGOINA ĀNA FUAFUĀGA?

²⁴ *Sa latou fefinaua ' i fo'i po o ai so latou e sili.*

Luka 22:24

Na amata mai i lea taimi ona fa'aleo le masalosalo o Iuta ma 'avea ma mea ua lē mautonu ai le 'au so'o. Na ia aumai i luma matā'upu e fete'ena'i ai ma manatu ia ta'ita'i sesē ai le 'au so'o, ma toe fa'amatala finauga na una'i mai e tusi'upu ma Faresaio e fa'asaga iā Keriso. O fa'afitauili 'ese'ese ma faigatā e fa'alavelave i le aga'i i luma o le tala lelei, sa fa'amatalaina e Iuta o fa'amaoniga e fa'asaga i le mea moni. Na ia fa'a'iloa tusitusiga mai le Afioga a le Atua e leai se feso'ota'iga ma 'upu moni o lo'o tu'uina mai e Keriso. O nei mau, a 'ave'ese mai le mafua'aga e fememea'i ai le 'au so'o, ma fa'ateleina ai lo latou loto vaivai, ua lē aunoa ona tau fa'aofiofi mai pea iā te i latou. Peita'i ua faia uma nei gaoioiga a Iuta i se 'auāla e foliga mai o ia se tagata loto fa'amaoni. Ma a o su'esu'e le 'au so'o mo fa'amaoniga e fa'amautū ai fetalaiaga a le A'oa'o Sili, na ta'ita'i lemū latou e Iuta i se isi 'auala. O lenei 'auāla sa foliga e fa'ale-agaga ma e atamai, ua ia aumai ai matā'upu i se malamalama e 'ese mai le mea ua tu'uina atu e Iesu iā te i latou, ma fa'aopoopo i ai ma 'upu e 'ese ma uiga e le'i fetalai atu ai o Ia. O fautuāga a Iuta na fa'aosofia ai le naunau i mea mo le taimi nei, ma fa'aliliu 'ese ai le 'au so'o mai mea e sili ona tāua e tatau ona latou manatunatu i ai. O le fefinaua'iga po o ai o i latou e sili e masani ona amataina e Iuta.

Ina ua fa'a'iloa e Iesu i le faipule mau'oa le tulaga o le 'avea ma so'o, na lē fiafia ai Iuta. Na ia manatu e i ai le mea ua sesē. Afai e maua mai tagata e pei o le ta'ita'i mau'oa ma fa'afeso'ota'i atu i le 'au fa'atuatua, o le a latou fesoasoani tele i le fa'aauūina o le galuega a Keriso. Na manatu Iuta, pe ana talia o ia e 'avea ma faufautua, e tele ni fautuāga e fa'atatau i fuafuāga mo le lelei o le ekalesia ititi. O āna ta'iala ma āna 'auāla e 'ese mai fuafuāga a Keriso, a e peita'i o nei mea uma na manatu Iuta o ia e sili atu lona atamai i lo Keriso.

(9) UA LEVA ONA FILIFILIA E IESU LE TO'ASEFULU MA LE TO'ALUA A E LE'I O'O I LE FA'ALATAINA, E UI I LEA NA FA'APEFEA ONA IA FA'AMATALAINA LE UIGA O SE TASI O I LATOU?

²⁰ *Ua tali atu Iesu iā te i latou: “Na 'Ou lē filifilia ea outou e to' asefulu ma le to'alua? A o le tasi o outou o le ti'apolo ia.”*

Ioane 6:70

O mea uma na fetalai atu ai Keriso i Ōna so'o, na i ai lava se mea e fa'ataute'e ai le loto o Iuta. O lona 'afia i le fili o le mea fa'afefete o le lē alofa ua vave ona faia lana galuega. E le'i iloa e le 'au so'o le mafua'aga moni o nei mea uma; peita'i na silafia e Iesu o lo'o fa'afeso'ota'i e Satani ōna uiga iā Iuta, ma ua tatala ai le 'auāla ina ia 'afia ma isi o le 'au so'o. O le tausaga lava lea a e le'i o'o i le fa'alataina o Iesu, na Ia fa'a'iloa atu, “*Na 'Ou lē filifilia ea outou e to'asefulu ma le to'alua? A o le tasi o outou o le ti'apolo ia*” (**Io. 6:70**).

(10) I SE TAIMI UA MAVAE, O LE Ā LE MEA NA TUPU I LE TAUSAMA'AGA I LE FALE O SIMONA SA FA'AALIA AI LE LĒ MALAMALAMA O LE 'AU SO'O I LE MEA SA FAIA E MARIA?

² *Ona sau ai lea iā te Ia o se fafine ma le fagu alapasa ua i ai le suāu'u manogi tau tele, ona liligi ai lea e ia i Lona ao a o ta'oto Ia e taumafa.* ⁸ *Ua iloa e Ōna so'o, ona tigā ai lea o latou loto, ua latou fa'apea ane: “Se ā le mea ua fa'amāumau ai lenā mea?”*

Mataio 26:7, 8

Peita'i e le'i fa'aalia e luta lona tete'e, na te le'i fesiligia fo'i a'oa'oga a le Fa'aola. E le'i fa'ailoa sona muimui se'ia o'o i le taimi o le tausama'aga i le fale o Simona. Ina ua u'u e Maria 'a'ao o Iesu, na fa'aalia e luta lona matape'ape'a. O le a'oa'iga mai ia Iesu na liua ai lona loto i le matuā lē fiafia. Sa fa'amanu'alia lona manatu fiasili ma sa ia naunau e fia tau ma sui ma ua 'ave'esea ai pā puipui o le matape'ape'a ua leva ona fa'apelepele ma ua pulea ai nei o ia. E fa'apea fo'i le mea e o'o i so'o se tasi o lē e fia faifai pea le fiafia i le agasala. O vaega o le amioleaga e lē te'ena ma lē manumālō i ai e tali atu ai i fa'aosoosoga a Satani, ma o le agaga o le a ta'ita'i e pei o le tagata o taua i le mea e mana'o ai Satani.

(11) INA UA MAFUFAU IUTA E MANA'OMIA IA NA FA'ALATA KERISO MA FA'AMALOSIA AI LEA O IA E FOLAFOLA LONA MALŌ FA'ALELALOLAGI, O LE Ā LANA MEA NA FA'AVAVAVE LOA IA FAIA?

¹⁰ *Ona alu lea o Iuta le Sekara, o le tasi o le to' atinoagafulu ma le to'alua i le ' au faitaulaga sili, e fa'alataina ai o Ia iā i latou.*

Mareko 14:10

A o luta e le'i fa'ama'a'a 'ato'atoa lona loto. E ui ina ua fa'alua ona ia folafola na te fa'alataina le Fa'aola, na i ai pea le avanoa e salamō ai. I le tausamiga o le Paseka, na fa'amaonia e Iesu Lona itū Atua i Lona fa'aali atu o fuafuāga a lē e fa'alata. Na Ia alofa mutimutivale iā luta ma na aofia fo'i o ia i Lana 'au'aunaga i le 'au so'o. Peita'i o le ōlega mulimuli o le alofa e le'i amana'ia e luta. O le i'uga o mea na faia e luta ua mae'a, ma o vae o luta na mulumulu e Iesu ua savali atu nei e faia le galuega a le fa'alata.

Na manatunatu luta afai o le a fa'asatauroina Iesu, e tatau ona fa'ataunu'u lea tulaga. O lona ia fo'i fa'alataina o le Fa'aola e lē suia le fa'ai'uga. Pe afai o le a lē maluu Iesu, e i ai Lana 'auāla e fa'asaoina ai e Ia o Ia lava. A o nei mea uma ua tutupu, e i ai lava le mea na ia maua i lana galuega fa'alata. Na ia maitauina e tele se mea fa'asili ua ia maua i le fa'alataina o lona Ali'i.

(12) O LE Ā LE MEA NA TUPU I SE TAIMI UA TUANA'I SA MAFUA AI ONA TALITONU IUTA O LE A LĒ FA'ATAGAINA E KERISO ONA PU'EINA O IA?

⁵⁹ *Ona latou fetagofi lea i ma'a e fetogi iā te Ia. Ona lafi lea o Iesu, ua ulufafo i le malumalu, ua ui ane i totonu iā te i latou, ma maluu 'ese ai.*

Ioane 8:59

Peita'i e le'i talitonu luta e fa'atagaina e Keriso o Ia ia pu'eina. O lona manatu o le fa'alataina o Iesu e a'oa'oina ai o Ia. Na ia fuafua lana gaoioiga ina ia silafia e le Fa'aola e tatau ona fa'aaloalo iā te ia. Peita'i e le'i iloa e luta ua ia tu'uina atu Keriso ia fasiotia. E masani ona a'oa'o Iesu e ala i fa'ata'oto, ma sa ofo tusi'upu ma Faresaio i Āna a'oa'oga! Ua tele taimi sa latou fai ai lava le fa'amasinoga o i latou lava! Ua latou fa'alogi so'o i le 'upu moni, ma sa latou lagona ai le ita tele, ma latou manatu e fetogi iā te Ia i ma'a; peita'i sa Ia maluu 'ese mai iā te i latou. Ona o le tele o taimi na sola 'ese ai Iesu mai a latou mailai, na manatu ai luta e lē fa'atagaina e Iesu ona pu'eina o Ia.

Sa filifili luta e tu'uina lenei matā'upu i le su'ega. Afai o Iesu o le Mesia moni, o tagata uma o ē na tele mea na faia mo i latou o le a lagolagoina Iesu ma latou fa'ailoa o Ia o le tupu. O i inā o le a fa'amausali ai le tele o mafau'au o lo'o fa'alētonu pea. O inā fo'i o le a lauiloa ai luta ona o ia ua tu'uina Iesu i le nofoali'i o Tavita. Ma o lenei gaoioiga o le a mautinoa ai o le a ia maua le tulaga aupito sili e soso'o ma Keriso i le mālō fou.

(13) ONA UA TALITONU IUTA O LE A SOLA'ESE KERISO MAI LIMA O TA'ITA'I O LE MOTU O TAGATA, O LE Ā LE FA'AILOGA SA IA TU'U ATU E FA'AMAONIA AI O IESU UA LATOU PU'EINA?

⁴⁸ *Ua uma ona tu'uina e lē na te fa'alataina o Ia le fa'ailoga iā i latou e fa'apea: “O lē ou te sogi i ai, o Ia lenā; ia outou pu' e iā te Ia.”*

Mataio 26:48

Ua fa'ataunu'uina nei fuafuāga a le so'o fa'afoliga i le fa'alataina o Iesu. I le fa'ato'āga ina ua ia fai atu i ta'ita'i o le motu o tagata, “O lē 'ou te sogi i ai o Ia lea; ia outou pu'e iā te ia” (**Mata. 26:48**), na ia matuā talitonu e sola 'ese Keriso mai o latou lima. Pe afai e latou te tu'ua'i iā te ia, e mafai ona ia fai atu, 'ou te le'i fai atu ea ia pu'e iā te ia?

Na va'aia e luta i latou na pu'e iā Keriso, ua latou faia mea uma na ia fai atu ai. A e na maofa o ia i lona va'aia o le Fa'aola ua ta'ita'i 'ese atu e tagata. Na ia mulimuli atu iā te Ia mai le fa'ato'āga e aga'i i le fa'amasinoga i luma o ta'ita'i lutaia. O taimi uma na va'ai luta mo le avanoa e fa'ate'ia ai e Keriso Ōna fili pe afai e fa'aali atu i o latou luma o Ia o le Ālo o le Atua, ma fa'alēaogāina uma ai a latou fuafuāga ma la latou pule. Peita'i a o mavae atu lea itūlā ma lea itūlā ma o Iesu ua tu'uina atu Ia i faiga sauā, ona o'o ai lea o le mata'u tele i lē fa'alata, o lē na fa'atauina lona Matai ia oti.

(14) INA UA FA'AI'UINA LE FA'AMASINOGA MA UA ILOA E IUTA LE MATA'UTIA O LANA MEA UA FAI, O LE Ā LE MEA NA IA TA'UTA'U ATU ONA UA ILOA LANA AGASALA?

⁴ *Ua fa'apea atu: “Ua ou agasala ina ua ou fa'alataina le tagata amiotonu.” A ua latou fa'apea mai: “Sa matou mea ea lenā? Faitalia lava oe!”*

Mataio 27:4

Ina ua tau fa'ai'u le fa'amasinoga, ua lē toe mafai e Iuta ona lavātia le pagātia o lona loto fuatia ifo. Na fa'afuase'i ona fa'alogoina se leo o 'alaga i le maota fa'amasino na matata'u uma ai tagata: E lē sala o Ia; fa'asa'oloto iā te Ia, Kaiafa!

(15) SA FA'APEFEA ONA FA'AILOA ATU E IUTA LONA MATAPE'APE'A MO TUPE A O I AI FA'ATASI I SO'O E SEFULU MA LE TO'ALUA?

⁶ *Ua lē fa'apea ane o ia, ina ua alofa o ia i ē matitiva, a ona o ia o le gaoi, ua iā te ia fo'i le ete, ma na tau'ave mea na fa'ao ai.*

Ioane 12:6

Na va'aia nei Iuta ua aga'i 'ese atu mai le fa'apotopotoga o tagata matata'u. O ōna foliga ua suia, ua matuā atuatuva'e, ma ua sisina ifo lona afu i lona muāulu. Na ia fa'avave atu i luma o nofoa fa'amasino, ua ia lafo atu i luma o le faitaulaga sili ma ta'ita'i tupe siliva, o le tau na ia fa'atauina ai lona Ali'i. Sa ia ōle atu iā Kaiafa e fa'asa'oloto Iesu, ma ia fa'apea atu e leai se agasala e tatau ai ona oti o Ia. O Kaiafa ua va'ai mai ma ua lē mautonu, ua lē iloa se 'upu o le a fai. O le taupulepulega fa'alilolilo a faitaulaga ua fa'aalia. Ua fa'amaonia na latou totagia le so'o o Iuta e fa'alata lona Matai.

(16) O LE Ā LE TALI FA'ATAUEMU A LE FAITAULAGA SILI INA UA TAUMAFAI IUTA E TAUANAU ATU IA FA'ASA'OLOTO KERISO INA UA ILOA UA LĒ TAUNU'U LANA FUAFUĀGA?

⁴ *Ua fa'apea atu: “Ua ou agasala ina ua ou fa'alataina le tagata amiotonu.” A ua latou fa'apea mai: “Sa matou mea ea lenā? Faitalia lava oe!”*

Mataio 27:4

“Ua 'ou agasala,” o le tagi lea a Iuta, “ina ua 'ou fa'alata lē ua lē sala.” Peita'i le faitaulaga sili na toe mau manatu ma na tali mai ma lona 'ino'ino, “Sa matou mea ea lena? Faitalia lava 'oe!” (**Mata. 27:4**). Na malilie faitaulaga e fai Iuta ma a latou mea faigaluega; peita'i na latou 'ino'ino i lona uiga maulalo ma le lē fa'amaoni. Ina ua ia liliu atu iā te i latou e ta'u atu lana agasala, na latou tete'e iā te ia ma le 'ino'ino.

(17) I SE TAIMI UA TUANA'I O LE Ā LE FETALAIGA A IESU E FA'ATATAU I LONA MALŌ A E LE'I MALAMALAMA I AI ŌNA SO'O?

³⁶ *Ona tali atu lea o Iesu: “O Lo' u malo e lē mai le lalolaqi lenei. Ana mai le lalolaqi nei Lo' u malo, semanū ua tau A' u 'au'auna, ina ne' i tu'uina atu A' u i tagata Iutaia. A o lenei, e lē mai iinei Lo' u malo.”*

Ioane 18:36

Ua fa'apa'ū nei Iuta i 'a'ao o Iesu ma fa'a'iloa atu o Ia lava o le Ālo o le Atua, ma ōle atu ia lavea'i iā te Ia. E le'i a'oa'i atu le Fa'aola i lē na fa'alataina o Ia. Na Ia silafia e le'i salamō Iuta; o le fa'aaliga o lana agasala sa fa'amalosia ona o lona manatu i le va'aiga mata'utia i le fa'asalaga ma le va'aiga i le fa'amasinoga, a e na te le'i matuā lagona le salamō loloto ona ua ia fa'alata le Ālo o le Atua, ma ia te'ena le Pa'ia o Isara'elu. Peita'i e le'i fetalai Iesu i se 'upu e ta'usalaina ai Iuta. Na Ia silasila ma le alofa mutimutivale iā Iuta ma fetalai atu, “O le itū aso lenei na 'Ou sau ai i le lalolaqi” (**Io. 18:37**).

Na tau'ai ofo le fa'apotopotoga o tagata. Ua maofa ina ua latou va'aia le fa'apalepale o Keriso i lē na fa'alataina o Ia. Na latou toe manatu ma fa'apea, o lenei Tagata e sili atu i isi tagata ola. Peita'i afai o ia le Ālo o le Atua, o le latou fesili lea, ai se ā na Ia lē fa'asa'oloto ai o Ia mai Ōna noanoataga ma manumālō ai i ē o lo'o molia o ia?

(18) INA UA ILOA E IUTA E UI I ĀNA TALOSAGA FA'ATAUANAU I LE FAITAUŁAGA SILI, A E O LE A FA'ASATAUROINA IESU, O LE Ā LANA MEA LĒ TAUPULEA NA ALU LOA FAI?

⁵ *Ona lafo ai lea e ia o tupe i le malumalu, ua alu 'ese; ona alu ai lea o ia ua noa o ia e ia..*
Mataio 27:5

Ina ua iloa e Iuta ua lē aogā āna taumafaiga, na ia fa'avave 'ese loa mai le maota ma 'alaga, Ua tuai! Ua tuai! Na ia lagona e lē mafai ona ola pea ia ma va'ai i le fa'asatauroina o Iesu, ma i lona atuatuva le na ia alu ai loa ma noa iā te ia lava.

(19) O LE Ā LE VA'AIGA INOSIA SA VA'AIA E LE MOTU O TAGATA AMIOLEAGA I LE 'AUALA MAI LE MAOTA O PILATO?

¹⁸ *Na fa'atau fo'i e lenei tagata le fanua i le totogi o le amio leaga; na titō fo'i o ia ua pā ai lona manava, ua masa'a ai i fafo lona ga' au uma lava.*
Galuega 1:18

Ua mavae se taimi i le ala lava lea i le 'auāla e aga'i atu i le maota o Pilato i le mauga o Kalevario, ua i ai se tala ua fa'alavelave i le pisapisaō ma le 'alalaga o le motu o tagata lē taupulea o lo'o ta'ita'ia Iesu i le mea e fa'asatauroina ai. Sa latou va'aia i le ala se la'au mago, ma o lalo ifo o lo'o ta'atia ai le tino o Iuta. O se va'aiga aupito sili ona mata'utia. O lona mamafa na motu ai le maea na ia nonoa ai o ia i le la'au. Ua pa'ū ifo ma fa'aleagaina ai lona tino, ma o uli o lo'o latou 'a'ai ma fa'aumatia ai. O vaega o lo'o totoe sa 'aveina fa'avave e nisi tagata ma tanumia 'ese mai le va'ai. Peita'i ua fa'aitiitia le 'alalaga tauēmu o tagata, ma na latou mafafau i mea na tutupu. O le tau'i mamafa e foliga mai ua amata ona asiasi mai iā i latou ua ta'usalaina i le toto o Iesu.

(20) E UI INA UA O'O LE FETU'U I LE TAGATA AGASALA, A E O LE Ā LE FA'AMANUIĀGA UA AUMAIA E LE TOTO O KERISO MO LĒ E TALITONU?

¹³ *A o lenei, ona o Keriso Iesu, o outou o ē sa matuā mamao 'ese mai i le Atua, ua outou fa'alatalata mai ona o le toto o Keriso.*
Efeso 2:13

Ou te tatalo ia 'ou talisapaia e lē aunoa le fa'amoemoega pa'ia ua tofia ai a'u e Keriso ia 'ou fa'amaoni e fa'asoa a'u mea ma i latou o lo'o mana'omia le fesoasoani.

Li'o le Tali: Ioe Lē Mautonu

Ou te tatalo mo le poto e fa'aaogā ai le manuia o le tupe e se ala e lē manatu fa'apito ina ia fa'aalia ai lo'u alofa i le Fa'aola o lo'o aumaia mea uma 'ou te mana'omia.

Li'o le Tali: Ioe Lē Mautonu

Ou te naunau e nofo sauni e tu'u atu i ala fa'ale-Atua o lo'o ta'ita'iina ai e le Agaga Pa'ia a'u e fesoasoani ai i le aigātagata, e lē na'o le fa'aletino a e fa'apea le fesoasoani fa'aleagaga.

Li'o le Tali: Ioe Lē Mautonu

O fa'amanuiāga iā te a'u le mafai ona foa'i atu o a'u mea ma 'au'aumea fa'atasi ma i latou o lo'o tala'i le tala lelei i lenei tupulaga.

Li'o le Tali: Ioe Lē Mautonu

<u>Manatu Mai le Su'esu'ega</u>	<u>Tatalo Mana'omia</u>	<u>Tali o Tatalo</u>

I le Maota Fa'amasino o Pilato

Lesona 4

I le maota fa'amasino o Pilato, le kovana Roma, ua tula'i ai Keriso ua noanoatia pei se pagotā. I Ōna 'autafa na i ai fitafita e leoleo iā te Ia, ma ua vave fa'atumuina le maota i ē maimoa. I fafo o le faitoto'a o lo'o i ai fa'amasino o le Fono Faitulafono, o faitaulaga, o faipule, ta'ita'i, ma le motu o tagata.

Comment [11]:

(1) SA FA'APEFEA ONA FA'AMATALAINA E IOANE KERISO MA LANA GALUEGA PA'IA MO LE FA'AOLATAGA O LE AIGĀ TAGATA, O LEA NA TE'ENA E TA'ITA'I IUTAIA?

²⁹ O le taeao ua va'ai atu ai Ioane iā Iesu o maluu mai iā te ia ona fai ane lea: "Fa'auta i le Tama' i Mamoe a le Atua, na te 'ave'esea le agasala a le lalolagi!"

Ioane 1:29

Ina ua mae'a le ta'usalaina o Iesu, o le fa'alapotopotoga a le Fono Faitulafono ua ō mai iā Pilato ina ia fa'amaonia la latou fa'asalaga ma ia fa'ataunu'uina. Peita'i, o ia ta'ita'i Iutaia e lē mafai ona ulufale i le potu fa'amasino. E tusa ai ma la latou tulafono o sauniga, o le a lē mamā ai i latou, ma taofia ai i latou mai le 'auai i le Paseka. I lo latou tauaso latou te le'i va'ai ai o lo latou ita ma le fia fasioti tagata ua lē mamā ai o latou loto. Latou te le'i iloa o Keriso o le Tama'i Mamoe moni lea o le Paseka, ma e talu ai ua latou te'ena o Ia, o le sauniga tūua ua leai se aogā iā te i latou.

(2) O LE Ā LE MANATU O PILATO I LANA VA'AIGA I FOFOGA O KERISO, LE TO'AFILEMŪ, MA LĒ LEOA?

¹⁴ A ua lē tali atu Ia iā te ia i se 'upu e tasi, ona matuā ofo ai lea o le ali'i.

Mataio 27:14

Ina ua aumai le Fa'aola i le potu fa'amasino, sa va'ai atu Pilato ma ōna foliga lē fiafia iā te Ia. Sa vala'auina fa'avave o ia mai lana malōlōga, ma na ia manatu e fa'atalise le fa'atinoina o lana galuega. Na ia sauni e faia i le pagotā e pei ona tataua ai. O ōna foliga e matuā sauā, sa ia liliu atu e va'ai pe o le ā le itū'aiga tagata lenei ua 'aumai e na te su'esu'eina, ua ala ai ona vave vala'auina o ia mai lana malōlōga i lenei taimi o le taeao pō. Na ia iloa atonu o se tasi ua naunau ta'ita'i o Iutaia ia fa'amasinoina ma fa'asalaina vave.

Na tepa atu Pilato iā te i latou o lo'o leoleoina Iesu, ona ia pulato'a lea iā Iesu. O Pilato e masani ona feagai ma itū'aiga pagotā 'ese'ese; peita'i na te le'i va'ai muamua i se tagata e i ai fa'aailoga o le alofa ma le aga fa'atamali'i i Ōna luma. I Ōna fofoga na te lē o va'aia ai se fa'aailoga o se tagata nofo sala, e lē o fa'aailoa ai se fefe, pe fa'amauualuga, pe tete'e. Na va'aia e Pilato se tagata mamalu ma to'afilemū. O Ōna fofoga e leai ni fa'aailoga o se tagata amio leaga, peita'i o fa'aailoga o le lagi.

(3) INA UA FA'AALIA MAI I SE MITI PO O AI IESU, O LE Ā LE LAPATA'IGA NA TU'U ATU IĀ PILATO MAI LANA AVĀ?

¹⁹ Ua ti'eti'e o ia i le nofoa fa'amasino, ona sau ai lea o le fe' au mai lana avā, ua fa'apea mai: "Ne' i e mao i lea tagata amiotonu; auā na ou matuā tigāina analeilā i le miti iā te Ia."

Mataio 27:19

Na tūua i le manatu o Pilato Keriso ina ua ia va'ai iā te Ia. Na suia ōna lagona i le alofa. Na ia fa'alogi i tala iā Iesu ma Āna galuega. O lana avā na fa'amatala iā te ia e fa'atatau i galuega ofoofogia na faia e le perofeta Kalilaia, o Lē na fa'amālōlō i ē mama'i ma fa'atutū i ē na oti. O lea ua toe fa'amanatu pei o se miti i le mafaufau o Pilato. Ua ia toe manatua fāfātala na ia fa'alogi i ai mai tagata 'ese'ese. Na ia manatu loa ia poloa'iina Iutaia e uiga i la latou moliaga e fa'asaga i le pagotā.

(4) E LE'I MANA'OMIA E IUTAIA SE FA'AMASINOFA FAITELE FA'ALE-MALŌ, A E O LE Ā LE MEA NA LATOU MOLIA AI IESU?

⁶³ *Ua fa'apea atu: "Le ali'i e, ua matou manatua na fai mai lenā tagata pepelo ina o ola mai Ia, 'A mavae aso e tolu 'Ou te toe tū mai ai.'"*

Mataio 27:63

O ai lenei Tagata, ma o le ā le mafua'aga na outou aumai ai iā te Ia? o lana fesili lea. O le ā le moliaga ua outou aumai e fa'asaga iā te Ia? Ua lē mautonu nei Iutaia. Ua latou iloa e lē mafai ona fa'amaonia a latou moliaga e fa'asaga iā Keriso, na latou lē mana'omia se su'esu'ega fa'alaua'itele. Na latou tali atu o Ia o le taufa'asesē e ta'ua o Iesu mai Nasareta.

(5) ONA E LE'I MAUA E IUTAIA SE MEA I LE SOIFUĀGA O KERISO E TATAU AI INA OTI, O LE Ā LE LATOU 'UPU NA TAUMAFAI E FA'ATOSINA AI PILATO IA VAVE ONA TA'USALAINA O IA?

³⁰ *Ua latou tali mai iā te ia: "Afai ana lē o se pagotā o Ia, po ua matou lē tu'uina atu o Ia iā te oe."*

Ioane 18:30

Ua toe fesili atu Pilato, "Se ā le mea ua outou momoli ai lenei tagata?" Ua leai se tali a faitaulaga i lana fesili, a o a latou 'upu ua fa'ailoa ai lo latou 'ino'ino, ua fai mai, "Afai ana lē pagotā o Ia, po ua matou lē tu'uina atu o Ia iā te 'oe" (**Io. 18:29, 30**). O i latou o le Fono Faitulafono, o tagata tāua o le mālō, pe a ua latou aumaia iā te 'oe se tagata ua latou manatu e tatau i ai le oti, e i ai se mea e mana'omia ai le fesiligia o se moliaga e fa'asaga iā te Ia? Na latou fa'amoemoe ia iloa e Pilato e tāua latou, ma ta'ita'i ai o ia e talia la latou talosaga e aunoa ma le fa'ataunu'uina o isi tulaga e ao ona fa'amumua. Na latou naunau ia fa'amaonia la latou fa'ai'uga; auā ua latou iloa o tagata na molimauina galuega ofoofogia na faia e Keriso e mafai ona latou fa'amatala se tala e 'ese'ese mamao mai talafatu lea ua latou fafauina.

(6) O LE Ā LE MEA NA FA'AMOEMOE IUTAIA E TATAU ONA TUPU IA MAFAI ONA FA'ATOSINA MAI AI PILATO IA GAUA'I ATU I LATOU MANA'OGA?

¹³ *Ua latalata le paseka a tagata Iutaia, ma ua maliu a' e Iesu i Ierusalem.*

Ioane 2:13

Na manatu faitaulaga talu ai o Pilato e vaivai ma e lē mautonu o le a mafai ona fa'ataunu'u a latou fuafuāga e aunoa ma se fa'alavelave. I se taimi ua mavae na ia saina fa'avavave ai se fa'asalaga oti fa'aletulafono, ua ta'usalaina ni tagata latou te iloa e lē tatau ona oti. I lona manatu o le ola o le pagotā e lē tāua tele; tusa pe sala pe lē sala, e leai se afāina tele o i ai. Na fa'amoemoe faitaulaga ia fa'ataunu'u le fa'asalaga o le oti iā Iesu e aunoa ma le faia o se su'esu'ega. O la latou talosag lea ua folasia ina ia alofagia ona o la latou sauniga tāua fa'alenu'u.

(7) INA UA ILOA E PILATO E LĒ O I AI SE MAFUA'AGA FA'ALE-TULAFONO UA MATUĀ MANANA'O AI IUTAIA IA FASIOTIA KERISO, O LE Ā LA LATOU POGAI TONU NA IA ILOA LELEI?

¹⁸ *Ua iloa e Ia o lo latou matau' a ua latou tu'uina atu ai o Ia.*

Mataio 27:18

Peita'i na i ai se mea i le pagotā na taofia ai Pilato mai lenei tulaga. Na te le'i fia faia lea mea. Ua ia faitauina mafua'aga a faitaulaga. Ua manatua e Pilato e le'i mamao atu na toe fa'atū ai e Iesu Lasalo, o le tagata na fā aso talu ona oti; ma na ia matuā fia iloa a e le'i sainia e ia le fa'ai'uga o le fa'asalaga, po o ā mafua'aga o moliaga e fa'asaga iā te Ia, ma pe mafai fo'i ona fa'amaonia.

(8) ONA E LE'I MANA'O PILATO IA I ŌNA LUGA LE TA'USALAINA O LE TAGATA E LEAI SE AGASALA INA IA OTI, O LE Ā LE MEA NA IA FA'ATONU IUTAIA IA LATOU FAIA?

³¹ *Ona fai atu lea o Pilato iā te i latou: "Ia outou ave o Ia ma fa'amasino e tusa ma la outou tulafono." Ua tali mai tagata Iutaia iā te ia: "E sā ona matou fasioti o se tasi."*

Ioane 18:31

Afai e tonu la outou fa'amasinoga, o lana 'upu lea, ai se ā ua outou aumai ai le pagotā iā te a'u? “Inā ave ia e outou iā te Ia, inā fa'amasino iā te Ia i la outou tulafono” (F. 31). Ina ua tauānauina Pilato e faitaulaga, ua latou 'alalaga atu iā Pilato ua mae'a la latou fa'ai'uga, a e tatau ona faia fo'i le fa'amasinoga a Pilato e fa'amaonia ai la latou fa'ai'uga. O le ā la outou fa'ai'uga? ua fesili ai Pilato. O le fa'asalaga o le oti, sa latou tali atu ai; peita'i e lē mafai e matou i lalo o le tulafono ona fasioti o se tasi. Na latou talosaga iā Pilato ia talitonu i la latou fa'amatalaga e fa'ataui i le nofo sala o Keriso, ma fa'amalosia ai la latou fa'asalaga. O le a latou tau'aveina le tau i o le fa'ai'uga o le a fai.

(9) ONA E LĒ MAFAI E PILATO ONA TA'USALAINA IESU SE'ILOGA UA AUMAIA SE MOLIAGA E FA'ASAGA IĀ TE IA, O LE Ā LE MOLIAGA NA FA'AMATA'U AI PILATO E IUTAIA?

¹² O le mea lea ua sa'ili ai pea Pilato i se auala e fa'asa'oloto ai o Ia. A e ua alalaga mai tagata Iutaia e fa'apea: “Afai e te fa'asa'olotoina lenā tagata, e te lē alofa iā Kaisara. O se e fia fai ma tupu, e tete'e o ia iā Kaisara.”

Ioane 19:12

O Pilato e lē o se fa'amasino tonu pe loto fa'amaoni; peita'i e ui ina vaivai i lona tiute tau'ave i le faia o le mea sa'o, sa ia lē talia la latou talosaga. Na te lē ta'usalaina Iesu vaganā ua faia se moliaga e fa'asaga iā te Ia.

O faitaulaga ua fesaga'i nei ma se fa'afitauli. Ua latou iloa e ao ona ufiufi lo latou fa'afoliga i lalo o le manatu e nanā ia 'auna ne'i aliali ai. Latou te lē tatau ona fa'atagaina le manatu ia foliga mai na mafua ona pu'eina Keriso ona o talitonuga tau tapua'iga. Pe ana fai e fa'a'ailoa lea mafua'aga, se manū o a latou gaoioiga e leai se afāina iā Pilato. E ao ona latou faia ia pei o Iesu na galue e tete'e i le tulafono; ona mafai ai lea ona fa'asalaina Ia o se tagata fouvale i le mālō. Sa tele faitioga ma fouvalega a Iutaia e fa'asaga i le mālō o Roma. O nei fouvalega na matuā fa'afetaui ma le mālōsi e Roma, ma sa latou mataāla i le taofiofi o mea uma e foliga mai o le a tupu ai se vevesi.

(10) I SE TAIMI UA TUANA'I, A O TAUMAFAI LE 'AU FARESAIO E MAILEI KERISO, O LE Ā LE TALI FA'AALOALO LAVA NA TU'U ATU E IA SA FA'AMALAMALAMA MANINO AI LONA FA'AMAONI I LE MALŌ O ROMA?

²⁵ Ona fetalai atu lea o Ia iā te i latou: “O mea a Kaisara ia outou avatu iā Kaisara, a o mea a le Atua avatu ia i le Atua.”

Luka 20:25

E le'i tele ni aso ua mavae talu ona taumafai Faresaio e mailei Keriso i la latou fesili, “Pe sã 'ea ona matou avatu le taulaga iā Kaisara, pe leai?” Peita'i na fa'a'ailoa e Keriso lo latou fa'afoliga. O tagata Roma sa fa'atasi ai na latou va'aia le lē manuia o ē na taupulepule ma lo latou fenumiā'i ina ua tali atu o Ia, “O mea a Kaisara ia avatu iā Kaisara; a o mea a le Atua avatu ia i le Atua” (Luk. 20:22-25).

O lenei taimi ua manatu faitaulaga o le a fai ia foliga o lea ua a'oa'o Keriso i le mea na latou fa'amoemoe o le a Ia a'oa'o mai. I lo latou naunau tele na vala'auina ai molimau pepelo e fesoasoani iā te i latou, “ma latou molia o Ia e fa'apea, 'Ua matou maua lenei tagata o fa'asesē i le nu'u, ma fa'asā ona avatu le lafoga iā Kaisara, ua fai mai lava o Ia le Keriso o le tupu” (Luk. 23:2). E tele moliaga e aunoa ma ni fa'avae. Na iloa e faitaulaga lenei mea, peita'i na latou loto malilie e tautō pepelo ina ia mautinoa ai le maualā o la latou mau i le fa'ai'uga.

(11) INA UA FESILI PILATO IĀ IESU "O 'OE EA O LE TUPU O TAGATA IUTAIA?" O LE Ā LANA TALI?

¹¹ Ua tū Iesu i luma o le ali'i; ona fesili mai ai lea o le ali'i iā te Ia, ua fa'apea mai: “O 'Oe ea o le tupu o tagata Iutaia?” Ona fetalai atu ai lea o Iesu iā te ia: “O lea lava.”

Mataio 27:11

Na iloa e Pilato la latou fuafuāga. E le'i talitonu ia o lenei pagotā na Ia faufau mea leaga e fa'asaga tete'e ai i le mālō. O Ōna fofoga fa'amaulalo ma le agamalū ua fete'ena'i ma le moliaga. Na lagona e Pilato e i ai le mafua'aga lilo na taupulepule ai e nei tagata ia fa'aumatia ai le tagata e leai se agasala, o Ia e pei o lo'o tū fa'alavelave i le ala o ta'ita'i maua'uluga o Iutaia. Na ia fāliu iā Iesu ma fesili, “O 'Oe ea le tupu o tagata Iutaia?” Na tali atu le Fa'a'ola, “O lea lava” (Mata. 27:11). Ma a o Ia fetalai atu, na pei e pupula Ōna fofoga, e pei ua sulugia i 'ave o le lā.

Ina ua fa'alogo Kaiafa ma i latou sa fa'atasi ai i Lana tali, na latou fa'aioa ia Pilato o lea ua latou fa'alogo uma i le talia e Iesu o le agasala na molia ai o Ia. Na latou 'alalaga, o faitaulaga, o tusi'upu, ma ta'ita'i ua latou matuā manana'o ina ia fa'asalaina o Ia i le oti. O la latou 'alaga ua fa'aopoopo i ai ma le motu o tagata ma ē lē taupulea, ma ua matuā fa'ateleina le pisapisaō. Ua lē mautonu nei Pilato. Ua ia va'ai atu e leai se tali a Iesu i ē na molia o Ia, ona ia fesili atu lea, "Ua e lē fa'alogo ea i le tele o mea ua latou molia ai 'Oe? A ua lē tali atu Ia iā te ia i se 'upu" (F. 13).

(12) AISEĀ NA MAOFA AI PILATO ONA O LE UIGA O KERISO I LE TAIMI ATOA A O AGALEAGAINA O IA?

¹⁴ A ua lē tali atu Ia iā te ia i se 'upu e tasi, ona matuā ofo ai lea o le ali'i.
Mataio 27:14

A o la tū i tua o Pilato, o le lotoā o le maota ua aofia 'atoa i Lana silafaga, na fa'afofoga Keriso i 'upu so'ona lafo; peita'i i tu'ua'iga sesē uma e fa'atatau iā te Ia e le'i tali i ai. O Ōna fofoga na ta'u mai ai Lona lē sala. Na Ia tula'i e le'i felafoa'iina e galu sauā ua fafati mai. E pei o galu mālōsi o le to'asā ua faga'e ma tauāu lava ina pei o le si'isi'i o le tai o le vasa sousoua ua si'omia ai o Ia se'i o'o ina maua luga, a e le'i pā'ia o Ia. Na Ia tula'i e leai se 'upu, peita'i na va'aia le mamalu ma Lona taualoa e ui ina na o le fīfīlēmū. O le malamalama na pei e pupula mai i le tagata i totonu.

Na maofa Pilato i le to'afilēmū o Iesu. O lenei ea Tagata e lē fa'atāua e Ia nei tauālumaga ona o Lona lē manatu mamafa e lavea'iina Lona soifua? o lana fesili lea iā te ia lava. A o va'ai atu Pilato iā Iesu, o lo'o onosa'i i tauemuga ma 'upu faifai e aunoa ma le tau'i atu, na ia lagona le lē amiotonu ma le lē sa'o o faitaulaga o lo'o 'alalaga ma pisapisaō. Sa naunau Pilato na te maua le mea moni mai iā Iesu ma sola 'ese ai mai le fa'apotopotoga o tagata lē taupulea, ona tu'umuli itiiti lea o Pilato fa'atasi ma Iesu ma ua toe fesili atu, "O 'Oe ea le tupu o Iutaia?" (Luk.22:70).

(13) O LE Ā LE FESILI A KERISO IĀ PILATO INA IA TOFOTOFO AI LANA MAFUAGA UA FESILIGIA AI O IA?

³⁴ Ua tali atu Iesu iā te ia: "Pe se 'upu mai iā te 'oe lea 'upu, pe na ta'ua A'u e nisi iā te 'oe?"
Ioane 18:34

E le'i tali sa'o atu Iesu i lea fesili. Na Ia silafia o lo'o galue le Agaga Pa'ia i le loto o Pilato, ma sa Ia tu'uina i ai le avanoa e ta'utino ai lona talitonuga. Ua tali atu Iesu iā te ia, "Pe se 'upu mai iā te 'oe lea 'upu, pe na ta'ua A'u e nisi iā te 'oe e fa'atatau iā te A'u?" (Ioan. 18:34). O le uiga tonu pe o le fesili a Pilato na mafua ona o le tu'ua'iga a faitaulaga, pe o le naunau ina ia maua le malamalama mai iā Keriso. Na malamalama Pilato i le fesili a Iesu; peita'i o le mitamitavale ua oso a'e nei i lona loto. Na te le'i mana'o e fa'aioa le talitonuga o lo'o mamafa iā te ia. "Ou te se Iutaia ea?" o lana tali lea. "Ua tu'uina mai 'Oe iā te a'u e Lou nu'u ma le 'au ositaulaga sili; pe se ā le mea ua e faia?" (F. 35).

(14) INA IA MALAMALAMA PILATO E LE'I AFIO MAI O IA E SA'ILI SE NOFOALI'I FA'ALELALOLAGI, O LE Ā LE FETALAIGA A IESU NA FA'AMATALA ATU AI LE MAFUA'AGA O LONA FANAU MAI?

³⁷ Ona fai mai lea o Pilato iā te Ia: "O lenā fo'i, e te se tupu ea 'Oe?" Ua tali atu Iesu: "O lea lava, o A' u o le Tupu. O le mea lenei na fanau mai ai A'u, o le mea fo' i lenei na 'Ou sau ai i le lalolagi, ina ia 'Ou molimau i le 'upu moni. O i latou uma lava o i le 'upu moni, e fa'alogo mai i latou i Lo' u leo."
Ioane 18:37

Ua mavae le avanoa fa'a-auro o Pilato. Peita'i e le'i tu'ua e Iesu o ia e aunoa ma le fa'aopoopo atu o le malamalama iā te ia. Na fa'amanino e Iesu Lona galuega iā Pilato. Na Ia tu'uina iā Pilato le malamalama e iloa ai Na te lē o sa'ilia se nofoali'i fa'alelalolagi.

"E lē mai le lalolagi nei Lo'u mālō; afai ana mai le lalolagi nei Lo'u mālō, po ua tau A'u 'au'auna, ina ne'i tu'uina atu A'u iā Iutaia, a o lenei, e lē mai iinei Lo'u mālō,' ona fai mai lea o Pilato iā te Ia, 'O lenā fo'i, e te se tupu ea 'Oe?' Ua tali atu Iesu, 'O lea lava o A'u o le Tupu. O le mea lenei na fanau mai ai A'u, o le mea fo'i lenei na 'Ou sau ai i le lalolagi, ina ia 'Ou molimau i le 'upu moni. O i latou uma lava o i le 'upu moni, e fa'alogo mai i latou i Lo'u leo'" (Ioan. 18:36-37).

(15) O FEA NA FA'ATASI I AI KERISO INA UA IA TATALO ATU I LE TAMĀ I LE MEA E MAFAI ONA MAUA AI LE 'UPU MONI?

¹⁷ *Ia e fa'apa'iaina i latou i Lau 'upu moni; o Lau afioga o le 'upu moni lea.*
Ioane 17:17

Na fa'amaonia e Keriso o Lana afioga o le ki lava lea e matala ai mea lilo iā i latou ua sauni e talia ia mea. E i ai lona Ia lava mana e vi'ia ai Ia, ma o lenei le mea lilo o le fa'asalalauina o Lona mālō o le amiotonu. Na naunau Iesu ia malamalama Pilato e na o lona taliaina o le 'upu moni e mafai ai ona toe fa'aleleia lona uiga tumau ua fa'aleagaina.

(16) E LE'I FA'ATALI PILATO MO SE TALI I LANA FESILI "O LE Ā LE 'UPU MONI?," A E O LE Ā LE MEA NA IA ILOA MA SA FA'ALEOINA INA UA ALU I FAFO I LE MOTU O TAGATA O LO'O VĀVĀO?

³⁸ *Ua fai mai Pilato iā te Ia: “O le ā le 'upu moni?” Ua fai mai lea 'upu, ona toe alu lea o ia i fafo iā Iutaia, ua fai atu fo'i iā te i latou, “Ou te le'i iloa se mea e sala ai o Ia.”*
Ioane 18:38

Ua naunau Pilato ia na iloa le 'upu moni. O lona mafafau ua lē mautonu. Na ia naunau e taofi i afioga a le Fa'aola, ma ua fa'aosofia lona loto naunau ia na iloa tonu lea mea ma e fa'aapefa fo'i ona ia maua. “O le ā le 'upu moni?” (**F. 38**), o lana fesili lea. Peita'i e le'i fa'atali ia i se tali. O le vevesi mai o tagata na toe fa'amanatu mai ai iā te ia mea o lo'o tutupu i lea lava taimi; auā o lo'o vāvāo ma 'alalaga mai le motu o tagata mo se fa'ai'uga vave. Na ia alu atu i fafo i tagata Iutaia ma ia fai atu iā te i latou, “Ou te le'i iloa se mea e sala ai o Ia” (**Luk. 23:4**).

(17) INA UA FA'ALOGO LE FAITaulaga MA TA'ITA'I I LE FOLAFOLAGA A PILATO, SA FA'APEFEA ONA AFĀINA AI I LATOU?

⁵ *A ua latou finau pea, ua fa'aapea mai: “Ua fa'aoso e Ia i le nu'u, ua a'oa'o i Iutaia uma, ua afua mai i Kalilaia ua o'o mai iinei.”*
Luka 23:5

O nei 'upu mai le fa'amasino fa'apaupau o se a'oa'iga matuitui i ta'ita'i lē fa'amaoni ma le tau fa'asesē o Iutaia o lo'o tu'ua'ia le Fa'aola. A o fa'alogo atu faitaulaga ma ta'ita'i o Isara'elu i 'upu a Pilato, na matuā fa'ateleina ai ma ua leai se tua'oi o lo latou lē mautonu ma le 'ino'ino tele. Ua leva ona latou taupulepule ma fa'atalitali i lenei avanoa. A o latou va'ai atu e foliga mai o le a mafai ona fa'asa'olotoina Iesu, na pei ua latou sauni e fa'aumatia o Ia. Na latou 'alalaga e ta'uleagaina Pilato, ma fa'amata'u ia i le fa'aleaga o lona vā ma le mālō o Roma. Sa latou tu'ua'ia o ia i le lē ta'usalaina o Iesu, o lē ua latou fa'amaonia e tete'e iā Kaisara.

(18) O FEA LE ITŪ O LE NU'U NA TA'U MAI E LE FAITaulaga UA LAGONA AI E TAGATA UA A'AFIA I MATĀ'UPU A KERISO?

⁵ *A ua latou finau pea, ua fa'aapea mai: “Ua fa'aoso e Ia i le nu'u, ua a'oa'o i Iutaia uma, ua afua mai i Kalilaia ua o'o mai iinei.”*
Luka 23:5

O leo o le faitaga'i ua fa'alogoina, e fa'aalia mai ai manatu fa'asagatau ma fouvalega ua lauiloa ai Iesu i le nu'u. Na fai mai ositaulaga, “Na fa'aoso e Ia le nu'u, ua a'oa'o i Iutaia uma, ua afua mai i Kalilaia ua o'o mai iinei” (**Luk. 23:5**).

(19) INA UA FA'ALOGO PILATO O IESU E MAI KALILAIA MA UA MANATU IA FA'ATE'A ATU MAI IĀ TE IA LE TIUTE O LE FA'AMASINO, O LE Ā LE MEA NA IA FAIA FA'AVAVAVE LOA?

² *Ina ua iloa e ia, o Ia e mai i le itumālō o Herota, ona avatu lea o Ia iā Herota, o ia fo'i sa i Ieruselema i ia ōna pō.*
Luka 23:7

O le taimi lea e le'i manatu Pilato e ta'usalaina Iesu. Na ia iloa na molia o Ia e lutaia ona o lo latou 'ino'ino ma le fa'aailoga tagata. Sa ia iloa lona tiute, ma o le fa'amasinoga tonu ma le sa'o sa tatau ai ona fa'asa'oloto Iesu i lea lava taimi. Peita'i, o Pilato sa matuā mata'u ona o tagata ne'i lē fiafia iā te ia. Pe afai na te lē tu'uina atu Iesu i o latou lima, o le a tupu mai se vevesi tele, ma o le tulaga lea na ia fefe e la te fesaga'i. Ina ua ia fa'alogo o Iesu e mai Kalilaia, na ia filifili loa e 'auina atu o Ia iā Herota, o le ta'ita'i o le itūmalō o lo'o i Ieruselema i lenā taimi. Mai lea 'auāla, na manatu Pilato o le a ave'ese atu ai le tiute tau'ave o le fa'amasinoga mai iā te ia iā Herota. Na ia manatu fo'i o le avanoa lelei lenei e fa'aleleia ai le fe'ese'esega iga ua leva i lo lā vā ma Herota, ma ua fa'amaonia nei. O ali'i mautofi maua luga o le mālō ua fa'alelei i le fa'amasinoga o le Fa'aola.

(20) O LE Ā LE MEA FA'APITOA NA MANA'O HEROTA IA FAIA E IESU MANŪ O LE A MAFAI AI ONA FA'ASA'OLOTO O IA?

⁸ *Ua iloa atu e Herota iā Iesu, ona fiafia tele ai lea o ia; auā ua leva ona fia va'ai iā te Ia, ona o mea e tele ua logo mai iā te ia; ua fa'amoemoe fo'i o ia na te va'ava'ai i se fa'aailoga e faia e Ia.*

Luka 23:8

Na toe tu'uina atu Iesu e Pilato i fitafita, ma i totonu o le tauemu ma le taufaifai o le motu o tagata na ta'ita'i fa'avave atu Ia i le maota fa'amasino o Herota. "Ina ua va'ai Herota iā Iesu, ona matuā fiafia ai lea o ia." E le'i va'ai muamua lava Herota i le Fa'aola, peita'i ua "lea ona fia matamata iā te Ia, ona o mea e tele ua logo mai iā te ia; ua fa'amoemoe fo'i o ia na te va'ava'ai i se fa'aailoga e faia e Ia" (**Luk. 23:8**). O Herota lenei na pisia ōna lima i le toto o Ioane le Papatiso. Ina ua mua'i fa'alogo Herota i tala e uiga iā Iesu, na ia matuā mata'u ma fefe, ma fa'apea ane, "O Ioane le Papatiso lenei sa 'ou vavae 'eseina lona ulu ua toe tula'i ia nai ē ua oti" (**Mare. 6:16; Mata. 14:2**). Peita'i sa naunau Herota e fia va'ai iā Iesu. O le avanoa lenei e fa'asaina ai le ola o le perofeta, ma sa fa'amoemoe le tupu ia fa'ate'a 'ese ai mai lona mafauau e fa'avavau le va'aiga o le ulu o Ioane le Papatiso na aumai iā te ia i le tanoa. Na naunau fo'i Herota ia fa'amalieina lona fia iloa, ma ua manatu afai e i ai se avanoa e fa'asa'olotoina ai Keriso, o le a faia e Ia so'o se mea e fai atu e fai.

(21) O LE Ā LE MEA NA LOTO GATASITASI I AI PILATO MA HEROTA E FA'ATATAU I MOLIAGA NA AUMAI E TETE'E AI KERISO E Ē NA MOLIA O IA?

¹⁵ *A ua lē iloa fo' i e Herota; auā na 'ou a'auina atu outou iā te Ia; fa'auta fo'i, e leai se mea ua faia e Ia e tusa ai ina oti o Ia.*

Luka 23:15

Sa to'atele ositaulaga ma ta'ita'i na ō fa'atasi ma Keriso aga'i iā Herota. Ina ua aumaia le Fa'aola i luma o Herota, o nei tagata mamalu ua latou tautala ma ua fa'agae'etia, ua 'uuna'i a latou moliaga e fa'asaga iā te Ia. Peita'i e le'i tāua iā Herota a latou tu'ua'iga. Na ia fa'atonu atu ia fifilēmū, auā sa ia naunau i se avanoa e fesiligia ai Keriso. Na ia fa'atonu atu ia tatalaina noataga o Keriso, ma ia molia Ōna fili ona o a latou faiga sauā iā te Ia. Ina ua ia va'ai atu ma le tigāalofa i fofoga to'afilēmū o le Fa'aola o le lalolagi, na ia va'aia na o le poto ma le mamā. Na ia iloa lelei e pei fo'i o Pilato le mafua'aga ua molia ai Keriso ona o le tau fa'aleaga ma le matau'a.

(22) O Ā ITU'AIGA VAVEGA NA FAIA E KERISO I ITUMALŌ UMA O KALILAIA UA ATILI FA'ATELEINA AI LE FIA ILOA E HEROTA?

23 Ua fa'ata'amilo Iesu i Kalilaia uma, ua Ia a'oa'o i o latou sunako, ua Ia tala'i atu foi le tala lelei o le malo, ma fa'amalolo e Ia o ma'i uma ma ma'i tigā uma o le nu'u. 24 Ua o'o atu ai Lona logo i Suria uma, ona latou 'au mai ai lea iā te Ia o ē ua mama'i atoa uma, o ē ua i ai ma'i 'ese'ese, ma ē ua puapuagātia, ma ē ua uluitinoia e temoni, ma ē ua ma'i māliu, atoa ma ē ua mama'i i le supa; ona fa'amaloloina lea o i latou e Ia.

Mataio 4:23, 24

E tele 'upu na fesiligia ai Keriso e Herota, peita'i na tumau pea le leai o se tali. I le poloa'iga a le tupu, na vala'auina ai ē vaivai ma mama'i, ma ua fa'atonuina Keriso ia fa'amaonia Āna afioga i Lona faia o se vavega. Ua fai mai tagata e mafai ona e fa'amālōlōina ē mama'i, o le 'upu lea a Herota. Ua ou mana'o tele e va'ai o tala 'a'ave i Lou lauiloa e lē o 'ave sesē. E le'i tali Iesu, a e sa fa'atauānu pea Herota: Afai e te lē faia ni vavega mo nisi, ia e faia nei mo Lou lava lelei, o le mafua'aga e lelei mo 'Oe lava. Na ia toe fa'atonu atu, Fa'aali mai iā te i matou se fa'aailoga e iā te 'Oe le mana e fa'amaonia ai fa'amatalaga e fa'atatau iā te 'Oe. Peita'i o

Keriso ua pei o se tasi e lē o va'ai ma lagona se mea. O le Ālo o le Atua na 'aveina e la lava le uiga o le tagata. E ao ona la faia pei ona faia e se tagata i tulaga fa'apenci. O lea Na te lē faia ai se vavega e lavea'iina ai la lava mai tigā ma le fa'alumaina e pei ona o'o i so'o se tagata e ao ona onosa'i pe afai e o'o i lea tulaga.

(23) O AI NA TU'UA'I E FAITAILAGA MA TA'ITA'I O LO'O MAUA MAI AI E KERISO LONA MANA FAI VAVEGA?

A o le 'au tusi'upu ē na ō ifo mai Ierusalemā, ua fa'a'apea ane i latou, O ia te Ia Pelesepulo, o le ali'i fo'i o temoni, e tuli ai e Ia o temoni.

Mareko 3:22

Na folafola e Herota afai e faia e Keriso se vavega i ōna luma, e tataua ona tatalaina o Ia. O i latou na molia Keriso sa va'aia e o latou lava mata galuega ofoofogia na faia i Lona mana. Na latou fa'alogoina Lona poloa'i atu i le tu'ugamau ia tu'u a'e lē na oti. Na latou va'aia lē na oti ua tula'i mai ma usita'i i Lona si'ufofoga. Ua matata'u i latou ina ne'i faia nei e Ia se vavega. O le mea e sili ona matata'u ai i latou o se fa'aaliga lea o Lona mana. O se fa'aaliga fa'a'apea e fa'amaonia ai le fa'aumatia o a latou fuafuāga, ma atonu o le a i'u ina totogi ai i o latou lava ola. Ona o lo latou popole tele, o faitaulaga ma ta'ita'i sa toe u'una'iina a latou tu'ua'iga e fa'asaga iā te Ia. Ua latou 'alalaga ma le leo tele, ua ta'u atu o Iesu o le fa'alata, e fa'atauēmu i le Atua. O Āna vavega na mafai ona faia e ala i le mana na tu'uina atu i ai e Pelesepulo, le ali'i o agaga leaga. O le maota fa'amasino ua 'avea nei ma nofoāga o o le vevesi, o isi tagata ua 'alalaga mai i le isi mea, a o nisi fo'i ua 'alalaga mai i isi.

(24) E TUSA MA LE VALO'AGA A ISAIA E FA'ATATAU I LE TAIMI A O FESAGA'I IESU MA Ē NA MOLIA O IA, SA FA'APEFEA LE FA'AMATALAINA O ĀNA GAOIOIGA?

² *Na sauāina o Ia, na Ia tu'u atu fo' i o Ia lava ia fa'apuapuagātia; a e e lē tautala o Ia. Ua ta' ita' iina o Ia e pei o le tama'i mamoe o le a fasia; ma e pei o le mamoe e gūgū i luma o ē e sele i ōna fulufulu, e lē tautala mai fo' i o ia.*

Isaia 53:7

O le loto fuatia ifo o Herota ua mavae 'ese, o le lagona na i ai ua sili atu i lo o lona mata'u i le talosaga a Herotia mo le ulu o Ioane le Papatiso. Mo sina taimi na ia lagona le matuitui o le salamō ona o le mata'utia o le mea na ia faia; peita'i o lona lagona i le faia o le mea sesē na mavae lemū 'ese a o aga'i atu lona olaga i le tulaga maulalo ona o le agasala o le tu'inaanau. O lona agaga ua fa'ama'a'aina nei ma ua mafai ona mitamita vale ona o le fa'asalaga na ia fa'ao'o iā Ioane le Papatiso ona o lona taumafai e a'oa'i iā te ia. Ua ia fa'amata'u nei Iesu, ma fa'a'ailoa atu e mafai i lana pule ona fa'asa'oloto pe fa'asala o Ia. Peita'i e leai se fa'a'ailoga na fa'aali mai ai na lagona e Iesu se 'upu.

Na fa'aosofia le ita tele o Herota i le leai o se tali. E pei e fa'a'ailoa mai ai e lē amana'ia lana pule. I le tupu loto vi'i ma le fa'alialia, e feololo 'upu a'oa'i e fai mai i luma i lo le pei e lē o amana'ia ia. Na ia toe fa'amata'u atu Iesu ma le ita tele, a e ua tumau pea le leai o se tali ma sa fifilemū o Ia.

(25) O LE Ā LE MAFUA'AGA MUAMUA O LO'O TA'UA MAI FA'APEA O LE GALUEGA A KERISO I LE LALOLAGI?

¹⁸ *“Ua i O' u luga le Agaga o Ieova, auā ua ia fa'au'uina A' u e folafola le tala lelei i ē e matitiva, ua Ia 'auina atu A' u e tala' i le sa' olotoga i ē ua ave fa'apagotā, ma ia pupula mata o ē e tauaso, ma ia fa'asa' olotoina ē ua nutimomoia.*

Luka 4:18

O le galuega a Keriso i le lalolagi e lē o le fa'amalieina na o le su'esu'e vale ma le fia iloa. Na Ia maluu mai e fa'amālōlō ē loto nutimomoia. Pe ana fai o se 'upu e fa'amālōlōina ai se loto ua manu'a ma tigāina i le agasala, se manū e lē tumau Lona lē gagana. Peita'i, e leai ni Āna fetalaiaga mo i latou o ē solipalaina le 'upu moni i lalo o latou vae lē fa'apa'iaina.

(26) O LE Ā LE 'UPU MONI NA TU'U MAI E IOANE A E NA TE'ENA E HEROTA I SE TAIMI UA TUANA'I, MA UA FA'AMA'A'AINA E FA'AVAVAU LONA LOTO E TETE'E I SE ISI LAVA 'UPU MONI?

¹⁸ *Auā na fai atu pea Ioane iā Herota: “E sā i le tulafono ona lua nonofo ma le avā a lou uso.”*

Mareko 6:18

Na mafai ona fetalai atu Keriso i ni 'upu iā Herota e tuia ai taliga o le tupu loto ma'a'a. Sa mafai ona taia o ia i le fefe ma le mata'u a'o fofola atu i ōna luma le tumu o lona olaga i le agasala, ma le mata'utia o le pagātia o lo'o aga'i mai iā te ia. Peita'i o le lē leoa ma le filēmū o Keriso o le a'oa'iga aupito mamafa lea na mafai ona tu'uina atu iā te ia. Na te'ena e Herota le 'upu moni na ta'u atu iā te ia e le perofeta aupito sili, ma e leai fo'i se isi fe'au e na te toe maua. E leai se 'upu mai le Tupu o le lagi mo ia. O taliga e matala pea i le ōi o tagata ola, e leai se avanoa mo poloa'iga a Herota. O fofoga na silasila alofa i taimi uma i le tagata agasala ua salamō, ma le alofa fa'amagalo ua lē toe silasila iā Herota. O fofoga na fetalai i mea aupito moni, ma le leo mālū na ōle atu i ē aupito agasala ma le maulalo na tapunia i le tupu fa'amauluga o lē na lē lagona le mana'omia o se Fa'aola.

(27) E FA'APEFEA ONA TU'UINA MAI I LE ŌLEGA A TAVITA MO LE TAUSIGA A LE ATUA SE ATA FA'AVALO'AGA O PUAPUAGĀ O KERISO A O FA'ALUMAINA O IA I LUMA O TAGATA?

²⁰ *Ua tuia Lo' u loto i le fa'alumaina, ma ua leai se fofō o le manu' a. Sa 'Ou fa'amoemoe pea i se tasi e alofa mai, a e e leai se tasi; Ma ni ē e fa'amāfanafana mai, a e 'Ou te le' i mauaina se tasi.*

Salamo 69:20

Na pogisā le va'ai a Herota i lona ita tele. Na ia fāliu atu i le motu o tagata, ma ia ta'u atu ma le ita tele o Iesu o le tagata fa'afoliga taufa'asesē. Ona ia fai atu lea iā Keriso, Afai e te lē tu'uina mai se fa'amaoniga o Āu 'upu, o le a 'ou tu'uina atu 'Oe i fitafita ma le motu o tagata. Atonu e mafai ona manuia le latou taumafaiga e fa'atautala ai 'Oe. Afai o 'Oe o se taufa'asesē, o le oti i o latou lima ona pau lenā o le mea e te maua mai iā te i latou; a e afai o 'Oe o le Ālo o le Atua, fa'asao ia 'Oe iā te 'Oe i Lou faia o se vavega.

E pei e le'i uma atu āna 'upu a e ua laga mai tagata iā Keriso. Ua pei o ni manu fe'ai ua laga i la latou mea'ai. Ua latou ta'ita'i atu Iesu, ua 'au fa'atasi ai ma Herota i le taumafai e fa'alumaina le Ālo o le Atua. Pe ana lē fa'alavalave fitafita Roma ma latou taofi fa'amalosia le motu o tagata ua lē taupulea, se manū latou te fa'aumatia le Fa'aola.

(28) O Ā ISI FAIGA SAUĀ NA LAVATIA MA ONOSA'I E KERISO I LIMA O HEROTA MA FITAFITA ROMA?

¹⁹ *Ua latou tāfo' i i Lona āo i le ū ma tu'ufeanu iā te Ia, ua latou to'otutuli ma ifo mai iā te Ia.*

Mareko 15:19

“Ua ta'ita'iina Iesu e le 'au a le ali'i i le maota o le ali'i, ona latou fa'apopotoina ai lea iā te ia o le 'au uma, ona latou fa'aofuina ai lea o Ia i le ofu mūmū” (**Mata. 27:27, 28**). Na fa'aopoopo atu i ai ma fitafita Roma i lenei fa'asauāina. O mea lē tataua uma a nei tagata amioleaga, ma fitafita, fesoasoani i ai ma Herota ma ta'ita'i lutaia, e mafai ona latou fa'aosoina sa tu'u i luga o le Fa'aola. Peita'i e le'i mavae Lona onosa'i.

O ē na fa'asauā iā Keriso na latou taumafai e fua Lana amio i a latou lava amio; ua latou fa'atusatusa o Ia i le maulalo pei o i latou. Peita'i i tua atu o mea uma o lo'o fa'aalia mai i lenei taimi ua aliali mai ai le isi va'aiga, -o le va'aiga e i ai le aso latou te va'aia ai lona mamalu. E i ai nisi na latou gatete i luma o Keriso. A o ifo le motu o tagata ma tauemu i Ōna luma, o nisi na ō mai ona o le mafua'aga lava e tasi, sa latou toe fo'i i tua, ua fefefe ma ua fifilēmū. O Herota na ia lagona. O toe 'ave o le malamalama o le alofa tunoa ua fa'asusuluina i luga o lona loto ua ma'a'a i le agasala. Na ia lagona o lenei tagata e 'ese lava Ia; auā peiseāi ua fa'aalia mai Lona itū Atua i le Lona itū tagata. O le taimi lava a o si'omia Keriso e i latou o ē tauemu, o ē mulilua, ma ē fasioti tagata, na lagona e Herota o lo'o ia va'aia le Atua i luga o Lona nofoali'i.

(29) ONA SA ILOA LELEI LAVA E HEROTA O KERISO E LĒ SALA MAI MOLIAGA NA AUMAIA E IUTAIA IĀ TE IA, O LE Ā LE MEA SA IA FAIA IA FA'ASA'OLOTO AI IA MAI LE TIUTE TAU'AVE MATA'UTIA?

¹¹ *Ona fa'alumaina ai lea o Ia e Herota ma lana 'au, ma tauemu mai iā te Ia, na latou fa'aofu fo'i iā te Ia i le ofu pupula, ona toe aumai ai lea o Ia iā Pilato.*

Luka 23:11

E ui ina ma'a'a lona loto, na lē mafai e Herota ona ia fa'amaonia le ta'usalaina o Keriso. Na ia manatu e 'alo'ese o ia mai le tiute mata'utia, ma na ia toe 'auina Iesu i le maota fa'amasino a Roma.

(30) E UI INA UA MAUTINO A E PILATO E LĒ O SALA KERISO, A E ONA O FETU'UTU'UNA'IGA, O LE Ā LE GAOIOIGA NA IA FA'ATŪ ATU?

¹⁶ *O lenei fo'i, 'ou te a'oa'i atu iā te Ia, i le 'ou tatalaina atu ai.*

Luka 23:16

Sa fa'anoanoa ma lē fiafia Pilato. Ina ua toe fo'i mai Iutaia ma la latou pagotā, ua lē lava lona onosa'o ma sa fesili atu pe o le ā le mea e latou te manana'o na te faia. Na ia fa'amanatu atu ua mae'a lana su'esu'ega o Iesu, ma e na te le'i maua se mea e sala ai o Ia; na ia ta'u atu na latou molia Iesu, peita'i latou te le'i mafai ona fa'amaonia se moliaga e tasi. Sa ia 'auina Iesu iā Herota, o le tupu o Kalilaia, ma o se tasi vaega o lo latou lava nu'u, peita'i e le'i maua fo'i e ia se mafua'aga e tatau ai ona oti o Ia. Ua fai atu Pilato, "O lenei fo'i, 'ou te a'oa'i atu iā te Ia, i le 'ou tatala atu ai" (**Luk. 23:16**).

(31) O LE Ā LE FILIFILIGA MULIMULI NA FAIA E PILATO UA FA'AMAU AI E FA'AVAVAU LONA IA LAVA MALAIA?

⁶ *Ua vā'ai atu iā te Ia le ' au ositaulaga sili ma au'auna, ona latou alalaga mai lea ua fa'apea: "Inā fa'asatauro ia, fa'asatauro Ia!" Ua fai atu Pilato iā te i latou: "Inā 'ave ia e outou iā te Ia ma ia outou fa'asatauroina; auā ou te lē iloa se mea e sala ai o Ia."*

Ioane 19:6

Na fa'a'iloa mai iinei le vaivai o Pilato. Sa ia ta'u atu o Keriso e leai se agasala, a e na loto malie e sasaina o Ia ina ia fa'afilēmū ai ē na molia o Ia. Na ia fa'atuaana'i le fa'amasinoga tonu ma le mea sa'o ina ia fa'amalie ai le motu o tagata lē taupulea. Ua tu'uina nei ia lava i se tulaga fa'alētonu. Na mate'ia e le motu o tagata lona lē mautonu, ma ua fa'aauau ai le 'alalaga ma pisapisaō mo le soifua o le pagotā. Pe ana fai e tumau Pilato i lana fa'ai'uga muamua, ma tete'e ai le ta'usalaina o le tagata na ia lē maua se mea e sala ai, se manū na te motusia le filifili mata'utia na saisaitia ai o ia i le tulaga salamō ma lona manatu nofo sala na iā te ia i aso uma na ola ai. Pe ana ia fa'atino lona talitonuga i le mea sa'o, se manū e lē iā Iutaia le manatu latou te fa'atonu atu iā te ia i le mea e fai. Se manū e fasiotia lava Keriso, peita'i o le fa'asalaga o le a lē ti'eti'e i ōna luga. A o Pilato na ia aga'i fa'asolosolo i la'asaga e solia ai le lagona sa'o i lona loto fuatiaifo. Na ia fai le 'alofaga mo ia lava mai le faia o le fa'amasinoga ma le amiotonu ma le faia o le mea sa'o, ma ua maua ai nei o ia i le tulaga ua lē mafai ona 'alo 'ese ai mai lima o ositaulaga ma ta'ita'i. O lona lē mautonu ma le fefo'ifo'ia'i o lana filifiliga na fa'amaonia ai lona to'ilalo.

(32) O AI NA 'AUINA MAI E LE ATUA MA SE TOE LAPATA'IGA E FA'AILOA LE AGASALA MATA'UTIA O LE FASITOTIA O KERISO?

Ua ti'eti'e o ia i le nofoa fa'amasino, ona sau ai lea o le fe'au mai lana avā, ua fa'apea mai, Ne'i e mao i lea tagata amiotonu; auā na 'ou matuā tigāina analeila i le miti iā te Ia.

Mataio 27:19

E o'o lava i le taimi lea, e le'i tu'ua Pilato ia fai tauaso āna gaoioiga. Na i ai le fe'au mai le Atua e lapata'i ai o ia e fa'atautau i lana mea o le a fai. O le tali o le tatalo a Keriso, ua asiasi le agelu mai le lagi i le avā a Pilato i le miti na ia va'aia ai le Fa'aola. E lē o ia se Iutaia, peita'i na ia va'aia Iesu i lana miti, ma na te le'i masalomia Lana amio ma Lana galuega. Na ia iloa o Iesu o le Ālo o le Atua. Sa ia va'aia o Ia o lo'o su'esu'eina i le fale fa'amasino. Na ia va'aia Ōna 'a'ao ua saisaitia e pei o se tagata solitulafono mamafa. Ona ia va'aia lea o Herota ma āna fitafita o faia la latou galuega mata'utia. Na ia fa'alogo i ositaulaga ma ta'ita'i o le nu'u ua tumu i le matau'a ma taupulepulega leaga a o latou molia o ia. Na ia fa'alogo i 'upu, "E i ai la matou tulafono, e i le matou tulafono e tatau ona oti o Ia" (**Ioa. 19:7**). Sa ia va'ai ua tu'uina atu Iesu ia sasaina ina ua uma ona fai atu, "Ōu te lē iloa se mea e sala ai lenei tagata" (**Luk. 23:4**). Na ia fa'alogo i le fa'ai'uga o le ta'usalaina ina ua fa'aleoina e Pilato, ma ia va'aia ai ua tu'uina atu Keriso ia fasiotia o Ia. Na ia va'aia le tu'uina a'e o le satauro i Kalevario. Na ia va'aia le lalolagi ua ufitia e le pōuliuli, ma fa'alogoina le tagi, "*Ua taunu'u.*" O se tasi fo'i va'aiga ua feagai ma lana va'ai. Ua ia va'aia Keriso o lo'o nofo i le ao pupula, a o ta'avili le lalolagi i le vā nimonimo, ma o ē na fasiotia o Ia ua sosola mai Ōna luma ma Lona mamalu. Na ia ala a'e ma le tagi ma le mata'u tele, ma ia tusia loa 'upu o le lapata'iga iā Pilato.

A o tau mafaufau Pilato pe o le ā le mea e ao ona ia faia, ua fa'alatalata atu le 'ave fe'au, ma tu'u atu le tusi mai lana avā, e fa'apea: "Ne'i e mao i lea tagata amiotonu; auā ua 'ou matuā tigāina analeilā i le miti iā te Ia."

(33) SA ILOA LELEI E PILATO LE AGANU'U FA'A-IUTAIA I LE TAIMI O LE PASEKA E FA'ATAGA AI ONA FA'ASA'OLOTO KERISO, A E O LE Ā LE FESILI NA TU'U ATU E PILATO?

O lea na fai atu ai Pilato iā te i latou, ina ua potopoto i latou, Po o ai tou te loto i ai 'ou te tatalaina atu iā te outou? o Parapa ea? po o Iesu Lē ua igoa iā Keriso?

Mataio 27:17

Na suia foliga o Pilato. Ua lē mautonu ona o ōna lagona fete'ena'i. Peita'i, a o ia fa'atuai ona fai se fa'ai'uga, o faitaulaga ma ta'ita'i o lo'o latou fa'aosofiaina atili pei o le mumū o le afi mafaufau o le motu o tagata. Sa u'una'i fa'amalosia Pilato ia faia sana gaoioiga. Na ia manatu loa e fa'aogāina se masaniga atonu e mafai ai ona maua se mafua'aga ia tatalaina ai Keriso. O le tū e masani ai i taimi o lenei tausamiga o le tatalaina lea o se pagotā e filifili tagata e fa'asa'oloto. O lenei tū o se masaniga fa'apaupau; e leai se faiga tonu e i ai, peita'i sa matuā fa'atāua e Iutaia. O le taimi lea o lo'o taofia i le pule a Roma se pagotā e igoa iā Parapa, o ia o lo'o i lalo o le fa'asalaga o le oti. O lenei tagata na fai mai o ia o le Mesia. Na fai mai e iā te ia le pule e fa'avae ai se isi fa'atulagaina o mea ma fa'asa'o ai le lalolagi. I lalo o le tautua'asesē a Satani na fai mai o mea uma na te maua i le gaoi ma le faomea o āna ia lava mea. E tele mea maoa'e na ia faia i le pule a Satani, e to'atele tagata na mulimuli iā te ia ma na fa'aoso le fouvalega e fa'asaga i le mālō o Roma. I lalo o le ufiufi i le ma'elegā i tapua'iga o se tagata loto ma'a'a ma le amioleaga, e mātetele i le fouvale ma le fa'asauā. Ina ua tu'uina atu i tagata le filifiliga i le vā o lenei tagata ma le Fa'aola e lē agasala, na manatu Pilato o le a fafagu i latou i se lagona o le fai mea sa'o. Na ia fa'amoemoe ia latou maua se tigālofa mo Iesu e fa'afeagai ai ma faitaulaga ma ta'ita'i. O lea na ia fāliu atu i le motu o tagata ma fai atu ma le naunauta'i, "O ai so la'ua tou te loto i ai 'ou te tatalaina atu iā te outou? O Parapa ea po o Iesu lē ua igoa iā Keriso?" (**Mata. 27:21**).

(34) O AI PARAPA?

Sa i ai le tasi e igoa i a Parapa, ua noatia fa'atasi ma ē na fouvale ma ia, ē ua fasioti tagata i le fouvale sa fai.

Mareko 15:7

Na pei o manu fe'ai le 'alalaga mai o le tali a le motu o tagata, "Tatala mai Parapa iā te i matou." Na aga'i ina fa'ateleina le 'alalaga o tagata, "O Parapa! O Parapa! Sa manatu Pilato e le'i malamalama lelei tagata i lana fesili. Na ia toe fesili atu, "O ai so la'ua tou te loto i ai 'ou te tatalaina, o le tupu o tagata Iutaia?" A e ua latou 'alalaga mai, "Ave 'ese ia lenā tagata a e ia tatala mai Parapa iā te i matou!" (**Luk. 23:18**). "Tou te loto ea ina ia 'ou tatalaina atu iā te outou le tupu o tagata Iutaia?" (**Ioa. 18:40**). Ona toe fesili atu lea Pilato iā te i latou, "Se ā fo'i se mea tou te loto i ai 'ou te faia iā te Ia o lē ua igoa i le Keriso?" Ua atili ai le 'alalaga o le motu o tagata pei o temoni. O temoni ua tino tagata o lo'o fa'atasi ai i le fa'apotopotoga, ma o le ā se isi mea e ona tupu mai vaganā le tali, "Ia fa'asatauro iā te Ia?" (**Mare. 15:12, 13**).

Na atuavale Pilato. E le'i manatu ia o le a o'o i se tulaga fa'apenei. Na ia 'alo mai le tu'uina atu o le tagata e lē agasala i le oti e aupito mauilalo, 'inosia, matagā, fa'alumaina ma le tigāina e mafai ona fa'ao'o i se tagata. Ina ua fāi ifo le vāvāō o tagata, na ia toe fāliu atu i tagata ma fa'apea atu, "Se ā fo'i se mea leaga ua na faia?" (**Mata. 27:23**). Peita'i e mamao le tulaga ua o'o i ai lenei mea mo se isi finauga. Latou te lē o mana'omia se fa'amaoniga o le lē agasala o Keriso, peita'i ia fa'asalaina loa o Ia.

(35) E UI INA E LE'I MANA'O PEA IA E FA'ASATAUROINA LENEI TAGATA E LĒ AGASALA, A E ONA O LONA LĒ MAUTONU I LE VA'AIGA A LE MOTU O TAGATA, O LE Ā LA LATOU 'ALAGA IĀ PILATO?

²¹*A ua latou leo tetele mai e fa'apea: "Inā fa'asatauro ia, inā f'asatauro ia iā te Ia!"*

Luka 23:21

Peita'i sa taumafai pea Pilato e lavea'i iā te Ia. "Na ia fesili atu, o le atu tolu lea, 'O le ā se leaga ua Ia faia? 'Ou te lē iloa se mea e tatau ai ona oti ai o Ia. O le a 'ou a'oa'i iā te Ia ona tatala lea iā te Ia" (**Luk. 23:22**). A e o le ta'uina atu e tatala iā te Ia na fa'ateleina ai le 'alalaga mai, "Inā fa'asatauro ia, fa'asatauro ia!" Na fa'ateleina le 'alalaga e pei o le matagi mālōsi na fa'aosofia ona o le filifiliga lē mautonu na faia e Pilato.

(36) AISEĀ NA FA'ASA'OLOTO AI LAVA MULIMULI E PILATO PARAPA A E LĒ O IESU?

¹⁵ *Ona o le mana' o o Pilato e fa'amalie le motu o tagata, ua ia fa'asa' olotoina ai Parapa. Ina ua uma ona sasaina o Iesu e ia, ona ia tu'uina atu lea o Ia ia fa'asatauroina.*

Mareko 15:15

Na ta'ita'iina Iesu, ua vaivai ma lē lavā, ua ufitia i manu'a ma sa sasaina a o va'ava'ai i ai le motu o tagata. “Ona ta'ita'iina atu lea o Ia e le 'au i le maota, o le maota lea o le ali'i, ua latou fa'apotopotoina fo'i le 'au uma. Ona latou fa'aofu lea iā te Ia i le ofu pāuli, ma latou ta'ata'ai la'au tuitui ua fai a'i le pale, ua fa'apaleina ai o Ia. Ona latou alolofa mai lea iā te Ia, ua fa'apea mai, Talofa le tupu o tagata luitaia! Ua latou tā fo'i i Lona ao i le ū, ma feanu iā te Ia, ma to'otuli ma ifo iā te Ia” (**Mare. 15:16-19**). I nisi taimi na se'ia e se lima sauā le ū o i Lona 'a'ao ma tā ai le pale tuitui i Lona ao, ua goto ifo ma ua sisina ifo ai le toto i Ōna fofoga.

(37) O LE Ā LE TUGA NA VALO'IA E LENEI VALO'AGA I LE GAUA'I ATU O KERISO I 'UPU FAIFAI MA LE FA'ATAUGĀ FA'ALETINO MAI SUI O SATANI?

² *A e ua manu'a o Ia ona o a tatou solitulafono; ua momomo o Ia ona o a tatou amio leaga. O le a' oa' iga e filemū ai i tatou sa i Ōna luga lea, o Ōna fa'alavalava fo'i ua mālōlō ai i tatou.*

Isaia 53:5

Fa'auta, le lagi e! ma ia ofo, le lalolagi e! Fa'auta i lē e fa'asauā ma lē ua sauāina. O le fa'apotopotoga o tagata lē taupulea ua si'osi'omia le Fa'aola o le lalolagi. O le tauemu ma le so'ona pisaō vale ua fefiloi ma 'upu leaga tau faifai. O le tulaga maualo o Lona soifua mai ma le lē taualoa o Lona soifuaga na alalaga ai le motu o tagata e aunoa ma se lagona alofa. O Lona ta'u atu o Ia o le Ālo o le Atua na tauemu i ai, ma o tausūāga leaga ma 'upu tau faifai na ta'u atu e le tasi i le isi.

O Satani sa ta'ita'iina le motu o tagata sauā i le sauāina o le Fa'aola. O lana galuega o le tau fa'aoso lea ina ia taui atu e Iesu pe afai e mafai ai, po o le 'una'iina o Ia e fai se vavega e fa'asa'oloto ai Ia lava, ma lē taunu'u ai le fuafuāga o le fa'aolataga. E na o le tasi lava se pisia i Lona soifuāga i le itū tagata, e tasi lava se to'ilalo o Lona itū tagata e lavātia ai le tofotofoga mata'utia, ma o le Tama'i Mamoe a le Atua o le a 'avea o le taulaga e lē 'ato'atoa, ma lē taunu'u ai le fa'aolataga o le tagata. Peita'i o Ia e mafai i se fetalaiga ona aumai 'au a le lagi e fesaoasoani iā te Ia—o Lē e mafai ona tulia ma le mata'u le motu o tagata mai Lana silafaga i le pupula o Lona mamalu fa'a-Atua—ua tu'uina atu o Ia ma le filemū 'ato'atoa i le fa'alumaina ma le matuā 'inosia.

(38) SA FA'AFEFEA ONA FA'AMATALAINA E PAULO O KERISO O LO TATOU FAITAILAGA SILI MA LĒ FA'AU'UINA A LE ATUA?

Auā e tataua ona iā i tatou o se faitaulaga sili fa'apenā, e pa'ia, e agamalū, e leai sona leaga, e taumamao ma ē agasala, e silisili fo'i Ia i luga o lagi.

Eperu 7:26

O fili lava o Keriso na latou fa'amalosia se vavega e fa'amaonia ai Lona itū Atua. Sa iā i latou fa'amaoniga e sili atu i lo o ia na latou sa'ilia. Ina ua fa'amaulaloina ē na fa'asauā iā te Ia ua pei o Satani, na fa'apea le agamalū ma le onosa'i na fa'aeaina ai Iesu e sili a'e i le fanau a tagata ma fa'amaonia ai Lona itū Atua. O Lona fa'amaulaloina o le fa'aiologa lea o Lona fa'aeaina. O le toto o puapuagā na sisina ifo i Ōna fofoga, o le fa'amaoniga o Lona fa'au'uina i le “suāu'u o le oli'oli” (**Epe. 1:9**), o Ia o lo tatou faitaulaga sili. Na matuā ita tele Satani i lona iloa o le sauāga na fa'ao'o i le Fa'aola e le'i fa'amalosia ai o Ia ina ia i ai se muimui mai Ōna fofoga. E ui na 'avea e Ia uiga o le tagata, na Ia taofia pea le to'afilemū fa'ale-Atua e feagai ai ma faigatā, ma e le'i te'a 'ese ai mai le finagalo o Lona Tamā.

(39) I SE TOE TAUMAFAGA E FA'ASA'OLOTO IESU -UA FA'ASINO LONA LIMA IĀ TE IA - O LE Ā LE FA'AALIGA SA FA'ALEOINA E PILATO I LE TAUMAFAI E FA'AOSO SE TIGĀALOFA O LE MOTU O TAGATA?

² *Ona maliliu atu lea o Iesu i fafo, o lo'o i Lona āo le pale tuitui ma o lo'o ofu i le ofu pāuli. Ona fai atu lea o Pilato iā i latou: “Fa'auta, i le tagata!”*

Ioane 19:5

Ina ua tu'uina atu e Pilato Iesu ia sasaina ma tauemuina, na ia manatu o le a fa'aosofia ai le alofa i le motu o tagata. Na ia fa'amoemoe o le a latou filifili ua lava lea fa'asalaga. E o'o lava i le tau fa'aleaga o faitaulaga na ia manatu, ua fa'amalieina nei. Peita'i i le va'aiga manino o Iutaia na latou va'aia ai le faigata o le fa'asalaina fa'apea o se tagata ua fa'ailoa lona le agasala. Latou te iloa o lo'o taumafai Pilato e lavea'i le soifua o le pagota, ma ua latou tino'u e le tatau ona fa'asa'olotoina Iesu. I lona taumafai e fa'amalie i latou, ua sasaina ai o Ia e Pilato, ma pe afai latou te u'una'iina pea le mata'upu, e mautinoa lo tatou manumalo i le i'uga.

Na 'a'ami nei e Pilato ia aumaia Parapa i le fa'amasinoga. Ua ia tu'uina atu i o latou luma pagota e to'alua, ua tutu fa'atasi, ona ia fa'asino lea i le Fa'aola ma fai atu i lona leo 'ai'oi fa'atauinau, "Fa'auta i le Tagata!" (Ioa. 19:5). "Ua 'ou aumai o Ia i o outou luma, ina ia outou iloa 'ou te le iloa se mea e sala ai o Ia"(F. 4).

(40) A FA'ATUSATUSA LE SOIFUAGA PA'IA MA LE ALOFA FA'APALEPALE O KERISO MO E O LO'O MOLIA O IA, O LE A LE LEAGA NA TA'USALAINA AI PARAPA?

Sa i ai le tasi ua igoa ia Parapa, ua noatia fa'atasi ma e na fouvale ma ia, e na fasioti tagata i le fouvale sa fai.

Mareko 15:7

Ona toe alalaga lea o i latou uma lava, ua fa'apea atu, 'Aua lava lena, a o Parapa. O le fao mea fo'i Parapa.

Ioane 18:40

Ua tula'i mai le Alo o le Atua, o la'e i le ofu o tauemuga ma le pale tuitui. Ua latou to'ese Lona ofutino, ua va'aia ai i Lona tino fa'alavalava o lo'o tafe ifo ai le toto. O Ona fofoga ua pisia i le toto ma o lo'o i ai fa'aailoga o le mafatia ma le tigā; peita'i e le'i va'aia muamua ai le matagofie e pei o le taimi nei. O fofoga o le Fa'aola e le'i fa'aleagaina i lima o Ona fili. O vaega uma na fa'ailoa manino ai le agamalū ma le tigāalofa mo Ona fili sauā, ma Lona tu'uina o Ia lava e aunoa ma le tete'e iā te i latou. I nei mea uma e le'i iā te Ia se uiga fa'avaivai ma le pala'ai, a e o le mālōsi ma le mamalu o le onosa'i. Sa i ai le 'ese'esega mamao o Ia ma le pagota i Ona tafatafa. O foliga o Parapa ua fa'ailoa mai ai le ma'a'a o le tagata e ola so'ona fai. O lea 'ese'esega sa pei e tautala iā i latou uma na maimoa. O nisi o i latou ua fetagisi. A o latou tepa atu iā Iesu, na tumu o latou loto i le tigāalofa. E o'o lava i ositaulaga ma ta'ita'i ua latou lagona e fa'amaoni Ana fetalaiga uma e fa'tatau iā te Ia lava.

(41) O LE A LE MEA NA ILOA E LE TA'ITA'I O LE TO'ASELAU MA LATOU SA I AI MA IA A O TAUTAU KERISO I LUGA O LE SATAURO?

⁵⁴*A o le ta' ita' i' au ma i latou na leoleoina Iesu, ina ua latou va'aia le mafui' e ma mea ua tutupu, ona matuā fefefe ai lea o i latou ma fa'apea ane: "E moni, o le Alo lava lenei o le Atua."*

Mataio 27:54

O fitafita Roma o lo'o si'osi'omia Keriso e le loto ma'a'a uma i latou; o nisi sa latou va'ai toto'a i Ona fofoga mo se fa'amaoniga o Ia se tagata solitulafono pe amio le taupulea. O nisi taimi ua latou liliu 'ese e tepa le va'ai ma fa'aali foliga 'ino'ino iā Parapa. E le'i mana'omia se va'ai toto'a e faitauina ai le itū'aiga tagata e i ai o ia. Ua latou toe tepa atu i Lē ua fa'amasinoina. Na latou va'ai atu i Lē o lo'o puapuagatia ma le lagona o le tigā alofa loloto. O le tu'uina atu ma le filemū o Keriso sa fa'amauiina i o latou mafaufau le va'aiga, e le toe mafai ona mavae vagana ua latou fa'ailoa o Ia o le Keriso, po o le filifilia o lo latou lava i'uga ina ua te'ena o Ia.

(42) MULIMULI ANE, INA UA LĒ MAFAI E PILATO ONA LAVATIA LE SAUĀ MA LE TO'ASĀ O IUTAIA, O LE A LE MEA NA IA 'ALAGA ATU AI?

Ua va'ai atu iā te Ia le 'au ositaulaga sili ma au'auna, ona alalaga lea o i latou, ua fa'apea atu, "Inā fa'asatauro ia, fa'asatauro ia." Ua fai atu Pilato iā te i latou, "Inā 'ave ia e outou iā te Ia, ma ia outou fa'asatauroina; auā ou te le'i iloa se mea e sala ai o Ia."

Ioane 19:6

Na fa'atumuina Pilato i le ofo ona o le onosa'i le faitio o le Fa'aola. Na te le'i masalomia o le va'aiga o lenei Tagata pe a fa'atusatusa iā Parapa, o le a fa'aosofia ai le tigāalofa o Iutaia. Peita'i e le'i malamalama o ia i le matuā 'ino'ino o faitaulaga iā te Ia, o

le Malamalama o le lalolagi, ua fa'aalia ai lo latou pōuliuli ma le sesē. Na latou fa'aoso le motu o tagata ia matuā ita tele, ma o faitaulaga, o ta'ita'i, ma tagata ua atili ona 'alalaga i le 'alaga mata'utia, “Ia fa'asatauro iā te Ia, fa'asatauro iā te Ia.” Mulimuli ane, ua leai se onosa'i o Pilato i lo latou sauā e leai se fa'avae, ona ia 'alaga atu lea, “Inā ave ia e outou iā te Ia, ma ia outou fa'asatauroina, auā 'ou te lē iloa se mea e sala ai o Ia.”

(43) O LE Ā LE TULAFONO FA'A-IUTAIA NA FA'AAOGĀ E FAITAILAGA E TA'USALAINA AI LE ĀLO O LE ATUA?

Ua tali mai Iutaia iā te ia, "O i a te i matou le tulafono, e tusa fo'i i la matou tulafono ona ia oti o Ia, auā ua fai o Ia e Ia ma Ālo o le Atua."

Ioane 19:7

O le kovana Roma, e ui ina masani i va'aiga fa'asauā, na o'otia i le tigāalofa mo le pagotā puapuagātia, o Lē ua ta'usalaina ma o lo'o sasaina, o le toto o lo'o tafe ifo i Ōna fofoga ma le tino manu'a, a e ua fa'aalia pea fa'aailoga o le tupu o lo'o ti'eti'e i Lona nofoali'i. Peita'i o faitaulaga ua fa'aailoa mai, “E i ai la matou tulafono, ma e tusa ai ma le matou tulafono e tataui ai ona oti o Ia, auā ua Ia fai mai o Ia le Ālo o le Atua” (F. 7).

Ua fa'ate'ia Pilato. E le'i iloa e ia le mea tonu e uiga iā Keriso ma Lana galuega; peita'i na pei ua ia lagona le fa'atuatua e lē o manino iā te ia, i le Atua ma isi e sili a'e i tagata ola. O se manatu sa o'o ane muamua i lona mafaufau ua fa'amautūina nei. Na ia fesiligia pe atonu e lē o se atua o lo'o tula'i mai ona luma, o lo'o ofu i le ofu pāuli o tauemuga, ma ua fa'apaleina i la'au tuitui.

(44) INA UA TA'U ATU MA LE FA'ASIASIA E PILATO E IĀ TE IA LE PULE E FA'ASA'OLOTO AI O IA, O LE Ā LE TALI A KERISO?

¹¹ Ua tali atu Iesu iā te ia: “E leai lava sau pule e fa'asala ai A' u, pe ana lē tu'uina mai iā te oe mai lugā. O le mea lea, ua sili ai le agasala a le tagata na tu'uina atu A' u iā te oe.”

Ioane 19:11

Na ia toe alu atu i le maota fa'amasino ma fesili iā Iesu, “O ai ea 'Oe?” Peita'i e le'i i ai se tali a Iesu. Ua uma ona fa'amatala e le Fa'aola iā Pilato, ma fa'amalamalama i ai Lana galuega o le molimau i le 'upu moni. Na lē amana'ia e Pilato le malamalama. Na ia fa'aaogā sesē le tofiga maua luga o le fa'amasino ina ua ia tu'ulafoa'i ta'iala ma le pule e iā te ia i mana'oga a le motu o tagata. E le'i toe i ai se malamalama mai iā Iesu mo ia. Sa fa'alētonu Pilato i le leai o se tali a Iesu, ua fai atu ma le loto fa'amaua luga:

“E te lē tali mai ea iā te a'u? Po ua e lē iloa o iā te a'u le pule e tatala ai iā te 'Oe?”

Ua tali atu Iesu, “E leai sau pule iā te A'u, ana lē tu'uina mai iā te 'oe mai lugā; o le mea lea e tele ai lona leaga na ia tu'uina mai A'u iā te 'oe” (Ioa. 19:11).

(45) ONA O LE TIUTE TAU'AVE FA'ALEAGAGA SA IĀ KAIAFA AUĀ O IA O LE FAITAILAGA SILI MA O LE SUI O LE MĀLO O IUTAIA, O LE Ā LE FOLAFOLAGA NA FAIA E KERISO E TETE'E IĀ I LATOU?

"O le mea lea, ua sili ai le agasala a le tagata na tu'uina atu A' u iā te oe."

Ioane 19:11

O le Fa'aola alofa mutimutivale, i totonugalemū o Ōna puapuagā ma Lona finagalo mafatia, sa la fa'amagalo pea le gaoioga a le kovana Roma ina ua ia tu'uina atu o Ia e fa'asatauroina. Fa'auta i le va'aiga ua tu'uina mai i le lalolagi mo taimi uma! Fa'auta i le malamalama o lo'o sulugia ai le amio a le Fa'amasino o le lalolagi 'atoa!

“O le mea lea e tele ai lona leaga na ia tu'uina mai A'u iā te 'oe.” O le uiga o le fetalaiga a Keriso, o Kaiafa, le faitaulaga sili, o ia le sui o le mālō o Iutaia. Latou te iloa ta'iala e pulea ai ta'ita'i Roma. Na iā te i latou le malamalama o valo'aga sa molimau iā Keriso, ma Āna lava a'oa'oga ma vavega. O fa'amasino Iutaia na latou maua fa'amaoniga mautinoa i le pa'ia o Ia lē ua latou fa'asalaina i le oti. Ma o le fa'amasinoina i latou e fa'atatau i lo latou malamalama.

O le sala aupito mamafa e pa'ū iā te i latou e tulaga aupito maua luga o le mālō, o ē teuina ma tausia fa'atuatūaga pa'ia a o lenei ua latou lē fa'amaoni i ai. O Pilato, o Herota, ma fitafita Roma na latou lē iloa lelei Iesu. Na latou manatu e fa'amalie faitaulaga

ma ta'ita'i Iutaia i lo latou fa'asauā iā te Ia. E le'i iā i latou le malamalama tele na maua e le nu'u o Iutaia. Pe ana fai e tu'uina i fitafita lenā malamalama, se manū latou te lē sauāina Keriso e pei ona latou faia.

(46) SA FA'AMATA'UINA PILATO FA'APEA E LĒ O IA SE UŌ A LE KAISARA ROMA, A E O LE Ā LE MOLIGA E SILI ATU LE MALOSI SA AUMAIA E IUTAIA NA ILOA E PILATO O LE A TUPU AI LE MASALOSALO O LE MALŌ A ROMA IĀ TE IA?

¹² *O le mea lea ua sa'ili ai pea Pilato i se auala e fa'asa'oloto ai o Ia. A e ua alalaga mai tagata Iutaia e fa'apea: "Afai e te fa'asa'olotoina lenei tagata, e lē o 'oe o se uō a Kaisara. O so o se tasi e na te faia o ia ma tupu, e tete'e o ia iā Kaisara."*

Ioane 19:12

Na toe mafaufau Pilato e tatala le Fa'aola. "A ua alalaga Iutaia, ua fa'apea atu, 'Afai e te tatala lenā tagata, e te lē alofā iā Kaisara'" (**Io. 19:12**). O nei tagata lē fa'amaoni na latou fa'atagā faia mea ia foliga mai ona o le pule a Kaisara. O i latou uma na tete'e i le pule a Roma, na aupito sili ai Iutaia. A o'o loa ina saogalemū mo i latou, o i latou e aupito sauā i le fa'amalosia o a latou lava tulafono fa'alenu'u ma tapua'iga; peita'i afai e latou te mana'omia le fa'ataunu'uina o se tulaga sauā, ona latou fa'aeaina lea le pule a Kaisara. Ina ia fa'ataunu'uina le fa'aumatiāga o Keriso, ua latou fa'aioa atu lo latou lotonu'u i le pulega mai fafo o lo'o latou 'ino'ino i ai.

"O sē fia fai ma tupu e fou o ia iā Kaisara," o la latou 'alaga lea. Ua a'afia tonu le vaivaiga o Pilato. Na masalomia o ia e le mālō o Roma, ma ua ia iloa o se tala fa'apea e alu atu i tua o le a fa'aleagaina ai o ia. Na ia iloa pe afai e to'ilalo Iutaia, o le a fa'asaga mai lo latou ita tele iā te ia. E leai se mea e lē faia ina ia taunu'u ai le mea latou te manana'o ai. O lo'o tu'u mai i ōna luma le fa'ata'ita'iga o lo latou naunauta'i i le sa'ili o le soifua o Lē o lo'o latou 'ino'ino i ai e aunoa ma se mafua'aga.

(47) O LE Ā LE FA'AFITIGA NA TU'U MAI LE MOTU O TAGATA IUTAIA UA FA'AMAU AI E FA'AVAVAU UA TE'ENA I LATOU E 'AVEA O TAGATA FILIFILIA O LE ATUA?

A ua alalaga i latou, "Ave 'ese Ia; ave 'ese Ia. Inā fa'asatauro iā te Ia. Ua fa'apea mai Pilato iā te i latou, "Ou te fa'asatauro ea i lo outou tupu?" Ua tali atu le 'au ositaulaga iā te ia, "E leai so matou tupu, na o Kaisara."

Ioane 19:15

Ona nofo lea o Pilato i lona nofoa fa'amasino, ua ia toe tu'uina atu Iesu i luma o tagata ma fa'apea atu, "Fa'auta, o lo outou tupu!" Ua toe fa'alogoia le 'alaga leo tele mai le motu o tagata, "Ave 'ese ia, ave 'ese ia, inā fa'asatauro iā te Ia." I se leo na lagona mamao ma i mea lata mai, na fesili atu Pilato, "Ou te fa'asatauro ea lo outou tupu?" Peita'i ua tali mai i 'upu faifai le to'atele, "E leai so matou tupu na'o Kaisara" (**F. 15**).

O lea, ina ua latou filifilia se pule fa'apaupau, ua fa'aioa ai e le mālō o Iutaia ua latou ō 'ese mai le faigā mālō ma le Atua. Ua latou te'ena le Atua lo latou tupu. Mai lea taimi ua leai se lavea'i mo i latou. Ua leai so latou tupu a e na o Kaisara. O inā ua ta'ita'i i ai tagata e ositaulaga ma a'oa'o. Mo lenei tulaga ma le i'uga mata'utia na mulimuli mai, o i latou lava e pa'ū i ai. O le agasala ma le malaia o le mālō na pogai mai ta'ita'i fa'ale-agaga.

(48) INA UA ILOA E PILATO O LE A FASIOTIA LAVA KERISO, E UI INA E LĒ AGASALA O IA, O LE Ā LE MEA NA IA FAIA FA'AFIAILOGA E TAUMAFAI E TA'U MAMĀ AI MA IA LĒ TA'USALAINA AI IA E IA LAVA?

"Ua iloa e Pilato ua lē aogā lana 'upu, a e atili ai le vāvāō, ona tago ai lea o ia i le vai, ua fafano ai ona lima i luma o le motu o tagata, ua fa'apea atu, "Ou te mamā a'u i le toto o lenei tagata amiotonu; faitalia lava outou."

Mataio 27:24

Ma le mata'u ma ua ta'usalaina o ia e ia lava, sa tepa atu Pilato i le Fa'aola. Mai le anoano o foliga femēmēa'i, sa na'o fofoga o Iesu na to'afilēmū. Na peiseā'i e i ai se malamalama na susulu i luga a'e o Lona ao. Na fa'apea ifo Pilato i lona loto, O Ia o se Atua. Na fāliu atu i le motu o tagata ma fa'aioa atu, "Ou te mamā a'u i Lona toto. Ia outou ave iā te Ia ma fa'asatauro iā te Ia." Peita'i ia manatua e outou faitaulaga ma ta'ita'i, na 'ou fa'aleo atu o Ia o le Tagata e leai se agasala. Tau lava ina ia fa'amasinoina outou e Lona Tamā o lē na la ta'uina mai, a e lē o a'u, ona o a outou galuega ua faia i le aso nei. Ona ia fāliu atu lea iā Iesu ma fa'apea atu, Ia e

fa'amagalo mai a'u ona o nei gaoioiga; 'ou te lē mafai ona fa'asao iā te 'Oe. Ina ua uma ona toe sasaina o Iesu, ona ia tu'uina atu lea o Ia ia fa'asatauroina.

(49) O LE Ā LE FESILI A MAREKO O LO'O FA'AMATALA MANINO AI LE FILIFILI E PILATO O LE PULE FA'ALELALOLAGI, A E LĒ O LE OLA E FA'AVAVAU?

³⁶ *Auā se ā le aogā i le tagata, pe afai na te maua le lalolagi uma a e maumau lona ola?*

Mareko 8:36

Sa fa'anaunau Pilato ia lavea'i Iesu. Peita'i na ia iloa e lē mafai ona faia lea mea ma tumau i lona tofiga ma lona mamalu. Na ia filifili e fa'ataulaga ofo le soifua o Lē e lei se agasala i lo o le 'ave'esea o lona mamalu fa'ale-lalolagi. E to'afia nisi, ina ia sao 'ese mai le fememea'i ma puapugā, e fa'apea fo'i ona latou lē mulimulita'i i ta'iala. E fa'asino mai e le loto fuatia ifo ma le agaga galue le ala e ui ai, a e fa'asino e le manatu fa'apito i le isi itū ala. O le 'au mālōsi ua 'a'ave aga'i i le itū sesē, ma o lē e fetu'utu'una'i ma le leaga e tafea mamao atu ai i le pogisā o le nofosala.

(50) O LE Ā LE LAPATA'IGA TĀUA LAVA O LO'O TU'U MAI I LE AFIGA A LE ATUA MO I LATOU UMA E FETU'UTU'UNA'I MA LE AGASALA ONA O LE MEA E MAUA I LE MANATU FA'APITO?

¹² *O i ai le ala ua tonu i le manatu o le tagata, a o lona taunu'uga, o ala ia e oti ai.*

Fa'ata'oto 14:12

Na tosina atu Pilato i mana'oga o le motu o tagata. Ina ia lē fa'alētonu le mautū o lona tofiga, na ia tu'uina atu ai Iesu ia fa'asatauroina. Peita'i e ui ina sa ia fa'aeteete, o le mea tonu na ia fefe i ai sa o'o mulimuli mai i ōna luga. O lona mamalu na 'ave'esea mai iā te ia, na pa'ū mai lona tofiga maualuga, ma, ona ua mafatia i le salamō ma le loto mitamitavale ua fa'amanu'alia, e le'i leva ona mavae o le fa'asatauroina o Iesu a e ua ia pule i lona lava ola. O le tulaga fo'i lenā mo i latou uma e fai fetu'una'iga ma le agasala, o le a maua e i latou na o le fa'anoanoa ma le mafatia. “O i ai le ala ua tonu i le manatu o le tagata; a'o lona taunu'uga, o ala ia e oti ai” **(Fa'ata'oto 14:12).**

(51) O LE Ā LE TA'UTINOGA MATA'UTIA NA FAIA E LE MOTU O TAGATA MA LE FAITAILAGA SILI O LE A FA'AMALAIAINA AI LAVA I LATOU MO ASO UMA O LE OLAGA SE'I O'O I LE GATA'AGA?

²⁵ *O lea, ua tali mai ai tagata uma: “Ia i luga o i matou ma a matou fanau Lona toto.”*

Mataio 27:25

Ina ua fa'aailoa e Pilato lona mamā i le toto o Keriso, na tali mai Kaiafa ma lona fa'amauualuga, “Ia i luga iā i matou ma a matou fanau Lona toto” **(Mata. 27:25)**. O nei 'upu mata'utia 'na alalaga ai faitaulaga ma faipule o le nu'u, ma fa'aopoopo atu ai i le vāvāō le motu o tagata. O le fa'apotopotoga 'atoa ua 'alalaga fa'atasi, “Ia i luga iā i matou ma a matou fanau Lona toto.”

Ua faia le filifiliga a le fanauga a Isara'elu. Na latou fa'asino iā Iesu ma 'alalaga atu, “E lē o le tagata lea, a'o Parapa” **(Luk. 23:18)**. O Parapa o le faomea ma le fasioti tagata, o le sui o Satani. O Keriso o le sui o le Atua. Ua te'ena Keriso; ua filifilia Parapa. O Parapa o le a latou maua. Ina ua faia lenei fa'ai'uga ua latou talia ai lē na mai le amataga le pepelo ma le fasioti tagata. O Satani lo latou ta'ita'i. O i latou le nu'u o le a fa'atinoina mea e mana'o i ai. O āna galuega o le a latou faia. O lana pule e tatau ona latou lavātia fa'ataunu'u. O tagata na filifilia Parapa a e lē o Keriso o le a latou lagona le sauā o Parapa se'ia o'o i le i'uga o le lalolagi.

(52) SA FA'APEFEA ONA FA'AMATALAINA E TAVITA LE FAIPESE LE FA'AMASINOAGA A LE ATUA O LE A O'O I LE MALŌ O IUTAIA ONA O LE TE'ENA O LE ĀLO O LE ATUA?

⁸ *E na te fa'amasinoina le lalolagi i le amiotonu; E na te fa'amasinoina ma le tonu finauga a atunu'u 'ese'ese.*

Salamo 9:8

A o va'ai atu i le Tama'i Mamoe a le Atua ua fasia, ua 'alalaga atu Iutaia, “Ia i luga o i matou ma a matou fanau Lona toto.” O lea alaga mata'utia na alu a'e i le nofoali'i o le Atua. O lea fa'ai'uga na fa'aleoina i o latou lava luga, ua tusia i le lagi. Na talia lenā tatalo. O le toto o le Ālo o le Atua na i o latou luga ma a latou fanau, ma fanau a latou fanau, o le fetu'u e fa'aauau pea.

E mata’utia le fa’ataunu’uina i le fa’aumatiāga o Ierusalemā. Na mata’utia le fa’atinoina i le tulaga o le nu’u o Iutaia i tausaga e afe valuselau,-- o le lālā na vavae mai le vine, ua mate, o le lālā ua leai se fua, e fa’aputu ma susunuina. Mai lea nu’u i lea nu’u i le lalolagi ‘atoa, mai lea seneturi i lea seneturi, na fa’aumatia i solitulafono ma le agasala!

(53) O LE Ā LE MEA O LE A VA'AIA E TAGATA UMA - E AOFIA AI I LATOU NA TE'ENA O IA - O LO'O TUSIA I ŌNA LA'EI PE A TOE AFIO MAI KERISO I LONA MAMALU?

Ua iā te Ia fo'i le suafa ua tusia i Lona 'ofu ma Lona vae, O LE TUPU O TUPU, MA LE ALI'I O ALI'I.
Fa'aaliga 19:16

E mata’utia fo’i le fa’ataunu’uina o lenā tatalo i le aso o le fa’amasinoga tele. Pe a toe fo’i mai Keriso i le lalolagi, e lē va’aia Ia o se pagotā e si’osi’omia e tagata lē taupulea ma fa’atupu fa’alavelave. I lenā taimi o le a latou va’aia Ia o le Tupu o le lagi. O le a afio mai Keriso i Lona lava mamalu, i le mamalu o Lona Tamā, ma le mamalu o le ‘au agelu pa’ia. E afe ni afe, e mano ma mano agelu, o fanau a le Atua e matagofie ma manumālō, e sili atu le matagofie ma le pupula, o le a latou fa’afeao iā te Ia. Ona Ia ti’eti’e ai lea i Lona nofoali’i mamalu, ma o le a fa’apotopoto nu’u uma i Ōna luma. E va’aia fo’i o Ia e mata uma, ‘atoa ma i latou na tu’ia o Ia. Ua leai se pale o la’au tuitui, a e o le a Ia paleina le paleali’i o le mamalu, - o se pale i totonu o se pale. Ua lē o le ofu pāuli na fa’aofu ai o Ia, a e o le a Ia la’ei i le ofu pupula e matuā pa’epa’e pei o le kiona; “e leai fo’i se tagata tāofu i le lalolagi na te mafaia ona fa’asinasina fa’apenā” **(Mare. 9:3).** “Ua iā te Ia fo’i le suafa ua tusia i Lona ofu ma Lona vae, ‘O le Tupu o Tupu, ma le Ali’i o Ali’i” **(Fa’aal. 19:16).** O i latou na tauemu ma sasa iā te Ia o le a i ai. O ositaulaga ma ta’ita’i o le a latou toe va’ai i le va’aiga i le maota fa’amasino. O mea uma na tutupu o le a fa’aali mai i o latou luma, peisea’i ua tusia i mata’itusi mumū mai le afi. O i latou na ‘alalaga, “Ia i luga iā i matou ma a matou fanau Lona toto,” o le a maua le tali o Ia latou tatalo. Ona iloa ai lea ma malamalama le lalolagi ‘atoa. O le a latou iloa tonu po o ai ma o le ā le pogai na fa’asagatau i ai latou, o tagata leaga, vaivai, ma e lē ola fualoa. I lo latou puapugā ma le matata’u tele, o le a tagi atu i mauga ma papa, “Mafuli mai ia iā te i matou, ma tanuma’i i matou ai le silafaga a Lē ti’eti’e i le nofoali’i, ma le to’asā o le Tama’i Mamoe; auā ua o’o mai le aso tele o Lona to’asā, o ai fo’i sē na te mafaia ona tū atu?” **(Fa’aal. 6:16, 17).**

Ua 'ou talia Keriso e 'avea ma o'u Tupu ma ua 'ou naunau e va'ai iā te Ia i Lona mamalu uma.

Li'o le Tali **Ioe** **Lē Mautonu**

Ona ua 'ou iloa o Keriso na mafatia ma maluu mo a'u, o lea 'ou te fiafia ai e 'au'auna iā te Ia i le lalolagi, o le a mafai ai ona 'ou i ai fa'atasi ma Ia e fa'avavau pe a toe afio mai o Ia.

Li'o le tali: **Ioe** **Lē Mautonu**

Ou te tatalo o le a 'ou sauni e fa'asoa atu le 'upu moni o le fuafuāga o le fa'aolataga a Keriso iā i latou o lo'o sa'ili'ili i le 'upu moni.

Li'o le Tali: **Ioe** **Lē Mautonu**

A o 'ou faitau i le taimi o tū Keriso i luma o ē na molia o Ia, ou te tatalo mo le malosi ia mafai ona 'ou fesaga'i ma ē tete'e i lo'u fa'atuatuāga, i se uiga e filemū ma e fa'amagalo atu i ā i latou.

Li'o le Tali: **Ioe** **Lē Mautonu**

<u>Manatu mai le Su'esu'ega</u>	<u>Tatalo e Mana'omia</u>	<u>Tali o Tatalo</u>

O Kalevario

Lesona 5

“**U**a latou o’o atu i le mea ua igoa o Kolokota. Ua latou fa’asatauro iā te Ia.”

(1) I LE TUSI O LE KALATIA, O LE Ā LE FA'AMATALAGA A PAULO PE NA FA'APEFEA ONA FA'AOLAINA I TATOU MAI LE FETU'U O LE TULAFONO?

¹² *O le fa'atauina o i tatou e Keriso, ua fa'asa' olotoina ai i tatou mai i le malaia o le Tulafono, ma ua malaia o Ia e sui ai i tatou, auā ua tusia: “E fa'amalaia i latou uma ua fa'atautauina i se la'au.”*

Kalatia 3:13

“Ina ia fa’apa’iaina ai e Ia le nu’u i Lona lava toto” (**Epe. 13:12**). Ona o le soliga o le tulafono a le Atua, na tuli 'esea ai Atamu ma Eva mai Etena. O Keriso o le sui mo i tatou, na Ia mafatia i fafo o le 'a'ai o Ierusalem. Na Ia maliu i tua o le faitoto'a, o le nofoāga e fa’asala ai tagata solitulafono mamafa ma ē fasioti tagata. E matuā tāua nei 'upu, “Na fa’atauina mai i tatou e Keriso ai le fa’afanoga o le tulafono, ina ua fa’afanoina o Ia mo i tatou; auā ua tusia, e fa’afanoina i latou uma ua fa’atautauina i le la’au” (**Kala. 3:13**).

(2) O FEA NA 'AVE I AI IESU INA UA UMA ONA TU'U ATU O IA I LIMA O TAGATA ROMA INA IA FA'ASATAUROINA?

³³ *Ua latou o'o atu i le nofoāga ua ta' ua o le mea e i ai le ulupo'o, ua latou fa'asatauro iā te Ia i lea mea, ma ē pagotatā, o le tasi i Lona itu taumatau, ma le tasi i Lona itu tauagavale.*

Luka 23:33

E to’atele le motu o tagata na mulimuli atu iā Iesu mai le maota fa’amasino i Kalevario. O le tala fou o le fa’asalaina o Ia na salalau i Ierusalem, ma o itū'aiga tagata tulaga 'ese'ese na lolofi atu aga'i i le nofoāga e fa’asatauroina ai. O ositaulaga ma ta'ita'i na latou folafola e latou te lē faia se mea e afāina ai ē mulimuli iā Iesu pe afai e tu'uina atu o Ia ia te'i latou, ma o le 'au so'o ma ē na talitonu iā te Ia mai le 'a'ai ma ē lata ane i ai na latou fa'atasi atu i le motu o tagata o ē na mulimuli i le Fa'aola.

(3) O LE Ā LE MEA NA FAIA E FITAFITA INA UA LĒ TOE MAFAI E KERISO ONA TAU'AVE O LE SATAURO, TALU LO LATOU SO'ONA FA'ATAUGĀ IĀ TE IA?

³² *Ua latou o atu i fafo, ona iloa ai e i latou o le tagata Kurene, e igoa iā Simona. Ua latou fa'atonu iā te ia ia 'ave Lona satauro.*

Mataio 27:32

A o aga'i i Iesu i le faitoto'a o le lotoā o le maota o Pilato, o le satauro na saunia mo Parapa ua fa’ae’e atu nei i Ōna 'a'ao o lo’o tafe toto. E to’alua isi o pa’aga a Parapa o le a fa’asalaina i le oti fa’atasi i le taimi lea ma Iesu, ma sa fa’ae’e atu fo’i satauro ia te i la'ua. O le 'avega a le Fa'aola ua mamafa tele mo Lona tino ua i le tulaga e matuā vaivai ma le mafatia. Talu mai le tausamiga o le Paseka fa’atasi ma Ōna so'o, Na te le'i toe taumafaina se mea 'ai po'o se vai. Na Ia puapuagātia i le fa'ato'āga o Ketesemane i le fetauiga ma 'au a Satani. Na Ia feagai ma le mafatia ona o le fa'alataina o Ia ma Lona va'aia o Ona so'o ua tu'ulafoa'i iā te Ia ma ua sosola ese. Na aveina o Ia iā Ana, soso'o ma Kaiafa, 'atoa ma Pilato. Mai iā Pilato na 'auina atu iā Herota, toe aumai fo'i iā Pilato. Mai le ta'usalaina toe fa'afouina o isi tauemuga, mai le 'amusia, i le toe 'amusia, ma sasaina fa'alua,--i le po 'atoa o va'aiga ma isi va'aiga o tulaga 'ese'ese ina ia tofotofoina le agaga o le tagata i le mea e gata ai. A o Keriso e le'i to'ilalo. Na Ia lē faia se 'upu vaganā ai o 'upu e vi'ia ai le Atua. I taimi uma o le fa'amasinoga fa'afoliga ma le lē tonu na tausia lava e Ia le to'afilēmū ma le mamalu. Peita'i ina ua uma ona sasaina fa'alua, na fa'ae'e atu le satauro i Ōna luga, ma ua lē mafai e le tino fa'ale-tagata ona tau'aveina. Na pa'ū o Ia i lalo ifo o le 'avega.

Na va'aia e le motu o tagata na mulimuli iā te Ia Lona vaivai ma ua savali tau pa'ū, peita'i latou te le'i fa'ailoa so latou fa'apalepale. Na latou tauemu ma taufaifai iā te Ia ona ua lē mafai ona tau'ave le satauro mamafa. Na latou toe fa’ae’e iā te Ia le

satauro, ma ua toe pa’ū ifo Ia i le 'ele'ele. Na iloa atu e i latou sa fa'asauā iā te Ia ua Na lē mafai ona Ia toe tau’ave Lana 'avega. Sa faigatā ia te i latou ona maua se tagata e tau’aveina le 'avega o le fa'alumaina ma le 'inosia. O Iutaia lava ia latou te lē mafai ona faia lea mea, auā a fa'a'ele'elea fa'apea o le a taofia ai i latou mai le tausiga o le Paseka. E leai ma se isi o le motu o tagata na mafai ona punou ifo e tau’ave le satauro.

(4) O AI LE TAGATA 'ESE LOTO ALOFA SA MOLIMAUINA MA TOE FA'AMALOSIA E FAI SE VAEGA I LE TALA O LE FA'ASATAUROGA?

²¹ *Ua alu ane le tasi tagata, o Simona le Kurene, e sau mai le vao, o le tamā fo'i o ia o Alesana ma Rufo, ona latou fa'atauānau lea iā te ia ina ia 'ave e ia o Lona satauro.*

Mareko 15:21

O lea taimi sa i ai se tagata 'ese, o Simona le Kurene, na sau mai le vao, ua fetau i ma le fa'apotopotoga o tagata. Ua fa'alogo ia i 'upu taufaifai ma le so'ona vāvāo o le motu o tagata; na ia fa'alogo i le tauemu o lo'o 'alalaga ai pea, la fa'aavanoa le 'auāla mo le Tupu o Iutaia! Na ia tū ma lona maofa i lenei va'aiga; ma a o ia fa'aali lona tigāalofa, sa latou tofia o ia ma fa'ae'e i ai le satauro i luga o ōna tau'au.

Sa fa'alogo Simona i le tala iā Iesu. O ōna atali'i o nisi ua talitonu i le Fa'aola, peita'i o ia e lē o se so'o. O lona tau'aveina o le satauro i Kalevario o le fa'amanuiāga iā Simona, ma sa ia fa'afetai ona o lenei manuia mai le Atua. O lea na ta'ita'iina ai o ia e filifili na te tau'ave le satauro o Keriso, ma sa ia tau'aveina le 'avega ma le fiafia.

(5) ONA O LE TIGĀALOFA MO IESU I ŌNA MAFATIĀGA, O AI I LATOU SA FA'ATASI MA MULIMULI PEA IĀ TE IA?

⁴⁹ *Ua tutū mamao uma mai i latou o ē sa masani iā te Ia. E fa'apena fo' i ma fafine na mulimuli iā te Ia mai i Kalilaia, ua latou tutū ma va'ava'ai atu i nei mea uma.*

Luka 23:49

E i ai fo'i fafine na fa'atasi i le fa'apotopotoga, sa mulimuli i Lē e leai se agasala ma ō ai aga'i i Lona maliu puapugā. Na latou tulimata'i ma sa pulato'a iā Iesu. O nisi o i latou sa vā'ai muamua iā Iesu. E i ai nisi na aumai iā te Ia o latou tagata mama'i ma ē na puapugātia. O nisi fo'i o i latou sa la fa'amalōlōina. O tala o mea na latou va'ai i ai ma mea o lo'o tutupu e feso'ota'i. Ua latou maofa i le 'ino'ino tele o le motu o tagata iā te Ia Lē o lo'o latou lagona ai le liu suāvai o o latou loto ua nutimomoia. Ma e ui i amioga lē taupulea a le motu o tagata, ma 'upu ita a faitaulaga ma ta'ita'i, o nei fafine na fa'aalia lo latou tigā alofa. Ina ua pa'ū Iesu i lalo ifo o le satauro, sa lagona o latou leo tagi auē fa'avauvau.

(6) A O FA'AFOFOGA IFO KERISO I FAFINE O LO'O TAGIAUĒ, O LE Ā LANA FETALAIGA NA FAIA MA LONA TIGĀALOFA IĀ I LATOU A O IA SILASILA AGA'I LE LUMANA'I?

²⁸ *Ua faliu Iesu i fafine ma fetalai atu: “Tama fafine a Ieruselema e, 'aia tou te tagi iā te A' u, a ia outou tagi iā te outou atoa fo'i ma a outou fanau.”*

Luka 23:28

Ona pau lea o le leo sa tosina i ai le fa'afofoga a Keriso. E ui ina matuā lagona le mafatia a'o tau'aveina agasala a le lalolagi, Na te le'i fa'alēaogāina le fa'aalia o le fa'anoanoa. Na la silasila i nei fafine ma le alofa mutimutivale. O nisi o i latou e lē talitonu iā te Ia; na la silafia e latou te lē o lauē ona o Ia na 'auina mai e le Atua, peita'i na fa'agae'etia ona o le agaga tigāalofa fa'ale-tagata. Na la amana'ia lo latou manatu alofa, ma sa fafaguina ai i Lona finagalo se alofa mutimutivale e matuā loloto mo i latou. Na la fetalai atu, “Tama fafine a Ieruselema e, soia le tagi iā te A'u, a ia outou tagi iā te outou, 'atoa fo'i ma a outou fanau” (**Luk. 23:28**). Mai le va'aiga i Ōna luma, na silasila Keriso i lumana'i i le taimi o le fa'aumatiāga o Ieruselema. I lenā va'aiga mata'utia, o le to'atele o i latou o ē o lo'o fetagisi mo Ia o le a fa'aumatia fa'atasi ma a latou fanau.

(7) O LE Ā LE FETALAIGA A KERISO E UIGA I LE ŌLEGA A TAGATA AGASALA I LONA AFIO FA'ALUA MAI PE AFAI O LO'O AGASALA PEA I LATOU?

³⁰ *Ona latou alalaga atu lea i mauga, 'Mafuli mai iā te i matou!' e fai atu fo'i i mea maupu'epu'e, 'Inā ufiufi ifo ia iā te i matou!'"*

Luka 23:30

Mai le pa'ū o Ieruselema na fa'asolosolo manatu o Iesu i le isi fa'amasinoga e sili atu. I le fa'aumatiāga o le 'a'ai lē salamō na la silasila i le fa'ailoga o le fa'aumatiāga mulimuli o le a o'o mai i le lalolagi. Na la fetalai, *"Ona fai atu lea o tagata i mauga, mafuli mai ia ia te'i matou; E fai atu fo'i i mea maupu'epu'e, Inā ufiufi ifo ia iā te i matou. Auā afai e faia nei mea i le la'au mata, se ā se mea e faia i le la'au mago?"* (**Hose. 10:8; Luk. 23. 30, 31**). Ua fa'atusaina e Iesu la lava i le la'au mata, o le Fa'aola e lē agasala. Na fa'ataga e le Atua Lona to'asā e fa'asaga i ē agasala ia pa'ū i luga o Lona Ālo pele. O Iesu e tatau ona fa'asatauroina mo agasala a tagata. A e o le ā le puapuagā e o'o i le tagata o le a fa'aauau pea i le agasala? O i latou uma e lē salamō ma lē talitonu o le a iloa le fa'anoanoaga ma le pagātia e lē mafai e se gagana ona fa'amatalaina.

(8) I LE TAIMI UA TUANA'I, A O ULUFALE I LE MANUMALŌ KERISO I IERUSALEMA, O LE Ā LE MEA SA MUA'I 'ALAGA AI LE MOTU O TAGATA A O LEA UA 'ALAGA NEI "IA FA'ASATAURO IĀ TE IA?"

² *O le motu o tagata o ē ua muamua, ma ē o lo'o mulimuli mai ua alalaga i latou, ua fa'apea mai: "Osana i le Alo o Tavita! Ia manuia Lē e afio mai i le suafa o le Ali'i! Osana i mea e aupito i luga!"*

Mataio 21:9

Sa aofia i le motu o tagata na mulimuli i le Fa'aola i Kalevario tagata e to'atele na 'auai ma le fiasia ma osana ma tālotālo lālā la'au a o ulufale o Ia i le manumālō i Ieruselema. Peita'i e to'atele i latou o ē sa 'alalaga i Ōna vi'iga, auā sa lauiloa i lenā taimi, a o nei ua 'au fa'atasi i le 'alaga, *"Inā fa'asatauro ia o Ia, fa'asatauro o Ia."* Ina ua afio Keriso i Ieruselema, na matuā si'itia i luga le fa'amoemoe o le 'au so'o. Na latou sōsō latalata i lo latou Matai, ma le lagona o le tulaga maua luga o le feso'ota'i lea ma Ia. A o nei ina ua fa'alumaina o Ia ua latou mulimuli mamao mai. Na tumu i latou i le fa'anoanoa, ma ua punonou o latou ulu ona o fa'amoemoea ua lē taunu'u. Pagā, ua fa'amaonia nei fetalaiaga a Iesu, *"E tausuai outou uma ona o A'u i lenei lava pō; auā ua tusia, 'Ou te taia le leoleo mamoe, ona ta'ape'ape ai lea o le lafu mamoe'"* (**Mata. 26:31**).

(9) O AI NA MULIMULI IĀ KERISO I KALEVARIO MA SA MATA'UTIA LE LOTO MAFATIA A O VA'AI ATU IĀ TE IA O LO'O TAUTAU MAI I LUGA O LE SATAURO?

²⁵ *Sa tutū latalata ane i le satauro o Iesu lona tinā, ma le uso o lona tinā; ma Maria le avā a Kalopa, ma Maria le Makatala.*

Ioane 19:25

Ina ua taunu'u i le nofoāga o fa'asalaga, na saisaitia loa pagotā ta'ito'atasi i mea e fa'ataunu'u ai fa'asalaga. O pagotā faomea e to'alua ua taumafai e tete'e i lima o i latou na tu'ua i la'ua i satauro; a e peita'i o Iesu e le'i tete'e atu. O le tinā o Iesu, o lo'o fesoasoani i ai Ioane le so'o alofaina, na mulimuli atu i tulaga 'a'ao o lana Tama i Kalevario. Na ia va'ai o pa'ū o Ia i lalo o le 'avega o le satauro, na ia mo'omo'o e tu'uina se lima lagolago i lalo o Lona ao ua manu'a, ma fa'amāmā i Lona ao sa masani ona fa'alagolago i lona fatafata. Peita'i ua ia lē maua lea avanoa fa'amomoi loto. E fa'atasi ai ma le 'au so'o sa i ai pea i lona loto le fa'amoemoe o le a fa'aalia e Iesu Lona mana, ma la fa'asaoina ai o Ia lava mai Ōna fili. A e ua toe fāi ifo lona loto ina ua ia toe manatua Āna afioga na valo'ia ai va'aiga o lea ua fa'ataunu'uina nei. A o fusifusia faomea i satauro, na ia va'ai atu ma le agaga mafatia. Pe mata ea o le a fa'asatauroina Lē sa tu'uina atu le ola i ē na oti? Pe o le Ālo o le Atua o le a Ia fa'atagaina lava o Ia i se maliu e fa'apea le mata'utia? E tatau ea ona tu'u'esea lona fa'atuatua o Iesu le Mesia? O se mea ea e tatau iā te ia ona molimauina Lona fa'alumaina ma le mafatia, e aunoa ma se avanoa e 'au'auna ai iā te Ia i Ōna puapuagā? Na ia va'aia Ōna 'a'ao ua fālō i luga o le satauro; ua aumai le samala ma fao, ma a o tutū'iina fao i Ōna 'a'ao, o so'o fa'anoanoa ua latou 'ave'esea le tinā o Iesu mai lea va'aiga sauā.

(10) O LE Ā LE TATALO, E TUMU I LE ALOFA MUTIMUTIVALE MA LE TIGĀALOFA NA ŌLE ATU AI KERISO I LE ATUA MO I LATOU O LO'O TUTU'I O IA I LE SATAURO?

³⁴ *Ona fetalai atu lea o Iesu: "Lo' u Tamā e, ia e fa'amagaloina atu iā te i latou, auā ua latou lē iloa le mea ua latou faia." Ua latou tufatufa fo' i Ōna ofu ona fai ai lea o le vili.*

Luka 23:34

E le'i i ai se si'ufofoga fa'asea o le Fa'aola. Na to'afilēmū pea Ōna fofoga, peita'i o le āfu toto sa sisina ifo mai Lona ao. E leai se lima alofa e solo 'esea le sau o le oti mai Ōna fofoga, po o ni 'upu fa'amafanafana ma le fa'amaoni e fa'ato'afilēmū ai Lona finagalo. A o faia pea le galuega mata'utia a fitafita, sa tatalo Iesu mo Ōna fili, *“Lo'u Tamā e, ia e fa'amagaloina atu iā te i latou, auā ua latou lē iloa le mea ua latou faia”* (Luk. 23:34). Ua mavae 'ese mai Lona manatu i Ōna ia lava puapuagā, a e ua manatu iā i latou o lo'o fa'asauā iā te Ia ma le tau mata'utia o le a latou maua. Na te le'i fetu'uina fitafita o ē na so'ona fa'asauā iā te Ia. Na lē tau ma sui i ositaulaga ma ta'ita'i o ē na tinoū ia fa'ataunu'uina la latou galuega. Na tigā alofa Keriso ona o lo latou lē iloa ma le nofo sala. Na Ia mānavaina na o le talosaga mo lo latou fa'amagaloga—*“Auā ua latou lē iloa le mea ua latou faia.”*

(11) O LE Ā LE VALA'AU A KERISO NA TU'UINA MAI MO I LATOU UMA E TALIA O IA E FAI MA O LATOU FA'AOLA?

³⁴ *Ona vala'au atu lea o Ia i le motu o tagata, atoa ma Ōna so'o, ua fetalai atu lea iā te i latou: “Ai se fia mulimuli mai iā te A' u, 'aua ne'i usiusita'i o ia iā te ia, a ia 'ave i ia lona satauro, i le mulimuli mai ai ia te A'u.”*

Mareko 8:34

Pe ana fai latou te iloina o lea o lo'o latou fa'asauā i Lē na afio mai e lavea'i le fanau agasala mai le malaia e fa'avavau, se manū e latou te maua le matuā salamō ma le matata'u. Peita'i o lo latou pōuliuli e lē 'ave'esea ai lo latou nofo sala; auā o lo latou tofi le iloa ma le talia o Iesu o lo latou Fa'aola. O nisi o i latou na iloa la latou agasala ma salamō, na liua. O nisi e ala i lo latou lē salamō, ua lē mafai ai ona talia le tatalo a Keriso mo i latou. Peita'i, e tusa lava, o le finagalo o le Atua ua aga'i i le fa'ataunu'uina. O Iesu o lo'o sa'ilia e Ia le aiā e 'avea ai o Ia ma puluvaga mo tagata i luma o le Tamā.

O le tatalo a Keriso mo Ōna fili e aofia uma ai le lalolagi. E fa'atasi mai i ai ē agasala na ola i le taimi ua mavae, ma tagata ola i le lumana'i, mai le amataga o le lalolagi e o'o i le i'uga. E nofo sala uma tagata i le fa'asatauroina o le Ālo o le Atua. E ofoina le fa'amagaloga i tagata uma. “So'o se tasi” e maua e ia le filēmū o le Atua, ma le ola e fa'avavau.

(12) O LE Ā LE FA'AALIGA MATA'UTIA NA FAIA E IUTAIA UA FA'AMAU AI E FA'AVAVAU LE FA'ATAFUNAGA O I LATOU O LE NU'U FILIFILIA O LE ATUA?

¹⁵ *A e peita' i, ua latou alalaga mai: “Ia fasioti o Ia! Ia fasioti o Ia! Inā fa'asatauro iā te Ia!” A ua fai atu Pilato iā i latou: “Ou te fa'asatauro ea i lo outou tupu?” Ua tali mai le ' aufaitaulaga sili iā te ia: “E leai so matou tupu ua na o Kaisara.”*

Ioane 19:15

Ina ua mae'a ona tutū'i Iesu i le satauro, na si'itia e tagata mālōlosi ma fa'atūina i le mea ua uma ona saunia. Na matuā mafatia le Ālo o le Atua. Ona tusia lea e Pilato o le 'upu i gagana Eperu, Eleni, ma Roma ma tu'u i luga o le satauro, i luga a'e o Lona ao. Ua faitauina, “O IESU LE NASARETA LE TUPU O IUTAIA.” O lenei fa'aupuga na lē fiafia ai Iutaia. I le maota o Pilato na latou 'alalaga ai, “Inā fa'asatauro ia; e leai so matou tupu na'o Kaisara” (Ioa. 19:15). Na latou fa'ailoa o se tasi na te fa'ailoa se isi tupu o le fa'alata. O Pilato na tusia lo latou mana'o na fa'aalia. E leai se sala na ta'ua, vaganā o Iesu o le Tupu o Iutaia. O le tusi ua fa'ailoa ai le fa'amaoni o Iutaia i le pule a Roma. Ua fa'ailoa ai so'o se tasi e fa'apea mai o le tupu o Isara'elu e fa'amasinoina ma e tatau i ai le oti. O ositaulaga ua sili atu le mea ua latou fai i lo le mea sa tatau ona o'o i ai. A o latou taupulepule le fasiotia o Keriso, na fa'ailoa e Kaiafa, “Ua aogā pe a fāno se tagata to'atasi e sui a'i le nu'u” (Ioa. 18:14). A o lenei ua fa'aalia lo latou fa'afoliga. Ina ia fa'aumatia Keriso, na latou sauni e ofo atu e o'o lava i ola o lo latou nu'u.

Ua va'aia e ositaulaga le mea ua latou faia, ma latou talosaga ina ia suia le tusi i le mea na molia ai o Ia i luga a'e o Lona ao. Na latou fai atu, “Aua e te tusi, o le tupu o tagata Iutaia; a ia fa'apea, ua fai mai o ia, 'O a'u o le tupu o tagata Iutaia.” A'o Pilato ua lē fiafia iā te ia lava ona o lona vaivai, ma sa ia matuā 'ino'ino i le matau'a ma le faitogafiti o ositaulaga ma toea'ina. Na ia tali atu, “O le mea ua 'ou tusia, ua 'ou tusia lava.” (Ioa. 19:21).

(13) O Ā MANATUNATUGA A Ē O LO'O FAIMALAGA AGA'I IERUSALEMA INA UA LATOU VA'AIA LE SATAURO MA FAITAU I 'UPU O TUSIA AI LUGA PEI ONA FA'ATONUINA E PILATO?

²⁹ *Ua fa'atauemu iā te Ia tagata ua ui ane, ua lūlū o latou ulu ma fa'apea mai: "Ue! O 'Oe na o Lē lepeti le malumalu ma toe faia i aso e tolu."*

Mareko 15:29

O le pule e sili atu iā Pilato po'o lutaia na fa'atautaia le tu'uina o le tusi i luga a'e o le ao o Iesu. O le finagalo o le Atua ia fafagu manatu o tagata ma su'esu'e ai i Āna afioga. O le nofoāga na fa'asatauroina ai Iesu e latalata i le 'a'ai. E afe ma afe tagata mai isi nu'u na i ai i Ierusalemā, ma o le tusi o lo'o fa'aailoa o Iesu le Nasareta o le Mesia o le a latou mātāuina. O le 'upu moni o lo'o olaola pea na tusia e le lima na ta'ita'iina e le Atua.

(14) O LE Ā LE MEA NA TUSIA E FA'ATATAU I 'OFU O KERISO MA SA FA'ATAUNU'UINA AI LE VALO'AGA O LE FEAGAIGA TUAI?

¹⁸ *Ua latou tufatufa O' u ofu iā i latou, ma ua latou fai le vili i Lo' u ofu.*

Salamo 22:18

I puapuagā o Keriso i le satauro na taunu'u ai valo'aga. I seneturi ua mavae, a'o le'i o'o i le fa'asatauroina, na valo'ia e le Fa'aola puapuagā o le a o'o iā te Ia. Na Ia fetalai, "*Auā ua si'osi'omia A'u e uli; ua punitia A'u e le vao o tagata amio leaga; ua tu'ia e i latou O'u lima ma O'u vae. 'Ou te mafai ona faitau O'u ivi uma; o i latou, ua latou va'ava'ai mai, ua matamata mai iā te A'u. Ua latou tufatufa O'u ofu mo i latou, ma latou fai le vili i Lo'u ofu tino*" (**Sala. 22:16-18**). O le valo'aga e uiga i Ōna ofu na taunu'u lava e aunoa ma le aiā mai o Āna uō po o Ōna fili fo'i. O fitafita na fa'asatauro iā te Ia sa latou 'ave'esea Ōna ofu. Na fa'afōfoga Keriso a'o latou tufatufa Ōna ofu mo i latou. O Lona ofu tino e leai se su'iga, ua lalaga 'ato'atoa, na latou fa'apea ane, "Aua tatou te saeia, a'e se'i tatou fai ai le vili po o ai lē fai mona" (**Ioa. 19:22, 23**).

(15) O LE Ā LE MEA NA FAIA E KERISO INA UA IA TOFO LE VINETA NA LATOU TU'U ATU IĀ TE IA E FA'AITHITIA AI LE TIGĀ?

Ona latou avatu lea ia te Ia le vineta ua fefiloi ma le la'au o'ona, ia inu ai; ua tofotofa e Ia, a ua lē mafai ona inu ai.

Mataio 27:34

O le isi fo'i valo'aga na fa'aalia ai e le Fa'aola, "*O le luma na momomo ai Lo'u loto, ua ma'i lava A'u; na ou fa'atalitali fo'i i se na te fa'amatalaloto mai, a e leai lava se tasi, a e leai se isi na 'Ou maua. Na latou avane le mea o'ona e fai Ma'u mea e 'ai; ua 'Ou fia inu ona latou avane ai lea le vineta 'Ou te inu ai*" (**Sala. 69:20, 21**). E mo i latou na mafatia i le oti i le satauro, na fa'ataga ona avatu i ai se mea inu e fa'agalo ai le tigā ma le mafatia. Na ofoina atu lenā mea inu iā Iesu; a e ina ua la tofoina, na Ia lē inuina. Na Ia lē talia se mea inu e fa'anefu ai Lona mafau. E tatau lava ona taofi mau Lona fa'atuatua i le Atua. Ona pau lenā o Lona mālōsi'aga. O le nenefu o Lona mafau o le a maua ai e Satani le avanoa e manumālō ai.

(16) I LE GAGANA FA'AVALO'AGA, SA FA'APEFEA ONA FA'AMATALAINA LE ALA SA UIA E KERISO I KALEVARIO?

² *"Ua 'Ou solia to' atasi le tu'ugāuaina, a o le nu'u sa leai so latou e to'atasi iā te A' u. Na 'Ou solia i latou i Lo' u ita, ma ua 'Ou solia lava i latou i Lo' u tigā. Na pisia O'u ofu i o latou toto, ua leaga ai O'u ofu uma."*

Isaia 63:3

O fili o Iesu na latou matuā fa'aailoa lo latou ita tele a'o Ia tautau i luga o le satauro. O faitaulaga, tusi'upu, ma ta'ita'i na latou fa'aopoopo i le motu o tagata i le tauemuina o le Fa'aola. I Lona papatisoga ma le mauga o le liliūga na fa'alagoina le si'ufofoga o le Atua o fa'aailoa mai o Keriso o Lona Ālo. Na toe fetalai fo'i le Tamā a o le'i o'o i le fa'alataina o Keriso ma le molimau i Lona itū Atua, peita'i o nei ua lē lagona le si'ufofoga mai le lagi. Ua leai se leo e molimau ma lagolagoina ai o Ia. Ua na'o Ia ua mafatia i le sauāina ma le tauemuina e tagata amioleaga.

(17) A O 'AU'AUMEA FA'ATASI TA'ITA'I FA'ALEAGAGA MA SATANI I LONA ITA TELE IĀ KERISO, O Ā 'UPU FAIFAI NA FA'ALOGAINA MAI TAGATA IUTAIA, E FA'APEI FO'I O TU'UA'IGA A SATANI?

³⁵ *Ua tutū tagata ma va'ava'ai mai. A ua tauemu o ē e ta' ita' i ma fa'apea mai: "Sa Ia fa'aolaina isi; ia fa'aola e Ia iā te Ia pe afai o Ia o le Keriso a le Atua, o Lē ua Filifilia."*

Luka 23:35

"Afai o 'Oe le Ālo o le Atua," ua latou fa'apea mai, "inā alu ifo ia i le satauro." "Inā fa'aola ia iā te ia pe afai o le Keriso lē na filifilia e le Atua" (**Luk. 23:55**). O le fa'aosoosoina i le vao na fa'ailoa atu ai e Satani, "Afai o 'Oe le Ālo o le Atua, inā fetalai atu ia ia liu areto nei ma'a," "Afai o 'Oe le Ālo o le Atua, oso ia 'Oe i lalo," mai le tumutumu o le malumalu (**Mata. 4:3, 6**). Ma o Satani ma āna agelu i tino tagata na fa'atasi ai i le satauro. O le fili ma āna 'au na galulue fa'atasi ma faitaulaga ma ta'ita'i. Na fa'aosofia e a'oa'o le motu o tagata lē taupulea ina ia latou fa'aleo le fa'asalaga e fa'asaga i Lē e leai se sala, a e o le to'atele o i latou e le'i va'ai muamua iā te Ia se'ia o'o ina u'una'iina i latou e molimau pepelo e fa'asaga iā te Ia. O faitaulaga, ta'ita'i, Faresaio, ma tagata lē taupulea na latou 'au'aumea fa'atasi ona ua ulutinoina e le ti'apolo. Ua 'au fa'atasi ta'ita'i fa'aleagaga ma Satani ma āna agelu. Ua latou fa'ataunu'uina le mea e fai atu ai.

O Iesu, a o mafatia ma ua lata ona maliu, o lo'o Ia fa'afōfoga i 'upu uma na fa'ailoa e faitaulaga, "Na Ia fa'aolaina isi tagata, e lē mafai e Ia ona fa'aola iā te Ia. Afai o le tupu o Isara'elu o Ia, inā alu ifo nei lava o Ia i le satauro, ona tatou talitonu ai lea iā te Ia" (**Mata. 27:42**). Na mafai e Keriso ona Ia maliu ifo mai le satauro, a e ona o Lona lē lavea'i iā te Ia lava ua maua ai le fa'amoemoe o le tagata agasala mo le fa'amagaloina ma lelei ai ma le Atua.

(18) O Ā 'UPU TAUĒMU NA 'ALAGAINA, O LO'O LAGONA PEA MAI AUGĀ TUPULAGA E TA'ITA'IINA AI TAGATA IA SU'ESU'E I AFIOGA PA'IA MA IA MAUA AI LE 'UPU MONI E UIGA I LE FA'AOLATAGA E ALA I LE MALIU O KERISO I LUGA O LE SATAURO?

⁴³ *Na fa'atuatua o Ia i le Atua; se' i tu'u atu la i le Atua e na te lavea' iina o Ia pe a finagalo malie iā te Ia, auā ua Ia fa'apea mai, 'O A' u o le Atali'i o le Atua.'"*

Mataio 27:43

I lo latou tauemu i le Fa'aola, o i latou o lo latou tofiga o le fa'amatalaina o valo'aga o lenei ua latou tautala i 'upu tonu ia na valo'ia o le a latou faia i le aso lenei. Peita'i o lo latou tauaso na latou lē va'ai ai o lo'o latou fa'ataunu'uina le valo'aga. O i latou na lafo 'upu faifai ma fa'apea atu, "Na fa'atuatua ia i le Atua, ia Na lavea'i mai nei o Ia iā te Ia, afai e finagalo o Ia iā te Ia; auā na Ia fai mai, 'O A'u le Atali'i o le Atua'" (**F. 43**), latou te le'i manatu o la latou molimau o le a lagona i taimi o lo'o mulimuli mai. Peita'i e ui ina sa lafoina nei 'upu o le tauemu, o ia 'upu na ta'ita'iina ai nisi tagata latou te su'esu'e i le Afioga a le Atua a e le'i fa'apea muamua. O tagata popoto na latou fa'alogi, su'esu'e, mafaufau, ma tatalo. E i ai nisi na latou mautala ma fa'atusatusa tusitusiga se'ia o'o ina latou maua le uiga o le galuega a Iesu. E le'i i ai muamua se malamalama'aga iā Iesu nai lo le taimi a o tautau o Ia i luga o le satauro. O le to'atele o i latou na maimoa i le va'aiga o Lona fa'asatauroina, na fa'alogi i afioga a Keriso, ma iloa ai le malamalama o le 'upu moni.

(19) O LE Ā LE MOLIMAU A LE PAGOTĀ I LUGA O LE SATAURO NA FA'AALIA AI UA TALITONU IA O KERISO, I LONA MAMALU FA'A-ATUA, UA NA O SE TAGATA LĒ AGASALA UA SAUĀINA I FAIGA LĒ TONU?

⁴¹ *Auā o i ta' ua, ua tonu lava la ta sala, ua tauia fo' i i ta' ua e tusa ma mea ua ta faia; a o lenei tagata, e leai se mea e sala ai o Ia."*

Luka 23:41

A o mafatia Iesu i le satauro, na i ai sina ataata o le fa'amafanafanaga, o le tatalo a le pagotā na salamō. O pagotā e to'alua na fa'asalaina fa'atasi ma Iesu na tauemu iā te Ia; ma o le tasi ua 'avea ōna puapugā ma mafua'aga na atili ai ona atuavale ma tete'e atu. Peita'i e le'i fa'apenā le isi. O lenei tagata e lē o se pagotā loto ma'a'a; na ia mulimuli i ta'ita'iga sesē a ē na latou 'au fa'atasi, a e itiiti ifo lona nofo sala i le to'atele o i latou na tutū latalata i le satauro ma tauemu i le Fa'aola. Na ia va'ai ma fa'alogi iā Iesu, ma ia talitonu i Āna a'oa'oga, a e na tosina 'ese mai iā te Ia e faitaulaga ma toea'ina. O lona sa'ili e tineia lona talitonuga, na pa'ū atu ai o ia i le loloto o le agasala, se'ia o'o ina pu'eina ma fa'amasinoina o le tagata solitulafono e tataua ona oti i le fa'asatauroina. I le maota fa'amasino a o aga'i atu ai i Kalevario, na la fa'atasi ai ma Iesu. Na ia fa'alogi i le fa'ailoa mai e Pilato "Ou te lē iloa se mea e sala ai o Ia" (**Ioa. 19:4**). Na i ai pea Ōna fofoga fa'ale-Atua, ma Lona alofa mutimutivale ma le fa'amagalo i ē na fa'asauā iā te Ia. I luga o le satauro na ia va'aia ai i le to'atele o le 'au fai tapua'iga o latou lafoa'i 'upu taufaifai ma tauemu i le Ali'i. Na ia va'ai i le lialia'i o o

latou ulu. Na ia fa'alogo i 'upu leaga na faia fo'i e lana pa'aga, "Afai o 'Oe o le Keriso, inā fa'aola ia 'Oe iā te 'Oe 'atoa ma i ma'ua nei" (**Luk. 23:39**). E aofia ai i ē na ui ane, na ia fa'alogoina nisi o lo'ō latou puipui Iesu. Na ia fa'alogo i nisi o i latou o lo'ō toe tautala i Āna 'upu, ma talatalanoa i ai. Na toe fo'i mai lona talitonuga o Ia lava lenei o le Keriso. Na ia liliu atu i lona uso a pagotā ma fa'apea atu, "E te lē mata'u 'ea i le Atua, ina ua tatou sala fa'atasi?" O pagotā ua aga'i i le oti e leai se mea e toe fefefe ai i tagata. A e o le tasi na ia lagona le talitonuga e i ai le Atua e ao ona mata'u i ai, ma le lumana'i e gatete ai. A o nei, ua ufitia i le 'ele'elea o le agasala, o le tala fa'asolopito o lona olaga ua lata ona tapunia. "Ua tonu lava la ta sala," o lana auē lea; "auā ua tauia mai i ta'ua e tusa ma mea na ta faia; a o Ia nei, e leai se mea e lē tusa na faia e Ia" (**Luk. 23:40, 41**).

(20) O LE Ā LE ŌLEGA MAI LE LOTO UA MATUĀ SALAMŌ O LE FAOMEA INA UA ILOA O KERISO O LE ĀLO O LE ATUA?

⁴² *Ona fa'apea mai lea o ia iā Iesu, Le Ali'i e, ia e manatua mai a' u, pe a e afio mai i Lou malo."*
Luka 23:42

O nei e leai se fesili. E leai ni masalosologa, e leai ni a'oa'iga. Ina ua fa'asalaina ona e 'auai i soligā tulafono, na o'ō ifo i le pagotā le leai o se fa'amoemoe a e na o le atuatuvaile; a e o le tulaga e 'ese ua o'ō mai, o mafaufauga to'afilēmū ua tupu a'e na toe manatua ai tala na ia fa'alogo ai e uiga iā Iesu, na Ia fa'amālōlō ai i ma'i ma fa'amagaloina agasala. Na ia fa'alogo i 'upu a i latou ē o lo'ō fetagisi ua talitonu iā Iesu ma mulimuli iā te Ia. Na ia va'ai ma faitau i 'upu o lo'ō tusia i luga a'e o le ao o le Fa'aola. Na ia fa'alogo iā i latou o lo'ō faitau i ai a o ui ane, o nisi o lo'ō fa'anoanoa, a o isi o lo'ō tauemu ma taufaifai. Na fa'amalamalamaina e le Agaga Pa'ia lona mafaufau, ma fa'asolosolo ai ina fa'afeso'ota'i o fa'amaoniga i mea o lo'ō tutupu. O lo'ō ia va'aia Iesu ua sauāina, tauemuina, o lo'ō tautau i luga o le satauro, na ia va'aia ai le Tama'i Mamoe a le Atua, o Lē 'ave'esea le agasala a le lalolagi. Na fefiloi le fa'anoanoa ma le mafatia i lona leo ina ua leai se mea na te mafaia, a o lafoa'i atu ia lava i le Fa'aola. "Le Ali'i e, ia e manatua mai a'u," o lana tagi lea, "Pe a e afio mai i Lou mālō" (**Luk. 23:42**).

(21) O LE Ā LE TALI ALOFA LAVA NA FAIA E KERISO?

Ona fetalai atu ai lea o Iesu iā te ia, "E moni, 'Ou te fai atu iā te 'oe i le asō, ta te fa'atasi ma 'oe i Parataiso."
Luka 23:43

Na vave ona ia maua le tali. I le si'ufofoga mālū ma le mālīe, o afioga e tumu i le alofa, fa'apalepale, ma le mana na Ia fetalai atu ai, "*E moni, 'Ou te fai atu iā te 'oe; ta te fa'atasi ma 'oe i Parataiso*" (**F. 43**).

Mo itūlā e tele o mafatiāga, o 'upu faifai ma tauemuga na fa'afofoga i ai Iesu. A o Ia tautau i le satauro, na alu a'e pea le leo o 'upu leaga ma le taufaifai. Na mo'omo'o Lona finagalo e fia fa'afofoga i se fa'aaliga o le fa'atuatua mai Ōna so'o. A e na Ia fa'afofogaina na o 'upu fa'anoanoa, "Na tatou talitonu o Ia e Na te fa'aolaina Isara'elu." Oi le fa'afetai o le Fa'aola i le ta'uina o le fa'atuatua ma le alofa e le pagotā faomea ua lata ona oti! A o fa'afitia e ta'ita'i Iutaia o Ia, e o'o fo'i i le 'au so'o na masalosalo i Lona itū Atua, o lenei faomea, ua toe o se tuā'oi mai le fa'avavau, a e ua ia ta'uina Iesu o le Ali'i. E to'atele i latou na sauni e ta'uina o Ia o le Ali'i a o Ia faia vavega, ma ina ua mavae Lona toe tū mai le tu'ugamau; a e leai se isi na fa'aailoa o Ia a o Ia tautau i luga o le satauro vaganā le pagotā na salamō, o lē na fa'asaina i le itūlā mulimuli.

(22) O LE Ā LE VALO'AGA FA'AMAFANAFANA SA TU'U MAI E ISAIA E FA'ATATAU I LE MANA FA'ALE-ATUA O KERISO E FAIA AI MA "LĒ E TAU'AVEINA AGASALA?

Fa'auta, e le'i fa'apu'upu'uina le 'a'ao o leova, ia lē mafa'aola; e lē tutuli fo'i Ōna taliga, ia lē mafa'afofoga.
Isaia 59:1

Na fa'alogo ē na tutū lata ane a o ta'u e le pagotā Iesu o le Ali'i. O le leo o le tagata salamō na ua'i i ai la latou fa'alogo. O i latou na i lalo o le satauro sa fefinaua'i i ofu o Keriso, ma fai le vili i Lona ofu tino, ua latou fa'atali ma fa'alologologu. Na taofia o latou leo ita. Na fa'aititia lo latou pisapisaō ma va'ai atu iā Keriso, ma fa'atalitali i se tali mai fofoga o Ia ua lata ona maliu.

A o Ia fetalai atu i afioga o folafolaga, o le ao pogisā na foliga mai ua ufitia ai le satauro na sulugia e se pupula ma se malamalama ola. O le pagotā salamō na o'ō i ai le filēmū 'ato'atoa o le taliaina e le Atua. O Keriso i Lona fa'amaulaloina ua

fa'amamaluina. O Ia Lē ua va'aia e isi tagata uma e foliga mai ua to'ilalo, a e ua manumālō. O Ia ua ta'ua o Lē e tau'aveina agasala. E mafai ona fa'aailoa le pule a tagata i Lona tino. E mafai ona latou fa'amanu'alia Lona ao pa'ia i le pale tuitui. E mafai ona latou ave 'ese Ōna ofu ma fefinaua'i i le vaevaeina. Peita'i latou te lē mafai ona faoa Lona mana e fa'amagalo ai agasala. I Lona maliu na Ia fa'aailoa ai le molimau i Lona itū Atua ma le mamalu o Lona Tamā. E lē punitia Lana fa'afofoga ua Ia le lagona ai, e le'i fa'apu'upu'uina fo'i Lona 'a'ao ia lē mafa'aola ai. O Lana aiā fa'atupu e lavea'i ai i le mea e gata mai ai ia i latou uma o ē ō atu i le Atua e ala atu iā te Ia.

(23) I LE ASO NA TOE TŪ A'E AI KERISO, O Ā 'UPU NA FA'AALI MANINO MAI AI E LE'I AFIO A'E IA I LE LAGI FA'ATASI MA LE FAOMEA I LE ASO LAVA NA MALILIU AI?

Ua fetalai atu Iesu iā te ia, "'Aua e te tago mai iā te A'u, auā 'Ou te le'i alu a'e i Lo'u Tamā ma lo 'outou Tamā. A e ia e alu i O'u uso, ma fai atu iā te i latou, 'Ou te alu a'e i Lo'u Tamā ma lo outou Tamā, i Lo'u Atua ma lo outou Atua.'"

Ioane 20:17

*"'Ou te fai atu iā te 'oe i le aso nei, Ta te fa'atasi ma 'oe i Parataiso.'" E le'i folafola e Keriso o le a Ia fa'atasi ma le pagotā i le Parataiso i le aso lenē. E le'i afio a'e o Ia i le aso lava lea i le Parataiso. Na Ia tofā i le tu'ugamau, ma i le taeao o le toetū na Ia fetalai ai, **"Ou te le'i alu a'e i Lo'u Tamā"** (Ioa. 20:17). Peita'i o le aso na fa'asatauro ai, o le aso na foliga mai ua to'ilalo ma pogisā, na tu'u atu ai le folafolaga. **"O le aso nei"** a'o maliu i luga o le satauro o le tagata solitulafono, na ta'utino ai Keriso i le pagotā, E te fa'atasi ma A'u i le Parataiso (Luk. 23:43).*

(24) O AI SA FAITAUINA FA'ATASI MA KERISO A O IA TAU'AVE A TATOU AGASALA MA FAI MA PULUVAGA MO A TATOU SOLITULAFONO?

O le mea lea 'Ou te vaevaea ai se vaega mo Ia fa'atasi ma ē ua sili, e vaea fo'i le vete fa'atasi ma ē fitafita ona ua Ia sasa'a atu Lona ola ia oti; na faitauina fo'i o Ia fa'atasi ma ē pagotatā; na Ia 'aveina fo'i le agasala a tagata e to'atele, ua fautua fo'i o Ia mo ē solitulafono.

Isaia 53:12

O pagotā ua fa'asatauroina fa'atasi ma Iesu, "o le tasi i le itū taumatau, ma le tasi i le itū tauagavale" (Mare. 15:27). Na faia lenēi tulaga ona o le fa'atonuga a faitaulaga ma ta'ita'i. O Lona tulaga ogātonu i le vā o pagotā e fa'aailoa ai o Ia le pagotā e aupito mamafa Lana solitulafono o i latou e to'atolu. Ua taunu'u ai fo'i le Afioa a le Atua, "Na faitauina fo'i o Ia fa'atasi ma e pagotāta" (Isa. 53:12). Peita'i o le 'atoa o le uiga o a latou amio e le'i iloa e faitaulaga. A o fa'asatauroina Iesu fa'atasi ma faomea, ua tu'u "i le ogātonu," e fa'apena ona tu'uina Lona satauro i totonugalemū o le lalolagi agasala. Ma o 'upu fa'amagalo na Ia fetalai atu ai i le pagotā na salamō ua tutuina ai le malamalama o le a susulu i tulimanu uma o le lalolagi.

Na maofa agelu a o latou mata'i le alofa silisili 'ese o Iesu, o Lē e ui ina o lo'o mafatia i puapuagā faigatā o le tino ma le mafaufau, na manatu mo isi, ma fa'amalosī i le agaga ua salamō ia talitonu. I Lona fa'amaulaloina, o Ia o le perofeta na fetalai i tama fafine a Ierusalemā, o lo'o Ia fautua i le Tamā ina ia fa'amagalo ē o le a fasioti iā te Ia, ma o Ia le Fa'aola alofa na fa'amagaloina agasala a le pagotā na salamō.

(25) INA UA SILASILA IFO KERISO I LONA TINĀ UA TOE FO'I ANE I LE SATAURO, O Ā 'UPU ALOFA NA IA FETALAI ATU AI IĀ TE IA MA IOANE?

Ua silasila atu Iesu i Lona tinā, ma le so'o ua alofaina e Ia, ua tutū mai, ona fetalai atu lea o Ia i Lona tinā, "Sena e, fa'auta, o Lau tama." Ua fa'apea atu fo'i i lea so'o, "Fa'auta, o lou tinā." Talu fo'i lea itu aso ua 'ave o ia e lea so'o i lona aiga.

Ioane 19:26, 27

A o silasila solo Iesu i le motu o tagata o lo'o si'omia o Ia, na Ia matauina se tasi. I lalo ifo o le satauro o lo'o tū ai Lona tinā, o lo'o fa'alagolago i le so'o o Ioane. Na ia lē mafai ona nofo 'ese mai lona Ālo; ma o Ioane, na ia iloa ua lata mai le i'uga, ua aumai o ia i le satauro. A o latalata Lona maliu, na manatua pea e Keriso Lona tinā. A o Ia silasila atu i foliga mafatia i le fa'anoanoa, na toe silasila atu iā Ioane ma Ia fetalai atu loa i Lona tinā, **"Sena e, fa'auta, o lau tama! Ua fa'apea fo'i iā Ioane, Fa'auta, o lou tinā!"** (Ioa. 19:26, 27). Na malamalama Ioane i afioa a Keriso, ma ia talia le fa'atuatuāga ua tu'uina atu iā te ia. Talu mai fo'i lea itū aso sa 'ave

o ia e lea so'o i lona aiga (F. 28). Talofa i le alofa mutimutivale o le Fa'aola. I totonugalemū o Ōna mafatiāga ma puapuagā o le tino fa'apea le mafaufau, na Ia manatu mamafa i le tausiga o Lona tinā! E leai se tupe na te avatua e tasi ai o ia; peita'i na fa'atāuaina o Ia i le loto o Ioane, ma sa Ia tu'uina Lona tinā iā te ia e 'avea o se tofi tāua. O lea ua saunia mo ia le mea e aupito sili na te mana'omia,-- o le tigā alofa o lē e alofa iā te ia auā o ia fo'i na alofa iā Iesu. Ma o le taliaina e Ioane o ia o se tofi tāua, na maua ai e Ioane se fa'amanuiāga tele. O Maria o le fa'amanatu sa tumau iā te ia o lona Matai pe le.

(26) O LE Ā LE POLOA'IGA NA TAUSIA E KERISO INA UA IA FAIA SE TU'UTU'UGA MO LE TAUSIGA O LONA TINĀ?

Ia e āva i lou tamā ma lou tinā, ina ia fa'alevave ai ōu aso i le nu'u o le a foa'iina mai e Ieova lou Atua iā te 'oe.

Esoto 20:12

O le fa'ata'ita'iga 'ato'atoa o le alofa lē mavae o Keriso na susulu mai e lē o fa'anefu lona pupula i augā tupulaga. E latalata i le tolu sefulu tausaga na fesoasoani ai Iesu i aso fai so'o i le tau'aveina o 'avega i le aiga. A o nei, e ui lava i Ōna toe puapuagā, sa Ia manatua pea le tausiga mo Lona tinā fa'anoanoa ua leai sana tāne. O le agaga fo'i lea e tasi o le a va'aia i so'o uma lava o le Ali'i. O i latou uma e mulimuli iā Keriso e latou te lagona o le tasi lea vaega o la latou tapua'iga, o le fa'aaloalo ma le tausia o o latou mātua. E mai le loto e fa'apelepeleina Lona alofa, o le tamā ma le tinā e lē mavae le manuia o le mafaufau alofa i lo la'ua tausiga.

(27) O LE Ā LE 'ALAGA E MATUĀ MAFATIA LAVA NA FA'ALOGOINA MAI LAUFOFOGA O KERISO INA UA IA LAGONA UA TO'ESEA LE FA'ATASI MAI O LE TAMĀ?

Ua lata i le itu aso e iva, ona alaga ai lea o Iesu ma le leo tele, ua fa'apea atu, "Eli, Eli, lama sapatani?" O lona uiga lenei, "Lo'u Atua e, Lo'u Atua e, se ā le mea ua e tu'ulafoa'i mai ai A'u?"

Mataio 27:46

A o lenei ua lata ina malii le Ali'i o le mamalu, o le togiola mo le fanau a tagata. I le tu'uina atu o Lona soifua pa'ia, e le'i si'itia o Ia i le 'oli'oli o le manumālō. O mea uma ua na o le pōuliuli o le to'ilalo. E lē o le mata'utia o le oti na mamafa iā te Ia. E lē o le tigā o le 'inosia ma le fa'alumaina i le satauro na mafua ai Lona mafatia e lē mafai ona fa'amatalaina. O Keriso o le āloali'i o ē puapuagātia; a o Lona mafatia na mai le lagona o le mata'utia o le uiga o le agasala, o le iloa pe a masani ma le amio leaga, ua fa'atauasoia ai tagata i lona mata'utia. Na silafia e Keriso le loloto o le taofi a le agasala i le loto o le tagata, ma le to'aititi o i latou e loto malilie ia sosola 'ese mai lana pule. Na Ia silafia a aunoa ma le fesoasoani mai le Atua, o le a tatau ona fano le aigā tagata, ma na Ia silafia fo'i le to'ele o i latou o le a fano a o latalata lava i le fesoasoani.

Na i luga o Keriso le suitulaga mo i tatou, a tatou soliga tulafono ina ia togiola ai i tatou mai le fa'asalaga a le tulafono. O le nofo sala a i latou uma na tutupu mai iā Atamu ua mamafatū i Lona finagalo. O le to'asā o le Atua e fa'asaga i le agasala, o le fa'aalia o Lona lē fiafia ona o le amioleaga, ua fa'atumuina ai le finagalo o le Ālo o le Atua i le fa'anoanoa tele. O le soifuāga 'atoa o Keriso na Ia tala'i i le lalolagi ua pa'i le tala lelei o le alofa tunoa o le Tamā ma Lona finagalo alofa e fa'amagaloina ai. O le fa'aolataga mo ē aupito agasala o le autū lea o Lana fea'u. A o nei o le mata'utia o le mamafa o le fa'asalaga na te tau'aveina, ua Ia lē va'aia ai fofoga fa'amagalo o le Tamā. O le to'esea o fofoga o le Atua mai le Fa'aola i le itūlā o Lona matuā puapuagā na tuia ai Lona finagalo i se fa'anoanoāga e lē mafai ona malamalama i ai le tagata. O le tele o Lona finagalo mafatia ua tau lē lagona ai se tigā o le tino.

(28) E UI INA E LE'I MAFAI E KERISO ONA SILASILA I TALA ATU O FAITOTO'A O LE TU'UGAMAU I LE I'UGA O LANA TAULAGA OFO, O LE Ā LE MEA NA IA FAIA ONA O LONA ALOFA TELE NA'UĀ MO LE FANAU A TAGATA?

A ua fa'aalitinoina mai e le Atua Lona lava alofa iā te i tatou, ina ua malii Keriso ma sui o i tatou, a o tatou agasala pea.

Roma 5:8

O Satani ma āna fa'aosoosoga mata'utia ua ātu ai le finagalo o Iesu. Na le'i mafai e le Fa'aola ona silasila i tua atu o le tu'ugamau. O le fa'amoemoe ua lē fa'aailoa mai iā te Ia le toe tū mai le tu'ugamau ma le manumālō, pe fa'aailoa mai iā te Ia le taliaina e Lona Tamā o Lana taulaga ofo. Na Ia mata'u talu ai ona o le agasala o se mea e matuā 'inosia e le Atua, o le a 'avea ma ala e tete'a ai ma Lona Tamā e fa'avavau. Na lagona e Keriso le puapuagā e o'o i tagata agasala ma o le a lagona pe a ua lē toe i ai le alofa tunoa e

'ai'oi mo le fanau a tagata ua ta'usalaina. O le lagona o le agasala, ua tu'uina mai ai i Ōna luga, o le sui tulaga mo le tagata, le to'asā o le Tamā, ua ia inumia ai le ipu 'o'ona, na mafatia ai le finagalo o le Ālo o le Atua.

(29) SA FA'APEFEA ONA FOLIGA MAI UA FA'AALIA E MEA O LE FOAFOĀGA LE TIGĀALOFA MO LO LATOU ALI'I O LO'O MAFATIA MA UA LATA INA MALIU?

Ua fua mai i le itu aso e ōno, ua pogisā uma ai le nu'u, ua o'o lava i le itū aso e iva.

Mataio 27:45

Na molimauina e agelu ma le maofa tele puapuagā matuitui o le Fa'aola. Na ufiufi fofoga o 'au a le lagi a o latou maimoa i nei va'aiga mata'utia. O mea uma na faia e leai ni ola na fa'aailoa lo latou tigā alofa i le sauāina o Lē na foafoaina i latou. O le lā na lē mafai ona pupula mai i le va'aiga mata'utia. O ōna 'ave na susulu mālōsi e fa'amalamalamaina ai le lalolagi i le ogātotonu o le aso na foliga ua fa'afuase'i ona lē susulu mai. O le pōuliuli, na ufitia ai le satauro. "Ua afua mai i le itū aso e ono, ua pogisā uma ai le nu'u ua o'o lava i le itūlā e iva" (**Mata. 27:45**). Sa le'i gasetoto le lā pe o se isi lava mafua'aga fa'anatura na ala ai ona i ai lenā pogisā tele e pei o le tulua o pō e aunoa ma le masina po'o fetū. O lea le molimau fa'avavega na tu'uina mai e le Atua ina ia fa'amautiina ai le fa'atuatua o tupulaga amulī.

(30) A O UFITIA I LE POULIULI O LE SATAURO LE FA'ATASI AI O LE ATUA, MA UA LEAI SE FA'AMAFANAFANAGA MO KERISO, O LE Ā LE VALO'AGA MAI I LE ISAIA SA FA'ATAUNU'UINA?

³ *"Ua 'Ou solia to' atasi le tu'ugāuaina, a o le nu'u sa leai so latou e to'atasi iā te A' u. Na 'Ou solia i latou i Lo' u ita, ma ua 'Ou solia lava i latou i Lo' u tigā. Na pisia O'u ofu i o latou toto, ua leaga ai O'u ofu uma."*

Isaia 63:3

I lenā pōuliuli tele, na nātia ai le fa'atasi ai o le Atua. Na Ia faia le pōuliuli o Lona apitaga, ma ufitia Lona mamalu mai mata o tagata. O le Atua ma Āna agelu na i tafatafa o le satauro. Na fa'atasi le Tamā ma Lona Ālo. Peita'i e le'i fa'aailoa Lona afio ai. Pe ana fa'aalia Lona mamalu mai le ao, o tagata uma e va'ai i ai e fa'aumatia. I lenā itūlā faigatā, e le'i fa'amafanafanaina Keriso i le 'auai o Lona Tamā. Na Ia solia le tu'ugā uaina na o Ia, a o le nu'u sa leai so latou e to'atasi iā te a'u (**Isa. 63:3**).

(31) SA FA'APEFEA ONA NĀTIA E LE ATUA I LONA ALOFA E LĒ MAFA'ATUSAINA MAFATIĀGA MULIMULI O KERISO A O MALIU O IA I LUGA O LE SATAURO?

Ua fua mai i le itu aso e ōno, ua pogisā uma ai le nu'u, ua o'o lava i le itu aso e iva.

Mataio 27:45

I lenā pōuliuli tele, na ufitia ai e le Atua puapuagā fa'aletagata mulimuli o Lona Ālo. O i latou uma na va'aia Keriso i Ōna faigatā na talitonu i Lona itū Atua. O Ōna fofoga na va'aia e le fanau a tagata sa le'i toe mafai ona fa'agaloina. E pei ona fa'aailoa i foliga o Kaino lona nofo sala i le fasioti tagata, e fa'apea ona fa'aailoa i fofoga o Iesu Lona lē sala, to'afilēmū, ma le alofa,--o le fa'atusa o le Atua. Peita'i, e le'i amana'ia e i latou na molia o Ia fa'aailoga mai le lagi. I le taimi umi o puapuagā o Keriso na va'ai le motu o tagata iā te Ia ma le tauemu. A o nei ua ufitia o Ia i le alofa o le ofu tele o le Atua.

(32) INA UA O'O SE POGISĀ E LĒ MASANI AI LE LALOLAGI I LUGA O KALEVARIO, SA FA'APEFEA ONA FA'AALIA E LE MOTU O TAGATA LO LATOU MATATA'U?

I tagata uma ē ua fa'apotopoto e maimoa i lea mea, ua va'ava'ai i mea ua faia, ona pōpō lea o i latou i o latou lava fatafata, ma toe fo'i atu.

Luka 23:48

O le ta'aligoligoa o le tu'ugamau ua pei ua pa'ū i luga Kalevario. O le mata'u tele na o'o i le motu o tagata na potopoto i le satauro. O 'upu leaga ma 'upu taufaifai ua fa'afuase'i ona taofi i le ogātotonu. O tane, fafine, ma tamaiti ua fa'apa'ū'ū i le 'ele'ele. Na 'emo le uila mai le ao i nisi taimi ma iloa ai le satauro ma le Fa'aola o lo'o tautau ai. O faitaulaga, ta'ita'i, tusi 'upu, o ē na fa'ao'o sala, ma le motu o tagata sa latou manatu uma ua o'o mai le taimi o le tau ma sui. O nisi o i latou ua femusua'i o Iesu ua lata nei ona alu

ifo i lalo mai le satauro. O nisi ua latou taumafai e tautagotago o latou ala e toe fo'i i le 'a'ai, ua pōpō o latou fatafata ma auē ona o le matata'u.

(33) I LE POGISĀ NA PUNITIA AI KERISO MAI LE MOTU O TAGATA, O LE Ā LE 'ALAGA FA'ANOANO SA FA'ALOGOINA MAI LE ITŪ O LE SATAURO?

Ua lata i le itu aso e iva, ona alaga ai lea o Iesu ma le leo tele, ua fa'apea atu, "Eli, Eli, lama sapatani?" O lona uiga lenei, "Lo'u Atua e, Lo'u Atua e, se ā le mea ua e tu'ulafoa'i mai ai A'u?"

Mataio 27:46

I le itūlā e iva na si'itia ai le pōuliuli mai tagata, a e o lo'o ufitia pea le Fa'aola. O lea le fa'aailoga o le mafatia ma mata'utia o lo'o mamafa i Lona finagalo. E leai se tasi na ati lana va'ai i le pōuliuli e sili atu le loloto na ufitia ai le agaga mafatia o le Fa'aola. O uila sa 'emo o le to'asā e pei ua fa'asaga mai iā te Ia a o Ia tautau i luga o le satauro. "Ona 'alaga ai lea o Iesu ma le leo tele, ua fa'apea atu, 'Eli, Eli, Lama Sapatani?...Lo'u Atua e, Lo'u Atua e, se ā le mea ua e tu'ulafoa'i mai ai A'u?'" (Mata. 27:46). A o fa'asolo ona ufitia le Fa'aola i le pōuliuli, e tele leo na fa'apea ane: O le tau'i ma sui a le lagi ua o'o iā te Ia. O le 'emo o le to'asā o le Atua ua fa'asaga iā te Ia, auā na Ia fa'apea mai o Ia le Ālo o le Atua. O le to'atele o i latou na talitonu iā te Ia na fa'alogo i Lana 'alaga mafatia. Na mavae le fa'amoemoe. Afai ua tu'ulafoa'i e le Atua Iesu, o le ā le mea e mafai ona fa'alagolago i ai ē mulimuli iā te Ia?

(34) O LE Ā LE MAFAUFAU O FAITAUAGA I 'UPU A KERISO UA MANATU AI E TONU LATOU 'ALOFAGA I LE LĒ FA'ATE'AINA O ŌNA PUAPUAGĀ?

Ua fa'alogo ai nisi o ē na tutū mai, ona latou fa'apea atu ai lea, "Ua vala'au atu lenei tagata iā Elia."

Mataio 27:47

Ina ua si'itia 'ese le pōuliuli mai le finagalo mafatia o Keriso, na Ia lagona le tigāina o Lona tino ma Ia fetalai ane, "'Ou te fia inu'" (Ioa. 19:28). O se tasi o fitafita Roma, na ia lagona le tigāalofa a o va'ai atu i fofoga ua mātūtū, ua fufui le omomi i le vineta ma tu'u i luga i le isopo, ona tu'u atu lea iā Iesu (F. 29). Peita'i o ositaulaga ua tauemu i Lona mafatia. Ina ua ufitia le nu'u i le pōuliuli, sa fa'atumulua i latou i le mata'u; na toe fo'i mai lo latou mata'u ina ne'i toe sola 'ese Iesu. O Lana 'alaga "Eli, Eli, Lama Sapatani?" na latou fa'auiga'eseina. I lo latou manatu fa'atauva'a ma le tauemu, na latou fa'apea, "O lo'o vala'au atu o Ia iā Elia." O le avanoa mulimuli e fa'ate'a ai Ōna tigā na latou lē taliaina. Sa na o na fa'apea ane, "Tu'u ai pea ia; se'i tatou iloa pe sau Elia na te fa'aolaina o Ia" (Mata. 27:49).

(35) O LE Ā LE FA'AMATALAGA FA'AVALO'AGA MA FA'AFATUSA E IOANE O IESU I LENEI GALUEGA O LE TAU'AVE O A TATOU AGASALA, FA'AUMATIAINA O LE OTI, MA LE TATALAINA FAITOTO'A O PARATAISO MO I TATOU?

O le taeao ua va'ai atu ai Ioane iā Iesu o maliu mai iā te ia ona fai ane lea, "Fa'auta i le Tama'i mamoe a le Atua, Na te 'ave'esea le agasala a le lalolagi."

Ioane 1:29

O le Ālo e lē ponā o le Atua ua tautau i luga o le satauro. O Lona tino ua manu'a i fa'alavalava; o 'a'ao sa masani ona 'a'apa atu e fa'amanuia, ua tu'itu'i i le la'au; o 'a'ao na le'i malōlō i le femalua'i i 'au'aunaga o le alofa, ua tutū'i i le la'au, o le ao o le Tupu na tuia i tala o le pale tuitui; o Lona fofoga ua fa'aleoina ai le tagi auē. Ma i faigatā uma na Ia onosa'i ai—o le toto ua sisina ifo i Lona ao, o Ōna 'a'ao, o le tigā na o'o iā te Ia a o fa'atautauina, ma le ātu tele o Lona finagalo na tumu ai Lona finagalo ona o le ufitia o fofoga o Lona Tamā—o lo'o fetalai i tagata ta'ito'atasi o le fanau a tagata, ua fa'aailoa mai, Ona o 'oe na finagalo malie ai le Ālo o le Atua Na te tau'ave le 'avega o le nofosala; ona o 'oe na Ia fa'aleaga ai le pule a le oti, ma tatala ai faitoto'a o Parataiso. O Lē na fa'afilēmū peau sousou ma savali i luga o galu, o Lē na tetemū ai temoni ma sola 'ese ai ma'i faigatā. O Lē na pupula ai mata o ē tauaso ma vala'au ē na oti i le ola,—na Ia ofoina Ia Lava i luga o le satauro o le taulaga ofo, ona o Lona alofa mo 'oe. O Ia, Lē tau'ave agasala, ua 'onosa'i i le to'asā o le fa'amasinoga tonu a le Atua, ma ona o 'oe ua 'avea ai o Ia ma agasala.

(36) A O TO'ESEA LE POGISĀ MAI LE SATAURO, O LE Ā LE FETALAIGA OFOFOGIA A KERISO NA FA'ALOGAINA E LE ATULAULAU?

Ua talia le vineta e Iesu, ona fetalai ane lea o Ia, "Ua taunu'u;" ua fa'agaugau Lona ao, ona tu'uina atu lea o Lona agaga.

Ioane 19:30

Ua fa'alologo ē na matamata mo le fa'ai'uga o lenei va'aiga mata'utia. Ua susulu mai le lā, a o lo'o ufitia pea le satauro i le pōuliuli. Na va'ava'ai atu faitaulaga ma ta'ita'i aga'i i Ierusalem; ma e fa'auta, na va'aia le ao ua fa'amalumalu i luga o le 'a'ai ma fanua laugatasi o Iutaia. O le Lā o le Amiotonu, le Malamalama o le lalolagi, ua 'ave'e sea Ōna 'ave mai le 'a'ai na fa'apelepele o Ierusalem. O uila mata'utia o le to'asā o le Atua ua fa'asino tonu ma fa'asaga i le 'a'ai ua fa'amalaiaina.

Na fa'afuase'i ona si'itia le pogisā mai le satauro, ma o le si'ufofoga manino, e pei o le leo o le pū, peisea'i na fa'alogoina e le foafoāga 'atoa, ua 'alaga Iesu, *"Ua taunu'u. Lo'u Tamā e, 'Ou te tu'uina atu Lo'u nei agaga i Ōu 'a'ao"* (Luk. 23:46). O se malamalama na fa'ata'ali'oli'o i le satauro, ma o fofoga o le Fa'aola ua pupula ma le mamalu e pei o le lā. Ua fa'agaugau Lona ao i Lona fatafata, ua tō Lana manava, ua maliu.

(37) O Ā 'UPU TA'UTINO A LE TAMĀ SA FA'ALEOINA I LE PAPATISOGA O KERISO NA IA FA'ALAGOLAGO I AI MA LE FA'ATUATUA E FAI MA FA'AMAONIGA O LE TALIAINA E LONA TAMĀ?

Fa'auta fo'i, o le si'ufofoga mai le lagi, ua fa'apea mai, "O Lo'u Atali'i pele lenā, ua 'Ou fiafia lava iā te Ia."

Mataio 3:17

I totonu o lenei pōuliuli mata'utia, fa'apei ua tu'ulafoa'iina o Ia e le Atua, ua mae'a ona inumia e Keriso matāua mulimuli i le ipu o fa'anoanoāga o le fanau a tagata. I totonu o ia itūlā mata'utia na Ia fa'alagolago i le fa'amaoniga o le taliaina e Lona Tamā o le mea na tu'uina atu ia ta Ia. Ua Ia masani i uiga o Lona Tamā; na Ia malamalama i le tonu o Lana fa'amasinoga, Lona alofa tunoa, ma le tele o Lona alofa mutimutivale. E ala i le fa'atuatua na Ia mālōlō iā te Ia o Lē na Ia fiafia e usita'i i ai. Ma, i Lona gaua'i atu sa tu'uina atu o Ia lava i le Atua, o le lagona o le lē iloa o le finagalo malie o Lona Tamā ua mavae 'ese. Ona o le fa'atuatua, o Keriso ua manumālō.

(38) INA UA TOE TALIU MAI LE POULIULI, O LE Ā LE FA'AALIGA MATA'UTIA FA'ALEATULAULAU NA ILOA E LE LALOLAGI I LE TAIMI LAVA NA MALIU AI KERISO?

Fa'auta fo'i, ua saeluaina le 'ie puipui o le malumalu, ua amata ifo i luga, ua o'o i lalo; ua lūlūina fo'i le 'ele'ele, ua mavaevae fo'i papa.

Mataio 27:51

E le'i molimauina muamua e le lalolagi se va'aiga fa'apea. Na laulaututū le motu o tagata ma le fememea'i a o latou pulato'a i le Fa'aola. Na toe ufitia le fogā'ele'ele i le pogisā, ma na fa'alogoina le gogolo tele, e pei o faititili e tele. Na lūlūina se mafui'e mata'utia. O tagata ua matuā gatete i fa'apotopotoga. Na vevesi ma lē mautonu tagata. O mauga e si'omia le 'a'ai ua solo mai ai ma'a ma ta'avavale mai i le fanua laugatasi. Sa lūlūina le 'ele'ele, ua mavaevae papa, ua avanoa fo'i tu'ugamau, ma ua toe tutū mai ē na momoe i le oti (Mata. 27:50, 51). Peisea'i ua lūlūina mea uma na foafoaina. O ositaulaga, ta'ita'i, fitafita, o ē na fa'ataunu'uina fa'asalaga, ma le motu o tagata ua gūgū ona o le matata'u, ua latou pa'ū'i i le 'ele'ele.

(39) I LE TAIMI LAVA NA MALIU AI KERISO, O LE Ā LE MEA SA TUPU I LE 'IE PUPUNI SA VAVAE'ESEA AI LE POTU E AUPITO SILI ONA PA'IA MAI LE ISI VAEGA O LE MALUMALU MA UA FA'AILOA AI O LE MEA E SILI ONA PA'IA UA LĒ O TOE PA'IA?

Ua 'alaga Iesu ua leo tele, ona tō ai lea o Lana mānava. Ona saeluaina lea o le 'ie puipui o le malumalu, ua amata ifo i luga, ua o'o lava i lalo.

Mareko 15:37, 38

Ina ua 'alaga Keriso ma le leo tele, *“Ua taunu 'u,”* sa fai sauniga a ositaulaga i le malumalu. Ua o'o i le itūlā o le taulaga afiafi. Ua aumaia le mamoe o le fa'atusa o Keriso o le a fasia. O lo'o ofu le ositaulaga i la'ei tūa ma le matagofie, ua tū ma lona lima ua si'i, e pei ona faia e Aperaamo ina ua sauni e fasioti lona atali'i e fai ai le taulaga. Sa matuā fia iloa e tagata a o latou mātā'i atu. Peita'i ua lūlūina le lau'ele'ele ma ua gatete; auā ua latalata mai le Ali'i lava Ia. Ma le leo o se mea ua saeia, o le 'ie puipui o le malumalu na saeluaina mai luga e o'o i lalo (**F. 51**), e se 'a'ao e lē mava'aia, ma ua tatala atu mo le va'aiga a tagata le nofoāga sa masani ona fa'atumulia i le mamalu o le fa'atasi ai o le Atua. O le nofoāga lenei na i ai le Sekina. O inā na fa'aailoa ai le mamalu o le Atua i luga o le nofoa o le alofa tunoa. E leai se tasi vaganā le faitaulaga sili na te si'itia le 'ie puipui e vā ai lenei va'aiga mai le isi vaega o le malumalu. Na ia ūlu atu i ai e fa'a tasi i le tausaga e faia le togiola mo agasala a le nu'u. A e paga! Ua saeluaina le 'ie puipui. O le mea e sili ona pa'ia i le malumalu fa'ale-lalolagi ua lē toe pa'ia.

(40) O KERISO UA GALUE NEI FA'AFAITAULAGA MA FAUTUA I LE MEA E SILI ONA PA'IA I LE LAGI, O LE Ā LE TALI OFOOFOGIA MO LE FA'AFITAU LI O LE AGASALA O LE A MAFAI ONA TATOU MAUTINO?

Ona ūlu fa'atasi lava lea o Ia i totonu o le mea pa'ia, e lē o le toto o 'oti ma tama'i povi, a o Lona lava toto, ua Na maua le togiola e fa'avavau mo i tatou.
Eperu 9:12

Ua na o le mata'u ma le vevesi ua o'o mai. O le faitaulaga na sauni e fasi le taulaga a e ua pa'ū 'ese le a'upega mai lona lima, ma ua sola le tama'i mamoe. Ua fetau le ata ma le mea moni i le maliu o le Ālo o le Atua. Ua faia le taulaga aupito sili. O le ala i le mea e sili ona pa'ia ua matala. O le ala fou ma ola ua saunia mo tagata uma. Ua lē toe mana'omia e le aigā tagata agasala ma fa'anoanoa ona fa'atalitali i le o'o mai o le faitaulaga sili. Ua amata mai nei ona galue le Fa'aola, o le faitaulaga ma le puluvaga i le lagi o lagi. E pei lava ua fetalai mai se si'ufofoga ola i ē tapua'i: O lenei ua fa'ai'uina taulaga osi uma ma taulaga mo agasala. O le Ālo o le Atua ua afio mai e tusa ai ma Lana fetalaiga, *“Le Atua e, silasila mai ia, 'Ou te alu atu e faia Lou finagalo (Ua tusia A'u i le Tusi ta'ai.)”* (**Epe. 10:7**). *"Ona ulu fa'atasi lava lea o Ia i totonu o le mea pa'ia,...a o Lona lava toto, ua na maua le togiola e fa'avavau mo i tatou."*

A o 'ou faitau i le Tusi Pa'ia e fa'atatau i le maliu o Keriso, ua pā'ia lo'u loto e le Agaga Pa'ia ma ua 'ou iloa na maliu o Ia i le mafatiāga o le vavae'ese mai Lona Tamā ona o a'u.

Li'o le tali:	Ioe	Lē Mautonu
<i>Ou te tatalo mo le fa'atuatua o Keriso e lē mafai ona fa'avaivaiina e ui ina ua to'esea e le Atua Lona fa'atasi ai mai iā te Ia a o i luga o le satauro.</i>		
Li'o le Tali:	Ioe	Lē Mautonu
<i>Ua ou naunau e tu'u atoa lo'u olaga i Lē o lo'o vala'auina a'u e talia Lona la'ei o le amiotonu e fai ma meaalofa mo lo'u fa'aolataga.</i>		
Li'o le Tali:	Ioe	Lē Mautonu
<i>Ou te naunau mo le aso o le a 'ou va'ai ai i fofoga o lo'u Fa'aola ma o le a mafai ona 'ou vi'ia Lona suafa ofoofogia ma le 'oli'oli ma le fa'afetai.</i>		
Li'o le Tali:	Ioe	Lē Mautonu

Manatu mai le su'esu'ega	Tatalo e Mana'omia	Tali o Tatalo

Ua Taunu'u

Lesona 6

E le'i tu'uina atu e Keriso Lona soifua se'ia mae'a le galuega na afio mai e faia, ma i Lana mānava fa'amavae, na Ia alaga ai, "*Ua taunu'u*" (**Ioa. 19:30**). Ua Ia manumālō i le taua. O Lona 'a'ao taumatau ma Lona 'a'ao pa'ia ua maua ai le manumālō. O lē e manumālō ua Ia fa'atūina Lana fu'a i le tumutumu e fa'avavau. E le'i 'oli'oli ea agelu? O se 'oli'olisaga ua i le lagi 'atoa ona ua manumālō le Fa'aola. Ua to'ilalo Satani, ma ua ia iloa ua lē iloa lona mālō.

(1) I TAIMI FA'AI'U O LONA FA'ASATAUROINA O LE Ā LE FETALAIGA FA'ALOTOTELE NA FAIA E KERISO MO ĀNA FOAFOĀGA UMA?

Ua talia le vineta e Iesu, ona fetalai ane lea o Ia, "Ua taunu'u;" ua fa'agagau Lona ao, ona tu'uina atu lea o Lona agaga.

Ioane 19:30

Mo agelu ma lalolagi e le'i agasala e i ai le uiga tāua o le alaga, "*Ua taunu'u.*" O le galuega tele o le togiola mo i latou ma i tatou fo'i ua fa'ai'uina. O i latou fa'atasi ma i tatou e tofusia i tau i le manumālō o Keriso.

Sa le'i malamalama lelei agelu ma lalolagi e le'i agasala i le uiga o Satani se'ia o'o ina ua maliu Keriso. O lē na fouvale sa fa'aofu ia lava i le tau fa'asesē e o'o lava i le 'au pa'ia e latou te le'i malamalama 'ato'atoa i āna ta'iala. E le'i va'ai manino i latou i uiga moni o lona fouvale.

(2) SA FA'APEFEA ONA FA'AMATALAINA E LE PEROFETA O ESEKIELU LE TULAGA FA'AEAINA O LUSIFERO I LE LAGI NA ALA AI ONA MANUIA LANA GALUEGA TAUFUA'ASESĒ?

O 'oe o le kerupi ua fa'au'uina, o lē fa'amalumalu; na 'Ou tu'uina 'oe, sa e i luga o le mauga pa'ia o le Atua; sa e fealualua'i i le vā o ma'a o le afi.

Esekielu 28:14

O ia o lē na matagofie ma mamalu a e na ia fa'asaga tau i le Atua. Na fetalai le Ali'i e fa'ataua iā Lusifelo, "O 'oe na, ua e fa'amau fa'ailogaina le 'ato'atoa; ua tumu 'oe i le potu, na 'ato'atoa fo'i lou matagofie" (**Esek. 28:12**). O Lusifelo o le kerupi sa fa'amalumalu. Na ia tū i le malamalama o le afio'aga o le Atua. O ia lē na silisili iā i latou uma na faia e le Atua, ma sa taulamua i le fa'aioaina o fuafuāga a le Atua i le atulaulau. Ina ua uma ona agasala, o lana pule e fa'asesē ai na fa'ateleina, ma o le fa'aioaina o lana amio na matuā faigatā ona iloa, ona o le tulaga maua luga na ia u'umia a o fa'atasi ma le Tamā.

(3) O Ā 'UPU SA FA'AAOGĀINA E LE FAIPESE E FA'AMATALAINA AI LE MALŌ MA LE UIGA O LE ATUA?

O le amiotonu ma le fa'amasinoga o lo'o tumau ai Lou nofoali'i; o le alofa ma le fa'amaoni la te muamua atu i Ōu luma.

Salamo 89:14

Na mafai e le Atua ona fa'aumatia Satani ma i latou na alolofa iā te ia e pei o le faigofie ona lafoa'i se ma'ama'a i le 'ele'ele, a e Na te le'i faia lea mea. O le fouvale e lē fa'ato'ilaloina i le fa'amalosī. O le pule fa' amalosī e na'o le mālō o Satani e maua ai. O fa'avae o le mālō o le Atua e lē fa'apea ona faia. O Lana pule e fa'avae i le fa'apalepale, agalelei, ma le alofa mutimutivale; ma o le fa'aalia o ia ta'iala o le 'auāla lea e fa'aaogā. O le mālō o le Atua e fai mea tatau, ma o le 'upu moni ma le alofa e fa'aaogā e pulea ai.

(4) E UI LAVA O LE MALŌ O SATANI E TA'ITA'IINA TAGATA I LE AGASALA, O LE Ā LE FOLAFOLAGA MAI LE MALŌ O KERISO I A I LATOU UMA E NAUNAU I LE AMIOTONU?

Amu'ia ē fia 'a'ai ma fia inu i le amiotonu, auā e ma'o'ona i latou.

Mataio 5:6

O le finagalo o le Atua ia tu'uina mea uma ia mautū le fa'avae e fa'avavau, ma i le taupulega a le lagi na tonu ai o le a tu'uina le taimi mo Satani e atia'e ai ta'iala o le a 'avea ma fa'avae o lana faigā mālō. Na ia fa'apea e sili atu ana fuafuāga i lo ta'iala a le Atua. Na tu'uina le taimi ia galuea'iina ai manatu o Satani ina ia va'aia e le atulaulau.

Na ta'ita'i e Satani tagata i le agasala, ma sa fa'agaioi loa fuafuāga o le fa'aolataga. Mo le fā afe tausaga, na galue Keriso mo le si'itia o le tagata, a o Satani mo le fa'afanōga ma le fa'amaulaloina o le tagata. O le atulaulau sa latou mata'ia nei tauālumaga uma.

(5) SA FA'APEFEA ONA FA'AMATALAINA E KERISO LONA FA'ALAGOLAGO I LE ATUA I LONA SOIFUĀGA ATOA O FA'AOSOOSOGA MA LE FA'ALOTOVAIVAI?

'Ou te lē mafaia ona fai se mea e tasi, na o A'u; e fa'ataua La'u fa'amasinoga i Lo'u fa'alogo; ua tonu lava La'u fa'amasinoga, auā 'Ou te lē usiusita'i i Lo'u lava loto, a o le finagalo o le Tamā, o Lē na 'auina mai A'u.

Ioane 5:30

Ina ua afio mai Iesu i le lalolagi, na fa'asaga le mālōsi o Satani iā te Ia. Mai le taimi na Ia o'o mai ai o se pepe i Petele'ema, na galue le fili ia fa'aumatia o Ia. Na ia sa'ili i 'auāla uma e mafai ai, na ia taumafai e taofi Iesu mai le tupu a'e o se tamaitiiti e 'ato'atoa, o se taule'ale'a e leai se sesē, o Lana 'au'aunaga pa'ia, ma le taulaga e lē ponā. A e sa fa'ato'ilaloina Satani. Na ia lē mafai ona ta'ita'i Iesu i le agasala. Na ia lē mafai ona fa'avaivai iā te Ia, pe 'ave'ese o Ia mai le galuega na afio mai i le lalolagi e faia. Mai le vao e o'o i Kalevario, o le afā o le ita o Satani na tu'i mālōsi iā te Ia, peita'i o le tele o faigatā, o le mālōsi lea o le taofi mau a le Ālo o le Atua i le 'a'ao o Lona Tamā, ma aga'i atu pea i le ala ua pisia i le toto. O taumafaiga uma a Satani e sauāina ma fa'ato'ilaloina o Ia sa na o le fa'aioa mai ai le manino o le malamalama o Lona uiga mamā.

(6) ONA O LE MAFATIĀGA TELE SA MATAUINA E LE LAGI, O LE Ā LE MEA NA FAIA E TU'UINA AI IĀ KERISO LE FA'AMAFANAFANAGA I LE TAIMI O NEI PUAPUAGĀ?

Ona fa'aali mai ai lea iā te Ia o le agelu mai le lagi, ua fa'amalosi iā te Ia.

Luka 22:43

O le lagi 'atoa ma lalolagi e le'i agasala sa molimauina le finauga tele. Na latou matuā mātā'ia le fa'asologa aga'i i va'aiga fa'ai'u o le fete'ena'iga. Na latou va'aia le Fa'aola o ulu i le fa'ato'āga o Ketesemane, o Lona finagalo ua fa'ano'uno'u i le mata'utia o le pogisā tele. Sa latou fa'alogoina Lana 'alaga, *"Lo'u Tamā e, afai e mafai, ia ave 'ese leni ipu iā te A'u"* (**Mata. 26:39**). A o motusia le mafutaga ma le Tamā, na latou va'aia le 'o'ona o Lona fa'anoanoa e sili atu i le tauiviga mulimuli ma le oti. O le afu toto na sisina mai Lona tino ua to'ulu i le 'ele'ele. Mai Lona fofoga, e fa'atolu ona Ia tatalo mo le lavea'iga. O le lagi ua lē lavātia lea va'aiga, ma ua 'auina mai se 'ave'fe'au e fa'amafanafana i le Ālo o le Atua.

(7) O LE Ā LE TATALO OFOFOGIA MAI IĀ KERISO NA FA'AFOFOGAINA E 'AU A LE LAGI A O LATOU MAIMOĀ IFO I FAIGATĀ NA PUAPUAGĀTIA AI KERISO I LUGA O LE SATAURO?

Ona fetalai atu lea o Iesu, "Lo'u Tamā e, ia e fa'amagaloina atu iā te i latou, auā ua latou lē iloa le mea ua latou faia." Ua tufatufa e i latou Ōna ofu, ona fai ai lea o le vili.

Luka 23:34

Na va'aia e le lagi le fa'alataina o Ia i lima o tagata lē taupulea, ma ua latou tauemu ma sauāina o Ia a o fa'anatinati mai le tasi fa'amasinoga i le tasi fa'amasinoga. Na fa'alogoina le taufaifai o ē na fa'asauā iā te Ia ona o le tulaga maualalo o Lona fanau mai. Sa fa'alogoina le fa'afiti ma le tautō o le tasi o Ōna so'o pele. Na va'aia le galuega fememēa'i a Satani, ma lana pule i loto o tagata. Oi se va'aiga mata'utia! O le Fa'aola ua pu'eina i le tulua o po ma ao i Ketesemane, ua ta'ita'iina mai le maota o le pule i le fale fa'amasino, fa'amasinoina fa'alua i luma o faitaulaga, e fa'alua i luma o le Fono Faitulafono, fa'alua i luma o Pilato, fa'atasi i luma o Herota, fa'alumaina, sasaina, ta'usalaina, ma ua ta'ita'i atu ia fa'asatauroina, o lo'o tauaveina le 'avega mamafa o le satauro, i totonu o le tagiaū a tama fafine o Ierusalem ma le fa'atauemu a ē lē taupulea.

Ua maimoa le lagi ma le fa'anoanoa ma le maofa a o tautau Keriso i luga o le satauro, o le toto o lo'o sisina ifo mai Ōna fofoga sa fa'amanu'aina, ma le afu ua fefiloa ma le toto. Sa sisina ifo le toto mai Ōna 'a'ao i luga o le papa o lo'o tū ai le satauro. O

manu’a mai fao na tutū’i ai Ōna 'a'ao i le satauro sa fa’ateleina mai le mamafa o Lona tino. O Lana mānava ua faigatā ma fa’avavevave, a o mafatia Lona finagalo i le ‘avega mamafa o agasala a le lalolagi. Na fa’atumulia le lagi uma i le maofa tele ina ua ofo atu le tatolo a Iesu i le taimi o Ōna puapuagā mata’utia, *“Lo’u Tamā e, ia e fa’amagaloina atu iā te i latou, auā ua latou lē iloa le mea ua latou faia” (Luk. 23:34).* Peita’i o lo’o tutū mai nei tagata, o ē na faia i le fa’atusa o le Atua, ua latou ‘aufa’atasi ia fa’aumatia le soifua o Lona Ālo pele e to’atasi. Ua ma’eu se va’aiga mo le atulaulau!

(8) SA FA'APEFEA ONA FA'AMATALAINA E TAVITA LE AMIOGA MUAMUA A AGELU A O LEA UA TOTŌINA NEI LE LĒ TALITONU I LOTO O TAGATA?

Fa'amanū atu ia iā Ieova outou Āna agelu o ē malolos tele, o ē faia Lana afioga, o lo'o fa'alogo i Lona si'ifofoga.
Salamo 103:20

O ali’i ma ta’ita’i o le pōuliuli ua potopoto e si’osi’omia le satauro, o lo’o lafoia le ata ‘inosia o le lē talitonu i totonu o loto o tagata. Ina ua foafoaina i latou nei e tutū i luma o Lona nofoali’i, na matagofie ma mamalu i latou. O lo latou matagofie ma le pa’ia na feagai ma o latou tulaga fa’aeaina. Na fa’atamāo’aigaina i le poto o le Atua, ma la’ei i ofu 'ato'atoa o le lagi. O 'au'auna i latou a Ieova. Peita’i o ai sē na te iloa i agelu na agasala le serafī mamalu o lē sa 'au'auna i maota i le lagi?

(9) O LE Ā LE AUALA NA SAUNIA E LE ATUA E MAFAI AI E ALA IĀ KERISO, ONA LAVEA'IINA I TATOU MAI LE FA'AOSOFIAINA I LE AGAGA O LE ULUA'I FOUVALE TELE?

O Lē na foa'i'ina mai o Ia e Ia ona o a tatou agasala, ina ia lavea'i mai o Ia iā i tatou ai le olaga leaga ua i ai nei, e tusa ma le finagalo o le Atua, o lo tatou lava Tamā.
Kalatia 1:4

O ‘au tau a Satani na so’o fa’atasi ma tagata leaga i le ta’ita’iina o tagata ia latou talitonu o Keriso o le ali’i sili o ē agasala, ma ia 'avea Ia ma 'autū o mea 'inosia. O i latou na fa’atauenu iā Keriso a o tautau i le satauro na fa’atosina e le agaga o lē na muamua fouvale. Na ia fa’atumuina i latou i fa’a’upuga leaga ma le ‘inosia. Na ia fa’aosofiaina a latou 'upu faifai. Peita’i e mai nei mea uma e leai se mea na ia maua mai ai.

(10) ONA O LE MAUSALĪ O LE FA'ATUATUA MA LE TU'U ATU ATO'ATO A O KERISO I LE ATUA, O LE Ā LE FOLAFOLAGA E FA'ATATAU IĀ SATANI NA FA'ALOGOINA MAI LE LAGI A O FA'AGAUGAU IFO LONA AO MA UA MALIU?

Na 'ou fa'alogo fo'i i le leo tele mai le lagi, ua fa'apea, "O ōna pō nei ua o'o mai ai le olataga, ma le mana, ma le malō o lo tatou Atua, ma le pule o Lona Keriso; auā ua lafo i lalo lē na molia o tatou uso, o lē na molia i tatou i luma o lo tatou Atua i le ao ma le pō."
Fa'aaliga 12:10

Pe ana fai e maua se agasala e tasi iā Keriso, pe ana ia tu’u atu se mea e tasi iā Satani e sola 'ese ai mai puapuagā mata’utia, se manū e manumālō le fili o le Atua ma tagata. O Keriso ua punou ifo Lona ao ma ua maliu, a e peita’i na Ia taofī mau Lona fa’atuatua ma Lona gaua’i i le Atua. “Na ou fa’alogo fo’i i le leo tele mai le lagi, ua fa’apea mai, ‘O ōna po nei ua o'o mai ai le olataga, ma le mana, ma le mālō o lo tatou Atua, ma le pule a Lona Keriso, auā ua lafo ifo i lalo lē na molia o tatou uso, o lē na molia i latou i luma o lo tatou Atua i le ao ma le po.”

(11) O LE Ā LE FOLAFOLAGA NA FAIA I LE FĀNAU A TAGATA I LE TAIMI LAVA INA UA O'O MAI LE AGASALA I LE LALOLAGI, UA FA'AMATALAINA AI LE ATO'ATO A O LE FETE'ENA'IGA E TATAU ONA FAIFAI PEA SE'IA O'O I LE I'UGA?

'Ou te fa'atupuina le faitaga'i iā te ouluga ma le fafine, o lau fanau fo'i ma lana fanau; na te tu'imomomoina lou ūlu, a o 'oe e te tu'imomomoina lona mulivae.
Kenese 3:15

Ua va'ai Satani ua fa'aalia lona fa'afoliga. O lana faigā mālō ua fofola i luma o agelu e le'i agasala ma luma o le atulaulau. Ua ia fa'aailoa mai o ia lava o le fasioti tagata. I le fa'amaligiina o le toto o le Ālo o le Atua, na ia lia'iina ai ia lava mai manatu alofa o 'au a le lagi. E amata mai i inā ona fa'amuta lana galuega. Pe o le ā lava le tulaga o le a i ai, na te lē mafai ona toe fa'atalitali i agelu a o femālagaa'i mai taupulega a le lagi, ma molia uso o Keriso i o latou luma ina ua ia fa'a'ofuina i latou i ofu o le pōuliuli ma le 'ele'elea o le agasala. O le so'otaga mulimuli o le tigāalofa i le vā o Satani ma le lagi ua motusia.

Peita'i e le'i fa'aumatiaina ai Satani. E le'i malamalama lava fo'i agelu i mea uma na a'afia i le finauga tele. O le afāina o fa'avae e tatau ona fa'aalia lona 'atoāga. Ma ona o le tagata, e tatau ona fa'aauau pea le i ai o Satani. O le tagata fa'apea ma agelu e ao ona latou va'ai i le 'ese'esega o le Ali'i o le malamalama ma le ali'i o le pōuliuli. E tatau ona ia filifili pe o ai e 'au'auna i ai.

(12) O Ā 'UPU FA'AĀTA A SATANI UA FA'AMATALAINA AI E PETERU LE LAPATA'IGA TUSIA IĀ I LATOU O Ē TAUSI LE TULAFONO A LE ATUA?

Ia outou fa'autauta, ia outou mataāla, ona o lē ua fai outou mona fili, o le ti'apolo lea, o lo'o feālualua'i o ia e pei o se leona tagi, ua sa'ili se tasi e 'aina e ia.

I Peteru 5:8

I le amataga o le finauga tele, na fa'aailoa e Satani o le tulafono a le Atua e lē mafai ona tausia e se tasi, o le fa'amasinoga tonu e lē ō gatasi ma le alofa tunoa, ma pe afai e solia le tulafono, e matuā lē mafai lava ona fa'amagaloina le tagata agasala. O agasala uma e tatau ona fetaui ma lona fa'asalaga, o le finauga lea a Satani; ma pe afai e toe soloi e le Atua le fa'asalaga o le agasala, o ia e lē o se Atua o le 'upu moni ma le amiotonu. Ina ua solia e le tagata le tulafono a le Atua, ma lē usita'i i Lona finagalo, sa matuā fīafia Satani. Ua fa'amaonia, o lana fa'aaliga lea, e lē mafai ona tausia le tulafono; e lē mafai ona fa'amagaloina le tagata. Talu ai o ia, ina ua uma lona fouvalega, ua tuli 'ese mai le lagi, sa ta'ua e Satani o le fanau a tagata e tatau ona tapunia e fa'avavau mai le alofa tunoa o le Atua. Ua ia finau, e lē mafai ona amiotonu le Atua a e fa'aailoa pea le alofa tunoa i le tagata agasala.

(13) O LE Ā LE FA'AMAFANAFANAGA UA SAUNIA E LE ATUA MO I LATOU UMA UA TOFOTOFOINA INA IA TU'UINA ATU I LATOU I MANA'OGA FA'APITO O LE LOTO E PEI O LEA NA FAIA E SATANI I LUMA O LE ATUA?

Ua lē maua outou e se tofotofoga e 'ese i lo tagata; a ua fa'amaoni le Atua, o Lē na te lē tu'uina atu outou i le tofotofoga e sili i se mea ua outou lavatia, a e sauni fo'i fa'atasi ma le tofotofoga se mea e sao ai, ina ia outou lavā 'o'ono.

I Korinito 10:13

Peita'i e ui ina agasala le tagata, e 'ese le tulaga sa i ai o ia mai iā Satani. O Lusifelo na agasala i le lagi a o i ai ia i le malamalama o le mamalu o le Atua. Vaganā ai ia, e leai se isi na foafoaina e le Atua, na tu'uina i ai se fa'aaliga o Lona alofa. Na ia malamalama i le uiga o le Atua, ma ia iloa Lona agalelei, a e na filifili Satani e mulimuli i le manatu fa'apito o lona ia lava loto. O lenei filifiliga ua fa'ai'uina. Ua leai se isi mea e mafai e le Atua ona fai e lavea'i ai o ia. Peita'i ua fa'asesēina le tagata; na fa'apogisāina lona mafau fau i togafiti poto a Satani. Na te le'i iloa le maualuga ma le loloto o le alofa o le Atua. Mo ia o lea ua i ai le fa'amoemoe i le iloa o le alofa o le Atua. E ala i lana va'ai i Ōna uiga, atonu e mafai ai ona toe tosina atu ia i le Atua.

(14) NA FA'APEFEA ONA FA'AALITINOINA LE ALOFA TUNOA MA LE AMIOTONU O LE ATUA I TAGATA E AUNOA MA LE SUIA O LANA TULAFONO PA'IA?

O lenei, sa iā Keriso le Atua, ua fa'aleleia e Ia le lalolagi iā te Ia, ua lē ta'ua a latou agasala iā te i latou; ua Ia tu'uina mai fo'i iā te i matou le 'upu o le leleiga.

II Korinito 5:19

Na fa'aalitinoina i tagata le alofa tunoa o le Atua e ala iā Iesu; a e o le alofa tunoa e lē ave'esea ai le fa'amasinoga tonu. O le tulafono e fa'aailoa ai le uiga o le amio a le Atua, ma e leai se iota po o se mata'itusi e mafai ona suia ina ia fa'afetaia'i ai le tagata i lona tulaga pa'ū. E le'i suia le tulafono a le Atua, a e ua fai o Ia ma taulaga ofo, e ala iā Keriso, mo le fa'aolataga o le tagata. "Sa iā Keriso le Atua na fa'aleleia e Ia le lalolagi iā te Ia" (II Kori. 5:19).

(15) TALU AI O LE AMIOTONU A KERISO E NA O LEA LE AUALA E PUIPUIA AI TATOU MAI LE AGASALA, MA O LE TALIA O LE AMIOTONU E ALA I LE FA'ATUATUA MO I TATOU, O LE Ā LE TULAGA O LE A I AI I TATOU MA LE ATUA?

O lenei, ia iā te la na te mafaia ona leoleo iā te outou ne'i pa'ū'ū, ma tu'uina atu iā te outou ua lē ponā i luma o Lona lava mamalu ma le fiafia tele.

Iuta 1:24

O le tulafono e mana'omia le amiotonu,—o le olaga amiotonu, o le amio e 'ato'atoa; ma o lenei mea e lē o i le tagata ia na tu'uina atu. E lē 'ausia e ia le mea e mana'omia e le tulafono pa'ia a le Atua. Peita'i o Keriso, na afio mai i le lalolagi o le tagata, na soifua i se olaga pa'ia, ma atia'e le amio e 'ato'atoa. O mea ia na la ofoina mai fa'a meaalofa mo i latou uma o ē talia. O Lona soifua e sui ai ola o tagata uma. O lea e latou te maua ai le fa'amagaloina o agasala ua mavae, e ala i le fa'apalepale o le Atua. E sili atu fo'i i lea, ua la tu'uina mai i tagata uiga o le Atua. Na la fausia a'e le amio a le tagata ia pei o uiga fa'ale-Atua, o se fa'avae lelei o le mālōsi fa'ale-agaga ma matagofie. O lea o le amiotonu o le tulafono a le Atua e fa'ataunu'uina i le tagata e talitonu iā Keriso. O le Atua, “o le Amiotonu, ina ia iloa ai o le amiotonu, ma ua ta'uamiotonuina e la lē ua fa'aatuatua iā Iesu” **(Rom. 3:26)**.

(16) O LE Ā LE 'UPU MONI MATAGOFIE NA FA'AALIA I LE ATULAULAU E LE SOIFUĀGA MA LE MALIU O KERISO?

O le alofa ma le fa'amaoni ua la fetaia'i; o le amiotonu ma le filemū ua la feāsogi.

Salamo 85:10

Ua fa'a iloa mai le alofa o le Atua i Lona fai mea tonu e lē itiiti ifo i Lona alofa tunoa. O le amiotonu o le fa'avae o Lona nofoali'i, o le fua o Lona alofa. O le fuafuāga a Satani ia fa'ate'a 'ese'ese le alofa tunoa mai le 'upu moni ma le amiotonu. Na ia taumafai e fa'amaonia o le amiotonu o le tulafono a le Atua o le fili o le filēmū. Peita'i ua fa'aalia e Keriso o fuafuāga a le Atua e so'o fa'atasi; e lē mafai ona i ai le tasi e aunoa ma le tasi. “O le alofa ma le fa'amaoni ua la fetaia'i; o le amiotonu ma le filēmū ua la feāsogi” **(Sala. 85:10)**.

E ala i Lona soifua ma Lona maliu, na fa'amaonia e Keriso o le amiotonu a le Atua e le'i fa'aumatia ai Lona alofa tunoa, peita'i e mafai ona fa'amagaloina le agasala, ma o le tulafono e tonu, ma e mafai ona tausia 'ato'atoa. O tu'ua'iga a Satani ua lē fa'amaonia. Na tu'uina mai e le Atua le fa'amaoniga e lē fesiligia o Lona alofa.

(17) O Ā NI FETALAIGA UIGĀ NA TU'UINA ATU E KERISO I ŌNA SO'O E FA'ATATAU I LONA VĀ FEAGAI MA LE TULAFONO A LE ATUA?

'Aua ne'i outou manatu ua 'Ou sau e tatalaina le tulafono po o le 'au perofeta; 'Ou te le'i sau e tatalaina, a ia fa'ataunu'uina.

Mataio 5:17

O le isi tau fa'asesē ua tu'uina mai nei i luma. Na fa'a iloa e Satani o le alofa tunoa e fa'aumatia ai le amiotonu, ma o le maliu o Keriso e fa'alēaogāina ai le tulafono a le Tamā. Pe ana mafai ona sui pe fa'alēaogāina le tulafono, se manū e lē mana'omia le maliu o Keriso. Peita'i o le fa'alēaogāina o le tulafono e lē fa'aumatia ai le agasala, ma tu'uina ai le lalolagi i lalo o le pule a Satani. Ona o le tulafono e lē mafai ona suia, talu ai o le tagata e fa'aolaina i lona usita'i i poloa'iga, ua ala ai ona si'itia o la i le satauro. A e peita'i, o le 'auāla na fa'avae ai e Iesu le tulafono, ua fa'aalia e Satani o le a fa'alēaogāina ai. Oinei o le a o'o mai ai le fete'ena'iga mulimuli o le finauga tele i le vā o Keriso ma Satani.

(18) INA IA TETE'E ATU I FA'AMATALAGA A SATANI O LE TULAFONO A LE ATUA E LĒ TONU, O LE Ā LE FA'AMAONIGA UA TU'UINA MAI E KERISO IĀ I TATOU O LE TULAFONO A LE ATUA E LĒ MAFAI ONA SUIA?

Auā e moni, 'Ou te fai atu iā te outou, e mavae atu le lagi ma le lalolagi, a e lē mavae atu lava se iota po o sina fasi mata'itusi o le tulafono, se'ia taunu'u mea uma.

Mataio 5:18

Ona o le tulafono na fetalai mai le si'ufofoga o le Atua e lē sa'o, ua tu'u'eseina se vaega fa'apitoa, o le fa'a'upuga lea ua tu'uina mai nei e Satani. O lana tau fa'asesē tele mulimuli lea o le a ia aumai i le lalolagi. Na te lē mana'omia le osofa'ia o le tulafono 'atoa; afai na te mafai ona ta'ita'i tagata ia fa'agalo se poloa'iga e tasi, ua 'ausia lana fuafuāga. “Auā o sē tausī le tulafono uma, a e agasala i se mea e tasi, ua nofo sala ia i mea uma” (**Iak. 2:10**). I le loto malie e soli le tulafono e tasi, ua aumaia ai tagata i lalo o le pule a Satani. I le suia o le tulafono a tagata mo le tulafono a le Atua, o le a sa'ili ai Satani e pulea le lalolagi. O lo'o valo'ia lenei galuega i valo'aga. O le mālōsi o le pule tete'e a le sui o Satani, ua fa'a'ailoa mai ai, “Na te faia 'upu i le Silisili 'Ese, ma fa'aumatia le 'au pa'ia a le Silisili 'Ese, e manatu o ia e fa'aliliu i tausaga ma tulafono, e tu'uina atu fo'i i latou i lana pule” (**Tani. 7:25**).

(19) INA IA FA'AMALOSIA ISARA'ELU E FAI SE FILIFILIGA, O LE Ā LE U'UNA'IGA SA FAIA E IOSUA IĀ I LATOU, E PEI FO'I ONA TATAU I A I TATOU I ASO NEI ONA FAIA, IA MAFAI AI ONA TATOU TUTŪ MALOSI I LE ITU O LE MEA MONI A O LATALATA MAI LE TAIMI O TOFOTOFOGA?

Pe afai fo'i e leaga iā te outou ona au'auna i le Ali'i, inā filifili ia o outou i le aso nei, po o ai tou te au'auna i ai; po o atua na au'auna i ai o outou tamā, o ē sa i le la itu o le vaitafe, po o atua o sã Amorī, ē ō latou le nu'u ua outou nonofo ai; a o a'u nei ma lo'u aiga, matou te au'auna iā leova.

Iosua 24:15

E mautinoa o le a fa'atūina e tagata a latou lava tulafono e fete'ena'i ma tulafono a le Atua. O le a latou sa'ili e una'i fa'amalosi le loto fuatia ifo o nisi; ma i lo latou ma'elegā e fa'amalosia nei tulafono, o le a latou fa'asauā i o latou uso a tagata.

O le taua e tete'e i le tulafono a le Atua, lea na amataina i le lagi, o le a fa'aauau se'ia o'o i le taimi o le i'uga. O le a tofotofoina tagata uma. O le usita'i po'o le lē usita'i o le fesili lea e fai i ai le fa'ai'uga a le lalolagi 'atoa. O le a vala'auina tagata uma e filifili i le tulafono a le Atua po o tulafono a tagata. O inā o le a tusia ai le laina e vaelua ai. E na o le lua lava vasega. O amio ua uma ona atina'e; ma o le a fa'aalia uma pe ua latou filifilia le itū o le fa'amaoni po o le itū o le fouvale.

(20) O LE Ā LE FA'AI'UGA FA'ANOANO PE A O'O MAI LE I'UGA IĀ I LATOU O Ē NA FILIFILI MA LE LOTO I AI E LĒ USIUSITA'I I LE TULAFONO A LE ATUA?

Auā fa'auta, o le a o'o mai le aso e mū ai pei se umu; ona fai ai lea ma tagutugutu o saito o ē fa'amaualuluga uma, atoa ma ē fai amio leaga uma; e susunuina fo'i i latou i le aso o le a o'o mai, ua fetalai mai ai leova o 'au; e lē fa'atoeina ai mo i latou se 'a'a po o se la la'au.

Malaki 4:1

Ona o'o mai ai lea le i'uga. O le a fa'amaonia i le 'ato'atoa e le Atua Lana tulafono ma lavea'iina Ōna tagata. O Satani ma i latou uma na 'au fa'atasi ma ia i le fouvalega o le a ave'esea. E fa'afanoina le agasala ma ē agasala, o a'a ma lālāla'au (**Mala. 4:1**), - o Satani le a'a, ma o ē mulimuli iā te ia o lālā. O le a fa'ataunu'uina le 'upu i le ali'i o le amioleaga, “Ona ua e fa'atusa lou loto i le finagalo o le Atua;...Ou te fa'aumatia iā te 'oe, le kerupi fa'amalumalu, na i le vā o ma'a o le afi....E 'avea 'oe ma mea e ala ai le mata'u e lē toe i ai lava 'oe e fa'avavau" (**Esek. 28:6-19**). Auā “E toe itiiti ona leai lea o le amio leaga; e te mafaufau fo'i i le mea sa i ai o ia, a e leai lava" (**Sala. 37:10**); “e 'avea i latou e peiseā'i ua leai lava i latou” (**Opet. 1:16**).

(21) ONA O LE FILIFILIGA FA'A-SATANI E TETE'E I LE ALOFA TUNOA O LE ATUA, O LE Ā LE FETALAIGA A KERISO E FA'ATATAU IĀ I LATOU?

A o lē agasala mai iā te A'u, ua fa'asaunua e ia lona lava ola; atoa uma o ē 'ino'ino mai iā te A'u, ua latou manana'o i le oti.

Fa'ata'oto 8:36

O lenei gaoioga e lē o se pule so'ona fai i le vaega a le Atua. O ē na te'ena Lona alofa tunoa e selesele le mea na latou lūlūina. O le Atua le puna o le ola; a e afai e filifili e se tasi e 'au'auna i le agasala, ua vavae 'ese ai o ia mai le Atua, ma ave'esea o ia e ia lava mai le ola. O lea “ua liliu'eseina i latou i le ola o i le Atua” (**Efe. 4:18**). Na fetalai Keriso, “O ē ino'ino iā te A'u, ua latou manana'o i le oti” (**Fa'ata. 8:36**). Na tu'uina atu e le Atua iā te i latou e ola mo se taimi ina ia atia'e a latou amio ma fa'a'ailoa a latou

ta'iala. O lenei ua mae'a, ma ua latou maua le i'uga o a latou lava filifiliga. E ala i le olaga fouvale, o Satani ma i latou uma na so'ofa'atasi ma ia ua tu'uina i latou i se tulaga e le feagai ma le Atua ma o le a 'avea Lona fa'atasi ai e pei o se afi mumu ia te i latou. O le mamalu o Ia e alofa o le a fa'aumatia ai i latou.

(22) O LE A LE 'ALAGA OFOOFOGIA A KERISO NA FAIA I LUGA O LE SATAURO UA MAUTINOA AI LE FA'AMAONI O LE UIGA O LE ATUA; MAUTINOA AI LE FA'AUMATIA O LE AGASALA MA SATANI E FA'AVAVAU; MA FA'AMAUTUINA AI LE FANAU A TAGATA MA LE AIGA FA'ALELAGI E FA'AVAVAU?

Ua talia le vineta e Iesu, ona fetalai ane lea o Ia, "Ua taunu'u;" ua fa'agagau Lona ao, ona tu'uina atu lea o Lona agaga.
Ioane 19:30

I le amataga o le finauga tele, e le'i malamalama ai agelu. Pe ana fai e tu'u Satani ma ana 'au ia selesele le i'uga 'ato'atoa o la latou agasala, se manū e fano i latou; peita'i o le a le ilo tino e 'au a le lagi o lea le fa'ai'uga mautinoa o le agasala. O le masalomia o le alofa o le Atua o le a tumau pea i o latou mafaufau pei o se fatu leaga, e maua mai ai lona fua o le oti i le agasala ma le mafatia. Peita'i e le fa'apea pe a fa'aumaina le finauga tele. O i inā, ina ua fa'amae'aina le fuafuāga o le fa'aolataga, o le a fa'aalia ai le uiga moni o le Atua i ē fai mafaufau na foafoaina. O le a va'aia fa'avae o Lana tulafono e ato'aoa ma e le suia. Ma o le agasala o le a fa'aalitino lona uiga moni, o Satani ma lana amio. O le fa'aumatiāga o le agasala e fa'acaina ai le alofa o le Atua ma fa'amausalī ai Lona mamalu i luma o le atulaulau o ē fiafia e faia Lona finagalo, ma ē o lo'o i o latou loto Lana tulafono. O le mea lea atonu na olioli ai agelu a o latou maimoa i le satauro o le Fa'aola; auā e ui ina latou te le'i malamalama 'ato'atoa i ai, sa latou iloa o le fa'aumatiāga o le agasala ma Satani e le tau mateina, o le fa'aolataga o le tagata ua mautinoa, ma o le saogalemū o le atulaulau ua mausalī e fa'avavau. O Keriso na Ia silafia lelei le i'uga o le taulaga ofo na faia i Kalevario. Mo ia mea uma na Ia silasila ai aga'i i luma i le taimi ina ua Ia 'alaga mai i luga o le satauro, *"Ua Taunu'u."*

<i>Ou te fa'afetai i le Atua ma avatu ia te Ia le vi'iga ona o le fa'aolataga na Ia saunia mo a'u e ala i le maliu o Lona A'lo, o Iesu Keriso.</i>		
Li'o le Tali:	Ioe	Lē Mautonu
<i>Ua 'ou iloa o Satani e i ai ana auala fa'atogafiti e tosina ai a'u ia 'ou faia mea sesē, a e ua 'ou filifili e taofimau i le 'a'ao malosi o le fa'atuatua ia Keriso Iesu mo le puipua o a'u.</i>		
Li'o le Tali:	Ioe	Lē Mautonu
<i>'Ou te tatalo ina ia tali atu lo'u aiga ma a'u uō i le musumusuga a le Agaga Pa'ia ina ia tu'uina atu ai mea uma i le Atua.</i>		
Li'o le Tali:	Ioe	Lē Mautonu
<i>Ou te mana'o e tu'uina atu a'u ia i ai sa'u vaega i le fa'asalalauina o le fe'au matagofie o le lata o le afio mai o Keriso i so'o se ala Na te ta'ita'iina ai a'u i nei aso mulimuli a e le'i fa'aali mai o Ia.</i>		
Li'o le Tali:	Ioe	Lē Mautonu

Manatu mai le Su'esu'ega	Tatalo e mana'omia	Tali o Tatalo

I le Tu'ugamau o Iosefa

Lesona 7

Mulimuli ane ua mālōlo Iesu. O le aso umi o le fa'alumaina ma le sauāina ua mae'a. A o fa'aufale mai e toe 'ave o le lā le Sapati, ua mālōlo filēmū le Ālo o le Atua i le tu'ugamau o Iosefa. Ua mae'a Lana galuega, o Ōna 'a'ao ua malōlō i le filēmū. Na Ia malōlō i itūlā pa'ia o le aso Sapati.

(1) NA FA'APEFEA ONA FA'AALIA LE FIAFIA O 'AU O LE LAGI I LE FA'AI'UINA O LE VA'AIGA MATAGOFIE O LE FOAFOĀGA, MA INA UA TOE FA'AFUINA I LE SATAURO?

Ina o pepese fa'atasi fetū o le taeao, ma alalaga fiafia atali'i uma o le Atua.

Iopu 38:7

I le amataga na malōlō le Tamā ma Lona Ālo i le Sapati ina ua mae'a le galuega o le foafoāga. Ina “ua uma lava ona faia o le lagi ma le lalolagi, 'atoa fo'i ma mea uma o i ai” (**Kene. 2:1**), na oli'oli Lē na foafoa fa'atasi ma 'au a le lagi i le va'aiga mamalu ma le matagofie. “Ina o pepese fa'atasi fetū o le taeao, ma alalaga fiafia atali'i uma o le Atua” (**Iopu 38:7**). O lenei ua malōlō Iesu mai le galuega o le fa'aolataga; ma e ui ina i ai le fa'anoanoāga iā i latou na alolofa iā te Ia i le lalolagi, a e sa i ai le oli'olisaga i le lagi. E matuā mamalu i le va'aiga a 'au a le lagi le folafolāga o le lumana'i. O le foafoāga ua toe fa'afou, o le aigā tagata ua fa'aolaina, ona o le agasala ua fa'ato'ilaloina o le a lē toe pa'ū, --o lenei mea, o le taunu'uga e maua mai le galuega mae'a a Keriso, na silasila i ai le Atua ma agelu.

(2) A O "MALĒLĒ" KERISO I LE TU'UGAMAU I LE SAPATI, UA FA'AMAONIA AI LONA TĀUA I LE LALOLAGI, O LE Ā LE FA'AMATALAGA FA'AVALO'AGA NA FAIA E ISAIA E FA'ATATAU I LE FA'AAUAIINA O LE TAUSIGA O LE SAPATI I LE LAGI?

O lea masina fa'ato'ā va'aia, ma lea masina fa'ato'ā va'aia, o lea sapati ma lea sapati e ō mai ai tagata uma lava e ifo mai i O'u luma, ua fetalai mai ai le Ali'i.

Isaia 66:23

Mai lenei va'aiga, o le aso na malōlō ai Iesu e o'o i le fa'avavau le feso'ota'iga. “Auā e tonu Ōna ala uma lava” (**Teute. 32:4**), ma “O mea uma e faia e le Atua e fa'avavau ia” (**Faila. 3:14**). Pe afai e “Toe fuata'i mea uma lava, ua fetalai mai e le Atua i fofoga o Āna perofeta pa'ia uma lava talu mai anamua” (**Galu. 3:21**), o le Sapati o le foafoāga, o le aso na malōlō ai Iesu i le tu'ugamau o Iosefa, o le a 'avea pea o le aso o le malōlōga ma le fiafia. O le a fa'atasia le lagi ma le lalolagi i vi'iga, ma “O lea Sapati ma lea Sapati” e ō mai ai tagata uma lava e tapua'i ma le fiafia i luma o le Atua ma le Tama'i Mamoe.

(3) O LE Ā LE TA'UTINOGA OFOFOGIA SA FA'ALOGOINA MAI LE TA'ITA'I O LE TO'ASELAU, O LĒ SA LĒ MAFAI ONA ONA TAOFI LONA FIA FA'AILOA ATU O LONA FA'ATUATUA IĀ KERISO I LE TAIMI O LONA MALIU?

O le ta'ita'i fo'i o le to'aselau, ma ē na leoleo iā Iesu fa'atasi ma ia, na latou iloa le mafui'e ma mea na faia, ona latou matuā matata'u ai lea, ua fa'apea ane, "E moni, o le Ālo lava lanei o le Atua."

Mataia 27:54

I tauālumaga fa'ai'u o le aso o le fa'satauroina, na tu'uina mai ai fa'amaoniga fou o le fa'ataunu'uina o valo'aga, ma se molimau fou i le itū Atua o Keriso. Ina ua mavae le pōuliuli mai le satauro ma ua fa'alogoina le toe 'alaga a le Fa'aola, na lagona ai se isi leo o fa'apea ane, “E moni, o le Ālo lava lenei o le Atua” (**Mata. 27:54**).

O ia 'upu e le'i faia tau musumusu. O mata uma na va'ai po o fea o sau ai lea leo. O ai lea ua faia ia 'upu? O le ta'ita'i o le to'aselau, o le fitafita Roma. O le onosa'i fa'ale-Atua o le Fa'aola, o Lona vave maluu, ma le 'alaga o le manumālō mai Lona fofoga, ua lagona i le loto o lenei tagata fa'apaupau. I le tino tu'imomomoina, o lo'o tautau i le satauro, na va'aia e le ta'ita'i 'au fofoga o le Ālo o le Atua. Na ia lē mafai ona taofia le fa'aalia o lona fa'atuatua. O lenei ua toe tu'uina mai le fa'amaoniga o le Fa'aola Na Ia silasila i le mafatia o Lona finagalo. O le aso lava o Lona maluu, e to'atolu tagata e 'ese'ese mamao lava i latou, na fa'alauiloa o latou fa'atuatua, --o le ta'ita'i 'au Roma, o lē na tau'ave le satauro o le Fa'aola, ma lē na oti a o tautau i luga o le satauro i le isi Ōna itū.

(4) O LE Ā LE MEA TĀUA NA TUPU I LE ASO PENETEKOSO A O LAUGA PETERU I LE TO'ATELE O TAGATA NA FA'ATASI AI MAI LE FA'ASATAUROINA O IESU NA O LE TOLU VAIASO UA MAVAE NEI?

Ona papatisoina lea o ē na talia lana 'upu ma le fiafia; o lea aso fo'i ua fa'aopoopoina ai pe tolu afe o tagata.

Galuega 2:41

A o aga'i mai le pogisā, na maninoa ma to'afilēmū Kalevario. Ua ta'ape le motu o tagata, ma e to'atele na toe fo'i i Ierusalemā ua suia o latou loto mai le tulaga na i ai i le taeao. E to'atele na fa'atasi atu i le fa'asatauroina o Ia ona o le fia iloa, a e lē ona o le ita iā Keriso. A e na latou talitonu pea i tu'ua'iga a faitaulaga, ma na latou va'ai atu o Keriso o se tagata leaga ua la soli le tulafono. Na 'afia i latou i le vevesi ma 'au fa'atasi atu ai i le motu o tagata lē taupulea o ē na tauemu ma fai 'upu iā te Ia. Peita'i ina ua ufitia le lalolagi i le pōuliuli na latou tutū ai ua ta'usalaina i latou e o latou lava loto fuatia ifo, ua latou lagona le nofo sala ona o se mea e matuā sesē. E le'i toe lagona se leo o tauemuga, ma 'upu fa'aulaula i totonugalemū o le fa'amālumālu mata'utia; ma ina ua si'itia, na latou aga'i atu loa i o latou aiga i le filēmū ma le paū. Na latou lagona o tu'ua'iga a faitaulaga e sesē, o Iesu e lē o se fa'afoliga; ma i nai vaiaso mulimuli ane, ina ua lauga Peteru i le aso Penetekoso, na aafia i latou i le afe ma afe o ē na liliu iā Keriso.

(5) O LE Ā LE FA'AMATALAGA A LE TUSI PA'IA E FA'ATATAU I LE VĀ FEAGAI O LE ATUA MA MEA NA IA FOAFOA E LEAI NI OLA (ĀNA GALUEGA) O LEA NA FA'AALIA E LONA LAVA ĀLO I LE AIGĀTAGATA, A E SA FOLIGA E LE'I ILOA E TA'ITA'I O ISARA'ELU?

O lo'o agalelei mai Ieova i mea uma, o Lona alofa mutimutivale fo'i ua i Āna mea uma na fai.

Salamo 145:9

Peita'i o ta'ita'i Iutaia e le'i suia i mea sa latou molimauina. O lo latou 'ino'ino iā Iesu e le'i fa'aititia. O le pogisā na ufitia ai le lalolagi i le taimi o le fa'asatauroina o Iesu e lē sili atu lona māfiafia i lo le pogisā lea o lo'o ufitia ai pea mafaufau o faitaulaga ma ta'ita'i. I Lona fanau mai na iloa e le fetū Keriso, ma sa ta'ita'ia le 'au makoi i le fale o manu na la ta'oto ai. Na iloa o Ia e 'au a le lagi ma latou pepese Ōna vi'iga i laufanua o Petele'ema. Na iloa e le sami Lona si'ufofoga, ma usita'i ai i Lana fetalaiga. O ma'i ma le oti na taualoa Lana pule, ma tu'uina mai iā te Ia le mea na fāoa. O le lā na iloa o Ia, ma o le va'aiga o Lona mafatia na ufiufi ai lona malamalama. O papa na iloa o Ia, ma sa lūlūina ma nuti i Lana 'alaga puapugātia. O mea e leai ni ola o le natura na latou iloa Keriso, ma latou tu'uina mai le molimau i Lona itū Atua. Peita'i o faitaulaga ma ta'ita'i o Isara'elu latou te le'i iloa le Ālo o le Atua.

(6) ONA E LĒ MANANA'O IUTAIA E FA'ATAUTAU PEA TAGATA I LUGA O SATAURO I LE SAPATI, O LE Ā LA LATOU TALOSAGA IĀ PILATO IA FA'AVAVE AI ONA O'O MAI LE OTI MA MAFAI AI ONA 'AVE'ESEA I LATOU?

Ona fa'atoga atu lea o Iutaia iā Pilato ia gauia o latou vae, ia 'ave'eseina fo'i i latou, ina ia lē tumau pea o tino i luga o satauro i le sapati, auā o le aso o le sauniga lea, (o le aso sili fo'i lea sapati).

Ioane 19:31

A e le'i mālōlo ai lava faitaulaga ma ta'ita'i. Ua latou fa'ataunu'uina lo latou fa'amoemoe ina ia tu'uina atu Keriso ia oti; peita'i latou te le'i maua le lagona o le manumālō na latou fa'anaunau i ai. E o'o lava i le taimi ina ua foliga mai ua manumālō, sa fa'asoesā masalosologa pe o le ā le mea o le a soso'o ona tupu mai. Na latou lagona le alaga, *"Ua taunu'u!" (Ioa. 19:30).* *"Lo'u Tamā e, 'Ou te tu'uina atu Lo'u agaga i 'Ōu 'a'ao" (Luk. 23:46).* Na latou va'aia papa ua māvavae ma lagona le mafui'e tele, ona lē maua ai lea e i latou se to'afilēmū.

Na latou matau'a i le tosina o tagata iā Keriso a o soifua; e o'o lava i Lona maliu o matau'a lava. Ua sili nei lo latou matata'u i le Keriso ua maliu, i lo le fefefe i le Keriso a o soifua. Ua latou matata'u ina ne'i atili fa'atāua e tagata mea ua tutupu fa'atatau i Lona fa'asatauroina. Na latou fefefe i le i'uga o galuega o lenā aso. E leai se mafua'aga e tasi o le a latou fa'atagaina ai ia tu'u pea Lona tino i luga o le satauro i le Sapati. Ua latalata mai le Sapati, ma o le a solia lona pa'ia pe afai e tautau pea tino i luga o satauro. O lea, ina ua fa'aaogāina lenā mafua'aga, sa talosagaina e Iutaia Pilato ina ia fa'avave ona fa'ao'o le oti i pagotā, ma 'ave'eseina o latou tino a o le'i goto le lā.

(7) O LE Ā LE VALO'AGA SA FA'ATAUNU'UINA E FA'ATATAU I LE TULAGA O LE TAULAGA I LE MALUMALU NA FA'AFATUSA I AI LE MALIU O KERISO I LUGA O LE SATAURO?

'Aua ne'i latou fa'atote se mea e o'o i le taeao, 'aua fo'i ne'i latou gagau sona ivi, e tusa ma tulafono uma i le Paseka ia latou faia.

Numera 9:12

O Pilato e le'i mana'o fo'i ia tu'uina ai pea le tino o Iesu i luga o le satauro. Na ia fa'atagaina e gauia vae o isi pagotā e to'alua ina ia fa'avave ai ona oti i la'ua; peita'i na latou iloa o Iesu ua maliu. O fitafita lē taupulea na latou lagona le o'otia i mea na latou fa'alogo ma va'ai ai iā Keriso, ma taofia ai i latou mai le gauia o Ōna 'a'ao. I le taulaga o le Tama'i Mamoe a le Atua ua fa'ataunu'u ai le tulafono o le Paseka, “Aua ne'i latou fa'atote se mea e o'o i le taeao, 'aua fo'i ne'i latou gagau sona ivi; e tusa ma tulafono uma o le Paseka ia latou faia” **(Nume. 9:12).**

(8) O LE Ā LE VALO'AGA MAI LE FEAGAIGA TUAI NA FA'ATAUNU'UINA MA SA MULIMULI ANE UA FA'AMAONIA E IOANE INA UA IA TUSIA E UIGA I LE FITAFITA ROMA LEA SA TUTU'IA LE ITŪ O KERISO INA IA FA'AMAONIA AI LONA MALIU?

'Ou te liligi ifo i luga o le aiga o Tavita, ma luga o ē nonofo i Ieruselema le agaga o le alofa tunoa ma talosaga, latou te va'ava'ai mai iā te A'u na latou tu'ia; latou te tagitu'i fo'i iā te Ia, e pei ona tagitu'i i le atali'i e to'atasi, ma latou fa'anoanoa iā te Ia, e pei ona fa'anoanoa i le ulumatua.

Sakaria 12:10

O faitaulaga ma ta'ita'i na maofa ina ua latou iloa ua maliu Keriso. O le oti i le fa'asatauroina o se fa'asalaga e faifai umi; e faigatā ona fuafua pe o le ā le taimi e uma ai le ola o le tagata. E le'i fa'alogo muamua i se tasi na fa'asatauroina na maliu i totonu o le ono itūla. Na naunau faitaulaga ia mautinoa ua maliu Iesu, ma o lo latou manatu na mafua ai ona tutū'i e le fitafita le tao i le itū o le Fa'aola. Mai lenā manu'a, na tafe mai ai le toto ma le vai. Na matauina e i latou uma na va'ai i ai, ma na fa'amatala manino mai lea tulaga e Ioane. Na ia fa'apea mai, “A'o le tasi tagata tau ua tutū'i lona itū i le tao; ona sisina loa mai lea o le toto ma le vai. O ia na matamata i ai, ua molimau ai, e moni lava lana 'upu, ina ia outou talitonu ai. Auā ua faia ia mea ia taunu'u ai le tusi, 'E lē gauia Sona ivi.' Ua toe fa'apea mai fo'i le Tusi, 'E va'ai atu i latou iā te Ia na latou tu'ia” **(Ioa. 19:34-37).**

(9) O LE Ā LE MEA SA FA'AALIA AI NA MALIU KERISO A E LE'I TUIA LONA ITŪ I LE TAO?

A o le tasi tagata tau ua tutu'i Lona itu i le tao; ona sisina loa mai lea o le toto ma le vai.

Ioane 19:34

Ina ua mavae le toe tū ona fa'asalalau ai lea o le tala e faitaulaga ma ta'ita'i o Keriso e le'i maliu i luga o le satauro, sa na o na matapogia, ma na toe ala a'e mulimuli. O le tasi tala fa'apea ua fa'amaonia e lē o se tino moni o ivi ma 'a'ano, a o le tino e foliga o se tino na tu'uina i le tu'ugamau. O gaoioiga a fitafita Roma na lē fa'amaonia ai ia tala lē sa'o. E le'i gauia Ōna 'a'ao auā ua uma ona maliu o Ia. Ina ia fa'amalieina faitaulaga na latou tutū'i ai Lona itū. Afai e le'i maliu o Ia, o lenā manu'a e mafua ai le maliu i le taimi lava lenā.

Peita'i e lē o le tutū'i i le tao, e lē o le tigā o le satauro na mafua ai ona maliu Iesu. O le 'alaga “ma le leo tele” **(Mata. 27:50; Luk. 23:46)**, i le taimi na maliu ai, o le tafe o le toto ma le vai mai Lona itū, ua ta'u mai ai na maliu o Ia ona o le mafatia o Lona finagalo. O Lona finagalo na nuti momomo i le matuā mafatia. Na fasia o Ia ona o agasala a le lalolagi.

(10) O LE Ā LE FETALAIGA A KERISO I ŌNA SO'O E FOLIGA MAI O SE VALO'AGA, ONA UA LATOU FEFEFE O LE A TO'ESEA LO LATOU FA'ATUATUA PE A MAVAE ATU LONA MALIU?

Ona fetalai atu lea o Ia iā te i latou, "Se ā le mea tou te fefefe ai fa'apea? Se ā le mea tou te lē fa'atutua mai ai?"

Mareko 4:40

O le maliu o Keriso na fano ai fa'amoemoega o Lona 'au so'o. Na latou va'ai i Ōna fofoga ua tofā ma Lona ao ua fa'agaugau, o Lona lauao ua to'a ai le toto, o Ōna 'a'ao na tu'ia i fao, ma le tigā e lē mafai ona fa'amatalaina. E o'o mai i le taimi mulimuli na latou

lê talitonu o le a malii o Ia; ma sa faigatā ona latou talitonu e moni ua malii o Ia. Ona ua matuā mafatia i latou i le fa'anoanoa, sa latou lê manatua ai Āna afioga na valo'ia ai le va'aiga tonu lava lea. E leai se mea na Ia fetalai atu ai iā te i latou o le a mafai nei ona fa'amafanafanaina ai i latou. Ua latou iloa atu na o le satauro ma le tino ua lilo i le toto sisina o Lē ua fa'asalaina. O le lumana'i e foliga mai ua na o le pogisā ma leai se fa'amoemoe. Ua mavae 'ese lo latou fa'atuatua iā Iesu; peita'i e leai se isi taimi na sili ai le alolofa i lo latou Ali'i e pei o le taimi nei. Latou te le'i maua muamua le lagona o Lona tāua, ma lo latou mana'omia o Lona fa'atasi ai.

(11) ONA E LE'I MAFAI E IOANE, LE SO'O, ONA MAUA MAI LE FA'ATAGAGA E 'AVE AI LE TINO O KERISO MO LE FALELAUASIGA E TATAU AI, O AI SA MAFAI ONA FAIA O LEA MEA?

Ua mavae ia mea, ona fa'anoi atu lea o Iosefa le Arimataia iā Pilato, ina ia 'ave 'ese e ia le tino malii o Iesu; (o ia o le so'o o Iesu, a e fa'alilolilo ona o le feje iā lutaia); ua tu'uina mai fo'i e Pilato. Ona alu ane lea o ia, ua 'ave le tino o Iesu.

Ioane 19:38

E o'o lava i Lona malii, na tāua pea i Ōna so'o le tino o Keriso. Na latou naunau ia tu'uina atu se falelauāsiga fa'aaloalogia, peita'i na le iloa pe fa'apefea ona fa'ataunu'u lenā mea. O le fouvale i le mālō o Roma le agasala na molia ai Iesu, ma o tagata e fa'asalaina i le oti ona o lenā agasala e tanumia i latou i le fanua tanu e fa'apitoa mo tagata solitulafono fa'apea. O le so'o o Ioane ma fafine mai Kalilaia sa fa'atalitali i latou i le satauro. Na latou lē tu'ua le tino o lo latou Ali'i ina ia so'ona mulu e fitafita e leai se lagona alofa, ma tanumia ai i se tu'ugamau e ta'uleagaina. A e latou te lē mafai ona taofia ia tulaga. Latou te lē mafai ona maua se avanoa mai pule lutaia, ma e leai fo'i so latou feso'ota'iga lelei ma Pilato.

I lenei taimi o faigatā, na o'o mai ai le fesoasoani i le 'au so'o mai iā o Iosefa le Arimataia ma Nikotemo. O i la'ua o totino o le Fono Faitulafono ma e masani ma Pilato. O nei ali'i e maumea ma e lauiloa, o tagata e taualoa. Na la'ua filifili o le tino o Iesu e tatau ona mamalu Lona falelauāsiga.

Na loto tele Iosefa ma ua alu iā Pilato, ma ole atu ina ia tu'uina mai iā te ia le tino o Iesu. O le taimi muamua lea na iloa ai e Pilato e moni ua malii Iesu. E fete'ena'i fa'amatalaga na o'o atu iā te ia e uiga i mea na tutupu i le fa'asatauroga, peita'i o le mautinoāga o le malii o Iesu na le'i fa'ailoa atu iā te ia. Na lapata'i Pilato e faitaulaga ma ta'ita'i e uiga i le taufa'asesē na faia e so'o o Keriso e fa'ataui i Lona tino. Ina ua ia fa'alogi i le talosaga a Iosefa, na ia 'a'ami loa i le ta'ita'i 'au na i ai i le fa'asatauroina, ma ia iloa ai le tonu i le malii o Iesu. Na ia fa'alogi ai fo'i i le tala o le va'aiga i Kalevario, ma fa'amaonia ai le molimau a Iosefa.

(12) O LE Ā LE VAEGA A NIKOTEMO SA FAI I LE FALELAUASIGA O IESU UA FA'AOPOOPO AI LE MAMALU MA LE FA'AALOALOGIA O LONA MALIU?

Ua alu ane fo'i Nikotemo, o lē na mua'i alu iā Iesu i le pō, ua na 'ave fo'i le muro fefiloi ma le aloe, po ua selau litara.

Ioane 19:39

Na talia le talosaga a Iosefa. A o atuatuva le Ioane e fa'ataui i le falelauāsiga o Lona Ali'i, ua toe fo'i atu Iosefa ma le poloa'iga mo le tino o Keriso; ma o Nikotemo ua sau fo'i ia ma mea manogi taugatā, o le muro ua fefiloi ma le aloe, pe ā ma le selau pauna le mamafa, mo le saunia o Lona tino mo le falelauāsiga. O ē sili ona mamalu i Ierusalem e lē sili a'e le fa'aaloalogia o o latou malii. O le 'au so'o na latou maofa ina ua va'aia nei tagata mau'oa o lo'o tāua iā te i la'ua le falelauāsiga o lo latou Ali'i e pei fo'i o i latou.

O Iosefa ma Nikotemo e le'i talia fa'aaliali le Fa'aola a o soifua o Ia. Na la iloa o lea la'asaga e fa'ate'a ai i la'ua mai le Fono Faitulafono, ma sa la fa'amoemoe e puipui iā te Ia i lo la'ua 'auai i a latou potopotoga. Mo sina taimi na foliga mai sa manuia; peita'i o faitaulaga fai togafiti, na latou mātāuina lo la'ua lelei ma Keriso, ma sa fa'alavelave i a la'ua fuafuāga. Na molia ma tu'uina atu o Ia ia fa'asatauroina a'e le'i fa'atasi ai i la'ua. Ona o lenei ua malii o Ia, e la te lē toe fa'aliloina lo la pipi'i iā te Ia. A o fefefe le 'au so'o e fa'ailoa o i latou o nisi e mulimuli iā te Ia, o Iosefa ma Nikotemo ua fa'aalia le loto tetele ma na ō mai e fesoasoani iā te i latou. O le fesoasoani a nei ali'i mau'oa ma le fa'aaloalogia na matuā mana'omia i lenei taimi. Na la mafai ona faia mo lo latou Ali'i ua malii le mea na le'i mafai e le 'au so'o matitiva ona fai; ma o lo la'ua tamao'aiga ma tulaga na i ai na puipua ai i latou, i se vaega e matuā tāua, mai le to'atama'i o faitaulaga ma ta'ita'i.

(13) INA UA MAE'A SAUNIUNIGA UMA SA FAIA MO LE FALELAUASIGA O KERISO, UA TOE FO'I FAFINE I O LATOU AIGA, O LE Ā LE MEA NA TA'U MAI UA LATOU FAIA LOA?

Ua latou toe fo'i atu, ua sauni mea manogi; ua latou malōlō fo'i i le sapati, e tusa ma le poloa'iga.

Luka 23:56

Ma le fa'aeteete ma le fa'aaloalo tele, o o la'ua lava lima na ave 'esea le tino o Keriso mai le satauro. O loimata o le alofa mutimutivale na maligī ifo a o la va'ai atu i Lona tino manu'a ma tu'imomomoina. O Iosefa e i ai lona tu'ugamau fou na foa i le papa. O lenei tu'ugamau na faia mo ia lava; peita'i e latalata i Kalevario, ma sa ia saunia lea tu'ugamau mo Iesu. O le tino, fa'atasi ma mea manogi na aumai e Nikotemo, na afifi ma le fa'aeteete i le 'ie lino, ma sa 'aveina loa le Fa'aola i le tu'ugamau. Na tago atu ia so'o e to'atolu ua fa'asasa'o fa'alelei Ōna 'a'ao mānu'anu'a ma tu'uina i luga o Lona fatafata. Ua ō mai fafine Kalilaia ma va'ai pe ua faia uma mea e tatau ona fai mo le tino maliu o lo latou A'oa'o pele. Ona latou va'aia lea ua fuli atu le ma'a tele e pupuni ai le faitoto'a o le tu'ugamau, ma ua tu'uina ai le Fa'aola i Lana mālōloga. O fafine sa latou ona mulimuli ō 'ese mai le satauro, o i latou fo'i na mulimuli ō 'ese mai le tu'ugamau o Keiso. A o fa'amalumu mai le pogisā, o Maria le Maketala ma isi Maria na fa'aumiumi ona i ai i le nofoāga na tu'u ai le tino o lo latou Ali'i, sa maligī o latou loimata o le fa'anoanoa i le i'uga ua o'o i Lē e latou te alolofa i ai. "Ua latou toe fo'i atu,... ua latou mālōlo fo'i i le Sapati, e tusa ma le poloa'iga" (Luk. 23:56).

(14) I LE TAIMI LAVA O LE MALIU O KERISO, O LE Ā LE MEA SA TUPU I LE 'IE PUPUNI O LE MALUMALU NA O'O AI LE MATA'U TELE I LOTO O LE 'AU FAITAILAGA?

Ona saeluaina lea o le 'ie puipui o le malumalu, ua amata ifo i luga, ua o'o lava i lalo.

Mareko 15:38

O le Sapati lenei e lē mafai ona fa'agaloia i le 'au so'o fa'anoanoa, fa'apea faitaulaga, o ta'ita'i, tusi 'upu, ma tagata. I le goto ifo o le lā i le tauafiai o le aso o le sauniuniga ua ilia pū, e fa'a'iloa ai ua amataina le Sapati. O le Paseka sa fa'amanatuina e pei ona faia i seneturi e tele, a e o la o Lē na fa'asino i ai ua fasiotia e lima o tagata leaga, ma o lo'o ta'oto i le tu'ugamau o Iosefa. I le aso Sapati na fa'atumulua lotoā o le malumalu i ē tapua'i. O le faitaulaga sili mai Kolokota na 'au ai, na ofu o ia i la'ei o le faitaulaga mo sauniga. O faitaulaga e fusi o latou ulu i 'ie lino papa'e, na tele gaioiga o tiute e fa'ataunu'uina. Peita'i o nisi o lo'o 'auai e lē o to'afilēmū a o ofoina atu le toto o povi ma 'oti mo agasala. Latou te le'i iloa ua fetau i le ata fa'atua ma le mea moni, ma ua mae'a ona faia le taulaga mo agasala a le lalolagi. Latou te lē iloa ua lē o toe i ai se tāua i le fa'ataunu'uina o sauniga e masani ai. Peita'i e le'i molimauina muamua nei sauniga ma se lagona o fete'ena'iga. O pū ma mea fai pese fa'atasi ma leo o ē pepese sa matuā manino e pei ona masani ai. Peita'i na i ai se lagona e 'ese ai mai mea uma.

Ua tau fesilisili tagata i se mea uiga 'ese na tupu. O le mea e sili ona pa'ia na masani ona matuā puipuia mai so'ona soli. Peita'i o nei ua tatala ma va'ai i ai so'o se tasi. O le 'ie puipui, na faia i le lino mamā, ma teuteuina fa'amatagofie i le auro, pāuli, ma le mumū, ua saeluaina mai luga i lalo. O le nofoāga e feiloa'i ai Ieova ma le faitaulaga sili, e feso'ota'i ai ma Lona mamalu, o le nofoāga na 'avea ma afio'aga pa'ia o le Atua, ua mātala atu mo le va'aiga a so'o se tasi,—o le nofoāga ua lē toe aloa'ia e le Ali'i. Ma se fa'amalumu pogisā ua i o latou luga, sa 'au'auna pea faitaulaga i luma o le fatafaitaulaga. O le lē puipuia o le mea lilo o le nofoāga e sili ona pa'ia ua fa'atumulua ai i latou i le mata'u ona o se malaia o le a o'o mai.

(15) O FEA NA FETALAI IESU IA SA'ILI AI LE MEA MONI E FA'ATATAU IĀ TE IA?

E su'esu'e outou i Tusi, auā ua outou manatu tou te maua ai le ola e fa'avavau; o Tusi fo'i ia o lo'o molimau iā te A'u.

Ioane 5:39

E tele manatu na vevesi i mafaufauga sa amata i va'aiga i Kalevario. Mai le fa'asatauroina e o'o i le toe tū e to'atele na lē maua se moe a e ua su'esu'e i valo'aga, o nisi na fia iloa le 'ato'atoa o le uiga o le tausamiga o lo'o latou fa'amanatuina, o nisi sa sa'ili ni fa'amaoniga o Iesu e lē o Ia Lē na Ia ta'u mai; a o isi ua su'esu'e ma loto fa'anoanoa ni fa'amaoniga o Ia e moni lava o le Mesia. E ui ina su'esu'e i vaega 'ese'ese ua va'aia, na i'u ina talitonu i le mea moni e tasi,—o valo'aga ua fa'ataunu'uina i mea na tutupu i nai aso ua mavae nei, ma o Lē na fa'asatauroina o le Fa'aola o le lalolagi. O le to'atele o i latou na 'aufa'atasi i le sauniga e le'i toe 'auai lava i sauniga o le Paseka. O le to'atele 'atoa ai ma nisi o faitaulaga ua talitonu i le uiga moni o Iesu. O a latou su'esu'ega i valo'aga e le'i fa'alēaogāina, ma ina ua mavae Lona toe tū na latou ta'utino o Ia o le Ālo o le Atua.

(16) INA UA VA'AI NIKOTEMO UA SI'ITIA KERISO I LUGA O LE SATAURO, O LE Ā LE MEA SA IA MANATUA NA FETALAI ATU AI KERISO IĀ TE IA I LE TASI PŌ, O LEA UA FA'AMATALA NEI LONA MAFUFAU E MALAMALAMA MA TALITONU AI IĀ TE IA?

E pei ona si'itia i luga e Mose o le gata i le vao, e ao ina fa'apea ona si'itia i luga o le Atali'i o le tagata; ina ia lē fano se tasi e fa'atutua iā te Ia, a ia maua le ola e fa'avavau.

Ioane 3:14, 15

O Nikotemo, ina ua ia va'aia Iesu i luga o le satauro, na ia manatua Āna afioga na Ia fetalai ai i le po i le mauga o Olive, “*E pei ona si'itia i luga e Mose o le gata i le vao, e ao ina fa'apea ona si'itia i luga o le Atali'i o le tagata; ina ia lē fano se tasi e fa'atutua iā te Ia, a ia maua le ola e fa'avavau*” (**Io. 3:14**). I le aso Sapati lenā a o ta'oto Iesu i le tu'ugamau, na maua e Nikotemo le avanoa e manatunatu loloto ai. Ua manino le malamalama ua sulugia ai lona mafaufau, ma o afioga na fetalai atu ai Iesu iā te ia ua lē o ni 'upu e lē mafa'amatalaina. Na ia lagona e tele se mea ua ia le maua i lona lē feso'ota'i atu i le Fa'aola a o soifua. A o nei ua ia toe manatu i mea na tutupu i Kalevario. O le tatalo a Keriso mo e na fasioti iā te Ia ma Lana tali atu i le ōlega a le pagotā mafatia ua lata i le oti na fa'agae'etia ai le loto o le faipule a'oa'oina. Na ia toe va'ai i le Fa'aola i Ōna puapuagā; na ia toe fa'alogoina Lana 'alaga mulimuli, “*Ua taunu'u!*” sa 'alaga ai e pei o 'upu a se tasi ua manumālō. Na ia toe va'ai i le lūlūina o le lalolagi, o lagi ua fa'apouliuligia, o le saeluaina o le 'ie puipui, o papa ua gatete, ma ua fa'amausalī ai lona fa'atutua e fa'avavau. O mea ia na tutupu e fa'aumatia ai fa'amoemoe o le 'au so'o, na mautinoa ai le talitonu o Iosefa ma Nikotemo i le itū Atua o Iesu. O lo la'ua fefefe na fa'ato'ilaloina e le loto tele ma le fa'atutua e mausalī.

(17) A O LUMANA'I AI LONA MALIU, SA FA'APEFEA ONA FA'AMAMALUINA E KERISO LE FA'ATUTUA O LATOU UMA NA Ō MAI IĀ TE IA MO LE FA'AMALŌLŌGA?

O mea uma fo'i ua Ia maliu atu i ai, po o faoa 'a'ai, po o 'a'ai tetele, po o 'a'ai, ua latou tu'u ai ē mama'i i malae, ma 'ai'oi mai iā te Ia, ina ia latou papa'i atu tau lava o le tu'upao o Lona ofu, o ē na papa'i iā te Ia, na malōlō ai i latou uma.

Mareko 6:56

E leai se isi taimi na sili ai ona tosina mafaufau o le motu o tagata nai lo le taimi lea a o i ai o Ia i le tu'ugamau. E tusa ai ma a latou tū masani, ua aumai a latou tagata mama'i ma ē puapuagātia i lotoā o le malumalu ma fesilisili, O ai e mafai ona ta'u mai fa'atatau iā Iesu le Nasareta? E to'atele na malaga mai nu'u mamao e sa'ili Lē na fa'amālōlō i ē mama'i ma fa'atutū i ē na oti. O itū uma na fa'alogoina ai le tagi, Matou te manana'o iā Keriso Lē e fa'amālōlō! O le taimi lea o ē na manatu ua iloa ai fa'aailoga o le lepela e su'esu'e e faitaulaga. O le tele na fa'amalosi e fa'alogo ua afāina le tane, avā, po o le fanau i le ma'i lepela, ma o le a ō 'ese atu mai le puipuiga a o latou aiga ma le tausiga a uō, ina ia lapata'ia tagata 'ese i le 'alaga fa'anoanoa, “Lē mamā, lē mamā!” O 'a'ao alofa o Iesu le Nasareta sa lē fa'afiti i le pa'i atu e fa'amālōlō le lepela 'inosia, a o nei ua pi'ilima i luga o Lona fāfāfā. O fofoga na tali atu i lana ōlega i 'upu mafanafana, “*Ou te loto i ai; inā mamā ia 'oe*” (**Mata. 8:3**), o lenei ua filemū. E to'atele na talosaga i le faitaulaga sili ma ta'ita'i mo se fesoasoani, peita'i e leai. E foliga mai na latou naunau ina ia latou toe mau fa'atasi ma Keriso. Na latou tinoū e fesili e uiga iā te Ia. Ua lē mafai ona fa'ata'ape'ape i latou. A e peita'i sa tutūli'ese i latou mai lotoā o le malumalu, ma sa tutū fitafita i faitoto'a ia taofi ai le motu o tagata ua ō mai ma o latou tagata mama'i ma e ua tali oti, o lo'o tau ulufale fa'amalosi.

O ē mafatia na ō mai ia fa'amālōlōina e le Fa'aola, a e na matuā fa'anoanoa ona o le fa'amoemoe ua lē taunu'u. Sa fa'atumulia le ala tele i le fa'avavau. O ē mama'i na matuā naunau i le pa'i atu o Iesu e mālōlo ai i latou. Na latou sa'ili atu i foma'i, e le'i maua ai se fesoasoani; e le'i ai se agava'a e pei o Ia lea o lo'o ta'oto i le tu'ugamau o Iosefa.

(18) O AI LE MALAMALAMA TELE LEA NA MATUĀ FA'ANOANOAI TAGATA INA UA LATOU ILOA LE MEA MATA'UTIA SA TUPU I LE FA'ASATAUROGA E LE'I LEVA ATU?

Ona toe fetalai atu lea o Iesu iā te i latou, ua fa'apea atu, O A'u nei o le malamalama o le lalolagi; o lē mulimuli mai iā te A'u, e lē savali o ia i le pouliuli, a e iā te ia le malamalama o le ola.

Ioane 8:12

O le leo o le tagi fa'anoanoa na toe manatua ai e le afe ma afe o tagata le talitonuga ua mavae 'ese atu le malamalama tele na i le lalolagi. A aunoa ma Keriso, o le lalolagi ua pōuliuli ma pogisā. O le to'atele o leo na fa'ateleina le 'alalaga, “Fa'asatauro iā te Ia, fa'asatauro iā te Ia,” o lenei ua latou iloa le malaia ua fa'amalumu ifo i o latou luga, ma se manū o le a 'alalaga atu, “Tu'u mai Iesu iā te i matou,” pe ana fai o soifua pea o Ia.

(19) SA FA'APEFEA ONA FA'AMATALAINA E LE FAI SALAMO I LE GAGANA FA'AVALO'AGA LE TULAGA AGASALA O I LATOU, E ALA I A LATOU TU'UA'TGA SESĒ, NA AUMAIA AI KERISO I LONA MALIU I LUGA O LE SATAURO?

Auā ua fa'amaga mai iā te a'u le gutu o lē amio leaga, ma le gutu o lē taupelelope; ua latou fai 'upu mai iā te A'u i le laulaufaiva pepelo.

Salamo 109:2

Ina ua fa'alogo tagata ua fasiotia Iesu e faitaulaga, na fesilisili i latou e uiga i Lona maliu. O le au'ili'ili o Lona fa'amasinoga e le'i fa'alaua'iteleina; peita'i o le taimi a o i ai o Ia i le tu'ugamau, o Lona suafa na i luga o laugutu e afe ma afe, ma o fa'amatalaga o Lona fa'amasinoga fa'afoliga, ma le faiga fa'ataugā e faitaulaga ma ta'ita'i, sa lauiloa i tagata uma. A o nei tagata, o faitaulaga ma ta'ita'i na vala'auina ina ia fa'amalamalama valo'aga o le Feagaiga Tuai e fa'ataui i le Mesia, ma a o latou taumafai e fa'au se fa'amatalaga lē sa'o e tali atu ai, na 'avea i latou e pei o tagata ua vālea. O valo'aga e fa'asino i puapugā o Keriso ma Lona maliu e le'i mafai ona latou fa'amalamalamaina, ma o le to'atele o ē na fesilisili na talitonu ua fa'ataunu'uina Afioga a le Atua.

(20) O LE Ā LE FETALAIGA A KERISO I TA'ITA'I LEA NA LATOU TE'ENA I LE TAUĒMU MA LE FAIFAI A O NEI UA TOE MANATUNATU I AI MA LE MATA'U TELE?

Ua tali atu Iesu, ua fa'apea atu iā te i latou, "Inā lepeti ia o lenei malumalu, ona 'Ou toe faia lea i aso e tolu."

Ioane 2:19

O le tau i ma sui na manatu faitaulaga o le a matuā fiasia ai, o lenei ua latou tofo i ai i le 'o'ona. Ua latou iloa o le a latou fetala'i ma faitioga a tagata; na latou iloa o i latou lava na 'auai i tu'ua'iga e fa'asaga iā Iesu, a o nei ua matata'u i a latou lava galuega matagā. O nei faitaulaga na taumafai e talitonu o Iesu o le tafa'asesē, a e le'i aogā. O nisi o i latou na laulaututū i tafatafa o le tu'ugamau o Lasalo, ma latou va'aia lē na oti ua toe ola mai. Na latou matata'u ma ua fefefe ne'i toe tū mai Keriso mai ē na oti, ma toe fa'aali mai iā te i latou. Na latou fa'alogo o fa'a'iloa e iā te Ia le mana e Na te tu'uina atu ai Lona soifua ma toe aumai fo'i. Sa latou manatua na Ia fetalai, *"Ou te lepeti lenei malumalu ona 'Ou toe faia lea i aso e tolu"* (**Io. 2:19**). Na fa'amatala e luta iā te i latou afioga na fetalai atu ai Iesu i le 'au so'o, a o latou malaga mai i Ierusalem, *"Fa'auta, o le a tatou o a'e i Ierusalem, e tu'uina atu ai le Atali'i o le tagata i le 'au faitaulaga sili, ma le 'au tusi 'upu, latou te fa'asala ia ta Ia ia oti, latou te tu'uina atu fo'i iā te Ia i nu'u 'ese, ina ia latou fa'atauemu, ma sasa, ma fa'asatauro iā te Ia; a e toe fa'atūina o Ia i le aso tolu"* (**Mata. 20:18, 10**). Ina ua latou fa'alogo i ia 'upu, na latou 'a'amu ma tauemu iā te Ia. Peita'i ua latou manatua o valo'aga a Keriso ua fa'ataunu'uina e o'o mai nei. Na Ia fetalai atu o Ia e toe tū i le aso tolu, ma o ai e fa'apea mai e lē taunu'u lenā mea? Na latou naunau ia ave 'ese nei mafauaiga, a e ua lē mafai. E pei o lo latou tamā le ti'apolo, ua latou talitonu ma ua gatete ai.

Ua mavae nei le vevesi mai mea na tutupu, a o fofoga o Keriso o lo'o fa'avelave i o latou mafauaiga. Na latou va'aia o Ia o tū to'afilēmū ma le lē faitio i luma o Ōna fili, sa puapugātia e aunoa ma se muimui i a latou tauemuga ma sauāga. O mea uma na tutupu i Lona fa'amasinoga ma le fa'asatauroina ua toe fo'i mai iā i latou ma se talitonuga mālōsi o Ia lava o le Ālo o le Atua. Na latou lagona atonu o le a tū mai o Ia i o latou luma i se taimi, o lē sa molia e 'avea o lē na te faia le moliaga, o lē na fa'asalaina o le a Ia tu'uina atu le fa'asalaga, o lē na fasia e mana'omia le fa'amasinoga tonu mo le oti o ē na fasiotia o Ia.

(21) ONA O LE FEFEFE NE'I GAOIA LE TINO O KERISO E ŌNA SO'O MAI LE TU'UGAMAU, O LE Ā LE MEA NA FAIA E LE FAITAILAGA SILI MA LE 'AU FARESAIO INA IA FA'AMAUTŪ AI?

Ona latou ō ai lea, ua fa'amaui le tu'ugamau, ua fa'amaufa'ailoga fo'i i le ma'a, ma tu'u ai tagata e leoleo.

Mataio 27:66

E itiiti se mālōloga na latou maua i le Sapati. E ui ina latou lē la'asia le tū a nu'u 'ese ona o le fefefe i lē mamā, peita'i na latou fai se fono e fa'ataui i le tino o Keriso. O le oti ma le tu'ugamau sa tatau ona taofia o Ia Lē na fa'asatauroina. *"Ua fa'apotopoto atu ai iā Pilato le 'au faitaulaga sili ma Faresaio, ua fa'apea atu, 'Le ali'i e, ua matou manatua, na fai mai lenā tagata pepelo, ina o ola o Ia, a mavae aso e tolu 'Ou te toe tū mai ai. O lenei, ia e fetalai ane ia fa'amaui le tu'ugamau se'ia o'o i le aso tolu, ina ne'i ō atu Ōna so'o i le po, ma gaoi iā te Ia, ma latou fai atu i le nu'u, Ua toe tū mai Ia nai ē ua oti; ona sili ai lea o le pepelo e mulimuli i lē na muamua.'* Ona fai ane ai lea o Pilato iā te i latou, *'Ua iā te outou leoleo, inā ō ia, faitalia lava outou ona fa'amau ai.'* Ona latou o ai lea, ua fa'amaui le tu'ugamau, ua fa'amaufa'ailoga i le ma'a, ma tu'u ai tagata leoleo" (**Mata. 27:62-65**).

(22) E UI INA SA FA'AMAUTŪ MA LE MALOSI LAVA LE TU'UGAMAU, O LE Ā LE ISI MEA NA FA'APOPOO ONA FAIA E LE FAITAILAGA?

Ona latou ʻō ai lea, ua fa'amauiina le tu'ugamau, ua fa'amaufa'ailoga fo'i i le ma'a, ma tu'u ai tagata e leoleo.
Mataio 27:66

Na tu'uina atu e faitaulaga le fa'atonuga e fa'amautū ai le tu'ugamau. Sa tu'uina i ai le ma'a tele i le faitoto'a. E fa'alalava ai maea i luma o le ma'a ina ia mau ai pito o le papa, ma fa'amauiina i le fa'amaufa'ailoga a le mālō o Roma. E lē mafai ona 'ave'esea le ma'a e aunoa ma le lē fa'aleagaina o le fa'amaufa'ailoga. O le vaega a fitafita e to'aselau ua tutū e leoleoina le tu'ugamau mai le fa'aleagaina. Na fai e faitaulaga mea uma e mafai ona latou faia ia taofia ai le tino o Keriso i le nofoāga na tu'uina ai. Na fa'amauiina Lona tu'ugamau e pei lava o le a tumau ai i inā i taimi uma lava.

(23) O LE Ā LE VALO'AGA NA FA'AIILOA MAI AI LE LĒ AOGĀ O TAUMAFIIGA E FAITAILAGA INA IA TAOFIA AI KERISO I LE TU'UGAMAU?

E soisoi Lē o afio i le lagi; e tauēmu le Ali'i iā te i latou.
Salamo 2:4

O tagata vaivai ua fa'apea ona taupulepule ma fuafua. E lē iloa e nei fasioti tagata le lē aogā o a latou taumafaiga. A e o a latou gaoioiga na fa'amamaluina ai le Atua. O a latou taumafaiga na faia e taofia ai le toe tū o Keriso na 'avea ma fīnauga maumaututū mo lona fa'amaoniga. O le to'atele o fitafita na tu'uina e leoleo le tu'ugamau, o le mālōsi tele atu fo'i lea o le molimau ua toe tū o Ia. E selau ma selau tausaga a'o le'i maliu Keriso, na fa'aailoa mai e le fai salamo e ala i le Agaga Pa'ia, "Se ā le mea ua fa'anununu ai nu'u 'ese, ma mafaufau ai nu'u i le mea e lē aogā? Ua tutū mai tupu o le lalolagi, ua pulega fa'atasi fo'i ali'i e tete'e atu iā Ieova ma Lē na Ia fa'au'uina....E soisoi Lē e afio i le lagi; e tauemu le Ali'i iā te i latou" (Sala. 2:1-4). O fitafita Roma ma 'au a Roma e leai se mālōsi e taofia ai le Ali'i o le ola i totonu o le tu'ugamau. Ua lata mai le taimi e tatalaina ai o Ia.

Ou te fa'afetai sa malōlō le Ali'i i inula o le Sapati i Lona tu'ugamau, e fa'asino ai i lona pa'ia.

Li'o le Tali: **Ioe** **Lē Mautonu**

Ou te fa'anaunau i le taimi e lē mafai ai e tu'ugamau ona taofi le 'au fa'aolaina a le Ali'i ma o le a latou tutū uma fo'i mai la latou "malōlōga."

Li'o le Tali: **Ioe** **Lē Mautonu**

Ou te fia 'auai fa'atasi ma i latou o ē 'alalaga mai o Keriso "O le Ali'i o ali'i ma le Tupu o tupu" pe a toe fo'i mai o Ia.

Li'o le Tali: **Ioe** **Lē Mautonu**

Ou te fa'anaunau ina ia ola e fa'avavau i le fa'atasi ai o le "Malamalama o le lalolagi."

Manatu mai le Su'esu'ega	Tatalo e Mana'omia	Tali o Tatalo

Ua Toe Tū Le Ali'i

Lesona 8

Ua te'a mālīe atu le pō o le aso muamua o le vaiaso sā. Ua o'o nei i le itūlā e sili ona pōuliuli a o le'i tafa mai āta. I se tu'ugamau vā apiapi, o lo'o fa'apagotā ai pea Keriso. O le ma'a tele o lo'o i ai pea i lona nofoāga; o le fa'amaufa'iloga a Roma o lo'o mausalī; o leoleo Roma ua faia ma le fa'amaoni lo latou tiute. Peita'i, o lo'o i ai fo'i ma leoleo e lē o ma-va'aia. O 'au a agelu leaga sa potopoto fa'atasi ai fo'i i lea lava mea. Pe ana mafai, se manū o le ali'i o le pōuliuli ma āna 'au tau o le a latou tapunia e fa'avavau le tu'ugamau o lo'o i ai le Ālo o le Atua. A e o 'au a le lagi ua latou si'osi'omia le tu'ugamau. O agelu e sili ona mālōlosi sa leoleoina le tu'ugamau, ma fa'atalitali e fa'afeiloa'i i le Āloali'i o le ola.

(1) O LE Ā LE MAFUA'AGA SA GATETE MA MATATA'U TELE AI FITAFITA ROMA SA LEOLEOINA LE TU'UGAMAU O IESU?

Fa'auta fo'i, ua tō le mafui'e tele; auā na alu ifo le agelu a le Ali'i mai le lagi, ua alu atu, ma fuli 'ese le ma'a i le gutu o le tu'ugamau, ma ti'eti'e i ōna luga.

Mataio 28:2

"Fa'auta fo'i, ua tō mai le mafui'e tele; auā ua alu ifo le agelu a le Ali'i mai le lagi" (**Mata. 28:2**). O lenei agelu mai le lagi o lo'o la'e'i i le mamalu o le Atua. O 'ave pupula mālōlosi o le mamalu o le Atua sa muamua atu e fa'amalamalamaina lona 'auala. "E pei o le uila lona tino mai, ma ōna ofu ua sinasina pei o le kiona; ua tetemū fo'i i le matata'u iā te ia ē na leoleo, ua liua i latou e pei o tagata oti" (**F. 3**).

(2) O LE Ā LE FOLAFOLAGA OFOFOGIA O LE FA'AOLATAGA NA TU'U ATU E PAULO MO Ē NA Ō ATU I O LATOU TU'UGAMAU A O LO'O TALITONU I LE MALIU MA LE TOE TŪ O KERISO?

Auā afai tatou te talitonu ua maliu Iesu ma toe tū mai, e fa'apea fo'i ona aumaia e le Atua fa'atasi ma Ia ē o momoe ona o Iesu.

I Tesalonía 4:14

O lenei, outou faitaulaga ma ta'ita'i, o le fea le malosi o a outou leoleo? O fitafita totoa e le'i o'o i le fefe ona o le mālōsi fa'aletagata, a o lenei e pei ua 'avea fa'atagata-o-taua e aunoa ma se pelu po o se tao. O foliga ua latou fesaga'i nei e lē o foliga o se tagata toa; peita'i o foliga ia o le toa silisili i le 'au tau a le Ali'i. O le 'ave fe'au lenei na sui tulaga ina ua pa'ū mai Satani. O ia lenei na folafolaina i ātu mauga o Petele'ema le fanau mai o le Keriso. Ua gatete le lalolagi i lona fa'aali mai, ua sosola 'au o le pōuliuli, ma a o ia fuli 'eseina le ma'a mai le gutu o le tu'ugamau, e pei ua o'o mai le lagi i le lalolagi. Sa va'ai fitafita a'o fuli'esea le ma'a ua pei o sina 'ili'ili, ma latou fa'alogo a o ia 'alaga, "Le Ālo o le Atua, i nā sau ia i fafo; Ua vala'au Lou Tamā iā te 'Oe." Na latou va'aia Iesu ua maliu i fafo mai le tu'ugamau, ma latou fa'alogo a o fetalai Iesu i luga o le tu'ugamau, "*O A'u o le Toe Tū ma le Ola*" (**Ioa. 11:25**). A o Ia tula'i mai i Lona mamalu ma le pa'ia, sa fa'apa'ū'ū ma ifo 'au a le lagi i luma o le Fa'aola, ma fa'afeiloa'i iā te Ia i pese ma vi'iga.

(3) O LE Ā LE TALI ATU A LE LALOLAGI I LE TOE AFIO FA'ALUA MAI O KERISO E FA'ATUSATUSA MA LE TAIMI O LONA MALIU MA LONA TOE TŪ?

Ua tau tevateva le nu'u e pei o le tagata onā, ua feluea'iina e pei o le moega tautau; ua mamafa lona fouvale i luga iā te ia, e pa'ū ai o ia, e lē toe tū lava.

Isaia 24:20

O le mafui'e sa fa'ailogaina ai le itūlā na tu'uina atu ai Lona soifua, ma o le mafui'e na molimauina le taimi na Ia soifua mai ai i le manumālō. O Ia lē na fa'ato'ilaloina le oti ma le tu'ugamau ua toe tū mai ma tulaga vae o se toa manumālō, fa'atasi ma le lūlūina o le fogā'ele'ele, o le 'emo o le uila, ma le pāpā o faititili. Pe a toe afio mai o Ia i le lalolagi, Na te "lūlūina e lē na o le lalolagi, a e fa'apea fo'i ma le lagi" (**Epe. 12:26**). "O le lalolagi o le a tau tevateva e pei o le tagata onā, ma o le a 'ave'eseina pei o sina fale itiiti" (**Isa. 24:20**). "E ta'ata'ai le lagi e pei o se tusi" (**Isa. 34:4**); "...E te'a 'ese'ese ai fo'i o mea na fai a'i ina ua mū; o le lalolagi fo'i ma galuega o i ai e susunuina lava" (**II Pete. 3:10**). "A o Ieova, o le malu o Ia o Lona nu'u, ma le 'Olo o le fanauga a Isara'elu" (**Ioeu 3:16**).

(4) E TUSA AI MA PAULO, O AFEA E FA'AUMATIA AI LE OTI E LĒ MANUMALŌ - O LE FA'AI'UGA MULIMULI LEA O LE OTI?

Pe a ofu fo'i lenei tino i'u vale i le tino ola pea, a ofu fo'i lenei tino oti i le tino lē oti lava, ona taunu'u ai lea o le 'upu, Ua fa'aumatia le oti i le manumalō!

I Korinito 15:54

I le maliu o Iesu na va'aia e fitafita le lalolagi ua ufitia e le pōuliuli i le tūtonu o le lā; peita'i i Lona toe tū mai, sa latou va'aia le pupula o le 'au agelu sa fa'amalamalamaina ai le pō ma fa'alogoina 'au a le lagi a o latou pepese i vi'iga o le fiafia ma le manumalō: "Ua E fa'ato'ilalo Satani ma mana o le pōuliuli; Ua E fa'aumatia le oti i le manumalō!" **(I Kori. 15:54).**

(5) O LE Ā LE FA'AALIGA A KERISO E FA'ATATAU I LONA MALIU LE TOE TŪ UA FA'AMAUTŪ AI LONA TOE TŪ?

O le mea lea e alofa mai ai le Tamā iā te A'u, auā 'Ou te tu'uina atu Lo'u ola, ina ia 'Ou toe 'aumai ai. E leai se tasi na te 'ave'eseina iā te A'u, a e peita'i A'u, 'Ou te tu'uina atu e A'u lava. O iā te A'u le pule e tu'uina atu, o iā te A'u fo'i le pule e toe aumai ai; ua 'Ou maua lenā poloa'iga mai Lo'u Tamā.

Ioane 10:17, 18

Sa va'aia e fitafita Roma le toe tū mai o Keriso mai le tu'ugamau i Lona mamalu. Ua pulato'a o latou mata i fofoga o Lē sa latou 'a'amu ma fa'atauēmu i ai. I lenei itū fa'amamaluina, ua latou toe va'aia le pagotā na latou fa'afeagai i le potu o fa'amasinoga, o Lē na latou fa'apaleina i le pale tuitui. O Ia lenei na tū e aunoa ma se tete'e atu i luma o Pilato ma Herota, o Lona tino sa fa'amanu'alia ona o le sauā o le sasa na o'o i ai. O Ia lea na tu'ia i fao i le satauro, na fiafia ma fa'amalieina ai loto o faitaulaga ma ta'ita'i, sa lialiā'i o latou ūlu ma fa'apea ane, "Na Ia fa'aolaina isi tagata, e lē mafaia e Ia ona fa'aola iā te Ia" **(Mata. 27:42).** O Ia lenei na latou teuina Lona tino i le tu'ugamau fou o Iosefa. O le fa'atonuga ma le pule mai le lagi na toe fa'asa'oloto ai le Pagotā. E tusa pe a na fa'aputu se faula'iga maua i luga o le tu'ugamau, e lē mafai lava ona taofia ai Lona toe tū mai!

(6) INA UA VA'AIA LE FA'AOLA MAMALU UA TOE TŪ A'E, O LE Ā LE TA'UTINOGA A FITAFITA UA MATUĀ MATATA'U LAVA SA FAIA I LE FAITAILAGA MA TA'ITA'I?

O le ta'ita'i fo'i o le to'aselau, ma ē na leoleo iā Iesu fa'atasi ma ia, na latou iloa le mafui'e ma mea na faia, ona latou matuā matata'u ai lea, ua fa'apea ane, "E moni, o le Ālo lava lenei o le Atua."

Mataio 27:54

Ina ua va'aia le 'au agelu ma le Fa'aola i Lona mamalu, na pa'ū'ū fitafita ua pei o ni tagata oti. Ina ua mōu atu le solo mai le lagi, sa tutū latou i luga, ua tau fāi ifo le gatete o latou tino, ma aga'i atu i le faitoto'a o le fa'ato'āga. A o tautevateva pei o tagata onanā, ua latou fa'ata'alise atu i le 'a'ai ma ta'u atu le tala fiafia i ē na latou feiloā'i. Sa latou aga'i atu iā Pilato, a e ua 'a'ave tala i ta'ita'i Iutaia, ma ua amia mai latou ia muā'i feiloa'i i luma o le faitaulaga sili ma faipule. O se mea 'ese na va'aia i foliga o ia fitafita. O tino ua gatete i le mata'u ma foliga e pei o tagata oti, na latou aumaia le molimauina i le toe soifua mai o Keriso. O fitafita ua latou fa'amatala mea uma na tutupu, fa'apei ona latou va'aia; e le'i i ai se avanoa na mafaufau ai pe tautala i se isi itū vaganā mea moni uma na latou molimauina. Sa fai mai latou ma le loto tigā, "O le Ālo lava o le Atua lē na fa'asatauroina; na matou fa'alogi i le agelu a o ia folafolaina mai o Ia o le Tupu mamalu silisili o le lagi."

(7) O LE Ā LE PEPELO NA FA'ATONU AI E LE FAITAILAGA FITAFITA IA LATOU TA'U ATU INA IA TAUMAFAI E FA'ALILOILO LE TOE TŪ A'E O KERISO?

Ua fa'apea atu, "Ia outou ta'uta'u atu, 'Na ō mai Ōna so'o i le pō ua gaoi iā te Ia, a o matou momoe.'"

Mataio 28:13

O foliga o faitaulaga ua peiseā'i o tagata oti. Sa taumafai Kaiafa e tautala mai. Ua memumemu ōna laugutu a e leai se 'upu na fa'aleoina. Ua aga'i atu fitafita e tu'ua le falefono, peita'i o se leo na toe taofia mai ai i latou. Ua tautala mai nei Kaiafa, "Fa'atali, fa'atali. Ia 'aia ne'i outou ta'u atu i se tasi mea na outou va'aia."

Ua tu'u atu i fitafita se 'upu e lē moni. Na fa'apea atu faitaulaga, "Ia outou fai atu, 'ua ō mai Ōna 'au so'o i le pō ma gaoi Lona tino a o matou momoe." Ua sili atu nei le leaga o le mea ua faia e faitaulaga. Pe fa'apefea ona fai atu fitafita, na ō mai le 'au so'o ma gaoi le tino malie o Iesu a o latou momoe? E fa'apefea ona latou iloa pe a fai o la sa momoe? Pe a fai e fa'amaonia na gaoia e le 'au so'o le tino o Iesu a o momoe fitafita, e lē o faitaulaga e muamua ona ta'usalaia i latou? Afai na momoe leoleo i le tu'ugamau, e lē o faitaulaga e taulamua i le moliaga o latou i luma o Pilato?

(8) INA UA FOLAFOLA E LE FAITAUAGA MA TA'ITA'I O LE A LATOU PUIPUIA FITAFITA MAI IĀ PILATO, O LE Ā LE TOTOGI SA LATOU TALIAINA E PEPELO AI I TAGATA FA'ATATAU I LE TOE TŪ O KERISO?

Ona latou fa'apopototo ai lea fa'atasi ma toea'ina, ua latou filifili, ona avatu ai lea o tupe e tele i le 'au.

Mataio 28:12

Sa matuā fefefe fitafita i le manatu o le a molia i latou i le momoe i le taimi o le galuega. O le oti le i'uga o lenei solitulafono. E tatau ona latou faia se molimau pepelo e tau fa'asesē ai le motu o tagata, ma tu'u atu ai o latou ola i se tulaga faigatā? Latou te le'i mataāla ea e ui ina le lavavā ma vaivai? E fa'apefea ona tutū i le fa'amasinoga, e tusa pe ua mana'o i tupe, pe a latou molimau pepelo?

Ina ia fa'afilemūina lenei molimau ua latou matata'u ai, sa folafola e faitaulaga ia mautū ai le saogalemū o leoleo ma fa'apea atu, e lē o manatu Pilato ia lautele le fa'alauiloina o lenei matā'upu. O fitafita Roma na latou fa'atau atu iā Iutaia lo latou uiga fa'amaoni mo se tupe. Na latou ō mai i luma o faitaulaga ma se fe'au moni ma le ofoofogia o lo'o mamafa i o latou loto; ua fo'i latou ma 'avega tupe, ma o latou laulau faiva o lo'o tau 'aveina nei 'upu pepelo na saunia mo latou e faitaulaga.

(9) O LE Ā LE LAPATA'IGA SA LE'I TALIA E PILATO A O TULA'I KERISO I ONA LUMA, O LE FA'AVAE O PUAPUAGĀ NA MAFATIA AI O IA SE'IA O'O I LONA MALIU?

Ua ti'eti'e o ia i le nofoa fa'amasino, ona sau ai lea o le fe'au mai lana āvā, ua fa'apea mai, "Ne'i e mao i lea tagata amiotonu, auā na 'ou matuā tigāina analeilā i le miti iā te la."

Mataio 27:19

I lea lava taimi o lo'o fuafua ai e faitaulaga le fa'amatalaga pepelo mo fitafita, sa o'o atu iā Pilato le tala ua toe tū Iesu. E ui ina sa ia tu'uina atu Keriso ia fasiotia, a e le'i manatu mamafa Pilato i lea mea. Ona ua mata'u tele o ia, sa ia manatu na te lē fia va'ai i se isi, ma ua lē ulufafo mai lona fale. E ui i lea, a e ua ō mai faitaulaga i luma o Pilato ma le molimau pepelo na latou fausia fa'avave, ma latou talosaga ia fa'agalo le sesē ina ua momoe leoleo i le tu'ugamau. A o le'i taliaina lenei tau fa'asesē, na fesiligia lēmū leoleo e Pilato. Ona ua fefefe mo lo latou saogalemū, latou te le'i nātia se mea a e ua fa'aalia iā Pilato mea uma na latou molimauina i le toe tū mai o Keriso. Na ia lē toe tuliloaina lenei matā'upu, peita'i e amata mai lea lava taimi e le'i toe maua e ia se to'afilemū.

(10) O LE Ā LE MEA OFOFOGIA NA TUPU E LAGOLAGOINA AI LE FA'AMAONI UA TOE TŪ A'E KERISO MAI LE TU'UGAMAU?

Ua avanoa fo'i tu'ugamau, ua toe tutū mai fo'i tino o tagata pa'ia e to'atele na momoe.

Mataio 27:52

Sa manumalō Satani ina ua tu'uina le tino malie o Iesu i le tu'ugamau. Na iā te ia le fa'amoemoe o le a lē toe soifua mai le Fa'aola. Sa ia fa'a'iloa lona aiā ua pulea ai le tino malie o Iesu, o lea sa ia tu'u atu ai fitafita ia leoleoina le tu'ugamau ma le manatu na te saisaia fa'a-pagotā ai Keriso. Na ia matuā lagona le tigā 'o'ona o lona ita ina ua sosola āna 'au agelu a o tau lata mai le 'ave fe'au o le lagi. Ina ua va'aia Keriso ua toe tū mai i le manumalō mai le oti ma le tu'ugamau, ona mautinoa loa lea e Satani le i'uga o lona mālō to'ilalo, o le oti lea e fa'avavau.

Na 'avea faitaulaga o mea faigaluega a Satani i lo latou tu'uina atu o Keriso ina ia malie. O lenei ua matuā pulea i latou e Satani. Ua lavelavea i latou i le maili e lē mafai ona sosola 'ese mai ai a e ua na o le fa'aaauu pea lo latou fa'asaga tau atu iā Keriso. Ina ua latou maua le tala i Lona toe tū, na fefefe i latou ona o le ita o le motu o tagata. Na latou lagona le tulaga faigatā ua o'o i ai o latou ola ma ua lē toe saogalemū. O lo latou fa'amoemoe e tasi, ia fa'amaonia o Keriso o se tagata fa'a-foliga, ma ia tete'e i Lona toe tū mai. Sa latou totogi tupe e fa'aliliu ai fitafita ma fa'amautū le filemū o Pilato ia leai sana 'upu e fa'aalia. Ua latou fa'asalalau tala e lē sa'o i nu'u mamao ma ē lata mai. Peita'i sa to'atele molimau na latou lē mafaia ona fa'afilemū. E to'atele ē na fa'alogo i le molimau a fitafita i le toe tū manumalō mai o Keriso. Sa to'atele fo'i ē na oti a e sa toe tutū mai fa'atasi ma Keriso, na va'aia i latou e le to'atele

ma na latou ta'u atu ua toe tū mai o Ia. Sa 'a'ave tala i faitaulaga e uiga i tagata na va'aia ē sa toe tutū mai, ma sa fa'alogo i a latou molimau.

(11) O LE Ā LE FA'ASALAGA MATA'UTIA UA TU'UINA E LE MOTU O TAGATA I O LATOU LUGA, SA AUMAIA AI LE MATA'U MA LE FEFE I FAITAILAGA MA TA'ITA'I I TAIMI UMA O LATOU OLAGA?

Ona tali mai ai lea o le nu'u uma, ua fa'apea mai, "Ia i luga i a i matou, ma a matou fanau Lona toto."

Mataio 27:25

Ua lē maua se to'afilemū, a e ua na o le mata'u tele ua o'o i faitaulaga ma ta'ita'i o Iutaia, ma fa'apea latou ne'i fa'afuase'ia ona feiloa'i pe fesāga'i ma Ia i le ala, pe o totonu fo'i o latou lava aiga. Ua mautinoa e faitaulaga e leai se toe saogalemū moni mo latou. O fao ma u'amea ua na o ni mea fa'atauva'a e lē mafai ona puipuia i latou mai le Ālo o le Atua. I le āo ma le pō ua i ai pea i o latou luma le va'aiga mata'utia i le potu o fa'amasinoga a o latou 'alalaga, "Ia i luga o i matou, ma a matou fanau Lona toto" (**Mata. 27:25**). Ua lē mafai ona toe fa'ate'a 'eseina lenei āta mai o latou mafau. Sa lē toe i ai se moe filemū e maua e i latou.

(12) O LE Ā LE VALO'AGA SA FA'ATAUNU'UINA E FA'ATATAU I LE MALIU MA LE TOE TŪ O KERISO NA IA FA'AILOA ATU I FAITAILAGA MA TA'ITA'I?

Ua tali atu Iesu, ua fa'apea atu iā te i latou, "Inā lepeti ia o lenei malumalu, ona 'Ou toe faia lea i aso e tolu."

Ioane 2:19

Ina ua fa'alogoina le leo o le agelu mamana a o ia 'alaga, "Ua vala'auina 'Oe e Lou Tamā," na toe tū a'e le Fa'aola mai le tu'ugamau ona o le ola sa iā te Ia lava. O lea ua fa'amaonia nei le tonu o Āna afioga, "Auā 'Ou te tu'uina atu Lo'u ola, ina ia 'Ou toe aumai ai....O iā te A'u le pule e tu'uina atu, o iā te A'u le pule e toe aumai ai..." (**Ioā. 10:17b, 18b**). Ua fa'ataunu'uina nei le valo'aga na Ia fetalai atu ai i faitaulaga ma ta'ita'i Iutaia, "Inā lepeti ia o lenei malumalu, ona 'Ou toe faia lea i aso e tolu" (**Ioā. 2:19**).

I luga o le tu'ugamau matala o Iosefa, na 'alaga Keriso i Lona manumālō, "O A'u nei o le toe tū ma le ola" (**Ioā. 11:25**). E na o le Silisili 'ese Na te mafai ona fetalai i ia 'upu. O mea uma na foafoaina, e ola i latou i le mana ma le finagalo o le Atua. E fa'alagolago i latou uma i le ola o lo'o maua mai le Atua. Mai le serafi tulaga aupito maualuga e o'o i le mea ola pito maulalo, e toe fa'atumuina mea uma mai le Puna o le ola. E na o Ia, o Lē e tasi ma le Atua, e mafai ona fetalai mai, "O iā te A'u le mana 'Ou te tu'uina atu ai Lo'u ola, o iā te A'u fo'i le mana e toe aumai ai." I Lona itū Atua, ua iā Keriso le mana e motusia ai noanoataga o le oti.

(13) O LE Ā LE FOLAFOLAGA MATAGOFIE SA TU'UINA ATU I LE 'AU FA'ATUATUA UMA UA MALILIU A E NA FA'AMAONIA INA UA TOE TŪ A'E KERISO O LE ULUA'I FUA O LE SELESELEGA?

Auā afai tatou te talitonu, ua maliu Iesu ma toe tū mai, e fa'apea fo'i ona aumaia e le Atua fa'atasi ma Ia ē o momoe ona o Iesu.

I Tesalonia 4:14

Na toe tū a'e Keriso nai ē ua oti, o le Ulua'i Fua o i latou ua momoe. O Ia o le āta fa'atusa o le fusi saito; o Lona toe soifua mai na taunu'u tonu i le aso e tatau ona tu'uina atu ai le fusi saito i luma o le Ali'i. E sili atu i le afe tausaga o faia pea lenei sauniga fa'a-fa'atusa. Mai le fa'ato'āga, o le saito ua matua e fa'aputuina mai ai ulua'i fua; ma a o malaga tagata aga'i i Ierusalem ma le Paseka, latou te talotalo nei ulua'i fua o le fa'ato'āga, o se taulaga fa'afetai i luma o le Ali'i. Se'ia vaganā ua uma ona fa'ataunu'uina o lenei masani, ona seina loa lea o le saito e fusifusia ma fa'aputuina. O le fusi saito ua fa'apa'iaina mo le Atua, o le āta lea e fa'asino i le seleselega. O Keriso o le Ulua'i Fua e fa'asino i le seleselega tele fa'ale-agaga e fa'aputuina mo le mālō o le Atua. O Lona toe tū mai, o le āta fa'a-fa'atusa lea ma se ta'utinoga i le toe tutū mai o ē amiotonu o lo'o momoe i tu'ugamau. "Auā afai tatou te talitonu ua maliu Keriso ma toe tū mai, e fa'apea fo'i ona aumaia e le Atua fa'atasi ma Ia ē o momoe ona o Iesu" (**I Tesa. 4:14**).

(14) INA IA AVEA MA MOLIMAU O LE MANA O KERISO I LE OTI, O LE Ā LE MEA NA TUPU A O LŪLŪ LE MAFU'E MA MATALA TU'UGAMAU O TAGATA PA'IA NA SAUĀINA?

Ua avanoa fo'i tu'ugamau, ua toe tutū mai fo'i tino o tagata pa'ia e to'atele na momoe. Ua mavae fo'i Lona toe tū mai, ona latou ō mai ai lea nai tu'ugamau, ma latou ō atu i le 'a'ai pa'ia, ua iloa i latou e tagata e to'atele.

Mataio 27:52, 53

Ina ua toe tū mai Keriso, na fa'atutūina mai tu'ugamau fa'atasi ma Ia nisi na saisaitia e le pule a le oti. Sa fa'amatala tu'ugamau ina ua lūlū le mafui'e i le taimi o Lona maliu, a e ina ua toe tū mai o Ia, na tutū a'e ai fa'atasi i latou ma Ia. O i latou nei na galulue fa'atasi ma le Atua, na tu'uina atu fo'i o latou ola ona o le molimauina o le 'upu moni. O lenei ua toe molimau i latou mo Lē na toe fa'atutūina i latou mai le oti.

A o faia le galuega a Iesu i le lalolagi, sa Ia toe fa'atutūina ē na oti. Na Ia toe fa'atū le tama tane a le fafine ua oti lana tane i Naina, ma le afafine o Iairo le ta'ita'i 'au Roma, fa'apea ma Lasalo. Peita'i e le'i fa'aofuina i latou i le tino e lē toe oti lava. E ui ina sa fa'atutūina e Iesu i latou mai le oti, a e na toe oti i latou i se taimi mulimuli. A o i latou na tutū a'e ina ua toe tū mai Keriso, sa toe tutū i latou i le ola e fa'avavau. Ina ua afio a'e Iesu i le lagi na latou ō a'e fa'atasi ma Ia, o i latou o fa'aailoga o le manumalō o Keriso i le oti ma le tu'ugamau. Ua fetalai mai Keriso, *O i latou nei ua lē o toe i lalo o le pule a Satani; ua 'Ou togiolaina i latou. Ua 'Ou 'aumai i latou mai tu'ugamau, o ulua'i fua o Lo'u mana, ia fa'atasi ma A'u i le mea 'Ou te i ai, e lē toe iloa ai le oti po o se fa'anoanoa.*

(15) O LE Ā LE VALO'AGA SA TU'UINA IĀ ISAIA NA FA'ATAUNU'UINA INA UA LAFO ATU E LE 'ELE'ELE TAGATA OTI I LE TOE TŪ O KERISO?

E toe ola mai ōu tagata oti, o latou tino oti e toe tutū mai. Inā ala mai ia, ma alalaga fiafia outou ē o nonofo i le efuefu; auā o lou sau e pei o le sau o le vao iti ia; e lafo atu fo'i e le 'ele'ele ē ua oti.

Isaia 26:19

Ua ō i latou nei i le 'a'ai ma fa'aailoa atu i le to'atele, ua ta'utino atu o Keriso ua toe tū mai le oti, ma o i matou nei na toe tutū a'e fa'atasi ma Ia. O lenei ua fa'amaonia le 'upu moni pa'ia e fa'ataui i Lona toe tū. O le 'au pa'ia na toe tutū ua fai ma molimau i le moni o ia 'upu, "E toe ala mai ou tagata oti, o latou tino e toe tutū mai." O lo latou toe tutū mai o se ata o le fa'ataunu'uina o le valo'aga, "Inā ala maia, ma 'alalaga fiafia outou ē o nonofo i le efuefu; auā o lou sau e pei o le sau o le vao iti ia, e lafo atu fo'i e le 'ele'ele ē ua oti" (**Isa. 26:19**).

(16) E PEI ONA TUSIA E IOANE, O LE Ā LE FA'AALIGA A KERISO IĀ MARETA SA FA'AILOA AI E IĀ TE IA LE PULE FA'ALEATUA E TU'U ATU AI LE OLA E TUMAU PEA?

Ua fetalai atu Iesu iā te ia, "O A'u nei o le toe tū ma le ola; o lē fa'atuatua mai iā te A'u, e ui lava ina oti, a e ola lava ia."

Ioane 11:25

O Keriso o le Toe Tū ma le Ola i lē e talitonu. Iā te Ia lo tatou Fa'aola, ua toe fa'afo'i mai le ola na lē iloa ona o le agasala; auā o lo'o iā te Ia le ola e suia ai le oti pe a finagalo i ai. E iā te Ia le pule e foa'iina atu ai le tino e lē toe oti lava. O le ola na Ia tu'uina atu i Lona itū tagata, Na te toe 'aumai, ma foa'i atu i le fanau a tagata. "Ua Ia fetalai mai, 'Ua 'Ou sau ina ia latou maua le ola, ia maua atili ai lava'" (**Ioa. 10:10**). "A o sē inu i le vai 'Ou te avatu iā te ia, e lē toe fia inu ia; a o le vai 'Ou te avatu iā te ia, e 'avea i totonu iā te ia o le vaipuna, e puna i luga i le ola e fa'avavau" (**Ioa. 4:14**). "O lē 'ai i Lo'u tino ma inu i Lo'u toto, ua iā te ia le ola e fa'avavau; 'Ou te toe fa'atūina fo'i o ia i le aso gata'aga" (**Ioa. 6:54**).

(17) MO KERISIANO UMA O LO'O "MOMOE" IĀ KERISO SEI'A O'O I LO LATOU TOE TUTŪ I LONA AFIO FA'ALUA MAI, O LE Ā LE FA'AMOEMOEGA E MANUIA AI MO LE 'AU FA'AMAONI UMA NEI?

Pe a fa'aali mai Keriso lo tatou ola, ona iloa ai lea o outou fa'atasi ma Ia i le manuia.

Kolose 3:4

I lē e fa'atuatua, o le oti ua na'o se mea e fa'atauva'a lava. Sa fetalai Keriso e uiga i le oti e mo na o sina taimi. "Ai sē tausi i La'u 'upu, e lē iloa e ia le oti, e o'o i le fa'avavau....Ai sē tausi i La'u 'upu e lē o'o le oti iā te ia e o'o i le fa'avavau" (**Ioa. 8:51, 52**). I le Kerisiano, o le oti ua na o se moe, o sina taimi itiiti o le fifilemū ma le pogisā. O le ola ua nātia iā Keriso i le Atua, a e "Pe a fa'aali mai Keriso lo tatou ola, ona iloa ai lea o outou fa'atasi ma Ia i le manuia" (**Kolo. 3:4**).

(18) O LE Ā LE FOLAFOLAGA MATAGOFIE O LE A FA'ATAUNU'UINA IĀ I LATOU O LE EKALESIA A KERISO O LO'O MOMOE NEI I TU'UGAMAU I LONA AFIO FA'ALUA MAI?

Auā e afio mai le lagi le Ali'i lava, ma le 'alaga, ma le leo o le agelu sili, ma le pū a le Atua; e muamua fo'i ona toe tutū mai o ē ua oti o iā Keriso.

I Tesalonía 4:16

O le si'ufofoga na 'alaga mai luga o le satauro, "Ua taunu'u," sa fa'alogoina e ē ua maliliu. Na ati i 'aupā o tu'ugamau, ma vala'auina ai ē na momoe i le oti ia toe tutū mai. O le a fa'apea fo'i ona toe fa'alogoina le si'ufofoga o Keriso pe a 'alaga mai le lagi. O le si'ufofoga lea o le a ati i tu'ugamau ma tatala o latou puipui, ona toe tutū mai lea o ē na momoe o iā Keriso. I le toe tū mai o Keriso, e itiiti tu'ugamau na tatalaina; peita'i i Lona afio fa'alua mai o ē amiotonu ua momoe, o le a fa'alogo i Lona si'ufofoga ma toe tutū mai i le mamalu ma le ola e fa'avavau. O le mana na toe fa'atūina Keriso mai le oti o le a fa'aeaina ai fo'i Lana ekalesia o le a fa'amamaluina fa'atasi ma Ia, e sili atu i pule uma, e maualuga atu i mālō uma, ma e sili atu i se isi igoa e fa'aalia mai, e lē gata i lenei lalolagi a e fa'apea ma le lalolagi fou.

A o 'ou su'esu'e i puapuagā o Keriso ma iloa ai le mata'utia o le tau na Ia totogiina mo a'u agasala, e naunau lo'u loto mo le aso 'ou te va'ai ai i Ōna fofoga ma ifo atu i Ōna 'a'ao i le fa'afetai ma le vi'iga ma le fa'amanū.

Li'o le Tali: Ioe Lē Mautonu

Ou te tatalo ina ia ta'ita'iina a'u e le Agaga Pa'ia ina ia fa'aalia i la'u savaliga fa'a-Kerisiano uiga o le alofa tunoa ma le fa'amagalo atu, o fua ia o lo'u alofa mo lo'u Fa'aola.

Li'o le Tali: Ioe Lē Mautonu

Ou te tatalo ina ia musumusu le Agaga Pa'ia i loto o lo'u aiga ma a'u uō, ē o lo'o ola e aunoa ma Keriso, ina ia lagona e i latou lo latou mana'omia o le Fa'aola ofoofogia na malii mo lo latou fa'aolataga.

Li'o le Tali: Ioe Lē Mautonu

Ou te mana'o ia i ai sa'u vaega i le ekalesia e a'oa'oina le "tala lelei" mo le fanau a tagata e ala i le soifuāga, malii, ma le toe tū o Keriso e pei ona fa'aailoa mai e le Agaga Pa'ia.

Li'o le Tali: Ioe Lē Mautonu

Manatu mai le Su'esu'ega	Tatalo e Mana'omia	Tali o Tatalo

Se ā le Mea e te Tagi ai?

Lesona 9

O fafine na tutū i tafatafa o le satauro o Keriso, na fa'atali ma tulimata'i itūlā e mavae ai le Sapati. I le taeao pō lava o le ulua'i aso o le vaisapati, sa latou aga'i atu loa i le tu'ugamau, fa'atasi ma a latou mea manogi e fa'au'uina ai le tino maluu o le Fa'aola. Latou te le'i manatu fa'atatau i Lona toe tū a'e mai ē ua oti. Ua goto le lā o lo latou fa'amoemoe, ma le pōuliuli o le pō ua nofo i o latou loto. A o latou savavali, sa latou toe talatalanoa i galuega alofa a Keriso, ma Āna afioga fa'amafanafana. Peita'i latou te le'i manatuaina Āna fetalai, *"E tatou te toe feiloa'i ma A'u"* (Ioa. 16:22).

(1) O LE Ā LE VA'AIGA OFOFOGIA NA FESAGA'I MA FAFINE A O LATOU AGA'I ATU I LE TU'UGAMAU O KERISO?

Ua latou va'ava'ai atu, ona iloa lea, ua uma ona fuli'esea o le ma'a, auā ua matuā telē ia.

Mareko 16:4

E ui ina latou lē iloa mea o lo'o tutupu i lea lava taimi, a e ua latou lata atu i le fa'ato'āga, ma ua latou fa'apea ifo, "O ai ea se na te fuli'eseina le ma'a mo i tatou i le gutu o le tu'ugamau?" (Mare. 16:3). Sa iloa latou te lē mafaia ona fuli'ese le ma'a, a e ua latou ō atu pea aga'i i le tu'ugamau. Na fa'afuase'i ona fa'amalamalamaina le lagi i le mamalu e lē mai le oso a'e o le lā. Ua lūlūina le lau'ele'ele. Ua latou va'aia le ma'a tele ua fuli'ese. O le tu'ugamau ua gaogao.

(2) INA UA ULUFALE ATU FAFINE I LE TU'UGAMAU O KERISO UA GAOGAO, O LE Ā LE MEA NA LATOU VA'AIA UA MATATA'U AI I LATOU?

Ua ūlu atu i latou i le tu'ugamau, ona latou iloa lea o le taule'ale'a o nofo i le itu taumatau, ua ofu o ia i le ofu pa'epa'e tātāpuvae; ona latou matata'u ai lea.

Mareko 16:5

O fafine e 'ese'ese mea na ō mai ai aga'i i le tu'ugamau. O Maria le Maketala na mua'i taunu'u; ma ina ua ia va'aia le ma'a ua fuli'ese, na ia fa'avave loa e ta'u i le 'au so'o. I lea lava taimi sa taunu'u atu ai ma isi fafine. O se malamalama pupula ua si'omia ai le tu'ugamau, peita'i o le tino o Iesu ua lē o i ai. A o latou fa'atuai e tu'ua lea nofoāga, sa fa'afuase'i ona va'aia ua lē na o latou o i ai. O se tagata talavou e la'ei i ofu pupula o lo'o nofo ai i talane o le tu'ugamau. O ia o le agelu sa fuli'esea le ma'a. Ua ia 'avea le tino tagata ina ia lē fa'amata'uina ai nei uō a Iesu. Peita'i sa si'omia ia i le malamalama o le mamalu fa'ale-lagi o lo'o susulu pea, ma ua mātata'u ai fafine.

(3) O Ā 'UPU FA'AMAFANAFANA NA FAI MAI E LE AGELU LONA LUA I FAFINE E FA'ATATAU I LE TU'UGAMAU UA GAOGAO O LO LATOU FA'AOLA?

A ua fai ia iā te i latou, "'Aua tou te matata'u; o lo'o outou sa'ili iā Iesu le Nasareta o Lē na fa'asatauroina; ua tū o Ia; e lē o iinei; inā matamata ia i le mea na latou tu'uina ai o Ia."

Mareko 16:6

Na latou liliu o le a sosola 'ese, a e o 'upu a le agelu sa toe taofia mai ai i latou. Sa ia fa'apea atu, "'Aua lua te matata'u oulua; auā ua 'ou iloa ua oulua sa'ilia mai Iesu na fa'asatauroina. E lē o iinei o Ia; auā ua toe tū mai o Ia, pei ona fetalai atu ai o Ia. Ō mai, inā matamata i le mea na tu'u ai le Ali'i. Inā ō atu ia 'ia vave, lua te ta'u atu i Ōna so'o, ua toe tū mai o Ia nai ē ua oti" (Mata. 28:5-7a). Na latou toe va'ai atu i le tu'ugamau, ma latou toe fa'alogoia le tala ofoofogia. Sa i ai fo'i se isi agelu e tino i tagata, ma sa fa'apea mai, "Se ā le mea tou te sa'ili ai Lē ua soifua i ē ua oti? E lē o iinei o Ia, a ua tū; ia outou manatu i Lona fetalai atu iā te outou, ina o i Kalilaia o Ia, ua fa'apea atu, 'E tatau ona tu'uina atu o le Atali'i o le tagata i lima o tagata agasala, ma ia fa'asatauroina, ma toe tū mai i le aso tolu'" (Luk. 24:5b-7).

(4) O AI NA POLOA'I E AGELU FAFINE IA 'AVE I AI LE TALA FIAFIA O LE TOE TŪ O KERISO?

A ia outou ō atu, inā ta'u atu i Ōna so'o atoa ma Peteru, e muamua atu o Ia iā te outou i Kalilaia, tou te iloa ai o Ia i lea mea, fa'apei ona fetalai atu ai o Ia iā te outou.

Mareko 16:7

Ua toe tū o Ia, ua toe tū o Ia! O fafine sa fai ma toe faia nei 'upu fiafia. Ua lē o toe mana'omia nei u'u fa'amanogi. O lo'o soifua le Fa'aola, e lē o maliu. Ua latou manatua nei Lana fetalai i Lona maliu a e toe tū mai. O se aso fa'apitoa lenei i le lalolagi! Ua fa'avavave 'ese fafine mai le tu'ugamau, "ma le fefe ma le fiafia tele; ua la taufetuli e ta'u atu ai i Ōna so'o" (**Mata. 28:8**).

(5) E UI INA E LE'I MANATUA E LE SO'O O IOANE TUSITUSIGA E FA'ASINO I LE TOE TŪ O KERISO, O LE Ā LE MEA SA IA VA'AIA INA UA UMA ONA ULU ATU I LE TU'UGAMAU MA SA MAFUA AI ONA IA TALITONU UA TOE TŪ IESU?

Ma le solosolo sa i Lona ao, e le'i tu'u fa'atasi ma 'ie na tanuma'i, a ua tu'u 'ese, ma ta'ata'ai i le tasi mea.

Ioane 20:7

E le'i fa'alogo Maria i lenei tala fiafia. Ua alu o ia iā Peteru ma Ioane ma le fe'au fa'anoanoa lava, "Ua latou 'ave 'eseina le Ali'i i le tu'ugamau; matou te lē iloa fo'i le mea ua latou tu'uina ai o Ia" (**Ioa. 20:3**). Ua fa'ananati atu so'o i le tu'ugamau, ma fa'amaonia le 'upu a Maria. Ua la va'aia le 'ie tanu ma le solosolo sa i Lona āo, a e la te le'i maua lo latou Ali'i. Peita'i ua i ai lava i inei le molimau i Lona toe tū mai. O lavalava tanu e lē o so'ona fa'asalalauina, a e ua gaugau lelei ma teu 'ese. O Ioane "ua va'ai atu, ona talitonu lea o ia" (**F. 8**). Na te le'i malamalama i tusitusiga pa'ia e tatau ona toe tū mai Keriso nai ē ua oti; a e peita'i ua ia manatuaina nei 'upu fa'avalalo'aga a le Fa'aola e fa'ataua i Lona toe tū mai.

O Keriso lava ia na tu'u'esea 'ie tanu ma le fa'aeteete lava. Ina ua alu ifo le agelu mamana i le tu'ugamau, sa fa'atasi ai ma se isi, na aofia i le leoleoina o le tino maliu o le Ali'i. A o fuli'ese le ma'a e le agelu mai le lagi, sa ūlu atu le tasi i le tu'ugamau ma tatala 'ese 'ie fusifusi mai le tino o Iesu. Peita'i o 'a'ao lava o le Fa'aola na fatufatuina ma tu'u lelei i le mea e tatau ona i ai. I Lana silafaga, e tutūsa lava le ta'ita'iina o le fetū ma se mea fa'atauva'a e sili le nini'i o Āna foafoāga, e leai se mea e lē tāua. E va'aia i Āna galuega uma le pulega e matuā lelei ma le 'ato'atoa.

(6) A O TAGIAUĒ ONA O LE TU'UGAMAU UA AVANOĀ, O LE Ā LE TALI NA TU'U ATU E MARIA INA UA FESILIGIA O IA E LE AGELU?

Ua la fai mai iā te ia, "Funa e, se ā le mea e te tagi ai?" Ua fa'apea atu iā te i la'ua, "Auā ua latou 'ave'ese lo'u Ali'i, 'ou te lē iloa fo'i le mea ua latou tu'uina ai o Ia."

Ioane 20:13

Sa mulimuli Maria iā Ioane ma Peteru e aga'i i le tu'ugamau; ina ua toe fo'i i la'ua i Ierusalema, sa nofo ai pea Maria. A o ia va'ai atu i le tu'ugamau gaogao, sa fa'atumulia lona loto i le fa'anoanoa. Ina ua va'ai atu i totonu, sa ia iloa agelu e to'alua, o le tasi i le ūlu ma le tasi i vac i le mea na ta'oto ai Iesu. "Funa e, se ā le mea e te tagi ai?" o le la fesili lea. Sa tali ia, "Auā ua latou 'ave'ese lo'u Ali'i; 'ou te lē iloa fo'i le mea ua latou tu'uina ai o Ia" (**Ioa. 20:13**).

(7) O LE Ā LE FESILI SA FA'ALOGOINA E MARIA MAI LE TAGATA NA IA MANATU O LE LEOLEO FANUA?

Ua fetalai atu Iesu iā te ia, "Funa e, se ā le mea e te tagi ai? O ai ea e te sa'ilia?" A o le fafine, fa te ia o le leoleo ia o le fanua, ua fai mai iā te Ia, "Le Ali'i e, afai ua e 'ave'ese iā te Ia, ta'u mai ia iā te a'u po o fea le mea ua e tu'uina ai o Ia; ona 'ou 'ave'eseina lea o Ia."

Ioane 20:15

Ua liliu 'ese ia, mai agelu fo'i, ma sa manatu o ia e sa'ili se isi e ta'u mai po o fea ua o'o i ai le tino maliu o Iesu. A e o se isi leo ua fa'apea mai, "Funa e, se ā le mea e te tagi ai? O ai ea e te sa'ilia?" (**F. 15a**). Ua iloa mai e Maria se tagata o lo'o tū, ma ua manatu ia o le teu fanua. Sa ia tali atu, "Le ali'i e, afai ua e 'ave'ese iā te Ia, ta'u mai ia iā te a'u po o fea le mea ua e tu'uina ai o Ia, ona 'ou 'ave'eseina lea o Ia" (**F. 15b**). Afai e manatu o lenei tu'ugamau o se tagata mau'oa ua mamalu tele mo se fanua tanu mo Iesu, e na te mafaia ona saunia se nofoāga mau mo Ia. E i ai se tu'ugamau na fa'agaogaoina ina ua fetalai atu Keriso, na ta'oto ai Lasalo. Mata e

na te lē mafai ona maua o lea nofoāga tanu mo lona Ali'i? Sa ia lagona a na tausi lelei Lona tino pele na fa'asatauroina, o le a 'avea ma fa'amafanafanaga mo ia i lona tulaga fa'avauvau.

(8) I LE TALI FIAFIA A MARIA INA UA IA ILOA LONA ALI'I, O LE Ā LE LAPATA'IGA NA TU'UINA ATU E KERISO IĀ TE IA?

Ua fetalai atu Iesu iā te ia, "'Aua e te tago mai iā te A'u, auā 'Ou te le'i alu a'e i Lo'u Tamā ma lo 'outou Tamā. A e ia e alu i O'u uso, ma fai atu iā te i latou, 'Ou te alu a'e i Lo'u Tamā ma lo outou Tamā, i Lo'u Atua ma lo outou Atua.'"

Ioane 20:17

A e peita'i, o lenei ua fetalai atu Iesu iā te ia i Lona lava si'ufofoga masani, "*Maria e!*" Ua ia iloa nei e lē o se tagata 'ese o lo'o fetalai mai iā te ia, ma ina ua liliu sa ia va'aia i ōna luma le Keriso soifua. I lona fiasia sa galo iā te ia o Ia lea na fa'asatauroina. Sa oso mai o le a fusi i Ōna 'a'ao, ma fa'apea atu, "Raponi e !" Peita'i o Keriso us si'i Lona 'a'ao ma fetalai atu, "*Aua e te tago mai iā te A'u, auā 'Ou te le'i alu a'e i Lo'u Tamā; a ia e alu i Ō'u uso, ma fai atu iā te i latou, 'Ou te alu a'e i Lo'u Tamā ma lo 'outou Tamā; i Lo'u Atua ma lo 'outou Atua'*" **(F. 17).** Ona alu ai lea o Maria i le 'au so'o ma le tala fiasia.

(9) INA UA MAVAE LE AFIO A'E I LE LAGI MA UA MAUA LE FA'AMAONIGA UA TALIAINA LANA TAULAGA MO LE AIGĀTAGATA, O LE Ā LE TA'UTINOGA MATAGOFIE I LE FANAU A TAGATA UA FA'ATAUNU'UINA NEI E PEI ONA FA'AILOA MAI E LE PEROFETA O ISAIA?

'Ou te fa'ato'aitiitia tagata e sili i le auro lelei, o tagata lava e sili ona to'aitiiti i le auro lava o Ofeira.

Isaia 13:12

E le'i talia e Iesu le fa'aaloaloga a Ōna lava tagata se'i iā te Ia le mautinoāga o Lana taulaga ofo ua taliaina e Lona Tamā. Na Ia afio a'e i maota i le lagi, ma Na fa'afogaina mai le Atua lava ia le ta'utinoga, o Lana togiola mo agasala a tagata ua lava ma totee, ma e ala i Lona toto e mafai e tagata uma ona maua le ola e fa'avavau. Ua fa'amaonia e le Tamā le feagaiga na faia ma Keriso, Na te taliaina le tagata ua salamō ma usita'i, ma o le a alofa iā i latou e pei ona Ia alofa i Lona Ālo. O le a fa'amae'aina e Keriso Lana galuega, e fa'ataunu'u ai Lana ta'utinoga, "*'Ou te fa'ato'aitiitia tagata e sili i le auro lelei, o tagata lava e sili ona to'aitiiti i le auro o Ofeira'*" **(Isa. 13:12).** O mana uma o le lagi ma le lalolagi ua tu'uina i le Āloali'i o le ola, ma na Ia toe fo'i i Ōna so'o i le lalolagi agasala, ina ia mafai ona Ia tu'uina atu iā i latou mai Lona mana ma Lona mamalu.

(10) TALU AI UA LĒ LAVA LO LATOU FA'ATUATUA, SA FA'APEFEA LE TALI ATU A SO'O I LE FA'AALIGA OFOFOGIA A MARIA LE MAKETALA, SA IA VA'AI I LE FA'AOLA?

O i latou fo'i, ua latou fa'alogo i le tala ua soifua o Ia, ma ua iloa o Ia e ia, e le'i talitonu ai i latou.

Mareko 16:11

A o i ai le Fa'aola i le afio'aga o Lona Tamā, o lo'o taliaina mea alofa mo Lana Ekalesia, o le 'au so'o o lo'o manatunatu i latou i le tu'ugamau gaogao, ma le fa'anoanoa tele ma le fetāgisi. O lea aso o se aso o 'oli'olisaga i le lagi, a e mo le 'au so'o, o se aso o le lē mautinoa, fenumiā'i, ma le fememeā'i. O le lē talitonu i molimau a fafine ua fa'amaonia ai le maulalo o le mea ua goto i ai lo latou fa'atuatua. O le tala i le toe tū mai o Keriso ua 'ese mamao mai le mea na latou fa'amoemoeina ua lē mafai ona latou talitonu ai. Ua sili atu ona lelei i lo se mea e talitonuina. O lo latou manatu i le tala ua aumaia, e faigatā ona fa'amaonia. Sa latou fa'alogo i le tele o a'oa'oga ma talitonuga fa'a-saienisi a Satukaio, ma o le mea ua mau i o latou mafaufau e fa'atatau i le toe tū mai ua fa'anefu lava. E itiiti lo latou malamalamaga i le uiga o le toe tū mai nai ē ua oti. Ua lē mafai e o latou mafaufau ona fa'avasega lenei matā'upu telē.

(11) O AI LE SO'O NA TA'U MAI LONA IGOA E LE AGELU 'AVE FE'AU ONA O LONA FA'ANOANO TELE MA LONA MASIASI I LE FA'AFITIA O KERISO?

A ia outou ō atu, inā ta'u atu i Ōna so'o atoa ma Peteru, e muamua atu o Ia iā te outou i Kalilaia, tou te iloa ai o Ia i lea mea, fa'apei ona fetalai atu ai o Ia iā te outou.

Mareko 16:7

"Inā ō atu ia," sa fai atu ai agelu i fafine, ""inā ta'u atu i Ōna so'o ma Peteru e muamua atu o Ia iā te i latou i Kalilaia; tou te iloa ai o Ia i lea mea e fa'apei ona fetalai atu ai o Ia iā te 'outou" (**Luk. 16:7**). O agelu ia sa fa'atasi ai ma Keriso, o agelu puipui, i Lona soifuāga a o i ai i le lalolagi. Na latou molimauina Lona tofotofoga ma le fa'asatauroina. Na latou fa'alogoia Āna fetalai i Ōna so'o. Na fa'ailoa lea i le fe'au i le 'au so'o, ma sa tataua ona talitonu ai i latou i lona fa'amaoni. O nei 'upu e na o 'ave fe'au a le Ali'i ua toe tū mai e sau ai.

"Ta'u atu i Ōna so'o ma Peteru," na fai mai ai agelu. Talu le maliu o Keriso, o Peteru ua punou ifo i le loto fa'amaulalo ma le agaga salamō. O lona mā ina ua fa'afitia lona Matai, o le silasila alofa ma le mafatia a le Fa'aola, sa tū mai pea i ōna luma. Na sili atu le mafatia ma le tigā o Peteru i lo o se isi o le 'au so'o. Iā te ia ua tu'u mai le ta'utinoga ua talia lona salamō, ma ua fa'amagaloina lana agasala. Ua ta'ua mai ia i lona lava igoa.

(12) INA UA MAVAE LE AFIO A'E O KERISO I LONA TAMĀ MA TOE AFIO IFO I LE LALOLAGI, O LE Ā LE FE'AU FA'AMAFANAFANA NA IA TU'UINA I FAFINE FA'ATUATUA E FA'AILOA ATU I ŌNA SO'O?

Inā ō atu ia ia vave, lua te ta'u atu i Ōna so'o, ua toe tū mai o Ia nai ē ua oti; fa'auta, fo'i e muamua atu Ia iā te outou i Kalilaia; tou te iloa ai o Ia i lea mea; fa'auta, ua 'ou fai atu ai iā te oulua.

Mataio 28:7

"Ta'u atu i Ōna so'o ma Peteru ina ia latou ō atu i Kalilaia, latou te iloa ai A'u." O so'o uma na latou tu'ulafoa'i Iesu, ma o le vala'au ina ia feiloa'i ma Ia e aofia ai i latou uma lava. Na te le'i lafoa'iina se tasi o i latou. Ina ua ta'u atu e Maria le Maketala na ia va'ai i le Ali'i, sa ia toe fa'amanatu atu le vala'au i le fa'atasiga i Kalilaia. Ma ua fa'atolu ona sau o lea fe'au iā i latou. Ina ua uma ona Ia afio a'e i Lona Tamā, na fa'aali Iesu i isi fafine, ma fetalai atu i ai, ""*Si Ō'u alofa!*" Ona la ō mai ai lea ma fetagofi i Ōna 'a'ao, ma ifo mai iā te Ia. Ona fetalai atu lea o Iesu iā te i la'ua, '*Aua lua te matata'u; inā lua ō atu ia, lua te ta'u atu i Ō'u so'o, ina ia latou ō atu i Kalilaia, latou te iloa mai ai A'u*'" (**Mata. 28:9, 10**).

(13) O LE Ā LE MEA NA TA'U ATU E LE FA'AOLA I ŌNA SO'O E SAUNIA AI I LATOU MO MEA MATA'UTIA MA LE FAIGATĀ UA IA SILAFIA O LE A MAFAI ONA TUPU AI LE MASALOSALO IĀ I LATOU?

Ua 'Ou fai atu nei fo'i iā te outou a o le'i taunu'u; ina ia outou talitonu mai pe a taunu'u.

Ioane 14:29

O le ulua'i galuega a Keriso i le lalolagi ina ua toe tū mai o le fa'atalitonuina lea o Ōna so'o i Lona alofa e lē fa'aititia ma le fa'apalepale mo i latou. Ina ia tu'u atu iā i latou le fa'amaoniga o Ia lo latou Fa'aola o lo'o soifua, ua Ia motusia filiifili o le tu'ugamau, ma e lē toe mafai ona taofia e le fili, o le oti lea; ina ia fa'aali atu o lo'o iā te Ia pea le alofa e tasi pei o taimi na latou fa'atasi ai ma Ia, lo latou A'oa'o pele, na Ia fa'aali pea lava pea iā i latou. Na te tosina i latou i le fusi o le alofa ia si'omia ai. Ō e ta'u atu i Ō'u uso, sa Ia fa'atonu atu ai, ia latou feiloa'i iā te A'u i Kalilaia.

Ina ua fa'alogu le 'au so'o i lenei taimi ua atofaina, sa mafaufau ifo i afioga a Keriso iā i latou na valo'ia ai Lona toe tū mai. Peita'i e o'o lava i lenei taimi, e leai se fiafia iā i latou. Latou te le'i mafai ona fa'ate'a 'ese le masalosalo ma le femēmēa'i. E o'o lava ina ua fa'ailoa atu e fafine ua latou va'ai i le Ali'i, a e sa le'i talitonu lava le 'au so'o. Na manatu i latou o fafine ua mafaufau sa va'ai iā Iesu.

(14) A E LE'I MAFAI ONA OLI'OLI LE 'AU SO'O I LE FA'AMAONIGA O LE TOE TŪ O LE FA'AOLA, O LE Ā LE MANATU FA'ALOTOVAIVAI MA LE FA'ANOANO NA TAOFIA AI I LATOU I SE TULAGA O LE LĒ TALITONU?

Sa matou fa'amoemoe fo'i, o Ia lava o le a togiolaina Isara'elu; a e lē gata i ia mea uma, o lona aso tolu le asō talu ona faia o na mea.

Luka 24:21

E foliga mai ua fa'amalumalumi mai puapuagā i luga o isi faigatā. O le aso ōno o le vaiaso na latou va'aia lo latou Matai ua maliu; o le aso muamua o le vaiaso e soso'o ai na latou lē iloa le mea ua o'o i ai Lona tino maliu, ma na molia i latou fa'apea ua latou gaoi Lona tino ma 'ave 'ese atu ina ia fa'asesēina ai tagata. Sa latou popole e fa'atonuina manatu lē sa'o ua fa'ateteleina ona tete'e mai

iā i latou. Ua latou fefefe i le tete'e o faitaulaga, ma le ita tele o tagata. Sa latou naunau mo le fa'atasi mai o Iesu, o Lē na fesoasoani iā i latou i faigatā uma.

Na latou faia so'o 'upu, "Sa matou fa'amoemoe fo'i, o Ia lava o le a togiolaina Isara'elu" (Luk. 24:21). Ua lagona ua tu'ulafoa'i ma ua loto vaivai, ona latou manatua lea o Āna fetalai, "Auā afai e faia nei mea i le la'au mata, se ā se mea e faia i le la'au mago?" (Luk. 23:31). Ua latou fa'apotopoto i le afeafe aupito aluga, ma pupuni ma fa'amau faitoto'a, ua mautinoa o le i'uga o lo latou A'oa'o pele e lē taumate ua lata ona o'o mai fo'i iā i latou.

A e o lenei taimi 'atoa, sa tatau ona fa'afiafiaina i latou i le iloa ua toe tū mai le Fa'aola. I le fa'ato'āga, o Maria sa tū ai ma tagi, a o Iesu o lo'o i ai i ōna tafatafa. O ōna mata sa fa'apogisāina e loimata na ia lē iloa ai o Ia. Ma o loto o le 'au so'o sa matuā tumu i le fa'anoanoa ua latou lē talitonu ai i le fe'au a agelu po o afioga a Keriso lava ia.

(15) O LE Ā LE FA'AALIGA OFOOFOGIA NA TOE TA'UTINO AI PAULO MO LE MAUTINOAGA A SO'O UMA O LE ATUA O LO'O FA'AMOEMOE I LE TOE TŪ?

A o lenei, ua toe fa'atūina mai Keriso i ē ua oti, ua 'avea ma fa'apolopolo o ē ua momoe.
I Korinito 15:20

Pe to'afia ē o lo'o faia pea e pei ona faia e le 'au so'o! E to'afia o lo'o faia e pei o le tagi fa'avauvau a Maria, "Ua latou 'ave'ese lo'u Ali'i...ou te le'i iloa fo'i le mea ua latou tu'uina ai o Ia" (Ioa. 20:13). Pe e to'afia o lo'o fetalai atu i ai le Fa'aola, "Se ā le mea e te tagi ai? O ai ea e te sa'ilia?" (F. 15). O lo'o latalata ane lava la iā i latou, peita'i o mata ua fa'atauasoina e loimata ua latou lē iloa ai o Ia. Ua Ia fetalai atu iā i latou, a e ua latou lē malamalama.

Pagā, pe 'ana ea a'e i luga le ūlu ua punou, pe ana fa'apupulaina mata ina ia iloa atu ai Ia, o taliga ia mafai ona fa'alogi i Lona si'ufofoga! "Inā ō atu ia i ai vave, lua te ta'u atu i Ōna so'o, ua toe tū mai o Ia" (Mata. 28:7). Ta'u atu ia 'aia ne'i latou va'ai i le tu'ugamau fou o Iosefa, sa tapunia e se ma'a tele, ma fa'amauiina e le fa'amau fa'ailoga a Roma. E lē o i ai Keriso i lea mea. Ia 'aia le va'ai i le tu'ugamau gaogao. 'Aia le fa'anoanoa e pei o ē ua leai se fa'amoemoe ma lē maua se fesoasoani. O lo'o soifua Iesu, ma ona o lo'o soifua o Ia, o le a tatou ola fo'i. Mai loto fia fa'afetai, mai laugutu ua pā'ia e le afi pa'ia, ia fa'aleoina le vi'iga fiafia, "**Ua toe tū Keriso!**" O lo'o soifua o Ia e fautua mo i tatou. Ia u'umau i lenei fa'amoemoe, ma o le a taofimau le agaga pei o se taula ua tofotofoina. Ia talitonu, ona e va'aia lea o le mamalu o le Atua.

Ou te fa'afetai ua aumai e Keriso le mautinoāga o le toe tutū o le 'au amiotonu pe a toe afio mai o Ia i le lalolagi.

Li'o le Tali: Ioe Lē Mautonu

Ou te tatalo ina ia saunia lo'u aiga ma ē pele mo le toe tū ofoofogia o le a fa'atasia ai le aiga o le Atua e fa'avavau.

Li'o le Tali: Ioe Lē Mautonu

E fa'amafanafanaina a'u i lo'u iloa o le oti e na o se tulaga e lē tumau le te'a 'ese'ese ma tagata o le aiga fa'atuatua ma ua lata le toe afio mai o Keriso e toe fa'atasia ai tatou.

Li'o le Tali: Ioe Lē Mautonu

E iā te a'u le fiafia ona o le iloa o Keriso na malii mo a'u agasala ma o lo'o fa'atalitali e talia a'u i le aiga e leai se gata'aga o le oli'oli ma le fiafia e ola fa'atasi ma Ia e fa'avavau.

Li'o le tali: Ioe Lē Mautonu

Manatu o le Su'esu'ega	Tatalo e Mana'omia	Tali o Tatalo

O Le Savaliga i Emau

Lesona 10

(1) A O TOE FO'I I AIGA SO'O O KERISO E TO'ALUA MAI LE PASEKA, O LE Ā LE MEA SA LA TALATALANO A AI NA AUMAIA IĀ TE I LA'UA LE FA'ANOANO?

Sa fetautalatala'i i la'ua i ia mea uma ua faia.

Luka 24:14

A o malu mai le afiafi o le aso o le toe tū, e to'a lua so'o na malaga aga'i i Emau, se nu'u e valu maila le mamao mai Ierusalem. O nei so'o e lē tulaga maua luga i le galuega a Keriso, a e la te talitonu 'ato'atoa iā te Ia. Sa ō mai i le 'a'ai mo le fa'ailogaina o le Paseka, a e ua femēmēa'i tele ona o mea sa tutupu. Sa la fa'alogo i le tala o le taeao e fa'atatau i le 'ave'esea o le tino o Keriso mai le tu'ugamau, fa'apea ma le tala i fafine na va'aia agelu ma le feiloā'iga ma Iesu. O lea ua la fo'i nei i o la aiga se'i manatunatu loloto i ai ma tatalo. Na la savavali ma le fa'anoanoa tele, ma talatalanoa i va'aiga o le fa'amasinoga ma le fa'asatauroina. E le'i i ai muamua i la'ua i se tulaga ua matuā fa'alotovaivai ai e pei o lenei taimi. O o la'ua loto ua lei se fa'amoemoe ma se fa'atuatua, ua la savavali nei i le āta o le satauro.

(2) A O SAVAVALI NEI SO'O E TO'ALUA O LA MAFAUFAU UA FA'ATUMULIA I O LA'UA LAVA FA'ANOANO, O AI NA FA'ATASI ATU I LE SAVALIGA, MA NA IA LAGONA LA LA'UA TALANOĀGA?

Ua la fetautalatala'i, ma fesuea'i, ona fa'alatalata mai ai lea o Iesu, ua ō fa'atasi ma i la'ua.

Luka 24:15

E le'i mamao tele le savaliga a e ua fa'atasi mai se tagata 'ese, peita'i ona o le fa'anoanoa tele la te le'i amana'ia ai o Ia. Sa fa'auau pea le talanoāga, ua fe-fa'aalia'i mafaufauga i o la loto. Ua la manatunatu fa'atatau i a'oa'oga sa tu'uina mai e Keriso, ua foliga mai la te lē o malamalama i ai. A o talanoa i mea na tutupu, sa naunau Iesu e fa'amafanafana iā i la'ua. Na Ia silafia lo la fa'anoanoa; na Ia malamalama i manatu o lo'o fete'ena'i ma le femēmēa'i ua o'o mai i o la mafaufau: O lenei Tagata, Lē na mafatia ma fa'alumaina, o Ia e le Keriso? O lo la fa'anoanoa ua lē ma-taofia, ma sa fetagisi ai. Ua silafia e Iesu o la loto ua fusia fa'atasi ma Ia ona o le alofa, ma sa la naunau e soloi'ese o la'ua loimata, ma ia fa'atumuina i le fiafia ma le 'oli'oli. Peita'i e tatau ona Ia muā'i tu'uina atu iā i la'ua ni a'oa'oga e lē mafai ona la toe fa'agaloina.

(3) O Ā FESILI NA TU'UINA ATU E IESU I SO'O E TO'ALUA SA MAUA AI LE AVANO NA IA AVATU AI A'OA'OGA TĀUA E LĒ TOE MAFAI E I LA'UA ONA FA'AGALOINA?

Ua fetalai atu Ia iā te i la'ua, "O ā ea ia 'upu ua oulua felafolafoa'i ai, o oulua o savavali, ma ua mata fa'anoanoa?"

Luka 24:17

"Ua fetalai atu Ia iā te i la'ua, 'O ā ea ia 'upu ua oulua felafolafoa'i ai, o oulua o savavali, ma ua mata fa'anoanoa?' O le tasi o i la'ua e igoa iā Kaleopa, ua tali mai iā te Ia, ua fa'apea mai, 'Pe na o 'Oe ea le āumau i Ierusalem ma le lē iloa o mea ua tutupu ai i ōna po nei?'" Na la ta'u atu iā te Ia lo la fa'anoanoāga e fa'atatau i lo la Matai, "O le perofeta lea sa mālōsi i mea na Na faia, ma Āna afioga i luma o le Atua ma le nu'u uma;" peita'i, "na tu'uina atu fo'i o Ia e le 'au faitaulaga sili ma o tatou faipule," sa la fa'apea mai, "ia fa'asalaina o Ia ia oti, ma ua latou fa'asatauroina o Ia." O o la loto ua matuā tumu i le fa'anoanoa ma tino ua gatete, sa la toe fa'aopoopo atu, "Sa matou fa'amoemoe fo'i, o Ia lava o le a togilaina Isara'elu; a e lē gata i ia mea uma, o lona aso tolu le asō talu ona faia o nā mea" (Luk. 24:17-21).

(4) O Ā FETALAIGA A KERISO E LE'I MANATUA E SO'O A E SA MANATUA MA LE MATATA'U I LOTO O LE 'AU FAITAILAGA MA TA'ITA'I?

Ua fa'apea atu, "Le ali'i e, ua matou manatua, na fai mai lenā tagata pepelo, ina o ola mai o Ia, 'A mavae aso e tolu 'Ou te toe tū mai ai.'"

Mataio 27:63

O se mea 'ese ona ua lē manatua e ia so'o afioga a Keriso, ma iloa ai na la valo'ia mea ua uma ona tutupu! La te le'i iloa o le vaega mulimuli o mea na la fa'aalia e mautinoa e fa'atau'uina pei o le vaega muamua, ma o le aso tolu, o le a toe tū mai ai o Ia. O le vaega lenei sa tatau ona la manatua. O faitaulaga ma ta'ita'i e le'i galo iā i latou. I le aso "e tuā'oi ma le aso o le sauniuniga, ua fa'apotopoto atu ai iā Pilato le 'au faitaulaga sili ma le 'au Faresaio, ua fa'apea atu, 'Le ali'i e, ua matou manatua, ua fai mai lenā tagata pepelo, ina o ola mai o Ia, *A mavae aso e tolu 'Ou te toe tū mai ai'*" (**Mata. 27:62, 63**). A e peita'i, e le'i manatua e le 'au so'o nei 'upu.

(5) O LE Ā LE FESILI NA SOSO'O ATU A KERISO I SO'O E TO'ALUA SA AUMAI AI 'UPU FIAFIA O LE FA'AMOEMOE I O LA LOTO UA MATUĀ TIGĀ?

E lē tatau ea ona tigā o le Keriso i mea fa'apenā, i le o'o ai o Ia i Lona mamalu?

Luka 24:26

"Ona fetalai atu lea o Ia iā te i la'ua, '*O tagata valea, ma loto faigatā ona talitonu i mea uma ua fai mai ai e le 'au perofeta. E lē tatau ea ona tigā o le Keriso i mea fa'apenā, i le o'o ai o Ia i Lona mamalu?*'" (**Luk. 24:25, 26**). Ua ofo ia so'o po o ai lenei tagata 'ese na te mafai ona va'ai i totonu o o la loto, ma o lo'o talanoa mai i se loto e fa'atauānau, e mālū, e tigālofa, ma e tumu i le fa'amoemoe. O le taimi muamua lenei talu le fa'alaina o Keriso, ua la lagona ai se fa'amoemoe. E tele taimi na la va'ai atu ai ma le naunauta'i i lē o lo'o latou savavali fa'atasi, ma ua mafaufāu ifo o Āna afioga o 'upu lava ia sa faia e Keriso. Sa maofa i la'ua, ma na amata fa'atumulia o la loto i se fiafia uiga 'ese.

(6) INA IA ATINA'E LO LA'UA FA'ATUATUA, O FEA SA TA'ITA'IINA I AI E KERISO LO LA'UA MALAMALAMAGA E FA'ATATAU I VALO'AGA?

Ona fa'amatala ai lea e Ia iā te i la'ua o mea ua tusia iā te Ia i Tusi uma, ua amata mai iā Mose

Luka 24:27

Na amata mai iā Mose, o le Alefa o le tala fa'asolopito o le Afioga Pa'ia, na tu'uina atu e Keriso i Ōna so'o le fa'amatalaga sa'o e uiga iā te Ia. Pe ana Ia mua'i fa'ailoa atu Ia lava iā i la'ua, se manū ua fa'amālilieina o la'ua loto. I le fa'atumulia o i la'ua i le fiafia, o le a lē toe i ai se isi mea la te toe mana'omia. Peita'i e tatau iā i la'ua ona malamalama lelei i molimau sa fa'atatau iā te Ia, e ala i āta ma valo'aga o le Feagaiga Tuai. I luga o ia mea uma e tatau ona fa'avaeina ai lo la'ua fa'atuuatua. E le'i faia e Keriso se vavega ina ia talitonu ai i la'ua, a e o Lana mua'i galuega o le fa'amatalaina lea o Lana Afioga. Sa manatu i la'ua o le maluu o Keriso o le fa'aumatiāga lea o la fa'amoemoe uma. A e o lenei ua la fa'aalia mai le 'au perofeta, o lea le fa'amaoniga mautinoa mo lo la fa'atuuatua.

(7) O LE Ā LE FETALAIGA A KERISO E FA'ATATAU I LE MOLIMAU A LE FEAGAIGA TUAI I LANA GALUEGA?

Ua fetalai atu Ia iā te i latou, "O 'upu ia na 'Ou fai atu ai iā te outou, ina ia O'u iā te outou; e tatau ona taunu'u o mea uma ua tusia iā te A'u i le tulafono a Mose, ma le 'au perofeta, ma salamo."

Luka 24:44

I le a'oa'oina o nei so'o, sa fa'aalia e Iesu le tāua o le Feagaiga Tuai, o se molimau i Lana galuega. E to'atele ē ta'utino mai o Kerisiano, a ua latou lafoa'i le Feagaiga Tuai, fai mai ua lē toe aogā. Peita'i, e lē fa'apea a'oa'oga a Keriso. Ona sa tāua tele iā te Ia le Feagaiga Tuai, e i ai le taimi na Ia fa'apea ai, "*Pe afai latou te lē fa'alogi iā Mose ma le 'au perofeta, e ui lava ina tū mai se tasi nai ē ua oti, latou te lē mafafai lava*" (**Luk. 16:31**).

O le si'ufoga lava o Keriso o lo'o fetalai e ala mai i pateriaka ma perofeta, mai ona po o Atamu se'i o'o lava i va'aiga fa'ai'u o le lalolagi. O lo'o fa'aali manino mai le Fa'aola i le Feagaiga Tuai, e fa'apea fo'i i le Feagaiga Fou. O le malamalama fa'avalō'aga lenā mai taimi ua tuana'i e fa'ailoa manino mai ai le matagofie o le si'ufoga o Keriso ma a'oa'oga o le Feagaiga Fou. O vavega na faia e Keriso o fa'amaoniga na o Lona itū Atua; peita'i o se fa'amaoniga sili e ta'utino ai o Ia o le Fa'aola o le lalolagi e maua lea i le fa'atusatusaina o valo'aga o le Feagaiga Tuai ma le tala fa'asolopito o le Feagaiga Fou.

(8) O LE Ā LE 'UPU MONI OFOFOGIA SA TATAU ONA A'OA'OINA I NEI SO'O INA IA FA'ATONU AI LE LĒ MALAMALAMA E FA'ATATAU I LE GALUEGA A KERISO I LE LALOLAGI?

Auā ua sau le Atali'i o le tagata e fa'aola i lē na lē iloa.

Mataio 18:11

Mai valo'aga, na tu'uina atu e Keriso i Ōna so'o le uiga tonu o Lona itū tagata. O lo latou fa'amoemoega mo se Mesia o le a afio mai e nofoia Lona nofoāli'i ma le mana fa'a-tupu pei o fa'anaunauga o tagata, ua fa'aseseina ai i latou. E fa'alavelave lea talitonuga ma le mea o lo'o fa'apopoleina ai i Lona afio ifo mai le mea e aupito maua luga i le tulaga e sili le maua e mafai ona nofoia. Na finagalo Keriso ia mamā ma fa'amaoni i itū uma manatunatuga o Ōna so'o. E tatau ona latou malamalama lelei i le uiga loloto o le ipu 'o'ona o puapuagā ua fa'asoaina mo Ia. Na Ia fa'a'ailoa iā i latou le fete'ena'iga mata'utia latou te lē o mafai ona malamalama nei i ai, o le fa'ataunu'uga lea o le feagaiga na faia a o le'i fa'avaeina le lalolagi. E tatau ona maliliu Keriso, e pei lava o tagata soli tulafono uma le tatau ona oti pe a faifai pea le agasala. O mea uma ia e tatau ona fa'ataunu'uina, peita'i sa lē tatau ona fa'ai'uina i le to'ilalo, a e o le manumalo mamalu e fa'avavau. Na fetalai Iesu i Ōna so'o ina ia taumafai e fai mea uma e mafai ina ia lavea'i le lalolagi mai le agasala. O i latou uma o ē mulimuli iā te Ia, e tatau ona ola fa'apei ona soifua o Ia, ma galulue e pei ona Ia galue, ma le filigā ma le ma'elegā i mea uma.

(9) SA FA'APEFEA ONA FA'AMATALAINA E KERISO LE MANA O LONA ITŪ ATUA I ŌNA SO'O?

Ona maliliu ane ai lea o Iesu ua fetalai atu iā te i latou, "Ua tu'uina mai iā te A'u le pule uma lava i le lagi ma le lalolagi."

Mataio 28:18

Na fa'apea ona a'oa'o atu Keriso i Ōna so'o, ia matala ai o la'ua mafaufau ia malamalama i Afioga a le Atua. O nei so'o ua vaivai, peita'i e le'i fa'aititia ai le talanoāga. O 'upu o le ola ma le fa'amalosia'au, sa pa'ū mai fofoga o le Ali'i. Peita'i o lo'o punitia pea la la'ua va'ai. A o Ia fetalai atu iā i la'ua e uiga i le fa'aumatiāga o Ierusalem, sa Ia silasila atu i le 'a'ai ua fa'amala'aina ma le tagi. E lē o i ai sina o la masalosologa po o ai o lo'o latou malaga fa'atasi. La te le'i manatu o le matā'upu o la latou talanoāga o lo'o savali i o la tafatafa; auā o Keriso o lo'o talanoa atu e fa'atatau iā te Ia e pei o Ia o se isi tagata. Sa manatu i la'ua o Ia o se tasi na fa'atasi ai i le tausamiga tele, ma o lea ua toe fo'i i Lona aiga. Na latou savavali ma le fa'aeteete i luga o le āla gaoā, ma taofia le malaga i isi taimi mo se malōlōga. Sa fa'apea ona fa'aauu le savaliga i le ala gaoā, a e o Lē ua lata ona 'aveina Lona tulaga i le itū taumatau o le Atua, ma e Na te mafai ona fetalai atu, "*Ua tu'uina mai iā te A'u le pule uma lava i le lagi ma le lalolagi*" (**Mata. 28:18**), o lo'o savali i o la tafatafa.

(10) ONA O LO LA NAUNAU E FA'ALOGOLOGO PEA I LENEI "TAGATA 'ESE," O LE Ā LE VALA'AU FA'AALOALO NA LA TU'UINA ATU IĀ KERISO?

A ua la pulunaunau iā te Ia, ua fa'apea mai, "Tatou te nonofo ma i ma'ua nei; auā ua taugagaifo le lā, ua lata i le afiafi. Ona ulufale atu lea o Ia latou te nonofo."

Luka 24:29

Ua goto ifo le lā a o alu pea le malaga, ma a o le'i taunu'u le 'aumalaga i lo la malōlōga, o le 'au faifā'ato'āga ua tu'ua a latou galuega. A o aga'i atu ia so'o i lo la fale, o le tagata 'ese e foliga mai o le a fa'aauu pea Lana malaga. Peita'i o ia so'o sa lagona ua tosina atu i la'ua iā te Ia. O o la agaga ua mana'omia le toe fa'alogi i Āna afioga. Ua la fai mai, "*Tatou te nonofo ma i ma'ua nei.*" Sa foliga mai Na te lē talia le vala'aulia, a e ua la fa'atauānuu pea iā te Ia, fa'apea, "*Auā ua taugagaifo le lā, ua lata i le afiafi.*" Sa talia e Iesu le la 'ai'oi, ona "*ulufale atu lea o Ia, latou te nonofo*" (**Luk. 24:29**).

Ana fa'atamala nei so'o ma lē fa'atāua le la vala'au, se manū la te lē iloa o Ia lea na latou malaga fa'atasi, o le Ali'i lea ua toe tū mai. O Keriso e Na te lē fa'amalosia Lona mafuta i se tagata. Na te fa'amalieina i latou e mana'omia o Ia. E fiafia o Ia e ulufale i aiga tulaga maua, ma fa'afiafiaina ē o loto fa'anoanoa. Peita'i afai o tagata ua lē fiafia e mafaufau i le Malō fa'ale-lagi, pe vala'aulia o Ia e malōlō fa'atasi ma i latou, o le a la malaga loa. O lea e to'a'ele ē ua lē maua lenei fa'amanuiāga. Latou te lē iloa Keriso e pei o ia so'o a o la malaga fa'atasi ma i la'ua i le āla.

(11) A O SAUNI MO LE TAUMAFATAGA, O LE Ā LE GAOIOIGA NA LA ILOA LELEI AI LE UIGA MASANI A KERISO?

Ua ta'oto o Ia e taumafa fa'atasi ma i la'ua, ona tago ai le a i le areto, ua fa'afetai, ma tofitofi, ma avatu iā te i la'ua. Ona pupula ai lea o la'ua mata, ua la iloa o Ia; a ua mōu o Ia nai iā i la'ua.
Luka 24:30, 31

Sa saunia le areto o le afiafi mo le aiga. Ua tu'u atu i luma o le mālō, o lea ua nofoia le nofoāga i le ūlu o le laulau. Ua fa'aloloa Ōna 'a'ao e fa'amanuia le mea taumafa. O so'o ua fa'ate'ia ma ua ofo. O lenei tagata 'ese ua fa'aloloa Ōna 'a'ao fa'apei ona masani ona faia e lo la Matai. Sa la toe va'ai atu, fa'auta, sa la va'aia i Ōna 'a'ao tulaga o fao. Sa la taufai 'alalaga fa'atasi, O le Ali'i o Iesu lenei! O Ia ua toe tū mai nai ē ua oti!

Ua tutū i la'ua e fa'apa'ū'ū i Ōna 'a'ao e ifo iā te Ia, peita'i ua mōu 'ese atu la mai o la luma. Na la va'ai atu i le nofoāga sa nofoia e la Lē e le'i leva atu ona ta'oto Lona tino i le tu'ugamau, ma ua la fetautalatalaa'i fa'apea, "E le'i mū ea o ta loto i totonu iā i ta'ua, ina ua fetalai o Ia iā te i ta'ua i le ala, ina ua fa'amatala mai fo'i e Ia o Tusi iā te i ta'ua?" (F. 32).

(12) ONA O LE FIAFIA TELE INA UA FA'AALIA LE FA'ATASI AI O KERISO, O LE Ā LE MEA NA UNA'I FA'AMALOSI IA SO'O E FAI?

Ua la tutū i luga i lea lava itu aso, ua toe fo'i atu ai i Ierusalem, ua maua atu fo'i e i la'ua o le to'asefulu ma le to'atasi ua fa'apotopoto fa'atasi ma ē na iā i latou.
Luka 24:33

Ua lē mafai ona la nonofo ma talanoa a e o lo'o i ai se tala tāua e tatau ona ta'u atu. Ua te'a lo la'ua vaivai ma ua lē fia 'a'ai. La te le'i tagofia le taumafataga na saunia, ma ona ua fa'atumulia i la'ua i le fiafia, sa toe fo'i atu i le ala na ō mai ai, ua fa'anatinati e ta'u le tala lelei i le 'au so'o o lo'o i le 'a'ai. O nisi vaega o le ala e lē saogalemū, peita'i na la a'ea isi itū i luga o tofē, ma sesē'e i luga o ma'a lāmolemole. La te le'i va'aia, la te le'i iloa fo'i o lo'o i ai le puipuiga a Lē sa latou savavali fa'atasi i lea āla. Ma o a la to'oto'o i o la lima, na tuli tatao pea ma le naunau ia vave atu i lo o le mea e tatau ai. Na fesē'a'i i isi taimi, peita'i sa toe maua lava le ala. O ni taimi ua taufetuli, e pa'ū'ū ma lavelavea, a e sa aga'i pea i luma, o le Uō e lē ma-va'aia sa fa'atasi pea ma i la'ua i le ala 'atoa.

(13) A O FA'ASOA ATU MA LE FIAFIA TELE E NEI SO'O LE TALA I LE TOE TŪ O KERISO, E FA'APEFEA FO'I ONA FA'AMATALAINA E PAULO I LATOU, I LE GASOLOGA O LE TAIMI, E FA'ASOA ATU LE TALA LELEI?

E fa'aapefea fo'i ona latou tala'i atu, pe afai ua lē 'a'auina atu i latou? Pei ona tusia, E matagofie na'uā o latou vae o ē 'aumai le tala lelei i le manuia, o ē aumai le tala i mea lelei.
Roma 10:15

O le pō e pogisā, a e o le Lā o le Amiotonu na susulu i o la luga. Sa tutūmu o la'ua loto i le fiafia. E foliga mai ua i ai i la'ua i se lalolagi fou. O Keriso le Fa'aola o lo'o soifua. La te lē toe fa'avauvau ona ua maliu o Ia. Ua toe tū mai Keriso -sa fai ma toe fai e la'ua ia 'upu. O lenei le fe'au o lo'o la tau'aveina i ē o lo'o fa'anoanoa. E tatau ona la ta'uina iā i latou le tala ofoofogia o le savaliga i Emau. E tatau ona la ta'u atu Lē na ō fa'atasi ma i la'ua i le ala. Ua la tau'aveina le fe'au e aupito sili ona tāua ua tu'uina mai i le lalolagi, o se fe'au o le tala lelei e fa'amoemoe i ai le manuia o le aigā-tagata mo le olaga nei 'atoa ma le ola e fa'avavau.

<i>Ou te fiafia i le iloa o lo'u Fa'aola ua toe tū ma o Lona toe tū e aumai ai iā te a'u le fa'amoemoe.</i>		
Li'o le Tali:	Ioe	Lē Mautonu
<i>Ua 'ou iloa o Keriso e fa'atasi mai pea e tu'u mai iā te a'u le malosi ma le lototele a o 'ou fesaga'i ma faigatā ma tofotofoga i lo'u olaga.</i>		
Li'o le Tali:	Ioe	Lē Mautonu
<i>'Ou te naunau ia i ai sa'u vaega i le folafolaina o le "tala fiafia" i nisi a o latalata mai le taimi o le afio mai o Keriso.</i>		
Li'o le tali:	Ioe	Lē Mautonu

Li'o le Tali: **Ioe** **Lē Mautonu**

[illegible]

Ia Outou Manuia

Lesona 11

I na ua taunu'u so'o ia e to'alua i Ierusalemā, na la ulu atu i le faitoto'a i sasa'e, auā e matala i pō o tausamiga. E pogisā fale ma leai se pisa, peita'i o tagata faimalaga o lo'o uia ala vāiti i le malamalama o le masina ua oso. Sa la ō atu i le āfēāfē aupito aluga, i le mea sa i ai Iesu i le itūlā mulimuli o le afiafi a o lumana'i ai Lona maliu. O iinei sa la iloa e maua atu i ai le 'au uso. E ui ina foliga mai ua leva le afiafi, a e la te iloa e lē o momoe le 'au so'o se'i o latou mautinoa po o le ā le mea ua tupu i le tino o lo latou Ali'i. O le faitoto'a sa la maua ua matuā fa'amauiina lava. Sa la tu'itu'i ina ia ulufale, a e ua leai lava se tali mai. Ua lē gaoiā mea uma. Ona la ta'u atu lea o la igoa. Sa tatala lēmū ma le fa'aeteete le faitoto'a, ua la ulufale atu, ma o le Isi, e lē o va'aia, sa ulufale fa'atasi ma i la'ua. Na toe fa'amauiina le faitoto'a, ia lē ulu atu i totonu ē tau lamalama.

(1) O Ā 'UPU ALOFA NA FETALAI ATU AI IESU I ŌNA SO'O A O FA'AALIA MAI O IA IĀ TE I LATOU I LE AFEAFE AUPITOALUGA?

O tautalatala i latou i nei mea, a ua tū mai Iesu lava i o latou luma, ua fetalai atu iā te i latou, "Ia outou manuia."
Luka 24:36

Sa maua atu e le 'au malaga i latou uma i se tulaga fa'agae'etia. O leo o i latou o lo'o i totonu o le fale ua fa'atumulia i le vi'iga ma le fa'afetai, ma fa'apea mai, "E moni, ua toe tū le Ali'i, ua fa'aali fo'i o Ia iā Simona" (**Luk. 24:34**). O so'o fo'i e to'alua, e mapusela ona o le fa'avavave mai o le la malaga, ua fa'amatala atu le tala ofoofogia i le fa'aali mai o Iesu iā i la'ua. Ina ua mae'a la la'ua molimau, ma o nisi ua fai mai latou te lē talitonu i ai, ona e faigatā se mea moni fa'apea, a e fa'auta, o se tasi Tagata ua tū i o latou luma. O mata uma ua tepataula'i i le Tagata 'Ese. E leai se tasi na tu'itu'i ia ulufale mai. E le'i fa'alogoina se la'a o se vae. Sa fa'ate'ia le 'au so'o, ma fia iloa pe o le ā le uiga o nei mea. Ona latou fa'alogoina ai lea i se leo, o le si'ufofoga o lo latou Matai. E manino ma ma'oti fetalai sa pa'ū mai Ōna fofoga, "Ia outou manuia" (**Ioa. 20:19**).

(2) O Ā 'UPU SA FETALAI ATU AI KERISO INA IA TALITONU AI I LATOU O IA MONI LEA O LO LATOU ALI'I UA TOE TŪ MAI Ē UA OTI?

"Ia outou va'ava'ai mai i O'u lima ma O'u vae, auā o A'u lava lenei; ia outou tagotago mai iā te A'u, ma ia va'ava'ai mai; auā o le agaga e leai sona 'a'ano ma ni ivi, pei o A'u nei ua outou va'ava'ai i ai."
Luka 24:39

"Ua fefefe i latou, ua matuā matata'u lava, fa te i latou o le agaga ua latou va'aia. Ua fetalai atu fo'i o Ia iā te i latou, 'Se ā le mea ua outou atuatuva'e ai? Se ā fo'i e tutupu ai masalo i o outou loto? Ia outou va'ava'ai mai i O'u lima ma O'u vae, auā o A'u lava lenei; ia outou tagotago mai iā te A'u, ma ia va'ava'ai mai; auā o le agaga e leai sona 'a'ano ma ni ivi, pei o A'u nei ua outou va'ava'ai i ai.' Ua uma ona fetalai atu, ona fa'aali atu ai lea e Ia iā te i latou o Ōna lima ma Ōna vae" (**Luk. 24:37-40**).

(3) O LE Ā LE TOE FA'AMAONIGA NA TU'UINA ATU E KERISO I ŌNA SO'O O IA LO LATOU ALI'I UA TOE TŪ A E LĒ O SE "AGAGA" LEAGA?

Ona latou avatu ai lea iā te Ia se fasi i'a tunu, ma se fasi melikerio. Ua tago Ia i ai, ma taumafa ai i o latou luma.
Luka 24:42, 43

Ua latou iloa atu 'a'ao sa fa'aleagaina e le sauā o fao na tu'ia ai. Latou te iloa Lona si'ufofoga, e lē fa'apea se isi ua latou fa'alogoina i ai. "A o le'i talitonu i latou ona ua oli'oli, ma ua ofo, ua fetalai atu Ia iā te i latou, 'O iinā ea ni a outou mea e 'ai?' Ona latou avatu lea iā te Ia se fasi i'a tunu, ma se fasi melikerio. Ua tago Ia i ai, ma taumafa ai i o latou luma" (**F. 41-43**). "Ona oli'oli ai lea o le 'au so'o ina ua latou va'ai atu i le Ali'i" (**Ioa. 20:20**). O le fa'atuatua ma le oli'oli ua suia le tulaga lē talitonu, ma o le lagona e lē mafai e 'upu ona fa'amatalaina ua fa'a'ailoa atu le matuā talitonu i lo latou Fa'a'ailoa na toe tū mai.

(4) TALU AI E NAUNAU KERISO IA AUMAIA LE FILEMŪ I LE FANAU A TAGATA, O LE Ā LE VALA'AU ALOFA UA IA TU'UINA ATU IĀ TE I LATOU UMA O LO'O PAGĀTIA I LE MASALOSALO MA LE MATA'U?

Fa'auta, 'Ou te tū atu i le puipui ma tu'itu'i atu; ai se tasi e fa'alogo mai i Lo'u leo, ma tatala mai le puipui, 'Ou te ulufale atu iā te Ia, ma te tali sua fo'i ma ia, o ia fo'i ma A'u.

Fa'aaliga 3:20

I le fanau mai o Iesu sa folafola mai e agelu: "O le manuia i le lalolagi, ma le finagalo alofa i tagata." Ma o nei i Lona ulua'i fa'aali mai i le 'au so'o ina ua toe soifua mai, sa fetalai atu le Fa'aola iā i latou i 'upu fa'amanuia, *"Ia outou manuia."* Ua nofo sauni pea Iesu e fetalai atu i 'upu fa'amanuia i agaga ua mafatia i le fefe ma le masalosalo. O lo'o fa'atali o Ia iā i tatou e tatala atu le faitoto'a o le loto iā te Ia, ma fa'apea atu, la mafuta ma i matou. Ua Ia fetalai mai, *"Fa'auta, 'Ou te tū atu i le puipui ma tu'itu'i atu; ai se tasi e fa'alogo mai i Lo'u leo, ma tatala mai le puipui, 'Ou te ulufale atu iā te ia, ma te tali sua fo'i ma ia, o ia fo'i ma A'u".*

(5) O LE Ā LE FA'AALIGA OFOFOGIA E MAFAI ONA VA'AI ATU UMA I AI I LUMA I LE TOE TŪ MULIMULI?

Auā o ōna pō nei tatou te va'ava'ai ai fa'ananefu i le fa'aata, ao ia ōna pō tatou te fesaga'i ai; o nei ōna pō 'ou te iloa ai fa'alēatoa, a o ia ōna pō ou te iloa tino ai, pei ona iloatinoina o a'u.

I Korinito 13:12

O le toe tū a'e o Iesu o le ata lea o le toe tutū mulimuli o i latou uma o lo'o momoe iā te Ia. O fofoga va'aia o le Fa'aola ua toe soifua mai, o Ōna uiga, o Āna fetalaiga sa masani uma ai Ōna so'o. E pei ona toe tū Iesu mai le oti, e fa'apea fo'i ona toe tutū i latou o momoe iā te Ia. Tatou te iloa ā tatou uō pei ona iloa e le 'au so'o Iesu. Atonu sa lē 'ato'atoa foliga, fa'agasegasea, fa'aleagaina le tino i le olaga nei, ma e tutū a'e i tino e 'ato'atoa ma le matagofie; peita'i i le tino mamalu e tumau uiga e iloa ai lava tagata ta'ito'atasi. "O ia ōna po 'ou te iloa tino ai, pei ona iloatinoina o a'u" **(I Kori. 13:12b)**. I le foliga ua pupula le malamalama e susulu mai fofoga o Iesu, tatou te iloa tino ai i latou e pele iā i tatou.

(6) A O TATALA E KERISO LE AFIGA A LE ATUA, O LE Ā LE FOLAFOLAGA UA LATOU ILOA NEI O LA LATOU GALUEGA LEA ONA O I LATOU O ŌNA SO'O?

O lenei, ia outou ō atu e fai nu'u uma lava ma so'o, ma papatiso atu iā te i latou i le suafo o le Tamā, ma le Atali'i, ma le Agaga Pa'ia; ia outou a'oa'o atu iā te i latou ia tausi i mea uma ua 'Ou fai atu ai iā te outou. Fa'auta fo'i 'Ou te iā te outou i aso uma lava, e o'o lava i le gata'aga o le lalolagi.

Mataio 28:19, 20

Ina ua feiloa'i Iesu ma Ōna so'o, na Ia fa'amanatu iā i latou afiga sa Ia fetalai atu ai a o lumana'i Lona maluu, e ao ona fa'ataunu'uina mea uma sa tusia i tulafono a Mose, ma le 'au perofeta, ma Salamo e fa'atatau iā te Ia. "O na tatalaina lea e Ia o latou loto, ina ia lagona ai Tusi. Ua fetalai atu fo'i o Ia iā te i latou, *'Ua fa'apea ona tusia, e fa'apea fo'i ona tatau ona tigā o le Keriso, ma toe tū nai ē ua oti i le aso tolu; ina ia tala'iina fo'i le salamō ma le fa'amagaloina o agasala i nu'u uma i Lona igoa, e amata mai Ierusalemā. O molimau fo'i outou i nei mea uma'"* **(Luk. 24:45-48)**.

Ua amata nei ona malamalama le 'au so'o i le autū ma le lautele o la latou galuega. E tatau iā i latou ona tala'i i le lalolagi le matagofie ma le fa'amaoni o le fe'au ua tu'uina atu e Keriso iā te i latou. O mea tutupu i Lona soifuaga, o Lona maluu ma le toe tū, o valo'aga e fa'asino i ia mea e tutupu, o le pa'ia o le tulafono a le Atua, o le mea lilo o le fuafuāga o le fa'aolataga, o le mana o Iesu e fa'amagalo ai agasala, - o mea uma ia ua latou molimauina, ma e tatau iā i latou ona latou fa'aailoa atu i le lalolagi. E tatau ona latou tala'i atu le tala lelei o le filemū ma le fa'aolataga e ala i le salamō ma le mana o le Fa'aola.

(7) INA IA FA'ATAUNU'UINA LE GALUEGA IA TALA'I LE TALA LELEI I LE LALOLAGI, O LE Ā LE MEA ALOFA TĀUA SA TU'UINA E KERISO I LE 'AU SO'O E MAFAI AI ONA FA'AUMA LENEI FE'AU PA'IA?

Ua Ia fetalai atu lea mea, ona mānava atu lea o Ia ma fa'apea atu iā te i latou, "Ia outou talia le Agaga Pa'ia."

Ioane 20:22

"Ua Ia fetalai atu lea mea, ona mǎnava atu lea o Ia, ma fa'apea atu iǎ te i latou, *'Ia outou talia le Agaga Pa'ia. O i latou uma lava tou te fa'amagaloina ai a latou agasala, e fa'amagalo Ia iǎ i latou; o i latou uma lava tou te tu'u pea i ai a latou agasala, e tu'u pea lava ia'ia*" (Ioa. 20:22-23). O le Agaga Pa'ia e le'i matuǎ 'ato'atoa ona fa'aali mai; auǎ e le'i o'o ina fa'amamaluina Keriso. O le tu'uina 'ato'atoa mai o le Agaga Pa'ia e le'i fa'ataunu'uina se'i uma ona afio a'e o Iesu i le lagi. Se'i iloga ua taunu'u le tu'uina mai o le Agaga Pa'ia ona fa'ato'ǎ mafai lea e le 'au so'o ona fa'ataunu'uina le fe'au ia tala'i atu le tala lelei i le lalolagi. Peita'i o le Agaga Pa'ia ua tu'uina mai nei mo se galuega fa'apitoa. A e le'i fa'ataunu'uina e le 'au so'o o latou tiute e feagai ai ma le ekalesia, sa mǎnavaina atu e Keriso Lona Agaga i o latou luga. Na Ia tu'u atu iǎ i latou le fa'atuatuǎga e matuǎ sili le pa'ia, ma sa Ia finagalo e fa'aailoa iǎ i latou le mea moni lea, a aunoa ma le Agaga Pa'ia e lē mafai ona fa'ataunu'uina lenei galuega.

O le Agaga Pa'ia o le mǎnava ola lea i le olaga fa'ale-agaga o le tagata. O le tu'uina mai o le Agaga, o le foa'iina mai lea o le soifua o Keriso. E fa'atumulia ai lē e taliaina i uiga o Keriso. E na o i latou ua a'oa'oina fa'apea i le Atua, o lo'o galue le Agaga i totonu o i latou, ma o lo'o fa'aailoa le soifuǎga o Keriso i o latou olaga, o le a tūtūla'i atu e fai ma sui, e 'au'auna mo le ekalesia.

(8) O LE Ā LE FA'ATONUGA FA'APITOA NA TU'UINA ATU E KERISO I LE EKALESIA E ALA I TUSITUSIGA A PAULO MO LE FEAGAI AI MA LE AGASALA?

Ia e tala'i atu le 'upu, ia e fa'amalosi i ōna aso e taugalemū ai, ma ōna aso e lē taugalemū ai, ia e fa'atonu atu, ia e a'oa'i atu, ia e apoapoa'i atu ma le onosa'i uma atoa ma le a'oa'o atu.

II Timoteo 4:2

Ua fetalai mai Keriso, *"O i latou uma tou te fa'amagaloina a latou agasala, e fa'amagalo lea;...ma i latou uma e tou te tu'u pea i ai a latou agasala, e tu'u pea lava ia."* E lē o tu'uina atu e Keriso le sa'olotoga i so'o se tagata na te fa'amasino ai i se tasi. I le Lauga i luga o le Mauga na Ia fa'asā ai lea mea. O le pule lea e na o le Atua e i ai. Peita'i i le ekalesia e tusa ai ma ōna fa'avae, ua Ia tu'u i ai se tiute tau'ave mo ōna tagata ta'ito'atasi. Mo i latou e pa'ū atu i le agasala, o le ekalesia e i ai se tiute, e lapata'i, e a'oa'i, ma pe a talafeagai ai, e toe fa'afou. Ua fetalai mai le Ali'i, *"Ia e fa'atonu atu, ia e a'oa'i atu, ia e apoapoa'i atu ma le onosa'i uma 'atoa ma le a'oa'o atu"* (II Timo. 4:2). Ia fa'amaoni i le afeagai ma ē fai mea sesē. Ia lapata'i agaga uma o i tulaga faigatā. 'Aua ne'i tu'ua se tasi fa'asesē iǎ te ia lava. Ia ta'u sa'o le agasala i lona igoa. Ia ta'utino le fetalaiga a le Atua e fa'tatau i le pepelo, o le soli Sapati, gaioi, ifo i tupua, ma isi uma mea leaga.

(9) TALU AI E TATAU I LE EKALESIA ONA TA'U LE AGASALA I LONA IGOA SA'O, O LE Ā LE LAPATA'IGA MANINO E TATAU ONA FA'AIILOA ATU Iǎ I LATOU O LO'O FAIA PEA LE SESĒ?

O le matau'a, o le fasioti tagata, o le onǎga, o le pōula, ma mea fa'apenā; 'ou te mua'i ta'u atu nei iǎ te outou, pei ona 'ou fai atu anamua, o ē fai mea fa'apenā, e lē fai le malō o le Atua mo latou tofi.

Kalatia 5:21

Afai latou te faia pea le agasala, o le i'uga tou te ta'u atu mai le Afioga a le Atua ua folafola lea mo i latou i le lagi. Ina ua filifili e faia le agasala, ua latou lafoa'i Keriso; o le ekalesia e tatau ona fa'aailoa e na te lē fa'atagaina a latou amioga, ona o le a ia lē fa'aalooalia ai lona lava Ali'i. E ao ona ta'u atu e le ekalesia e fa'atatau i le agasala pei ona fa'aailoa atu e le Atua e uiga i ai. E tatau ona ia faia i le agasala pei ona fa'atonu mai e le Atua, ma o āna gāioioiga e fa'amaonia lea i le lagi. O lē e ino'ino i le pulega a le ekalesia e ino'ino fo'i i le pule a Keriso lava Ia.

(10) O LE Ā LE TU'UTU'UGA OFOFOGIA UA FAIA E LE ATUA MO I LATOU UMA O Ē FA'AALI MA FULITUA I A LATOU AGASALA?

A e afai tatou te fa'aali a tatou agasala, e fa'amaoni o IA, ma le amiotonu e fa'amagalo ai a tatou agasala, ma fa'amamā mai iǎ i tatou i amiolētonu uma lava.

I Ioane 1:9

Peita'i e i ai se itū e lelei atu o lenei ata. *"O i latou uma lava tou te fa'amagaloina ai a latou agasala, e fa'amagaloina iǎ i latou."* Ia fa'alaulugaina lenei manatu. A o galulue mo i latou o ta'asē, ia taula'i uma le va'ai iǎ Keriso. Ia i ai i leoleo mamoe le alofā moni mo le lafu mamoe o i le lotoā a le Ali'i. Ia latou ta'u atu i lē o sē le alofā tunoa fa'amagalo o le Fa'aola. Ia latou fa'amalosi i le tagata agasala ina ia salamō, ma ia talitonu i Lē e mafai ona fa'amagalo. Ia latou fa'aailoa atu e ala i le mana o le afioga a le Atua, "A e afai tatou te fa'aali a tatou agasala, e fa'amaoni o Ia, ma le amiotonu e fa'amagalo ai a tatou agasala, ma fa'amamā mai iǎ i tatou i

amioleʻtonu uma lava" (**I Ioa. 1:9**). O i latou uma e salamō e iā i latou le mautinoāga, "E toe alofa mai o Ia iā te i tatou, e fa'ato'ilaloina e Ia a tatou amioleʻtonu; e Te lafo fo'i a latou agasala uma i mea loloto o le sami" (**Mika 7:19**).

Ia taliaina e le ekalesia ma le loto fiafia le salamō o le tagata agasala. Ia ta'ita'iina le tagata salamō mai le pogisā o le lē talitonu i le malamalama o le fa'atuatua ma le amiotonu. Ia tu'uina lona lima o lo'o gatete i a'ao alofa o Iesu. O lea fa'amagaloga e talia ma fa'amaonia i le lagi.

E na o le agaga lea e mafai ai e le pule a le ekalesia ona talia le tagata agasala. O le fa'amagaloina o agasala e na'o le amiotonu o Keriso e mafai ona maua mai ai. E lē o se tagata, po o se fa'alapotopotoga o tagata, ua tu'uina i ai se mana e fa'asa'oloto ai le agaga mai le ta'usalaina. O Keriso na fa'atonu i Ōna so'o ia tala'i le fa'amagaloga o agasala i Lona suafa i nu'u uma; a e le'i tu'uina iā i latou le mana e 'ave'ese ai se pisia e tasi o le agasala. E na'o le suafa o Iesu, "E leai lava se isi igoa i lalo o le lagi ua foa'iina mai i tagata e mafaia ona fa'aolaina ai o i tatou" (**Gal. 4:12**).

(11) NA FA'AFEFA ONA FA'AILOA MUAMUA LE ALOFA O TOMA IĀ KERISO A E MULIMULI ANE UA PA'Ū I LE MASALOSALO MA LE LOTOVAIVAI?

Ona fai atu lea o Toma, o lē na igoa iā Titumo, i lona 'au uso a so'o, "Ia tatou ō fo'i ina ia tatou oti fa'atasi ma Ia."

Ioane 11:16

O le taimi muamua na feiloa'i ai Iesu ma Ōna so'o i le afeafe aupito aluga, sa le'i fa'atasi ai Toma ma i latou. Sa ia fa'alogi i tala mai isi, ma ia maua fa'amaonia e tele ua toe tū Iesu; peita'i o lona loto sa fa'anoanoa ma fa'atamulia i le lē talitonu. A o ia fa'alogologo i le 'au so'o o fa'amatala le ofoofogia o le fa'aalitino mai o le Fa'aola ua toe soifua mai, na fāi ifo atili ai le loloto o lona atuatuva. Pe afai e moni ua toe tū a'e Iesu mai le oti, o le a lē toe i ai se fa'amoemoe mo le fa'atūina o se mālō fa'ale-lalolagi. Ma ua manu'a lona loto fiafi'a i le manatu ua fa'aali le Matai i so'o uma vaganā ai ia. Sa ia filifili ia 'aia ne'i talitonu, ma o lenā vaiaso 'atoa sa iā te ia uiga lē fiafia ma foliga mai ua atili ai lona tulaga pogisā, pe a fa'atusatusa i le fa'amoemoe ma le fa'atuatua o ōna uso.

(12) O LE Ā LE TA'UTINOGA A TOMA I LE FA'AMAONIGA E AO ONA IA MAUA FA'ATO'Ā TALITONU AI LEA?

Ona fai atu lea o le 'au so'o uma iā te ia, "Ua matou iloa atu le Ali'i." A ua fai mai o ia iā te i latou, "Afai 'ou te lē va'ai atu i Ōna lima i mea na tutu'i ai fao, ma tu'u lo'u tamatama'i lima i mea na tutu'i ai fao, ma tu'u lo'u lima i Lona itū, 'ou te lē talia lava."

Ioane 20:25

I lenei lava taimi sa ia fa'ailoa mai pea, "Afai 'ou te lē va'ai atu i Ōna lima i mea na tutu'i ai fao, ma tu'u lo'u tamatama'i lima i mea na tutu'i ai fao, ma tu'u lo'u lima i Lona itū, 'ou te lē talia lava" (**Ioa. 20:25**). Ua ia lē mafai ona va'ai e ala i mata o ōna uso, pe galuea'iina le fa'atuatua ma fa'alagolago i la latou molimau. Na ia matuā alofa i lona Ali'i, peita'i na ia fa'ataga le matau'a ma le lē talitonu e pulea lona mafau'au ma lona loto.

(13) INA UA FEILO'AI TOMA MA ISI SO'O I LE AFEAFE AUPITOALUGA, O AI NA FA'AALI FA'AFUASE'I MAI I O LATOU LUMA?

Ua mavae aso e valu, ua toe fa'atasi Ōna so'o i le fale, ua fa'atasi ai fo'i i latou ma Toma; ua malia atu Iesu, a o pupuni faitoto'a, ua tū fo'i o Ia i totonu, ma fetalai atu, "Ia outou manuia."

Ioane 20:26

O nisi o le 'au so'o ua faia nei le afeafe aupito aluga ma aiga e lē tumau a e fa'amautū i ai, ma e i ai uma i afiafi vaganā ai Toma. O se tasi afiafi ua filifili Toma ia fa'atasi ai ma i latou. E ui ina lē talitonu, a e sa i ai lava lona fa'amoemoe e moni le tala lelei na fa'alogi i ai. A o faia le 'aiga o le afiafi, sa latou talanoa i fa'amaoniga o folafolāga na tu'uina mai e Keriso iā i latou i valo'aga. "Ua malia atu Iesu, a o pupuni faitoto'a, ua tū fo'i o Ia i totonu, ma fetalai atu, 'Ia outou manuia.'"

(14) INA UA VALA'AU E KERISO TOMA NA TE MOLIMAUINA ŌNA MANU'A ONA O LONA LĒ TALITONU, O LE Ā LE TALI FIAFIA NA FAI ATU AI LOA TOMA?

Ona tali mai lea o Toma, ua fa'apea mai iā te Ia, "Lo'u Ali'i e, ma Lo'u Atua e."

Ioane 20:28

Ua Ia fāliu iā Toma ma fetalai atu, "'Au mai ia lou tamatama'i lima iinei, va'ai mai fo'i i O'u lima; 'au mai ia fo'i lou lima, ma tu'u mai i Lo'u itū; 'aua fo'i e te masalo vale, a ia e talitonu.'" O ia afioga e fa'ailoa ai na Ia silafia ma masani i mafaufauga ma 'upu a Toma. O le so'o masalosalo ua na iloa e le'i toe va'ai se isi o āna uō iā Iesu i le vaiaso 'atoa. E le'i mafai e se tasi ona fa'ailoa i le Matai lona lē talitonu. Ua ia mautinoa o Lē o lo'o i ōna luma o lona Ali'i. Na te le'i toe mana'omia se tasi fa'amaoniga. Ua tumu lona loto i le fiafia, ma sa ia fa'apa'ū i a'ao o Iesu ma le tagi, "Lo'u Ali'i e, ma lo'u Atua" (F. 26-28).

(15) ONA O I LATOU UMA E TALIA KERISO E ALA I LE MOLIMAU A ISI, O LEA NA LE'I LOTO TOMA NA TE FAIA, O LE Ā SE A'OA'IGA MĀLŪ SA TU'UINA ATU E KERISO IĀ TE IA?

Ua fetalai atu Iesu iā te ia, "Toma e, ua e talitonu, auā ua e va'ai mai iā te A'u. Amu'ia o ē lē va'ai mai, a e talitonu mai pea."

Ioane 20:29

Sa talia e Iesu lona fa'ailoa mai o Ia, ma sa a'oa'i lēmū i lona lē talitonu: "Toma e, ua e talitonu, auā ua e va'ai mai iā te A'u. Amu'ia o ē lē va'ai, a e talitonu mai pea" (F. 29). O le fa'atuatua o Toma se manū o se fiafiāga atili atu iā Keriso pe ana ia talitonu i molimau a ōna uso. Pe afai e mulimuli nei le lalolagi i le fa'ata'ita'iga a Toma, o le a leai se isi e talitonu i le fa'aolataga; ona o i latou uma e talia Keriso, e tatau ona latou maua e ala i ta'utinoga a isi.

O le to'atele o i latou e masalosalo ua faia ni 'alofaga fa'apea ana i ai ni fa'amaoniga e pei ona fa'aalia iā Toma mai ōna uso, se manū latou te talitonu. Latou te lē iloa o lo'o iā i latou ia fa'amaoniga ma isi e sili atu. E to'atele, fa'apei o Toma, e fa'atali ia 'ave'ese uma mea e masalosalo i ai, e lē iloa lava le mea o lo'o latou manana'o ai. E mulimuli ane o le a fa'atumauiina lo latou lē talitonu. O i latou uma e a'oa'oina e i latou lava e va'ai i le itū pogisā, e muimui ma faitio, e lē iloa mea o lo'o latou faia. Latou te lūlūina fatu o le masalosalo, ma o le selesalega fo'i o le masalosalo latou te selesaleina mai. I le taimi o lo'o matuā tāua ai le fa'atuatua ma le talitonu, e to'atele o le a maua i latou i le leai o se mālōsi e fa'amoemoe ai ma talitonu.

(16) O Ā AUALA E LUA E TATOU TE MAFaIA, MA LE FA'APALEPALE E PEI O KERISO, O LE A FA'ALOTOTELE AI I LATOU INA IA FA'AMALOSIA LO LATOU FA'ATUATUA, A E LĒ O LE 'UPUIA I LATOU ONA O LE MASALOSALO MA LE VAIVAI O LE FA'ATUATUA?

O lenei, e tupu le fa'atuatua i le taulogologo atu, o le taulogologo atu fo'i o i le Afioga a le Atua lea.

Roma 10:17

Ona ofo lea o le 'au so'o i Lana fetalaiaga. A ua toe tali atu Iesu iā te i latou, ua fa'apea atu, "La'u fanau e, e matuā faigatā i ē fa'atuatua i le 'oa ona sao atu i le malo o le Atua."

Mareko 9:24

I Lona vā feagai ai ma Toma, sa tu'u atu e Iesu se a'oa'oga mo Ōna so'o e mulimuli iā te Ia. O Lana fa'aa'oa'oga e fa'aali mai iā i tatou le faiga e tatau mo ē vaivai le fa'atuatua, ma ē e lauiloa i le masalosalo. O Iesu na te le'i tanumia Toma i a'oa'iga, Na te le'i amataina fo'i se fefinaua'iga ma ia. Na Ia fa'aalia o Ia i lē o masalosalo. O Toma na matuā lē fa'afetauia i le ta'uina mai o tu'utu'uga mo lona fa'atuatua, peita'i o Iesu, e ala i Lona alofa lē uma ma le manatunatu loloto, ua Ia 'ave'ese ai uma i lalo pā puipui. O le lē talitonu e seāseā fa'ato'ilaloina i se finauga. E 'ave i luga le tagata ia i le puipuiga, ma maua ai le fa'amalosi'aga fou ma 'alofaga. Peita'i ia fa'ataga Iesu, i Lona agalelei ma le alofa tunoa, ia fa'aali ai o Ia o le Fa'aola na fa'asatauroina, ma e mai laugutu e tele na i ai se taimi na lē mafai ona lagona ai, a e ua fa'ailoa mai nei le ta'utinoga a Toma, "Lo'u Ali'i ma lo'u Atua."

Ou te mana'o e fa'ailoa atu "Lo'u Ali'i ma lo'u Atua" mai a'oa'oga i aso ta'itasi o Lona alofa ma le alofa tunoa mo a'u ma ē pele iā te a'u.

Li'o le Tali:

Ioe

Lē Mautonu

Lē Mautonu

Ua Toe Fa'atasi i Autafa o Le Sami

Lesona 12

(1) INA UA MAVAE LE TOE TŪ, O FEA LE NOFOĀGA MASANI SA FINAGALO LE ALI'I IA FA'ATASI I AI MA ŌNA SO'O?

Ona fetalai atu ai lea o Iesu iā te i la'ua, "Aua lua te matata'u; inā ō atu ia, lua te ta'u atu i O'u uso, ina ia latou ō atu i Kalilaia, latou te iloa mai ai A'u."

Mataio 28:10

Na atofaina le feiloa'iga a Iesu ma Ōna so'o i Kalilaia; ma ina ua mae'a le vaiaso o le Paseka na aga'i atu loa i ai. O lo latou tu'ua o Ierusalem a i le vaiaso o le tausamiga o le Paseka se manū e fa'auigaina o le lē tūa ma le fa'atu'i'ese, o lea na nonofo ai pea se'ia o'o i lona fa'ai'uina; a e ina ua mae'a, na latou fīafia loa e fo'i aga'i i lo latou nu'u e feiloa'i ai ma le Fa'aola e pei ona Ia fa'atonuina.

(2) E FA'APEFEA ONA FA'AMATALAINA E NEI FUAI'UPU I LATOU SA VALA'AUINA SO'O E KERISO MA O LE Ā LE I'UGA O A LATOU GALUEGA?

Auā ua outou iloa lo outou vala'auina, le 'au uso e; e le to'atele o ē popoto i la le tino, e le to'atele faipule, e le to'atele ali'i;

I Korinito 1:26, 27

E to'afitu le 'au so'o na fa'atasi ai. Na latou la'ei i ofu o tagata fai faiva fa'atauva'a; na matitiva i latou i mea o lenei lalolagi, a e ua mau'oa i le malamalama ma le fa'ata'ita'iga o le 'upu moni; i le va'aiga a le lagi ua avatu iā i latou le tulaga aupito maua luga o a'oa'o. O i latou e le'i 'au ai i a'oga a le 'au perofeta, peita'i e tolu tausaga na a'oa'o ina ai i latou e le A'oa'o aupito sili na iloa i le lalolagi. I lalo o Lana a'oa'o ina na 'avea ai i latou o ē ua si'itia o latou tulaga, o tagata a'oa'o ina ma le tusa'afia, o ni sui e mafai ona ta'ita'i ai tagata i le malamalama o le 'upu moni.

(3) O FEA LE LAUFANUA SA MASANI ONA FA'AAOGĀ SO'O E KERISO, LE A'OA'O SILISILI, E VALI AI ATA O ĀNA GALUEGA OFOFOGIA MA IA SAUNIA AI ŌNA SO'O MO LE GALUEGA?

Ona toe tu'ua lea e Ia o le itu o Turo ma Saitonu, ua o'o atu i le vai o Kalilaia, ua ui atu i le itu o Tekapoli.

Mareko 7:31

O le tele o taimi o le galuega a Keriso na fa'aalu e lata i le Sami o Kalilaia. A o fa'apotopoto le 'au so'o i le nofoāga e pei e leai nisi e fa'alavelave ai, na latou iloa ua si'omia i latou i mea e manatua ai e i latou Iesu ma Āna galuega ofoofogia. O lenei sami a o tumu o latou loto i le matata'u, a o agi mālōsi mai le matagi ma fa'avave ona o'o mai ai le fa'aumatiāga iā te i latou, na savali Iesu i luga o galu ma lavea'i i latou. O inei na filemū ai le afā i Lana fetalaiaga. E iloa atu fo'i autafa o le sami na fafagaina ai le motu o tagata i nai areto ma i'a. E lē mamao ma Kapanau, o le nofoāga na faia ai vavega e tele. A o va'ai le 'au so'o i nei nofoāga, na tumu o latou mafau fau i afioga ma galuega a lo latou Fa'aola.

(4) O LE Ā LE I'UGA E LE'I FA'AMOEMOEINA I LE PŌ NA FAI FAIVA AI SO'O SA FA'AMOEMOE AI I SE I'UGA MANUIA?

Ua fai atu Simona Peteru iā te i latou, "Ou te alu ou te fagota." Ua fai mai i latou iā te ia, "Tatou te ō fo'i ma 'oe." Ua latou ō atu, ona latou ō a'e lea i le va'a; a e le'i maua se i'a e tasi i lea pō.

Ioane 21:3

O le afiafi na matagofie, ma o Peteru o lo'o tumau pea lona fīafia i va'a ma le fai faiva, na ia fa'atū se manatu ia latou ō atu i le sami ma lafo a latou 'u'upega. O lenei manatu na sauni uma i latou e 'au i ai; na latou mana'omia ni mea e 'ai ma lavalava, o mea ia e mafai ona maua pe afai e manuia le faiva i le pō. Na latou ō atu i lo latou va'a, peita'i e le'i i ai se i'a na maua. Na latou fagogota i

le pō 'atoa, a e le'i manuia. Ua alu lea pō o latou talatalanoa e fa'atatau i lo latou Ali'i, ma toe fa'amanatu mea ofoofogia na latou molimauina i Lana 'au'aunaga i autafa o le sami. Na latou fesiligia lo latou aga'i i luma ma sa latou matuā fa'anoanoa i le va'ai atu i le lumana'i.

(5) O LE Ā LE MEA OFOFOGIA NA TUPU INA UA USIUSITA'I LE 'AU SO'O I LE SI'UFOFOGA O LENEI "TAGATA 'ESE" O LO'O I LUGA O LE APITAGALU?

Ua o'o i le taeao, ua tū Iesu i le 'auvai, a e le'i iloa e le 'au so'o o Iesu lea. Ona fetalai atu lea o Iesu iā te i latou, "Le fanau e, pe i ai ea ni a outou mea e 'ai?" Ua latou tali mai iā te Ia, "E leai." Ua fetalai atu o Ia iā te i latou, "Inā lafo ia le 'upega i le itū i matau o le va'a, ona outou maua ai lea." Ona latou lafo lea; a ua lē toe mafai e i latou ona toso a'e, ona o taumafa o i'a.

Ioane 21:4 - 6

A o lenei taimi o lo'o i ai se Tasi o lo'o silasila ma mata'i mai i latou, e ui e latou te lē o va'aia o Ia. Ua aga'i ina mavae le pōuliuli, ma ua tafa mai ata. E lē o mamao tele le va'a mai le matāfaga, ma sa va'aia e le 'au so'o se Tasi o tū mai, ma ua fesili mai, "Le fanau e, pe i ai ea ni a outou mea e 'ai?" Ua latou tali atu, "E leai." Ua Ia fetalai atu iā te i latou, "Inā lafo ia le 'upega i le itū i matau o le va'a, ona outou maua ai lea." Ona lafo lea, a ua tau lē toe mafai e i latou ona toso a'e, ona o taumafa o i'a" **(Ioa. 21:5-6).**

(6) O LE Ā LE MEA, INA UA ILOATINO E IOANE E FA'ATATAU I LE "TAGATA 'ESE" O I LE MATĀFAGA, NA IA FA'ASOA ATU IĀ PETERU?

Ona fai atu lea o lenā so'o ua alofaina e Iesu iā Peteru, "O le Ali'i lea." Ua fa'alogo Simona Peteru, o le Ali'i ia, ona ofu lea o ia lona ofu, auā na fa'asau o ia; i le ua oso i le vai.

Ioane 21:7

Ua iloa e Ioane le tagata 'ese, ma fa'apea atu iā Peteru, "O le Ali'i lea." Ona o le fa'agae'etia o Peteru i le fiasia, na ia oso ai i le sami ma ua tū mai i tafatafa o lona Matai. O isi so'o ua ō mai i lo latou va'a, ma toso mai le 'upega e i ai i'a. "Ua latou tuta, ona iloa ai lea o le afi malala, o le i'a fo'i ua tunu ai, ma le areto" **(F. 9).**

(7) INA UA O'O MAI LE 'AU SO'O I UTA MA VA'AIA LE AFI O LO'O SAUNIA AI LE MEA'AI, O LE Ā LE VALA'AU SA TU'U ATU E KERISO I SO'O UA MATUĀ VAIVAI MA UA MATELĀINA I LE FIA 'A'AI?

Ua fetalai atu Iesu iā te i latou, "Ō mai ia, inā 'a'ai; a e le'i fa'amalosi se tasi o le 'au so'o e fesili atu iā te Ia, "O ai ea 'Oe?" auā ua latou iloa, o le Ali'i lava Ia.

Ioane 21:12

O lo latou maofa tele na lē fesili ai pe mai fea le afi ma le mea 'ai. "Ua fetalai atu Iesu iā te i latou, 'Au mai ia nisi i'a ua outou maua mai.'" Ua alu Peteru, e aumai le 'upega na ia lafoa'i, ma ua ia fesoasoani i ōna uso e toso mai i uta. Ina ua mae'a le galuega, ma le sauniuniga ua uma ona fai, na Ia vala'au i Ōna so'o mo le taumafataga. Na Ia tofitofi ma fa'asoa atu iā te i latou, o le masani lea na iloa ma faia uma e le to'afitu. O le vavega na fafagaina ai le to'alima afe i autafa o le mauga ua latou toe manatunatu i ai; o se lagona o le ofo ua o'o iā te i latou, ma ua latou pulato'a e aunoa ma se pisa i le Fa'aola ua toe tū mai.

(8) O LE Ā LE FA'ATONUGA OFOFOGIA SA MANATUA E SO'O A O LATOU TOE VĀ'AI AGA'I I TUA I TAIMI MA LO LATOU FA'AOLA MA ILOA AI LE MATUĀ TĀUA O LE VAVEGA I LE FAIVA SA MAUA AI I'A E TELE?

Ona fetalai atu lea o Ia iā te i la'ua, "Inā mulimuli mai ia iā te A'u, 'Ou te faia oulua ma fai faiva i tagata."

Mataio 4:19

Ua latou toe manatunatu ma le manino i le va'aiga i autafa o le sami ina ua vala'au i latou e Iesu e mulimuli atu iā te Ia. Na latou manatua, i Lana fa'atonuga na latou tu'utu'u atu ai i le loloto, ma lafo ifo la latou 'upega, ma maua ai le tele o i'a ua tumu le 'upega, toetoe ina māsae. Ona vala'au lea o Iesu ia tu'u o latou va'a fagota, ma Ia folafola o le a 'avea i latou ma fai faiva i tagata. O le toe aumaia o lenei va'aiga i o latou mafaufau, na latou matuā iloa ai le loloto o lona uiga, ma ua Ia toe faia le vavega. O Lana gaoioga ua toe fa'afouina ai le fe'au i le 'au so'o. Na fa'aailoa ai iā te i latou o le malui o lo latou Matai e le'i fa'aitiitia ai lo latou tiute i le faia o

le galuega na Ia tu'uina atu iā te i latou. E ui ina o le a lē fa'atasi ai o Ia i le tino, o le ala fo'i na tausi ai i latou i a latou galuega na faia muamua, a e o le Fa'aola o lo'o soifua, Na te tausia pea i latou. A o latou faia Lana galuega, o le a Ia 'aumaia mea e latou te mana'omia. Ma na i ai le mafua'aga na fetalai atu ai Iesu ia lafo le 'upega i le itū taumatau o le va'a. O lea itū na Ia tū ai i autafa o le va'a. O le itū lea o le fa'atuatua. Afai latou te galulue a o feso'ota'i ma Ia,- o Lona mana fa'aleAtua fa'atasi ma Ia latou taumafaiga fa'ale-tagata,- e mautinoa ai le manuia.

(9) INA UA UMA ONA AGASALA PETERU I LE FA'AFITIA O KERISO A O I LUMA O LE FAITAILAGA SILI, SA FA'APEFEA ONA IA FA'AILOA ATU LONA SALAMŌ MONI E MAI LONA LOTO?

Ona alu ai lea o Peteru i fafo, ua tagi lotulotu ia.

Luka 22:62

O le tasi a'oa'oga na tu'uina atu e Keriso, e fa'apitoa iā Peteru. O le fa'afitia e Peteru o le Ali'i, na 'avea o se mea e masiasi ai pe a fa'atusatusa i āna ta'utinoga o lona alofa fa'amaoni na faia muamua. Na ia fa'alumaina Keriso, ma sa lē toe talitonuina fo'i o ia e ōna uso. Na latou manatu e lē toe fa'atagaina o ia i lona tulaga na i ai muamua, ma ua lagona lava e ia ua 'ave'esea lona fa'atuatua. A e le'i vala'auina o ia ia toe tau'ave lana galuega fa'a-aposetolo, e tatau ona fa'ailoa i luma o i latou uma le fa'amaoniga o lona salamō. A aunoa ma lea, o lana agasala, e ui ina salamō ai, se manū e fa'alēaogāina ai lona aloa'ia o se 'au'auna a Keriso. Na tu'u atu e le Fa'aola le avanoa ia toe maua ai le talitonuina e ōna uso, ma e taumafai i le mea e mafai, ia ave'esea le fa'alumaina ua ia aumaia i luga o le tala lelei.

(10) O AI NA FA'AMATALAINA E TAVITA I LE SALAMO 51:4 LE FAITIOINA INA UA AGASALA - O LEA SA TATAU ONA TU'U'ESE E PETERU I LUMA O ŌNA USO?

Ua 'ou agasala atu iā te 'Oe, na o 'Oe lava; ua 'ou faia fo'i lenei mea leaga i Ōu luma; e tonu ai 'Oe i Lau fetalai, e sao fo'i 'Oe pe a e fa'amasino.

Salamo 51:4

O lo'o tu'u mai fo'i se a'oa'oga mo i latou uma e mulimuli iā Keriso. O le tala lelei e leai se fetu'una'iga ma le leaga. Na te lē faia se 'alofaga mo le agasala. O agasala lilo e tatau ona fa'aali i le mea lilo i le Atua, peita'i, o agasala lauiloa, e ao ona fa'aali fa'alaua'itele. O le tautalagia o le agasala a le so'o e lafoa'i atu iā Keriso. E 'avea ma manumalō ia Satani, a e o agaga e lē o mautū o le a tau tevateva ai. O le tu'uina atu o le fa'amaoniga o le salamō, o le so'o lava, i le mea e o'o i ai lona mālōsi, e tatau ona ia ave'esea lenei ta'uvalea.

(11) A O FA'ATASI KERISO MA LE 'AU SO'O, O LE Ā LE FESILI NA TOFOTOFOINA AI E IESU LE SALAMŌ MONI O PETERU?

Ua uma ona latou 'a'ai, ona fetalai atu lea o Iesu iā Simona Peteru, "Simona e, le atali'i o Iona, pe sili mai lou alofa iā te A'u, i lo latou nei?" Ua fai mai o ia iā te Ia, "Ioe, le Ali'i e, ua e silafia, 'ou te alofa iā te 'Oe." Ona fetalai atu lea o Ia iā te ia, "Ia e fafaga i A'u tama'i mamoe."

Ioane 21:15

A o taumafa fa'atasi Keriso ma Ōna so'o i tafatafa o le sami, na fetalai atu le Fa'aola iā Peteru, “*Simona e, le atali'i o Iona, pe sili mai lou alofa iā te A'u, i o latou nei?*” (**Io. 21:15**), o lo'o fa'atatau i ōna uso. Na fa'ailoa e Peteru i se taimi ua mavae, “E ui lava ina tausui tagata uma ona o 'Oe, 'ou te lē tausui lava a'u” (**Mata. 26:33**). Peita'i o nei ua ia tu'uina se fa'atulagaina o ia lava. “Ioe, le Ali'i e,” o lana 'upu lea, “Ua e silafia, 'ou te alofa iā te 'Oe.” E leai se ta'utinoga e fa'apea o lona alofa e sili a'e i lo o ōna uso. E na te lē fa'ailoa lona ia lava manatu i lona fa'amaoni. Iā te Ia lē e faitauina fuafuāga uma o le loto, o lo'o ia ōle i ai ia na fa'amasinoina lona fa'amaoni,- “Ua E silafia 'ou te alofa iā te 'Oe.” Ona fetalai atu lea o Iesu, “*Ia e fafaga i A'u mamoe*” (**Io. 21:16**).

(12) MA SE LOTO UA MATUĀ TIGĀ, SA FA'APEFEA ONA TALI PETERU I LE FESILI SA FAIA FA'ATOLU A IESU INA IA FA'AALI AI I ŌNA USO LE FA'AMAONI O LONA SALAMŌ?

Ua fetalai fa'atolu atu o Ia iā te ia, "Simona e, le atali'i o Iona, pe e te alofa mai iā te A'u?" Ua tigā Peteru, auā ua Ia fetalai fa'atolu iā te ia, Pe e te alofa mai iā te A'u? Ua fai mai iā te Ia, "Le Ali'i e, ua e silafia mea uma lava, ua e silafia, ua 'ou alofa lava iā te 'Oe." Ona fetalai atu lea o Iesu iā te ia, "Ia e fafaga i a'u mamoe."

Ioane 21:17

Na toe tofotofa fo'i e Iesu Peteru, ua toe fetalai atu iā te ia, *"Simona e, le atali'i o Iona, pe e te alofa mai iā te A'u?"* O le taimi lea Na te le'i fesili iā Peteru pe alofa iā te Ia e sili atu i isi ōna uso. E pei lava le tali lona lua o le tali muamua, e aunoa ma le so'ona ta'utino atu, "Ioe, le Ali'i e, ua e silafia, 'ou te alofa iā te 'Oe." Ona fetalai atu lea o Iesu iā te ia, *"Ia e leoleo i A'u mamoe."* Ua fa'atolu ona tu'uina atu e le Fa'aola le fesili: *"Simona e, le atali'i o Iona, pe e te alofa mai iā te A'u?"* Ua tigā Peteru; na ia manatu e lē o mautinoa e Iesu lona alofa. Sa ia iloa e i ai le mafua'aga ua lē talitonuina ai e Iesu lona alofa, ma ua ia tali atu ma le loto tigā, "Le Ali'i e, ua E silafia mea uma lava, ua E silafia, 'ou te alofa lava iā te 'Oe." Ua toe fetalai atu Iesu iā te ia, *"Ia e fafaga i A'u mamoe"* (F. 16, 17).

E fa'atolu ona fa'afiti fa'alaua'itele e Peteru lona Ali'i, ma e fa'atolu ona sa'ili e Iesu le fa'amaoniga o lona alofa ma lona fa'amaoni, na momoli i totonu o lona loto lea fesili uigā, e pei o se ū ma'ai ua ati i lona fatu sa manu'a. I luma o le fa'apopotoga a le 'au so'o, na fa'aali atu e Iesu le loloto o le salamō o Peteru, ma fa'aailoa ai le fa'amaulalo ua o'o i ai le so'o sa masani ona i ai le loto mitamita vale.

(13) O LENEI UA O'O I LE TAIMI UA LIUA MONI AI PETERU, O LE Ā LE FETALAIGA A KERISO IĀ TE IA A E NA TE LE'I FA'AFITIA O IA, O LEA UA AUMAIA AI NEI MO IA LANA FA'AMAONIGA O LANA FA'ATONUGA E 'AVEA MA LEOLEO MAMOE MO MAMOE A KERISO?

A ua 'Ou fa'atoga mo 'oe, ina ne'i mavae lou fa'atuatua. a o 'oe fo'i, pe a liua mai 'oe, ona e fa'amalosai ai lea i ōu uso.

Luka 22:32

O le uiga masani o Peteru o le osovale ma lē ma-taofiofia, ma sa fa'aaogāina e Satani ia uiga na te fa'ato'ilalo ai o ia. A o lumana'i le to'ilalo o Peteru, na fetalai atu Iesu iā te ia, *"Ua mana'o tele Satani iā te outou, ia lūlū iā te outou pei o le saito; a ua 'Ou fa'atoga mo 'oe, ina ne'i mavae lou fa'atuatua; a o 'oe fo'i, pe a e liua 'oe, ona e fa'amalosai ai lea i ōu uso"* (Luk. 22:31, 32). O le taimi lenei ua o'o i ai, ma o se suiga na o'o iā Peteru ua fa'amaonia. O le fesili tofotofa fa'ai'u a le Ali'i, e le'i aumaia ai se tali a se osovale ma le fa'alagolago iā te ia lava; ma e talu ai lona fa'amaulalo ma le salamō, ua sauni lelei nei Peteru nai le taimi muamua, e galue o ia e fai ma leoleo mamoe o le lafu.

(14) O LE Ā LE GALUEGA SA TU'UINA E KERISO IĀ PETERU SEMANŪ E NA TE LĒ MAFAI ONA FA'ATAUNU'UINA PE ANA LĒ SAUNIA O IA E ALA I PUAPUAGĀ MA LONA SALAMŌ?

Ua fetalai fa'atolu atu o Ia iā te ia, "Simona e, le atali'i o Iona, pe e te alofa mai iā te A'u?" Ua tigā Peteru, auā ua Ia fetalai fa'atolu iā te ia, Pe e te alofa mai iā te A'u? Ua fai mai iā te Ia, "Le Ali'i e, ua e silafia mea uma lava, ua e silafia, ua 'ou alofa lava iā te 'Oe." Ona fetalai atu lea o Iesu iā te ia, "Ia e fafaga i A'u mamoe."

Ioane 21:17

O le galuega muamua na tu'uina e Keriso iā Peteru ina ua fa'afo'i o ia i le 'au'aunaga, o le fafagaina lea o tama'i mamoe. O lea galuega e itiiti sona poto masani e i ai. E matuā mana'omia lana tausiga alofa ma le fa'aeteete, o le onosa'i ma le filigā. Ua vala'auina o ia ia tautua iā i latou o ē iti i le fa'atuatua, ia a'oa'o i latou o lo'o pōuliuli, e tatala le Afioga a le Atua iā i latou, ma a'oa'o i latou ia aogā i le galuega a Keriso. E le'i fa'aa'upagaina Peteru ia faia lea galuega, pe malamalama i lona tāua. Peita'i o lea le galuega ua vala'auina nei e Iesu o ia na te faia. O mea na o'o iā te ia i lona puapuagā ma le salamō na saunia ai o ia.

(15) I LE TAIMI A E LE'I LIUA PETERU, E UI INA E LE'I IĀ TE IA SE LOTO MAULALO E MANA'OMIA E GALUE AI MO ISI, A E SA FA'APEFEA ONA IA FA'AILOA ATU E TALITONU O KERISO O LE ĀLO O LE ATUA?

Ona tali mai lea o Simona Peteru iā te Ia, "Le Ali'i e, a matou ō ea iā te ia? o iā te 'Oe 'upu o le ola e fa'avavau. Ua matou talitonu, ma ua matou iloa o 'Oe o le Keriso, o le Ālo o le Atua soifua."

Ioane 6:68, 69

A o le'i o'o i lona pa'ū, o Peteru na tautala e mai i lona lagona o lea lava taimi e aunoa ma le fa'autauta. Na ia masani ona sauni e fa'asa'o isi, ma fa'aali lona manatu, a e le'i malamalama manino iā te ia lava po o le ā le 'upu o le a ia fai atu ai. Peita'i o le Peteru na liua ua matuā suia lava. O lo'o tumau pea lona ulua'i agaga naunau, a e o le alofa tunoa o Keriso ua pulea lona ma'elegā.

Ua lē toe osovale, talitonu iā te ia lava, ma na te fa'aea e ia ia lava, peita'i ua to'afilēmū, pulea, ma ua mafai ona a'oa'oina. O le a ia mafai ona fafaga tama'i mamoe 'atoa ma mamoe o le lafu mamoe a Keriso.

O le 'auāla na fa'aogāina e le Fa'aola i le feagai ai ma Peteru e i ai le a'oa'oga mo ia ma ōna uso. Ua a'oa'o i latou ina ia fa'afetaia'i lē solitulafono ma le onosa'i, fa'apalepale, ma le alofa fa'amāgalo. E ui ina sa fa'afitia e Peteru lona Ali'i, o le alofa o Iesu na tau'ave ai o ia e le'i maluelue. O le itū'aiga alofa lea e ao ona lagona e le leoleo mo mamoe ma tama'i mamoe ua tu'u atu i lana tausiga. O le manatua o ōna lava vaivaiga ma to'ilalo, ia fa'apea ona faia e Peteru i le lafu, e fai fa'apelepele e pei fo'i o Keriso ona faia iā te ia.

(16) O LE Ā LE FESILI FAIGOFIE NA TA'U ATU E IESU IĀ PETERU - NA TU'U ATU AI IĀ TE IA SE AVANOĀ E FA'AMAONIA AI UA MAUTŪ LONA VALA'AUIA?

Ua fetalai fa'atolu atu o Ia iā te ia, "Simona e, le atali'i o Iona, pe e te alofa mai iā te A'u?" Ua tigā Peteru, auā ua Ia fetalai fa'atolu iā te ia, Pe e te alofa mai iā te A'u? Ua fai mai iā te Ia, "Le Ali'i e, ua e silafia mea uma lava, ua e silafia, ua 'ou alofa lava iā te 'Oe." Ona fetalai atu lea o Iesu iā te ia, "Ia e fafaga i A'u mamoe."

Ioane 21:17

O le fesili na tu'uina atu e Keriso iā Peteru e tāua. Na Ia ta'ua na o le tulaga e tasi i le 'avea ma so'o ma le 'au'aunaga. “*Pe e te alofa mai iā te a'u?*” o Lana fetalaiga lea. O le agava'a mana'omia lea. Atonu e iā Peteru isi mea uma, a e afai e lē i ai le alofa o Keriso e lē mafai ona 'avea o ia o se leoleo fa'amaoni o le lafu mamoe a le Ali'i. O le atamai, lima foa'i, mau 'upu, loto fa'afetai, 'atoa ma le ma'elegā, e fesoasaoni uma lava i le faia o le galuega lelei; peita'i a aunoa ma le alofa o Iesu i le loto, o le galuega a le 'au'auna Kerisiano e lē manuia.

(17) INA IA MAFAI AI ONA FA'AMALOSIA PETERU MO LE TOFOTOFOGA MULIMULI O LONA FA'ATUATUA, O LE Ā LE MEA NA TA'U ATU E IESU E FA'ATATAU I LE I'UGA O LONA OLAGA 'AU'AUNA ATU?

Ua Ia fetalai atu lea 'upu e fa'aailoa atu ai le uiga o Lona oti e vivi'i atu ai o Ia i le Atua. Ua fetalai atu lea mea, ona fa'apea atu lea o Ia iā te ia, "Ia e mulimuli mai iā te A'u."

Ioane 21:19

Na savavali na'o Iesu ma Peteru, auā na i ai se mea na Ia finagalo e fa'aali atu tau o ia. A o lumana'i Lona maliu, na fetalai atu Iesu iā te ia, “*O le mea 'Ou te alu i ai, e te lē mafai ona mulimuli atu nei iā te A'u; a o se aso e te mulimuli atu ai iā te A'u.*” Ona tali atu lea o Peteru, “*Le Ali'i e, pe se ā le mea 'ou te lē mafai ai ona mulimuli atu nei iā te 'Oe? 'Ou te tu'uina atu lo'u ola ona o 'Oe' (Ioa. 13:36, 37).* Ina ua ia fai atu nei 'upu, na itiiti lona iloa o le maualuga ma le loloto o le 'auāla o le a ta'ita'i i ai e 'a'ao o Keriso. Na to'ilalo Peteru ina ua o'o mai le tofotofoga, peita'i na ia toe maua le avanoa e fa'amaonia ai lona alofa iā Keriso. Na tatala e le Fa'aola lona lumana'i ina ia fa'amalosia ai o ia mo le tofotofoga mulimuli o lona fa'atuatua. Na fa'aailoa atu iā te ia, pe a uma ona ola i se olaga aogā, pe a o'o mai le olaga matua ma fāi ifo le mālōsi, e mulimuli pea lava ia i lona Ali'i. Na fetalai atu Iesu, “*‘Ua e fusi iā te 'oe ina o e taule'ale'a, ma e feālua'i i mea na e loto i ai; a e pe a e toea'ina, e te fa'aloaloa ōu lima, e fusifusi fo'i iā te 'oe e se tasi, e ave fo'i 'oe i le mea e te lē loto i ai.'* Ua Ia fetalai atu lea 'upu e fa'aailoa atu ai le uiga o lona oti e vivi'i atu ai o ia i le Atua” (Ioa. 21:18, 19).

Ua fa'aailoa atu nei e Iesu iā Peteru le 'auāla e oti ai o ia; sa Ia valo'ia e o'o lava i le fa'aloaloa o ōna lima i luga o le satauro. Na Ia toe fetalai atu fo'i i Lona so'o, “*Ia e mulimuli mai iā te A'u.*” E le'i loto vaivai ai Peteru i lenei fa'aaliga. Na ia lagona le loto malie e tigāina i so'o se itū'aigā oti mo lona Ali'i.

(18) E UI INA E LE'I ILOA E IA LE TĀUA O ĀNA FETALAIGA, O LE Ā LE MEA NA TA'U E PETERU IĀ IESU MA UA FA'AMAONIA AI O SE VALO'AGA O LE A TAUNU'U?

Ua fai mai o ia iā te Ia, "Le Ali'i e, ua 'ou sauni ta te ō fa'atasi ma 'Oe i le fale puipui atoa ma le oti."

Luka 22:33

Na iloa muamua e Peteru Keriso i le tino, e pei ona iloa e le to'atele i ōna po nei; peita'i o lenei ua lē o toe i ai se mea e fa'agata mai ai. Ua na lē o toe iloa Ia e pei ona ia iloa o Ia i lona feso'ota'iga ma Ia i le itū fa'ale-tagata. Na ia alofa iā te Ia o le tagata, o le a'oa'o na auina mai le lagi; a o nei ua ia alofa iā te Ia o le Atua. O lea ua ia maua le a'oa'oga, o Keriso ua na'o Ia lava. Ua sauni

nei o ia e tofusua i le galuega o le taulaga ofo ma lona Ali'i. I le i'uga ina ua aumaia o ia i le satauro, na talosaga lava ia ina ia fa'asatauroina o ia e u i lalo lona ulu. Na ia manatu o se fa'aaloaloga e le feagai pe a fa'apuapugatiaina o ia pei o lona Matai.

(19) O Ā 'UPU APOAPOA'I NA TU'U ATU E IESU IĀ PETERU INA IA TAU FA'ATELEGESE AI LONA MA'ELEGĀ MA FA'ATO'ILALOINA AI LOA E SATANI?

Ua fetalai atu Ia i tagata uma, "A fia mulimuli mai se tasi iā te A'u, 'aua le usiusita'i o ia iā te ia, a ia 'ave e ia lona satauro i aso fai so'o, i le mulimuli mai ai iā te A'u."

Luka 9:23

Iā Peteru, o 'upu, *"Ia e mulimuli mai iā te A'u,"* e tumu i fa'atonuga. E le gata i lona oti, a o la'asaga ta'itasi o lona olaga, o a'oa'oga ia na tu'uina mai. E o'o mai i lenei taimi na mātete Peteru i le fai lava e ia ana gaoioiga. Na ia taumafai e fuafua le galuega a le Atua, a e le fa'atali e mulimuli i fuafuāga a le Atua. Peita'i e leai se mea na maua i le fa'anatinati e muamua i luma o le Ali'i. Ua fetalai atu Iesu, *"Ia e mulimuli mai iā te A'u."* 'Aua e te momo'e muamua i O'u luma. Ona e le fetalui ai lea e na o 'oe ma 'au a Satani. Fa'ataga A'u 'Ou te muamua iā te 'oe, ona le fa'ato'ilaloina ai lea o 'oe e le fili.

(20) E UI INA MANA'O PETERU IA ŌNA ILOA LE MEA E TUPU IĀ IOANE I LE I'UGA O LONA OLAGA, O LE Ā LE TALI A LE ALI'I I LANA FESILI, AUĀ E PAU LEA O LE MEA E TATAU ONA IA ILOA MA FAIA?

Ua fetalai atu Iesu iā te ia, "Afai 'Ou te loto ina ia tumau pea o ia se'ia 'Ou sau, pe se ā lea mea iā te 'oe? Ia e mulimuli mai 'oe iā te A'u."

Ioane 21:22

A o savali Peteru i tafatafa o Iesu, na ia va'aia Ioane o lo'o mulimuli mai. Na oso a'e se fa'anaunaga na te fia iloa lona lumana'i. "Ona fai mai lea o ia iā Iesu, 'Le Ali'i e, pe fa'apefa o ia nei?' Ua fetalai atu Iesu iā te ia, 'Afai 'Ou te loto ina ia tumau pea o ia se'ia 'Ou sau, pe se ā lea mea iā te 'oe? Ia e mulimuli mai 'oe iā te A'u'" (F. 21, 22). Na tatau iā Peteru ona ia manatunatu e fa'aalia e lona Ali'i iā te ia mea uma lava e lelei mo ia. O le tiute o tagata uma ia mulimuli iā Keriso, e aunoa ma le popole fua i le galuega ua tu'uina i isi. Na la fetalai e fa'ataui iā Ioane, *"Afai 'Ou te loto ina ia tumau pea o ia se'ia 'Ou sau,"* e le'i tu'uina atu e Iesu se fa'amaoniga o le a ola pea lenei so'o se'ia o'o i Lona afio fa'alua mai. Na'o na la ta'utino atu Lona Ia lava mana silisili 'ese, ma pe afai e finaglo e fa'ao'o lea mea, o le a le afāina ai le galuega a Peteru. O lumana'i o i la'ua uma o Ioane ma Peteru ua i 'a'ao o lo la'ua Ali'i. O le usiusita'i e mulimuli iā te Ia, o le tiute lea e mana'omia mai i tagata ta'ito'atasi.

E to'afia nisi i nei aso e pei o Peteru! E fiafia e va'ava'ai i matā'upu a isi, ma e popole ona e fia iloa o latou tiute, a e ua fa'alavelavea ai i latou i le fa'atamala i la latou lava vaega. O la tatou galuega o le va'ai iā Keriso ma mulimuli iā te Ia. E tatou te va'aia mea sesē i olaga o isi, ma mea e ponā i a latou amio. O le tagata e si'omia i vaivaiga. Peita'i, o Keriso e tatou te maua ai le 'ato'atoa. O le tepa taula'i iā te Ia, e 'avea ma 'auāla e suia ai i tatou.

(21) O LE Ā LE AUTŪ O LE MOLIMAU A IOANE A O GALUE MO LE ALI'I I LONA OLAGA 'ATOĀ?

Le 'au pele e, ia tatou feālofani, auā e mai le Atua le alofa. O i latou uma fo'i o ē alolofa ua fanau mai i latou mai le Atua, ua iloa fo'i e i latou le Atua.

I Ioane 4:7

Na ola Ioane se'ia o'o ina ua matua lava. Sa ia molimauina le fa'aumatiāga o Ierusalem, ma le fa'aleagaina o le malumalu matagofie, - o le fa'aailoga o le fa'atafuna'ina mulimuli o le lalolagi. E o'o lava i ōna aso tau fa'ai'ui'u, sa mulimuli pea Ioane e latalata i Lona Ali'i. O le 'avega o lana molimau i ekalesia, e fa'apea, "Le 'au pele e, ia tatou fealofani;... o le tumau i le alofa, ua tumau ia i totonu o le Atua, o le Atua fo'i o i totonu iā te ia" (I Ioa. 4:7, 16).

(22) O Ā 'UPU FA'ALOTOTELE NA AUMAI E PETERU MO I LATOU UMA UA TU'U I AI TULAGA IA TA'ITTA'I MA FA'AMAONI E FAFAGA A LATOU LAFU MAMOE?

Pe a fa'aali mai fo'i le Leoleo Mamoe Silisili, e maua e outou le pale pupula e le mamae lea.

I Peteru 5:4

“Ou te 'ai'oi atu i toea'ina o iā te outou, o a'u fo'i o le toea'ina ma le molimau i tigā o Keriso, ma lē ua tofusua fa'atasi i le manuia o le fa'aalia mai; ia outou leoleo i le lafu mamoe a le Atua o iā te outou, ia tausi i ai ma le loto, a e lē o le fa'atauānuina; 'aua fo'i ne'i faia ma le fia fai 'oloa, a o le loto fiafia. 'Aua fo'i ne'i fa'apei o ē fa'amālō i le tofi o le Atua, a ia fai outou ma fa'aa'oa'o i le lafu mamoe. Pe a fa'aali mai fo'i le Leoleo Mamoe Silisili, e maua e outou le pale pupula e lē maae lava" (I Pete. 5:1-4).

Li'o le Tali: **Ioe** **Lē Mautonu**

[illegible]

Ia 'Outou Ō ma A'oa'o i Nu'u Uma

Lesona 13

(1) O LE Ā LE FA'ATONUGA NA TU'U E KERISO I ŌNA SO'O MA LE 'AU FA'ATUATUA UMA UA MULIMULI IĀ TE IA MA UA FILIFILI E GALULUE FA'ATASI MA IA?

Ua fetalai atu fo'i o Ia iā te i latou, "Ō atu ia outou i le lalolagi uma, inā tala'i atu ai le tala lelei i tagata uma lava."
Mareko 16:15

E tula'i atu ua toe o se la'a i Lona nofoāli'i fa'ale-lagi, sa tu'uina atu e Keriso le fe'au i Ōna so'o. *"Ua tu'uina mai iā te A'u le pule uma lava i le lagi ma le lalolagi,"* na Ia fetalai atu ai. *"O lenei, ia outou ō atu e fai nu'u uma lava ma so'o"* (**Mata. 28:18, 19**). *"Ō atu ia outou i le lalolagi uma, inā tala'i atu ai le tala lelei i tagata uma lava"* (**Mare. 16:15**). Sa fetalai atu ma toe ta'u atu nei 'upu, ina ia lē galo a e tu'uloto e le 'au so'o le tāua. O i luga o tagatā nu'u uma o le lalolagi, maualuga pe maualalo, mau'oa ma le mativa, le malamalama o le lagi e sulugia ai i 'ave e manino ma mālōsi. O le 'au so'o e tatau ona galulue fa'atasi ma lo latou Fa'aola i le galuega o le lavea'iina o le lalolagi.

(2) INA UA MAVAE LE TOE TŪ, O FEA LE NOFOĀGA MASANI NA SA'ILI LE ALI'I IA FA'ATASI AI MA ŌNA SO'O INA IA TOE FA'AMALOSI I LATOU I LANA VALA'AU MO LE GALUEGA?

Ona fetalai atu ai lea o Iesu iā te i la'ua, "'Aua lua te matata'u; inā ō atu ia, lua te ta'u atu i O'u uso, ina ia latou ō atu i Kalilaia, latou te iloa mai ai A'u."
Mataio 28:10

O le fe'au sa tu'uina atu i le to'asefulu ma le to'alua ina ua latou fa'atasi ma Keriso i le afeafe aupito aluga; peita'i o lea ua tu'u atu nei fa'alaua'itele. I le fa'atasiga i se mauga i Kalilaia, o le to'atele o ē talitonu sa mafai ona vala'auina ma ua fa'apotopoto mai i ai. I lenei fa'atasiga, o Keriso lava ia, a o lumana'i ai Lona maliu, na filifilia le taimi ma le nofoāga. O le agelu i le tu'ugamau sa toe fa'amanatu i le 'au so'o le folafolāga a Iesu latou te feiloa'i i Kalilaia. O lea folafolāga sa toe fa'a'ailoa i ē talitonu na fa'apotopoto i Ierusalemā i le vaiasosā o le Paseka, ma e ala iā i latou sa o'o atu ai i le to'atele o lo'o fa'anoanoa ona o le maliu o lo latou Ali'i. Ma le matuā naunauta'i, sa latou tulimata'i ma le fīafia i lea feiloa'iga. Sa latou uia ala fa'ata'amilo, e ō mai i itū ala 'ese'ese, ina ia lē fa'atupu ai se tulaga masalosalo o Iutaia lotovale. Na latou ō mai ma loto e fia iloa ma le ofo, e talatalanoa fa'atasi i tala na latou maua e fa'atatau iā Keriso.

(3) O LE Ā LE MEA NA FAIA E I LATOU NA FA'ALOGO I TALA E FA'ATATAU I LE TOE TŪ O IESU, MA UA LATOU ILOA O IA O LO'O TŪ MAI I O LATOU LUMA MA FOFOGA MAMALU O LE ATUA?

Ua latou iloa o Ia, ona latou ifo mai ai lea iā te Ia; a ua masalosalo nisi.
Mataio 28:17

I le taimi sa atofaina, e tusa o le lima selau tagata talitonu na fa'apotopoto i nai vaega i le itū o le mauga, ua naunau ia fa'alogo ma iloa mea uma mai iā i latou sa vā'ai iā Keriso talu Lona toe soifua mai. Mai lea vaega i lea vaega sa fa'a'ailoa i ai e le 'au so'o mea na latou va'aia ma fa'alogo ai e fa'atatau iā Keriso, ma fa'amalamalama mai i le Afioga a le Atua e pei ona Ia faia iā i latou. Sa toe fa'amanatu e Toma le tala i lona lē talitonu, ma fa'amatala atu le mavae 'ese o ōna masalosaloga.

Sa fa'afuase'i ona tū atu Iesu i o latou ogātotonu. E leai se tasi na iloa pe fa'a'apefa ma o anafea fo'i na Ia taunu'u mai ai. O le to'atele o lo'o fa'atasi ai latou te le'i vā'ai muamua iā te Ia; peita'i i Ōna 'a'ao sa latou iloa ai fa'a'ailoga o Lona fa'asatauroina; o Ōna fofoga ua pei o fofoga o le Atua, ma ina ua latou va'aia o Ia, sa latou tapua'i loa iā te Ia.

A e peita'i, sa i ai le masalosalo i nisi. O le a fa'apea ai lava. E i ai i latou o le a faigatā ona fa'atinoina le fa'atuatua, ma ua latou tu'u i latou i le itū o le masalosalo. O i latou nei o le a tele mea latou te lē mauaina ona o lo latou lē talitonu.

(4) E UI O LE TO'ATELE O SO'O SA LATOU MOLIMAUINA LE MANA O KERISO I LE LALOLAGI, A E O LE Ā LE FA'AMATALAGA UA TU'U MAI AI NEI IĀ I LATOU SE MALAMALAMA UA SILI ATU LE MANINO I LE LAUTELE O LONA MANA FA'ALE-ATUA?

Ona maliu ane ai lea o Iesu, ua fetalai atu iā te i latou, ua fa'apea atu, "Ua tu'uina mai iā te A'u le pule uma lava i le lagi ma le lalolagi."

Mataio 28:18

Ua na o le pau lea o le talanoāga sa maua e le to'atele o ē talitonu ina ua uma Lona toe tū mai. Sa afio o Ia e fa'atasi ma i latou ma ua fetalai atu, *"Ua tu'uina mai iā te A'u le pule uma lava i le lagi ma le lalolagi"* (**Mata. 28:18b**). O le 'au so'o sa tapua'i iā te Ia a o le'i fetalai atu Ia, peita'i o Āna afioga, sa pa'ū mai fofoga na taofia e le oti, ua fa'atumulia ai i latou i le malosi uiga 'ese. O Ia nei o le Fa'aola ua toe tū mai. E to'atele i latou sa va'aia o Ia a o fa'aaogāina Lona mana e fa'amalōlō ai ē mama'i ma pulea 'au fa'a-satani. Sa latou talitonu e i ai iā te Ia le mana e fa'atū ai Lona mālō i Ierusalemā, le mana e fa'ato'ilalo uma ai ē tete'e mai, pule i le mālōsi fa'a-natura. Sa Ia fa'afilemū le souā o le sami; na Ia savali i luga o peau sousou; sa Ia toe fa'aola i ē na oti. O lenei ua Ia toe fa'ailoa atu *"o le pule uma"* ua tu'uina atu iā te Ia. O Āna afioga ua aveina ai mafau'au o Lana 'au fa'alologologo i luga a'e o mea fa'ale-lalolagi e lē tumau i le fa'ale-lagi ma e fa'avavau. Sa si'itia i latou e se lagona ua sili a'e le maualuga i lo latou malamalama i Lona mamalu ma le vi'iga.

(5) O Ā 'UPU OFOFOGIA FA'AFIAFIA MA FA'ALOTOTELE NA TU'U MAI E KERISO E FA'AALIA AI UA TALIA LANA TAULAGA OFO, MA O IA UA 'AVEA NEI MA PULUVAGA A LE FANAU A TAGATA SE'IA O'O I LE TAIMI O LE I'UGA?

Ia outou a'oa'o atu iā te i latou ia tausi i mea uma ua 'Ou fai atu ai iā te outou. Fa'auta fo'i 'Ou te iā te outou i aso uma lava, e o'o lava i le gata'aga o le lalolagi.

Mataio 28:20

O afioga a Keriso i luga o le mauga o le fa'ailoaina atu lea o le taulaga ofo sa Ia faia mo tagata, ua 'ato'atoa ma ua taunu'u. O tu'utu'uga o le togioa ua fa'ataunu'uina; o le galuega na Ia afio mai ai i le lalolagi ua mae'a. O lea ua aga'i atu nei o Ia i le nofoāli'i o le Atua, e fa'amamaluina e agelu, o ali'i sili, ma ē mālōlosi. Ua Ia ulu atu i Lana galuega fa'a-fautua. Ua la'e i le pule e lē gata mai, ona Ia tu'u atu lea o Lana malelega i le 'au so'o, *"Ia outou ō atu e fai nu'u uma lava ma so'o, ma paptiso atu iā te i latou i le suafa o le Tamā, ma le Atali'i, ma le Agaga Pa'ia; ia outou a'oa'o atu iā te i latou ia tausi i mea uma ua 'Ou fai atu ai iā te outou; fa'auta fo'i, 'Ou te iā te outou i aso uma lava, e o'o lava i le gata'aga o le lalolagi."*

(6) INA IA MAUTINOA UA MALAMALAMA ŌNA SO'O I LANA FA'ATONUGA E TALA'I LE TALA LELEI I TAGATA UMA, A E LĒ NĀTIA MO NA O TAGATA MANATU FA'APITO IA NA O SE VAEGA, O LE Ā LANA FETALAIGA IĀ I LATOU?

O lenei, ia outou ō atu e fai nu'u uma lava ma so'o, ma papatiso atu iā te i latou i le suafa o le Tamā, ma le Atali'i, ma le Agaga Pa'ia.

Mataio 28:19

O Iutaia sa faia i latou ma tagata e tu'uina i ai 'upu moni pa'ia; peita'i o uiga fa'a-Faresaio ua faia i latou o ē e aupito fa'ailoga tagata, o le aigā tagata. O mea uma e fa'atatau i faitaulaga ma ta'ita'i, - o latou la'e, tū masani, sauniga, ma uputu'u,- ua lē ōno 'avea ai latou e fai ma malamalama o le lalolagi. Ua latou va'ai iā i latou lava, le mālō o Iutaia, o le lalolagi lea. Peita'i sa fa'atonu e Keriso Ōna so'o e tala'i se fa'atuatuāga ma se tapua'iga e lē i ai se 'ese'esega i lanu po o atunu'u, se talitonuga e fa'afetaui i tagata uma, o mālō uma, ma vasega o tagata uma.

(7) O Ā MEA NA FETALAI AI PEA KERISO I ŌNA SO'O E FA'ATATAU I LONA MALŌ A E PEITA'I SA LATOU LĒ MALAMALAMA I AI?

Ua tali atu Iesu, "E lē mai le lalolagi nei Lo'u malō; afai ana mai le lalolagi nei Lo'u malō, pe ua tau A'u 'au'auna, ina ne'i tu'uina atu A'u iā Iutaia; a o lenei, e lē mai iinei Lo'u malō."

Ioane 18:36

A o le'i tu'ua e Ia Ōna so'o, sa fa'ailoa manino e Keriso le uiga moni o Lona mālō. Sa Ia toe fa'amanatu i o latou mafau'au le mea na Ia ta'u atu i le taimi ua mavae e fa'atatau i ai. Sa Ia fa'ailoa ua e lē o Lona fa'amoemoe e fa'atūina i le lalolagi se mālō e lē

tumau, peita'i o se mālō fa'ale-agaga. O Ia e lē nofoia le nofoāli'i o Tavita e fai ma tupu fa'ale-lalolagi. Sa Ia toe tatala atu iā te i latou le Afioga a le Atua, ua fa'aali atu sa fa'apa'iaina i le lagi mea uma na Ia uia, i finagalo 'au fa'atasi i le vā o Ia ma le Tamā. O nei mea uma sa valo'ia mai e tagata na osofia e le Agaga Pa'ia. Na Ia fetalai atu, O le a outou vā'ai o fa'ataunu'uina mea uma na 'Ou fa'ailoa atu iā te outou e fa'atatau i le te'ena o A'u o le Mesia. O mea uma na 'Ou fai atu ai iā te outou e fa'atatau i le fa'alumaina e ao ona 'Ou lavātia ma le oti e tatau ona 'Ou oti ai, ua fa'amaonia lava lea. O lona tolu o aso sa 'Ou toe tū a'e ai. Ia sa'ilili ma le naunauta'i i Afioga a le Atua, ona outou va'ai lea i mea uma o lo'o manino mai i valo'aga e fa'atatau iā te A'u, ua uma ona fa'ataunu'uina.

(8) INA UA TU'U LE FA'ATONUGA I SO'O IA 'AVE LE TALA LELEI I LE LALOLAGI ATOA, O FEA SA TATAU ONA AMATA ATU AI LE GALUEGA?

A e maua e outou le mana, pe a afio ifo le Agaga Pa'ia i luga iā te outou; e fai fo'i outou ma molimau iā te A'u i Ierusalem ma Iutaia uma lava, ma Samaria, e o'o lava i tululiga o le lalolagi.

Galuega 1:8

Ua fa'atonuina e Keriso Ōna so'o latou te faia le galuega ua Ia tu'u atu i o latou lima, e amata i Ierusalem. O Ierusalem o le va'aiga ofoofogia o Lona fa'amaulaloina mo le aigā tagata. O i inā sa puapuagātia ai, te'ena ma ta'usalaina ai o Ia. Sa fanau o Ia i le lauele'ele o Iuta. O i inā sa fa'aofuina ai i le ofu o le fanau a tagata, na feoa'i ai ma tagata, ma e to'aititi na latou iloa le latalata mai o le lagi i le lalolagi a o i ai Iesu ma i latou. O Ierusalem e tatau ona amataina ai le galuega a le 'au so'o.

I le va'aiga mai mea uma sa puapuagātia ai Keriso i lea mea, ma le tele o galuega lelei na Ia faia e le'i talisapaia, atonu e faia e le 'au so'o se talosaga mo se laufanua amata e sili atu le lelei; peita'i latou te le'i faia lea olega. O le fanua lava sa Ia lūlūina ai le fatu o le 'upu moni ua tu'u i le 'au so'o latou te galuea'iina, ma o le a tupu a'e fatu ma maua ai se seleselega tele. I la latou galuega, o so'o o le a feagai ma sauāga e ala i le mataū'a ma le 'ino'ino o Iutaia; peita'i o nei mea sa lāvātia e lo latou Matai, ma e lē tatau ona latou sosola 'ese mai ai. O le ofoina atu muamua o le alofa tunoa e tatau ona faia mo i latou na fasiotia le Fa'aola.

(9) ONA O LENEI UA TOE TŪ KERISO, O AI NISI I TUA ATU O IERUSALEMA, O LE A MATUĀ A'AFIA MA AOFIA I LE TALA'IGA O LE TALA LELEI?

A e peita'i e to'atele ali'i ua talitonu iā te Ia; a e le'i ta'u atu ai, ona o le 'au Faresaio, ne'i tulia i latou i le sunako.

Ioane 12:42

E to'atele ē na i Ierusalem sa latou talitonu fa'alilolilo iā Iesu, ma e to'atele sa fa'asesēina e faitaulaga ma ta'ita'i. O i latou fo'i ia e ao ona fa'aalia i ai le tala lelei. E tatau ona vala'auina i latou ia salamō. O le 'upu moni ofoofogia e ao ona fa'aali manino mai ai ua na'o Keriso e maua ai le fa'amagaloina o agasala. A o fa'agae'etia Ierusalem 'atoa ona o mea sa tutupu i vaiaso ua tuana'i, o le tala'iina o le tala lelei ua sili atu le loloto o lona lagona.

(10) E PEI ONA FA'ASINO E PAULO I TAGATA ROMA, ONA O LE ATUA O LE ATUA O TAGATA UMA, O AI NA FINAGALO KERISO IA O'O I AI LE FE'AU O LE FA'AOLATAGA?

Na o Iutaia ea e Atua i le Atua? E lē atoa ea fo'i ma nu'u 'ese? Ioe, atoa fo'i ma nu'u 'ese.

Roma 3:29

Peita'i o le galuega e lē gata ai iinei. E ao ona fa'ao'o i tulimanu uma o le lalolagi. Ua fetalai Keriso i Ōna so'o, *Sa fai outou ma molimau ina ua tu'uina atu Lo'u ola mo le lalolagi. Sa outou molimau i A'u galuega mo Isara'elu. E ui lava latou te le ō mai iā te A'u ina ia latou maua le ola, e ui ina faia e faitaulaga ma ta'ita'i iā te A'u e pei ona tusia, e ui ina latou te'ena A'u e pei ona valo'ia mai le Afioga Pa'ia, o lo'o i ai pea iā i latou le avanoa mo le taliaina o le Ālo o le Atua. Ua outou va'ai, o i latou uma e ō mai iā te A'u ma ta'uta'u a latou agasala, 'Ou te taliaina ma le fiafia. O lē e sau iā te A'u 'Ou te lē tulia iā i fafo. O i latou uma e loto i ai, e mafai ona fa'alelei ma le Atua, ma maua e latou le ola e fa'avavau. Ia te outou, O'u so'o e, 'Ou te tu'u atu i ai lenei fe'au o le alofa. Ia mua'i tu'uina atu iā Isara'elu, ma tu'u atu ai lea i nu'u uma, gagana, ma atunu'u. Ia tu'uina atu iā Iutaia ma nu'u 'ese. O i latou uma e talitonu ia fa'apopotopoto fa'atasi i le ekalesia e tasi.*

(11) I LE FA'AILOAINA O MEA ALOFA A LE AGAGA PA'IA, O Ā NISI O MEA ALOFA NA TA'UA E PAULO I LANA TAUTALAGA SA FA'APEA E MAFAI ONA MAUA E LE 'AU SO'O?

O lea ou te fiafia ai i mea e vaivai ai, o lē fa'aleaga mai, e malaia, o lē agatele mai, o lē atuatuva'e ona o Keriso; auā pe a 'ou vaivai, ona 'ou malosi ai lea.

I Korinito 12:10

E ala i le mea alofa o le Agaga Pa'ia, e maua e le 'au so'o le mana ofoofogia. O la latou molimau e tataua ona fa'amaonia e fa'aailoga ma mea ofoofogia. O le a faia vavega, e lē na o le 'au so'o, peita'i e fa'apea i latou uma ua talia la latou fe'au. Na fetalai Iesu, *"E tutūli e i latou temoni i Lo'u igoa; e tautalatala i latou i gagana fou; e fetāgofi i latou i gata; afai fo'i latou te inu i se mea e oti ai, latou te lē afāina ai lava; e fa'ae'e atu fo'i o latou lima i luga o ē mama'i, ma fa'amālōlōina i latou"* (**Mare. 16:17, 18**).

I lea vaitaimi, o le fa'aonāina o se tasi o se faiga ta'atele sa matuā fa'aaogāina e le 'au lē taupulea e fa'aumatia ai ē e tutū i le ala o a latou fuafuāga leaga. Na silafia e Iesu o ola o Ōna so'o o le a fa'apea ona fa'apuapugātiaina. E to'atele ua manatu o le fasiotia o Āna molimau, o le faia lea o se galuega mo le Atua. O lea ua la ta'utino atu mo i latou le puipuiga mai ia faigatā.

(12) FA'ATASI MA LE MEA ALOFA O GAGANA 'ESE'ESE A ISI ATUNU'U, O Ā VAVEGA NA FAIA E IESU O LEA UA NA TU'U ATU I ŌNA SO'O LE MANA E FAIA AI?

Ua fa'ata'amilo Iesu i Kalilaia uma, ua la a'oa'o i o latou sunako, ua la tala'i atu fo'i le tala lelei o le malō, ma fa'amalōlō e la o ma'i uma ma ma'i tigā uma o le nu'u.

Mataio 4:23

Sa tataua i le 'au so'o ona i ai le mana e tasi na iā Iesu e fa'amālōlō "ai o ma'i uma ma ma'i tigā uma o le nu'u" (**Mata. 4:23b**). O le fa'amālōlōina i Lona suafa o ma'i uma o le tino, o le ta'utinoga lea i Lona mana mo le fa'amālōlōga o le agaga (**Mata. 9:6**). Ma ua folafola atu nei iā i latou se malosi fou. O le 'au so'o latou te tala'i atu i nu'u 'ese, ma latou te maua le mana e tautala ai i isi gagana. O aposetolo ma o latou fesoasoani e lē o ni tagata a'oa'o'ina, peita'i e ala i le liligiina ifo o le Agaga Pa'ia i le aso Penetekoso, o a latou lauga, pe o la latou lava gagana po o se gagana 'ese, sa manino, faigofie, ma sa'o lelei 'upu ma le fa'aleoina.

(13) O LE Ā LE FOLAFOLAGA FA'AMAFANAFANA NA FAIA E KERISO I ŌNA SO'O A O IA FA'ATONU I LATOU E 'AVE LANA FE'AU O LE ALOFA TUNOA I LE LALOLAGI UMA?

O lenei, ia outou ō atu e fai nu'u uma lava ma so'o, ma papatiso atu iā te i latou i le suafa o le Tamā, ma le Atali'i, ma le Agaga Pa'ia; ia outou a'oa'o atu iā te i latou ia tausi i mea uma ua 'Ou fai atu ai iā te outou. Fa'auta fo'i 'Ou te iā te outou i aso uma lava, e o'o lava i le gata'aga o le lalolagi.

Mataio 28:19, 20

Ua fa'apea ona tu'uina atu e Keriso i Ōna so'o la latou fe'au. Sa la saunia mea uma mo le fa'agaoioiga o le galuega, ma la tu'u i Ōna lava luga le va'aiga mo le manuia. Afai e latou te usiusita'i i Āna afioga, ma galulue i le feso'ota'iga ma la, e lē mafai ona i'uva'e la latou galuega. Ia outou ō atu i nu'u uma, sa la fa'atonu atu ai i latou. Ō i itū aupito mamao o lo'o ainā o le lalolagi, a e ia mautinoa 'Ou te i ai i ia mea uma. Ia galulue i le fa'atuatua ma le mautinoa, auā e leai lava se taimi o le a 'Ou tu'ulafoa'i ai iā te outou.

(14) I LE OLEGA A PAULO I TAGATA KORINITO, SA FA'APEFEA ONA IA FA'AILOA ATU LE VĀ FEĀLOA'I MA LE TA'UTINOGA A I LATOU UMA O LE A GALULUE MO LE FA'ASAOINA O LATOU USO A TAGATA?

O lenei fo'i, o i matou o faigaluega fa'atasi ma la, ua matou 'ai'oi atu iā te outou, ina ne'i talia fua e outou le alofa tunoa o le Atua.

II Korinito 6:1

O le fe'au a le Ali'i Fa'aola i le 'au so'o e aofia ai ē ua talitonu. E aofia ai uma ma ē talitonu iā Keriso e o'o lava i le gata'aga. O se manatu sesē pe a fa'apea ua na o le faife'au fa'au'uina e fa'alagolago i ai le galuega mo le laveā'iina o agaga. O i latou uma ua fa'ala'e'i'uina fa'ale-lagi e tu'u i ai le agaga o le tala lelei. O i latou uma e talia le soifuāga o Keriso e fa'au'uina e galulue mo le fa'aolataga o o latou uso ā tagata. Mo lenei galuega sa fa'avacina ai le ekalesia, ma o i latou uma e filifili e tau'ave ana tautoga pa'ia e fa'apea ona ta'utino o le a galulue fa'atasi ma Keriso.

(15) O LE Ā LE VALA'AU FAIGOFIE A E UIGA E MAFAI ONA TU'U ATU E I LATOU UMA UA TALIA LE VALA'AU O LE FA'AOLATAGA MO LE AGAGA AGASALA O LO'O MAFATIA I LALO O LE TA'USALAINA, ONA O LE AGASALA?

Ua fetalai mai le Agaga ma le fa'ato'anofotane, "Inā sau ia;" inā fai atu fo'i ia o lē fa'alogo, "Inā sau ia;" o lē fia inu, "Inā sau ia," atoa ma lē mana'o i ai, "Inā 'ave fua ia le vai o le ola."

Fa'aaliga 22:17

"Ua fetalai mai le Agaga ma le fa'ato'anofotane, *Inā sau ia;* ina fai atu fo'i ia o lē fa'alogo, *Inā sau ia.*" O i latou uma o ē lagona ia latou toe fai atu ia 'upu vala'au. Po o le ā le tofiga i le olaga o le tagata, o le mea muamua e tatau ona tumutumu i le loto o le lavea'iina lea o agaga mo Keriso. Atonu e lē mafai e ia ona tautala i fa'apotopotoga, peita'i na te mafai ona galue mo tagata ta'ito'atasi. Mo i latou ia, na te mafai ona fa'a'ailoa atu fa'atonuga e maua mai le Ali'i. O le galuega o le 'au'auna atu e lē aofia ai na o le lauga atu. O i latou e 'au'auna atu ina ua fesoasoani i ē mama'i ma mafatia, fesoasoani i ē matitiva, tautala i 'upu fa'amalosi mo ē fa'avaivai ma ē ua itiiti lo latou fa'atuatua. E to'atele agaga lata mai ma ē mamao atu ua saisaitia i le mamafa o le agasala ma le lagona ua ta'usalaina. E lē o faigatā, galuega, po o le mativa ua fa'aleagaina ma fa'amaulaloina le aigā tagata. O le manatu i agasala, o le fai o mea sesē. O mea ia e maua ai le femēmēā'i ma le lē malie. Ua tu'uina atu e Keriso Ana 'au'auna e galulue mo agaga ua mama'i i le agasala.

(16) E ALA IĀ TE AI ONA FA'AA'UPEGAINA E LE ATUA E O'O LAVA I LE TAGATA FAIGALUEGA E AUPITO MAULALO INA IA 'AVEA MA MOLIMAU MALOSI MO IA?

A e maua e outou le mana, pe a afio ifo le Agaga Pa'ia i luga iā te outou; e fai fo'i outou ma molimau iā te A'u i Ierusalem ma Iutaia uma lava, ma Samaria, e o'o lava i tululiga o le lalolagi.

Galuega 1:8

O le 'au so'o sa tatau ona amataina la latou galuega i le mea sa i ai. O le fanua e sili le faigatā ma foliga lē aogā sa lē tatau ona latou tu'ulafoa'i. O le mea lea, o le 'au faigaluega uma a Keriso, ia tatau ona amata galulue i le mea o i ai lava le tagata ia. I o tatou lava aiga, atonu o i ai agaga o gālala mo se 'upu alofa, o matelāina mo le areto o le ola. Atonu o i ai tupulaga e ao ona a'oa'oina mo Keriso. O lo'o i ai ē fa'apaupau i o tatou tuā'oi. Ia tatau ona tatou faia ma le fa'amaoni le galuega o lo'o aupito lata mai. Ona fa'asolo atu ai lea a tatou galuega i le mamao e fa'ataga mai e le 'a'ao o le Atua o lo'o ta'ita'iina le ala. O galuega a le to'atele atonu e foliga mai ua taofiofia ona o tulaga o mea e tutupu; peita'i, po o fea lava o i ai, pe a faia ma le fa'atuatua ma le ma'elegā e matuā lagona i itū uma o le lalolagi. O le galuega a Keriso a o i le lalolagi sa foliga na faia i se fanua vāitiiti, peita'i o le motu o tagata mai nu'u 'ese'ese sa latou lagona Lana fe'au. E fa'aaogāina e le Atua i le tele o taimi o mea aupito faigofie e maua ai fa'ai'uga e aupito sili. O lea Lana fuafuāga ina ia felagolagoma'i itū uma o Lana galuega, e pei o le uili i totonu o le uili, e galulue fa'atasi uma itū. O le tagata galue e sili le agamalū, e fa'agaioiina e le Agaga Pa'ia, na te pā'ia maea e lē o va'aia, a o ōna gaioioiga o le a fa'alogoina i tululiga o le lalolagi, ma faia vi'iga mo augātupulaga e fa'avavau.

(17) A O TATOU FAIA LE FA'ATONUGA A KERISO E "Ō ATU I NU'U UMA," O LE Ā LE MEA O LE A TU'UINA IĀ I TATOU E ALA I LE AGAGA PA'IA IA FA'ATAUNU'U AI LANA GALUEGA?

Ua foa'iina ta'itasi i tagata le fa'aaliga o le Agaga e aogā ai....E matuā galue fo'i na mea uma e lea lava Agaga e tasi, o lo'o o tufatufa i tagata ia ta'itasi ma lana mea, pei ona finagalo i ai o Ia.

I Korinito 12:7, 11

A o le fa'atonuga, *"Ia outou ō i le lalolagi uma,"* ia lē mavae mai le va'ai. O lo'o vala'auina i tatou ia tepa a'e o tatou mata i "itu lalolagi i tala atu." E 'ave 'esea e Keriso le pā o vavae ai, le fa'a'ailoga tagata ua fevaevaea'i ai itū'aiga atunu'u 'ese'ese, ma a'oa'oina se alofa mo le aigā tagata. Na te si'itia tagata mai le li'o vāiti ua mautū ai i o latou uiga alofa fa'apito; Na te fa'agata tuā'oi uma fa'aitumālō ma le fa'avasegaina na faia o itū'aiga tagata 'ese'ese. E leai se 'ese'esega iā te Ia i le vā o tuā'oi ma tagata 'ese, uō ma fili. Ua Ia a'oa'o mai tatou ia va'ai iā i latou uma o lo'o mana'omia le fesoasoani e pei o so tatou uso, ma le lalolagi o lo tatou fanua galue.

Ina ua fetalai le Fa'aola, *"Ia outou ō atu,...a'oa'o i nu'u uma,"* sa Ia fa'apea mai fo'i, *"E mulimuli atu fo'i nei fa'a'ailoga i ē fa'atuatua; e tutūli e i latou temoni i Lo'u igoa; e tautatalata i latou i gagana fou; e fetāgofi i latou i gata; afai fo'i latou te inu i se mea e oti ai, latou te lē afāina ai lava; e fa'ae'e atu fo'i o latou lima i luga o ē mama'i, ma fa'amālōlōina i latou"* (**Mare. 16:15, 17, 18**). O le folafolāga e mamao le mea e o'o i ai fa'apei o le fe'au. E lē o mea alofa uma e tu'uina atu i tagata ta'ito'atasi e talitonu. O le Agaga e vaeveaina "i tagata ia ta'itasi ma lana mea, pei ona finagalo i ai Ia" (**I Kori. 12:11**). Peita'i o mea alofa a le Agaga ua folafola

atu iā i latou uma ua talitonu, e tusa ma lona mana'oga mo le galuega a le Ali'i. O lea folafolāga o lo'o mālōsi ma fa'atuatuaina pea i aso nei e pei o ʻōna pō o le 'au aposetolo. *"E mulimuli atu fo'i nei fa'ailoga i ē talitonu."* O le tofi lea o le fanau a le Atua, ma o le fa'atuatua e tatau ona taofimauiina o mea uma e ao ona i ai e fai ma fa'amaoniga o le fa'atuatua.

(18) A O I AI KERISO I LE LALOLAGI, O LE Ā LE UIGA FA'APITOA NA IĀ TE IA SA MAFAI AI ONA AUMAI E LĒ NA O LE FA'AMALŌLŌ FA'ALETINO A E SA FA'AMALŌLŌ AI FO'I FA'ALEAGAGA?

Ua tausisi le motu o tagata uma e pa'i atu iā te Ia, auā ua alu ane le mana mai iā te Ia ua fa'amalōlōina ai i latou uma.
Luka 6:19

"E fa'ae'e atu fo'i o latou lima i luga o ē mama'i, ma fa'amālōlōina i latou." O lenei lalolagi o se falema'i tele, peita'i sa afio mai Keriso e fa'amālōlō ē mama'i, ma fa'a'ailoa atu le fa'aolataga i ē o fa'apagotāina e Satani. Sa iā te Ia lava le soifua mālōlōina ma le mālōsi. Sa tu'uina atu Lona soifua i ē mama'i, o ē mafatia, o ē ulutinoina e temoni. Na te le'i te'ena se tasi na sau ina ia maua Lona mana fa'amālōlō. Sa Ia silafia o i latou uma sa talosagaina Lana fesoasoani sa aumai e i latou ma'i i o latou lava luga; peita'i Na te le'i te'ena le fa'amālōlōina o i latou. Ina ua maua uiga tonu o Keriso i totonu o nei agaga, sa iloa lo latou agasala, ma e to'atele ua fa'amālōlōina i o latou ma'i fa'ale-agaga, fa'apea ma ma'i fa'ale-tino. O lo'o i ai pea lea mana o le tala lelei, ma aiseā ua tatou lē molimauiina ai i nei ʻōna pō ia lava i'uga?

(19) SA FA'APEFEA ONA FA'AALIA E KERISO LONA FINAGALO MALIE I LE FA'AAOGĀINA O TOGAFITI FAIGOFIE MA MEA E MASANI AI INA UA SAU LE TAGATA TAUASO IĀ TE IA INA IA FA'AMALŌLŌINA?

Ona fa'apea atu lea o Ia iā te ia, "Alu ia, inā mulumulu i le ta'elega e Seloā." Ona alu lea o ia, ua mulumulu ma toe fo'i mai, ua va'ai.
Ioane 9:7

E silafia e Keriso mafatiāga uma o ē pagātia. Pe a fa'aleagaina e agaga leaga le tino o le tagata, e silafia e Keriso le leaga o le fetu'u. Pe a fa'amūina e le vevela le tafega o le ola, e silafia e Ia le mafatiāga. Ma e finagalo o Ia e fa'amālōlō ma'i o nei aso e pei o le taimi a o i ai o Ia i le lalolagi. O 'au'auna a Keriso o Ōna sui ia, ma o auala mo Āna galuega. E naunau o Ia, e ala iā i latou, le fa'aaogāina o Lona mana fa'amālōlō.

I uiga fa'amālōlō o le Fa'aola, e i ai a'oa'oga tāua mo Ōna so'o. O le tasi vavega, sa Ia 'u'uina mata o le tauaso i le palapala, ma fetalai atu, *"Alu ia, inā mulumulu i le ta'elega i Seloā...."* Ona alu lea o ia, ua mulumulu, ua toe fo'i mai, ua va'ai" (**Ioā. 9:7**). O le fa'amālōlōga ua na o le mana o le Fa'amālōlō e galuea'iina ai, peita'i o Keriso Na te fa'aaogā mea fa'atauva'a na foafoaina. E ui ina Ia lē silasila i le fa'aaogāina o vaila'au, sa Ia fa'ataga le fa'aaogā o togafiti faigofie ma e maua fua.

(20) O LE Ā LE FETALAIGA A KERISO I LE TO'ATELE O I LATOU NA MAUA LE FA'AMALŌLŌGA MAI IĀ TE IA UA FA'AALI AI LE SO'OTAGA I LE VĀ O LE MA'I FA'ALETINO, MA'I FA'ALEAGAGA, MA LE LĒ TAUSIA O LE TULAFONO A LE ATUA?

Ua mavae ia mea, ua silafia o ia e Iesu i le malumalu, ona fetalai atu lea o Ia iā te ia, "Fa'auta, ua malōlō 'oe; 'aua e te toe agasala, ne'i o'o atu iā te 'oe se leaga e sili i lenā."
Ioane 5:14

Mo le to'atele o ē mafatia na maua le fa'amālōlōga, ua fetalai atu Keriso, *"Aua e te toe agasala, ne'i o'o atu iā te 'oe se leaga e sili i lenā"* (**Ioā. 5:14**). O lea sa Ia a'oa'o atu ai, o ma'i e tupu ona ua solia o tulafono a le Atua, e aofia ai le fa'ale-tino ma le fa'ale-agaga. O mafatiāga tetele i le lalolagi ua o'o mai ona o le lē soifua le tagata e tusa ai ma fuafuāga a Lē na foafoaina mea uma.

(21) I TAUSAGA O I LE VAOMATUA, A O USIUSITA'I LE FANAUGA A ISARA'ELU I TULAFONO A LE ATUA E FA'ATATAU I FA'AVAE O LE SOIFUA MALŌLŌINA, O LE Ā LE I'UGA NA MAUA?

Ua Ia aumaia i latou ma le ario atoa ma le auro; e leai fo'i se tasi sa vaivai i o latou itu aiga.
Salamo 105:37

O Keriso o le ta'ita'i ma le a'oa'o o Isara'elu anamua, ma sa Ia a'oa'o i latou o le soifua mālōlōina o le tau'i lea o le usita'i i tulafono a le Atua. O le Foma'i Sili sa fa'amālōlōina ma'i i Palesetina na fetalai atu i Ōna tagata mai le ao fa'aniutū, e fa'aiiloa atu iā i latou le mea e tatau ona latou faia, ma le mea o le a faia e le Atua mo i latou. Ua fetalai mai o Ia, "*Afai e te matuā fa'alogi i le leo o le Ali'i lou Atua, ma e fai le amio tonu i Ōna luma, ma e ua'i mai ōu taliga i Āna poloā'iga, ma e tausi i Āna sauniga uma lava, 'Ou te lē tu'uina atu iā te 'oe se tasi o ia ma'i na 'Ou tu'uina atu iā Aikupito; auā o A'u o le Atua, o Lē na te fa'amālōlōina 'oe*" (Eso. 15:26). Sa tu'uina e Keriso iā Isara'elu fa'atonuga fa'apitoa e tusa ai ma a latou amioga e tatau mo o latou olaga, ma na Ia folafola iā i latou, "*E 'ave 'ese e le Atua o ma'i uma lava iā te 'oe*" (Teute. 7:15). Ina ua latou fa'ataunu'uina nei tu'utu'uga, sa fa'amaonia iā i latou lea folafolāga. "E leai fo'i se tasi sa vaivai i o latou itū'aiga."

O nei a'oa'oga e mo i tatou. E i ai tulaga e ao ona fa'amamaluina e tagata uma o ē tausia le soifua mālōlōina. E tatau ona iloa e tagata uma po o ā nei tulaga. O le Ali'i e lē fiafia i le pōuliuli pe a fa'atatau i Āna tulafono, pe fa'ale-tino po o le fa'ale-agaga. O i tatou o le 'au faigaluega fa'atasi ma le Atua mo le toe fa'afo'isia o le soifua mālōlōina i le tino fa'apea ma le agaga.

(22) O LE Ā LE FETALAIGA A KERISO E FA'AILOA AI LONA NAUNAU I LE TOE FA'AFUINA FA'ALETINO MA LE FA'ALEAGAGA O Ē MAMA'I MA MAFATIA?

O le gaoi, e leai se tasi mea e sau ai na o le gaoi, ma fasi, ma fa'aumatia; ua 'Ou sau ina ia latou maua le ola, ia maua atili ai lava.

Ioane 10:10

Ma e tatau ona tatou a'oa'o isi i ala e tausia ma toe maua ai le soifua mālōlōina. Mo ē mama'i e tatau ona tatou fa'aaogā fofō ua tu'uina mai e le Atua i mea na foafoaina, ma fa'asino i latou iā te Ia e To'atasi o Lē e mafai ona toe fa'afuina mea uma. O la tatou galuega o le tu'uina atu o ē mama'i ma mafatia iā Keriso e ala i lima o lo tatou fa'atuatua. E tatau ona a'oa'o i latou ia talitonu i le Foma'i Sili. Ia tatou taofimau i Lana folafolāga, ma tatalo mo le fa'aalia o Lona mana. O le autū moni o le tala lelei o le toe fa'a'ato'atoaina, ma o le Fa'aola ua mana'omia i tatou ia vala'au i ē mama'i, ē ua leai se fa'amoemoe, ma i latou ua pagātia, ia 'a'apa atu i Lona mālōsi.

(23) O LE Ā LE MEA E TATAU IĀ I TATOU ONA FAI, E ALA I LE FA'TUATUA, PE AFAI O LE A AVEA I TATOU MA MEA FAIGALUEGA I LANA GALUEGA O LE FA'AMALŌLŌGA FA'ALETINO MA LE FA'ALEAGAGA?

E fa'atuatua iā te 'Oe o ē ua iloa Lou suafa; auā le Ali'i e, e te lē tu'uina i latou o ē sa'ili iā te 'Oe.

Salamo 9:10

O le mana o le alofa sa i fa'amālōlōga uma a Keriso, ma e na o le 'auai i lea alofa, e ala i le fa'atuatua, e mafai ai ona 'avea tatou ma mea faigaluega mo Lana galuega. Afai tatou te fa'atamala e feso'ota'i atu i tatou i le so'otaga pa'ia ma Keriso, o le tafe e aumaia le mālōsi e ola lelei ai, o le a lē mafai ona fa'atafeina atu mai iā i tatou ma alu atu i tagata. E i ai nofoāga sa lē mafai e le Fa'aola lava ia ona faia o galuega ofoofogia e tele talu ai lo latou lē talitonu. O le taimi nei o le lē talitonu ua tu'u 'ese'ese ai le ekalesia ma lana Fesoasoani pa'ia. O lana taofimau atu i mea moni fa'ale-agaga e vaivai lea. Ona o ia ua leai se fa'atuatua, ua lē fa'ataunu'uina Lona finagalo, ma o Lona mamalu ua faoa.

(24) O LE Ā LE POLOA'IGA IA FAI E LE EKALESIA E 'AVEA MA TULAGA MUAMUA MO LE AUMAIA O LE MANA E GALULUE AI MO NISI?

Ia outou amoina La'u amo, ma ia outou fa'aa'oa'o iā te A'u, auā o A'u Lē agamalū ma le loto maulalo; ona maua lea e outou le mālōlōga mo outou agaga.

Mataio 11:29

O le faia o le galuega a Keriso e maua ai e le ekalesia le folafolāga o Lona fa'atasi ai. Ia outou ō ma a'oa'o i nu'u uma, sa fetalai ai o Ia; "*Fa'auta fo'i, 'Ou te iā te outou i aso uma lava, e o'o lava i le gata'aga o le lalolagi*" (Mata. 28:20). O le 'avea o Lana 'avega o se tasi lea o ulua'i tulaga o le taliaina o Lona mana. O le ola moni o le ekalesia e fa'alagolago lea i lona fa'amaoni e fa'ataunu'uina le fe'au a le Ali'i. O le tu'ulafoā'i o lea galuega o le vala'auina lea o vaivaiga ma le fāi ifō fa'ale-agaga. Pe a leai se galuega e faia mo isi, o le a mavae le alofa, ma fa'anefu ai le fa'atuatua.

(25) SA FA'APEFEA ONA FA'AMATALAINA E IEREMIA LE GALUEGA A LEOLEO MAMOE I A LATOU EKALIESIA?

'Ou te avatu fo'i iā te outou leoleo mamoe e tatau ma Lo'u loto, latou te fafaga iā te outou i le poto ma le fa'autauta.
Jeremia 3:15

O Keriso e finagalo e 'avea Āna 'au'auna o a'oa'o o le ekalesia i le galuega o le tala lelei. Latou te a'oa'o tagata pe fa'apefea ona sa'ili ma laveā'i ē ua lē iloa. Peita'i o le galuega ea lenei o lo'o latou faia? Pagā, e to'afia o lo'o galulue e tau fa'aolaola se malala i se ekalesia ua tauau ina pē! E fia ekalesia o lo'o tausi pei o mamoe mama'i e i latou e tatau ona sa'ili i mamoe o lē iloa! Ma o lea taimi 'atoa e faitau miliona ma miliona o lo'o fano, e lē o iā i latou Keriso.

(26) PE A LĒ FA'ATAUĀINA MANA'OGA FA'ALEAGAGA O ISI E I LATOU UA TA'UA LATOU TE 'AU'AUMEA FA'ATASI MA KERISO, O LE Ā LE MOLIAGA O LE A FA'AILOAINA E LE ATUA E TETE'E IĀ I LATOU I LE ASO O LE FA'AMASINOFA TELE?

Ona fa'apea atu lea o Ia, "'Ou te fai atu iā te outou, 'Ou te le'i iloa outou pe mai fea; inā ō 'ese ia outou iā te A'u, o outou uma o ē fai amio leaga."
Luka 13:27

Ua fa'agae'etia le alofa fa'ale-lagi e o'o ifo i le loloto lē ma-fuatia mo le tagata, ma o agelu e māōfa i le va'ai ifo i ē o lo'o talia lenei alofa tele ua na'o sina fa'afetai fa'atauva'a ua tu'uina atu. O agelu ua latou ofo i le papa'u o le lagona fia fa'afetai mo le alofa o le Atua. Ua silasila ifo ma le matuā māōfa le lagi ona o agaga o tagata o lo'o tu'ulafoa'i. Tatou te iloa ea pe o le ā le finagalo o Keriso i ai? O le ā se lagona o se tamā ma se tinā, pe a la iloa o le lā tama, sa lē iloa i le mālūlū ma le kiona, sa uī ane ma lafoā'i ia e i latou atonu sa mafai ona latou laveā'i iā te ia? E lē maua ea e i la'ua se loto e matuā fa'anoanoa, e matuā ita tele? La te lē ta'uleagaina latou o fasioti tagata ma se ita e vevela pei o la'ua loimata, e mālōsi pei o lo la'ua alofa? O mafatiāga o so'o se tagata, o mafatiāga ia o se atali'i o le Atua, ma o i latou e lē 'a'apa atu se lima fesoasoani i o latou uso ā tagata o le a fano, e fa'atupuina le amiotonu o Lona to'asā. O lenei le to'asā o le Tama'i Mamoe. Mo i latou e ta'u e latou te mafuta ma Keriso, peita'i e lē tāua iā i latou mana'oga o latou uso a tagata, Na te fa'a'iloa atu i le aso tele o le fa'amasinoga, "'Ou te le'i iloa outou pe mai fea; inā ō 'ese ia outou iā te A'u, o outou uma o ē fai amio leaga."

(27) SA FA'APEFEA ONA FA'AMATALAINA E KERISO LE MEA E TATAU ONA TUPU E FA'ATATAU IĀ TE IA MA "LE TULAFONO MA LE 'AU PEROFETA?"

Ua fetalai atu Ia iā te i latou, "O 'upu ia na 'Ou fai atu ai iā te outou, ina ia O'u iā te outou; e tatau ona taunu'u o mea uma ua tusia iā te A'u i le tulafono a Mose, ma le 'au perofeta, ma salamo."
Luka 24:44

I le fa'atonuga i Ōna so'o, e le'i na o le fa'atulagaina o la latou galuega e Keriso, peita'i sa tu'u iā i latou la latou fe'au. Ia a'oa'o tagata, sa fetalai ai o Ia, "*Ia tausi i mea uma ua 'Ou fai atu ai iā te outou.*" E tatau i le 'au so'o ona a'oa'o atu mea sa a'oa'o e Keriso iā te i latou. O mea uma na Ia fetalai atu ai, e lē na o le taimi a o i ai o Ia ma i latou, peita'i e mai le augā perofeta ma a'oa'o o le Feagaiga Tuai, e aofia ai uma iinei. E tapunia i tua a'oa'oga fa'ale-tagata. E leai se avanoa mo uputu'u, mo taofi ma fa'ai'uga a le tagata, po o faigā tulafono tau tapuā'iga. E leai se tulafono ua fa'avaeina mai le pule a le 'au failotu o lo'o aofia i le fe'au. E leai se mea o nei mea e a'oa'oina e 'au'auna a Keriso. "*O le tulafono ma le 'au perofeta,*" ma le molimau o Āna lava afioga ma mea sa fai, o le 'olola tele lea na tu'uina i le 'au so'o e tatau ona latou tu'uina atu i le lalolagi. O le suafa o Keriso o la latou 'upu teuloto lea, o la latou fa'a'iloa e iloa gofie ai, o le fusi o la latou so'ofa'atasiga, o le pulega mo so'o se galuega latou te fai, ma o le mafuāga o lo latou manuia. E leai se mea e lē o i ai Lana fa'a'iloa o le a āloā'ia i Lona mālō.

(28) INA IA FA'ASA'OLOTO MAI LE PULE A LE AGASALA, O Ā MEA TĀUA E LUA O LE UIGA O KERISO E MANA'OMIA IA MAUA E LE TAGATA?

Auā na tu'uina mai e Mose le tulafono, a o le alofa tunoa ma le mea moni, mai iā Iesu Keriso ia.
Ioane 1:17

O le tala lelei e ao ona tu'uina atu, e lē pei o se manatu e leai se ola, a e peita'i o se mālōsi e suia ai le olaga. E naunau le Atua iā i latou uma e talia Lona alofa tunoa ina ia molimau atu i Lona mana. Na te taliaina i latou o ē sa uia le ala o lo'o fai ma mea fa'a'ono'ono iā te Ia; pe afai latou te salamō, ona Ia avatu lea iā te i latou Lona Agaga Pa'ia, tu'uina i latou i se tulaga e matuā fa'amoemoeina, ma 'auina atu i latou i fa'alapopotoga a ē lē talitonu e molimau atu i ai i Lona alofa e leai se tuā'oi. Ua Ia finagalo e molimau atu Āna 'au'auna i le mea moni, ona e ala i Lona alofa tunoa o le a maua ai e tagata uiga fa'apei o Keriso, ma 'oli'oli ai i le mautinoāga i le tele o Lona alofa. Na te 'auina atu i tatou e fai ma molimau o le a lē mafai ona fa'amalieina se'i vaganā ua toe maua mai ma toe fa'afo'isia le aigā tagata i lo latou tofi pa'ia, o Ōna atali'i ma afāfine.

(29) E FA'APEFEA ONA FA'AMATALAINA E ISAIA LE TAUSIGA ALOFA MA LE AGAMALŪ A KERISO O "TAMA'I MAMOE" O LANA LAFU, I 'UPU E MATUĀ FA'APALEPALE E FA'AFILEMŪ MA 'O'OTIA AI LOTO?

Na te leoleoina Lona lafu e pei o le leoleo mamoe; Na te sapaia tama'i mamoe i Ōna lima, ma tau'ave i latou i Lona fatafata; Na te ta'ita'i filemū i mamoe ua fananau.

Isaia 40:11

O iā Keriso le agamalū o le leoleo mamoe, le alofa fa'a-mātua, ma le alofa tunoa e lē ma-fa'atusaina o le Fa'aola fa'apalepale. O Āna fa'amanuiāga Na te tu'uina mai i uiga matagofie 'ese'ese. Ua Ia lē na ona fa'ailoa mai nei fa'amanuiāga; Na te tu'uina mai ia mea i 'auāla matagofie, ina iā fa'atupu ai le fa'anaunau e fia maua ia mea. O lea e fa'ailoa atu ai e Āna 'au'auna tamā'o'aiga o le mamalu o le Meaalofa e lē mafai ona fa'amatalaina. O le alofa ofoofogia o Keriso e fa'aliusuāvai ma to'ilalo ai loto, a e lē o le toe fa'amanatu o matā'upu 'ese'ese e leai se mea e maua ai. *"Ia outou fa'amafanafana, inā fa'amafanafana atu ia outou i Lo'u nu'u,"* ua fetalai mai ai lo outou Atua" **(Isa. 40:1)**. "Alu a'e i le mauga maua luga, o 'oe lē aumai le tala lelei iā Siona; ia matuā leo tele, o 'oe lē aumai le tala lelei iā Ierusalem; ia leo tele, 'aua le fefe; fai atu i 'a'ai o Iuta, 'Fa'auta i lo outou Atua!... Fa'auta, ua iā te Ia Lana tau, ...Na te leoleoina Lona lafu e pei o le leoleo mamoe; Na te sapaia tama'i mamoe i Ōna lima, ma tau'ave i latou i Lona fatafata" **(F. 9-11)**.

(30) INA IA VA'AIA KERISO E "ATO'ATO A LONA MATAGOFIE," E FA'APEFEA ONA E NA O LE AIGĀ TAGATA E FA'AĀTAINA LEA FA'ATUSA I LUMA O LE LALOLAGI?

Auā o ē na silafia e la anamua, na Ia tofia anamua fo'i, ia foliga i latou i Lona Ālo, ia foliga iā te Ia, ina 'avea o ia ma ulumatua o le 'au uso e to'atele.

Roma 8:29

Ia fa'ailoa i tagata o Ia Lē "e silisili 'ese i mano," ma o le To'atasi "ua 'ato'atoa ona lelei o Ia" **(Pese a Solo. 5:10, 16)**. E lē mafai na o 'upu ona fa'ailoaina atu. E tatau ona ātagia i le amio ma fa'aalitinoina i le olaga. O Keriso o lo'o fa'aalia Ōna fofoga i so'o uma. O i latou uma lava na mua'i tofia e le Atua ina "ia foliga i latou i Lona Ālo" **(Rom. 8:29)**. Mai iā i latou uma ta'ito'atasi, e tatau ona fa'ailoa ai i le lalolagi le fa'apalepale o Keriso, Lona pa'ia, agamalū, alofa mutimutivale, ma le 'upu moni.

(31) INA UA UMA ONA FA'APOTOPOTO FA'ATASI LE 'AU SO'O MA TATALO MO LE AGAGA PA'IA, O LE Ā LE T'UGA NA O'O I AI I LE ASO MATAGOFIE O LE PENETEKOSO?

Ona papatisoina lea o ē na talia lana 'upu ma le fiafia; o lea aso fo'i ua fa'aopoopoina ai pe tolu afe o tagata.

Galuega 2:41

O ulua'i so'o sa latou ō atu ma tala'i le 'upu. Na latou fa'aalia Keriso i o latou olaga. Ma sa galue le Ali'i fa'atasi ma i latou, "ua fa'amaonia le 'upu i fa'ailoga na mulimuli ane ai" **(Mare. 16:20)**. O nei so'o sa matuā saunia i latou mo la latou galuega. A o lumana'i ai le aso Penetekoso sa potopoto fa'atasi i latou, ma tu'u 'ese mea uma sa fe'ese'esea'i ai. Sa loto gatasi i latou. Sa latou talitonu i le folafolāga a Keriso o le a foa'i mai le fa'amanuiāga, ma na latou tatalo ma le fa'atuatua. Latou te le'i tatalo mo se manuia na'o i latou lava; o le avega mamafa sa i a i latou o le fa'aolaina lea o agaga. O le tala lelei sa tatau ona 'aveina atu i tulu'iga o le lalolagi, ma ua latou fa'ailoa atu ai le foa'iina mai o le mana sa folafolaina e Keriso. O lea na liligi ifo ai le Agaga Pa'ia, ma e afa ma afe na liua ai i le aso e tasi.

(32) INA O LE A LATA LE AFIO FA'ALUA MAI O KERISO, O LE Ā LE MEA MATA'UTIA TELE E TUPU O LE A FA'A'UPEGAINA AI TAGATA O LE ATUA MO LE FA'AMANUIĀGA O LE LAVEA'IINA O AGAGA NA LĒ ILOA?

O lenei, le 'au uso e, onosa'i ia se'ia o'o i le afio mai o le Ali'i. Fa'auta, e fa'atali lē galue fanua i le fua aogā o le 'ele'ele, e fa'atalitali i ai, se'ia maua le ūaga muamua ma le mulimuli.
Iakopo 5:7

E fa'apea fo'i aso nei. Ia lē na o mānatunatuga o tagata, a ia tala'iina le Afioga a le Atua. Ia 'ave 'ese e tagata Kerisia no o latou fe-'ese'esea'iga, ma tu'u atu i latou i le Atua mo le lavea'iina o ē ua lē iloa. Ia latou ōle atu i le fa'atuatua mo le fa'amanuiāga, ona foa'i mai lea. O le liligiina ifo o le Agaga Pa'ia i aso o le 'au aposetolo o le "uāga muamua lea," ma sa matuā matagofie le i'uga. A e peita'i o le "uāga mulimuli" o le a sili atu ona fa'ateleina **(Ioelu 2:23)**.
O i latou uma e fa'apa'aina o latou ola, tino, ma agaga mo le Atua o le a fou pea ona talia o le liligiina ifo o le mālōsi o le tino ma le mafaufau. E lē uma 'oa o le lagi e latou te maua i taimi e ōle atu ai. E avatu e Keriso iā i latou le māmāva o Lona lava agaga, o le ola o Lona lava soifua. O le Agaga Pa'ia e tu'uina atu Lona mana aupito i maoa'e e galue i loto ma mafaufau. O le alofa tunoa o le Atua e fa'alateleina ma fa'atupuina lo latou iloa, ma o le 'ato'atoa o Lona uiga pa'ia e ulufale mai e fesoasoani i le galuega o le lavea'iina o agaga. E ala i le galulue fa'atasi ma Keriso, o i latou e 'ato'atoa uma iā te Ia, ma e ui i o latou vaivaiga fa'ale-tagata, e mafai e i latou ona faia galuega a le Silisili 'Ese.

(33) E UI INA E LĒ O TALIAINA E TAGATA UMA LE TALA LELEI O LE ALOFA TUNOA O LE ATUA, E FA'APEFEA ONA FA'AMATALAINA E LE PEROFETA O ISAIA LE TALI A KERISO I LE TOGIOLAINA O ĀNA MEA UMA NA FA'ATAUINA?

Ona o le tigā o Lona Agaga Na te iloa ai Lana fanau, e malie ai o Ia; o le malamalama mai iā te Ia e ta'uamiotonuina ai tagata e to'atele e La'u au'auna ua amiotonu; auā e tau'ave e Ia a latou amio leaga.
Isaia 53:11

O le Fa'aola e matuā naunau e fa'atinoina Lona alofa tunoa ma fa'ailogaina Lana amio i luga o le lalolagi 'atoa. O Lana mea totino sa fa'atauina, ma e finagalo o Ia e tu'u tagata ia sa'oloto, ma ia mamā, ma pa'ia. E ui ina galue Satani ia lē fa'ataunu'uina lea fuafuāga, peita'i e ala i le toto na fa'amaligiina mo le lalolagi e i ai mea e ao ona manumālō ai, e maua ai le vi'iga o le Atua ma le Tama'i Mamoe. E lē fa'amalieina le finagalo o Keriso se'i vaganā ua 'ato'atoa le manumālō ma "Ia iloa le tigā o Lona finagalo, e malie ai o Ia" **(Isa. 53:11)**. O le a fa'alogo nu'u uma o le lalolagi i le tala lelei o Lona alofa tunoa. E lē o i latou uma o le a maua Lona alofa tunoa; peita'i "E 'au'auna iā te Ia le fanau; e ta'ua i latou e fai ma tupulaga mo le Ali'i" **(Sala. 22:30)**. "O le mālō, ma le pule, 'atoa ma le mamalu o le mālō i lalo ifo o le lagi uma, e tu'uina atu ia i le nu'u o le 'au pa'ia a le Silisili 'Ese" **(Tani. 7:27)**, ma "E tumu le lalolagi i le malamalama o le Ali'i, e pei ona ufitia o le iliti tai i le suāsami" **(Isa. 11:9)**. "E pau mai i sisifo, latou te mātata'u i le suafa o le Ali'i; e pau mai fo'i i le mea e alu a'e ai le lā" **(Isa. 59:19)**.
"E matuā matagofie i luga o mauga o vae o lē ua fai mai le tala lelei, o lē logologo mai le manuia, ua tala mai le tala lelei; ua fa'a'ailoa mai le olataga; ua fai mai iā Siona, O lo'o pule lou Atua!... Ia 'alalaga fiafia fa'atasi outou o mea fa'atafuna'ina;... auā ua fa'amafanafanaina Lona nu'u e le Ali'i.... Ua tō'ese e le Ali'i le ofu i Lona 'a'ao pa'ia i luma o nu'u uma; ua iloa fo'i i tulu'iga uma o le lalolagi le olataga moi lo tatou Atua" (Isa. 52:7-10).

<i>Ou te naunau e 'avea le su'esu'eina o le Tusi Pa'ia o se vaega e aupito sili le tāua o lo'u olaga i aso ta'itasi ina ia 'ou maua ai fa'amanuiāga mai le a'oa'oina atili o le alofa o le Atua mo a'u.</i>		
Li'o le Tali:	Ioe	Lē Mautonu
<i>O le a 'ou tatalo mo le alofa ma le lotogatasi ia 'avea o le uiga e pulea lo'u olaga fa'apea ma la'u ekalesia, ina ia mafai ai ona fa'apa'ū mai le ūaga mulimuli.</i>		
Li'o le Tali:	Ioe	Lē Mautonu
<i>O lo'o 'ou tepataula'i i le fa'ai'uga o le agasala ma le toe fo'i mai o lo tatou Ali'i o Iesu Keriso.</i>		
Li'o le Tali:	Ioe	Lē Mautonu

Li'o le Tali: **Ioe** **Lē Mautonu**

[illegible]

I Lo'u Tamā Ma Lo 'Outou Tamā

Lesona 14

(1) SA FA'APEFEA ONA FA'AMATALAINA E IOANE LE MAMALU FA'ALE-ATUA O KERISO?

Ua liu tino tagata le Lokou, sa mau fo'i o Ia ma i tatou, (na matou matamata i Lona mamalu; o le mamalu lava lea o le Ālo e to'atasi o le Tamā,) ua tumu o Ia i le alofa tunoa ma le fa'amaoni.

Ioane 1:14

Ua o'o i le taimi e afio a'e ai Keriso i le nofoali'i o Lona Tamā. Ona o Ia o Lē ua manumālō, ua lata nei ona toe fo'i o Ia i maota i le lagi fa'atasi ma fa'ailoga o Lona manumālō. A o lumana'i ai Lona maliu sa Ia fa'a'iloa atu i Lona Tamā, "*Ua 'Ou fa'aumaina le galuega na E tu'uina mai iā te A'u 'Ou te faia*" (**Ioā. 17:4**). Ina ua mae'a Lona toe tū sa galue pea Ia i le lalolagi i ni nai aso, ina ia masani Ōna so'o ma Ia i Lona tino mamalu sa toe tū mai ai. O lenei ua sauni o Ia mo le afio 'ese. Ua Ia fa'amaonia ma le 'ato'atoa le tonu o Ia o le Fa'aola o lo'o soifua. E lē tatau fo'i i Ōna so'o ona toe ta'u fa'atasia o Ia ma le tu'ugamau. Ia latou manatu iā te Ia o Lē ua fa'amamaluina i luma o le atulaulau.

(2) I LE NOFOĀGA MA LE TAIMI O LE AFIO A'E O KERISO, O Ā 'UPU FA'AMAFANAFANA NA TU'U ATU E AGELU I LE 'AU SO'O A O TŌ'ESEA ATU O IA MAI LA LATOU VA'AI?

Ua latou tulimata'i a'e i le lagi, a o afio a'e o Ia, fa'auta fo'i, o tagata e to'alua ua tutū mai iā te i latou ma ofu sisina. Ua la fai mai, "O outou tagata Kalilaia e, se ā le mea tou te tutū ai ma va'ava'ai i le lagi? O Iesu lenā, ua 'aveina a'e nai iā te outou i le lagi, e fa'apea ona toe afio mai o Ia, pei o Lona afio atu i le lagi na outou va'ava'ai i ai."

Galuega 1:10, 11

O le nofoāga e si'itia a'e ai o Ia, na filifilia e Iesu le 'ele'ele sa fa'apa'iaina e ala i Lona fa'atasi ai a o mafuta o Ia ma tagata. E lē o le Mauga o Siona, o lo'o i ai le 'a'ai o Tavita, e lē o le Mauga o Moria, le tulaga o le malumalu, sa tatau ona fa'apea ona fa'aaloalogia. O i inā sa fa'atauemu ai ma te'ena Keriso. O i inā sa te'ena ai i tua galu o lo'o mālōlosi pea o le alofa tunoa e loto ua matuā fa'ama'a'aina. O Iesu, i Lona lē lavā ma le finagalo mafatia, na Ia sa'ilia se mapusaga i le Mauga o Olive. O le mamalu o le Atua e lē ma-fa'amatalaina, ina ua afio 'ese mai le ulua'i malumalu, sa tū i le mauga i sasa'e, ua foliga mai e le'i finagalo ia tu'ulafoā'i le 'a'ai filifilia; o lea sa tū Keriso i luga o Olive, ma le finagalo naunauta'i a o silasila atu i Ieruselema. O la'au ma vanu o le mauga sa fa'apa'iaina i Āna talosaga ma Ōna loifofoga. O ōna tofē sa fetalia'i i le 'alaga o le manumālō a le motu o tagata sa 'alagaina o Ia le Tupu. I ōna 'auvae mauga sa taliaina ai o Ia i le aiga o Lasalo i Petania. I le laugatasi o le fa'ato'āga i Ketesemane sa tatalo fa'atauānau ai ma le mafatia tele, na o Ia. Mai lenei mauga o le a afio a'e ai o Ia i le lagi. I luga o lona tumutumu o le a pa'i ai Ōna 'a'ao i Lona toe afio mai. O le a lē o se tagata o fa'anoanoāga, peita'i o le Tupu mamalu ma le manumālō, o le a tū'a'ao i luga o le Mauga o Olive, a o tu'u fa'atasia "aleluia" fa'a-Eperu ma "osana" a nu'u 'ese, ma leo o le 'au fa'aolaina e pei o se 'au tau mata'utia o le a fa'ateleina ai le 'alaga, Fa'apale Ia le Ali'i o mea uma!

(3) A O FAIMALAGA ATU IESU MA LE 'AU SO'O AGA'I I LE MAUGA O OLIVE MO LEA TAIMI MULIMULI, O LE Ā LE MEA NA IA FAIA E SAUNIA AI I LATOU MO LA LATOU GALUEGA O I O LATOU LUMA?

Ona tatalaina lea e Ia o latou loto, ina ia lagona ai Tusi.

Luka 24:45

Ua aga'i atu nei o Ia i le mauga fa'atasi ma le to'asefulu ma le tasi o Ōna so'o. A o latou aga'i atu i le faitoto'a o Ieruselema, e tele mata na fia iloa ma mata'ia le fa'apotopotoga o nai tagata to'aitiiti o lo'o ta'imua ai Lē sa ta'usalaina ma fa'asatauroina i luma o ta'ita'i. O le 'au so'o e latou te le'i iloa o la latou talanoāga mulimuli lea ma lo latou Matai. Sa fa'aaogā e Iesu le toe taimi e talanoa ma toe fa'amanatu ai i Ōna so'o Āna apoapoa'iga na tu'u atu muamua iā i latou. Ina ua lata i Ketesemane, na Ia fa'atali se'i toe manatua i o latou mafaufau a'oa'oga na Ia tu'u atu iā te i latou i le pō o Lona mafatiāga tele. Sa fa'apea ona Ia toe silasila atu i le vine na Ia fa'atua i ai le so'ofa'atasi o Ia i Lana ekalesia ma Lona Tamā; sa Ia toe fa'amanatuina mea moni sa Ia fofola atu i lea taimi. O Lona

si'osi'omāga o fa'amanatuga o Lona alofa e lē mafai ona tauia. E o'o lava i so'o sa matuā pele i Lona finagalo, i le itūlā o Lona fa'alumaina, sa tu'ua'iina ma tu'ulafoā'iina Ia.

(4) INA UA LATALATA I LE TAIMI O KERISO MO LANA MALAGA E TOE FO'I AI I LONA NOFOALI'I MAMALU, O Ā 'UPU FA'ALOTOTELE NA IA TU'U MAI MO I LATOU UMA SA IA AFIO MAI E LAVEĀ'I?

Ia outou a'oa'o atu iā te i latou ia tausī i mea uma ua 'Ou fai atu ai iā te outou. Fa'auta fo'i 'Ou te iā te outou i aso uma lava, e o'o lava i le gata'aga o le lalolagi.

Mataio 28:20

O Keriso na aumau i le lalolagi mo le tolusefulu ma le tolu tausaga; sa Ia lavātia le ta'u fa'atauva'aina, le fa'alumaina, ma le tauemuina; sa te'ena o Ia ma fa'satauroina. A o nei ua lata ona si'itia o Ia i Lona nofoāli'i mamalu, - a o Ia toe iloiloina le tulaga lē fa'afetai o tagata sa Ia afio mai e laveā'i, - pe mata o le a Ia lē tō'esēa mai iā i latou Lona agalelei ma le tigāalofa? E lē o Lona alofa o le totonugalemū i le mālō e tauāloaina ai o Ia, e i ai agelu e le'i agasala o lo'o fa'atalitali e faia Lona finagalo? E leai; o Lana folafolāga iā i latou e alofa i ai o lo'o i le lalolagi, e fa'apea, *"Ou te iā te outou i aso uma lava, e o'o lava i le gata'aga o le lalolagi."*

(5) A O AFIO LEMŪ A'E IA I LE LAGI, MA UA FA'ALOGOINA LEO MATAGOFIE O PESEGA FA'ALELAGI, O LE Ā LANA MEA MULIMULI NA FAIA UA IA FA'AILOA AI LONA ALOFA MO ŌNA SO'O?

Ua o'o ina o fa'amanuia e Ia iā te i latou, ona te'a 'ese lea o Ia iā te i latou, ua si'itia i le lagi.

Luka 24:51

Ina ua taunu'u i le Mauga o Olive, sa ta'ita'iina e Iesu le ala e ui ai i le tumutumu, i le vai'a'ai o Petania. Ua tū o Ia, ma ua fa'apotopotole le 'au so'o i Ōna tafatafa. O 'ave malamalama e foliga ua susulu mai Ōna fofoga a o Ia silasila alofa atu iā i latou. Na te le'i a'oa'i atu i o latou vaivaiga ma sesē; o 'upu fa'apelepele e sili le loloto sa pa'ū mulimuli i o latou taliga mai fofoga o lo latou Ali'i. Ua Ia fa'alaloa ona 'a'ao ma fa'amanuia atu, ma e peisea'i ua tu'u atu se ta'utinoga o Lana tausiga ma Lana puipuiga, sa afio lemū a'e o Ia mai iā i latou, ua 'aveina a'e aga'i i le lagi e se mana e sili le mālōsi i se mea fa'atosina fa'ale-lalolagi. A o afio a'e o Ia, o le 'au so'o ua fa'atumulia i le mata'u ma le ofo, o lo'o taula'i pea le va'ai mo se va'aiga mulimuli o lo latou Ali'i. O le ao mamalu sa ufitia ai o Ia mai la latou va'ai; ma o afioga sa toe o'o mai iā i latou a o taliaina o Ia e kariota o agelu, e fa'apea, *"Fa'auta, 'Ou te iā te outou i aso uma, e o'o lava i le gata'aga o le lalolagi."* O le taimi lava lea sa o'o mai ai iā i latou o vi'iga e sili ona mālīe ma le matagofie mai 'au faipese a agelu.

A o pulato'a a'e pea le 'au so'o, sa fa'alogoina leo pei o pese mālīe o tautala mai iā i latou. Ua fāliu i latou, ma iloa atu agelu tino i tagata e to'alua, ua fa'apea mai iā te i latou, "O outou tagata Kalilaia e, se ā le mea tou te tutū ai, ma va'ava'ai i le lagi? O Iesu lenā ua 'aveina a'e nai iā te outou i le lagi, e fa'apea ona toe afio mai o Ia, pei o Lona afio atu i le lagi na outou va'ava'ai i ai" (**Gal. 1:11**).

(6) E PEI ONA FA'AMATALAINA E PAULO I LE TUSI O EPERU, O LE Ā LE FA'ATONUGA PA'IA SA TU'U I AGELU E TO'ALUA IA FA'ATAUNU'UINA?

E lē o agaga e au'auna ea i latou uma, na 'a'auina e au'auna ona o i latou o ē a maua le ola?

Eperu 1:14

O agelu nei mai le fa'apotopotoga sa fa'atali mai i ao pupula e fa'afeao Iesu i Lona aiga i le lagi. I ē aupito fa'aeaina o le 'au agelu, o i la'ua ia e to'alua sa i ai i le tu'ugamau i le toe tū a'e o Keriso, ma sa i ai fa'atasi ma Ia i Lona soifuāga 'atoa i le lalolagi. Ma le matuā naunauta'i, o le lagi 'atoa sa fa'atali mo le fa'ai'uina o Lona āumau i se lalolagi sa fa'aleagaina e le fetu'u o le agasala. Ua o'o nei i le taimi e talia ai e le lagi ma le atu laulau lo latou Tupu. Pe le'i naunau ea ia agelu e to'alua e fia fa'atasi ma isi e talia Iesu? Peita'i ona o le tigāalofa ma le alofa mutimutivale mo i latou ua Ia tu'ua, sa la'ua fa'atali e tu'uina iā te i latou se fa'amafanafanaga. "E lē o agaga e 'au'auna ea i latou uma, ua 'a'auina e 'au'auna ona o i latou o ē a maua le ola?"

(7) PE A FA'ATAUNU'UINA LE FOLAFOLAGA I LE TOE AFIO MAI O KERISO O LO'O I LE IOANE 14:3, O LE Ā LE ALA E TOE AFIO MAI AI O IA?

Pe a sau le Atali'i o le tagata i Lona mamalu, ma le 'au agelu pa'ia uma fa'atasi ma Ia, ona ti'eti'e ai lea o Ia i Lona nofoali'i mamalu.

Mataio 25:31

Ua afio a'e Keriso i le lagi i Lona tino tagata. Sa va'aia e le 'au so'o le ao o taliaina o Ia. O Iesu lava lea sa fe'oa'i, ma talanoa, ma tatalo ma i latou; sa Na vaevae le areto ma i latou; sa fa'atasi ma i latou i o latou va'a i luga o le vaituloto; ma i lea lava aso sa tautigā fa'atasi ma i latou a o a'ea le Mauga o Olive,- o Iesu lava lea ua afio a'e nei e fa'atasi ma Lona Tamā i Lona nofoali'i. Ma ua ta'utino atu agelu iā i latou, o Ia lea sa latou va'aia o afio a'e i le lagi, e toe afio ifo e pei ona Ia afio a'e. E toe afio mai o Ia "ma ao, e iloa atu fo'i o Ia e mata o tagata uma" **(Fa'aal. 1:7)**. "Auā e afio ifo mai le lagi le Ali'i lava, ma le 'alaga, ma le leo o le agelu sili, ma le pū a le Atua; e toe tutū mai o ē ua oti o iā Keriso" **(I Tesa. 4:16)**. *"Pe a sau le Atali'i o le tagata i Lona mamalu, ma le 'au pa'ia uma fa'atasi ma Ia, ona ti'eti'e ai lea o Ia i Lona nofoali'i mamalu"* **(Mata. 25:31)**. O le a fa'apea ona fa'ataunu'uina o le folafolāga a le Ali'i lava iā i Ōna so'o, *"Afai fo'i 'Ou te alu ma sauni se mea e nonofo ai outou, 'Ou te toe sau, 'Ou te talia fo'i outou ia fa'atasi ma A'u; ina ia i ai outou i le mea 'Ou te i ai A'u"* **(Ioa. 14:3)**. E ao ona 'oli'oli le 'au so'o i le fa'amoemoe o le toe afio mai o lo latou Ali'i.

(8) A O SALALAU SOLO LE TALA I LE TOE TŪ A'E O KERISO MA LONA AFIO A'E I LE LAGI, SA FA'APEFEA ONA FA'AILOA ATU E LE 'AU TALITONU LO LATOU FA'AMOEMOE UA TOE FA'AFUINA?

Ua latou vivi'i atu i le Atua, ma ua alofaina e le nu'u uma lava. Ua fa'aopoopoina i le ekalesia e le Ali'i i aso fai so'o o ē ua fa'aolaina.

Galuega 2:47

Ina ua toe fo'i le 'au so'o i Ierusalema, sa va'ava'ai ma le ofo tagata iā i latou. Ina ua mavae le fa'amasinoga ma le fa'asatauroina o Keriso, sa i ai le manatu o le a fa'aalia iā i latou le loto fa'anoanoa ma le masiasi. O o latou fili sa fa'amoemoe e va'aia i o latou foliga se fa'aaliga o le fa'avaavau ma le to'ilalo. A e peita'i sa na o le fiafia ma le oli'oli i le manumālō. O latou foliga ua fa'apupulaina i se fiafia e lē pogai mai i le lalolagi. Latou te lē fa'anoanoa ona o fa'amoemoe ua lē taunu'u, a e ua fa'atumulia i vi'iga ma le fa'afetai i le Atua. Sa latou fa'aailoa ma le fiafia le tala ofoofogia i le toe tū mai o Keriso ma Lona afio a'e i le lagi, ma o la latou molimau sa talia e le to'atele.

(9) A O FA'AALIA E LE 'AU SO'O LO LATOU FIAFIA I FOLAFOLAGA A LE ATUA, O LE Ā LE FOLAFOLAGA MAUMAUTUTŪ NA TU'U ATU E IESU MO I LATOU SA LATOU 'U'UMAUIA?

O lea aso tou te lē toe fesili mai ai iā te A'u i se mea e tasi. E moni, e moni, Ou te fai atu iā te outou, o mea uma tou te ōle atu ai i le Tamā i Lo'u igoa, e foa'i mai e Ia iā te outou.

Ioane 16:23

Ua lē toe i ai se masalosalogā o le 'au so'o i le lumana'i. Sa latou iloa ua i ai Iesu i le lagi, ma o Ōna tigāalofa o lo'o i ai pea mo i latou. Ua latou iloa o lo'o i ai la latou Uō i le nofoali'i o le Atua, ma ua latou naunau e fa'aailoa atu o latou mana'oga i le Atua e ala i le suafa o Iesu. I le āva ma le migao, ua latou punou ifo i talosaga, ma toe fa'amanatu le ta'utinoga, *"O mea uma tou te ōle atu ai i le Tamā i Lo'u igoa, e foa'i mai e Ia iā te outou. Ua o'o mai nei lava tou te le'i ōle atu i se mea i Lo'u igoa; inā ōle atu ia, ona outou maua ai lea, ina ia 'ato'atoa ai lo outou oli'oli"* **(Ioa. 16:23, 24)**. Sa latou tu'u atu le lima o le fa'atuatua ia sili atu lona maualuga, ma le finauga mālōsi fa'apea, "O Keriso, o Ia na maluu, a ua toe tū mai lava o Ia; o lo'o i le itū taumatau fo'i o le Atua, o lo'o fautua fo'i o Ia mo i tatou" **(Rom. 8:34)**. Ma o le Penetekoso na aumai ai iā i latou le 'ato'atoāga o le 'oli'oli i le fa'atasi mai o le Fesoasoani, pei ona folafola mai e Keriso.

(10) IA FAITAU I LE AGAGA TATALO MA LE ĀVA TELE FUAI'UPU MAI LE SALAMO 24. O LE Ā LE SUAFA FA'AEAINA O LO'O 'ALAGAINA PEA LAVA PEA MA LE OLI'OLI E AGELU?

Inā fa'aea ia i luga o outou ūlu, outou faitoto'a e; ia fa'aeaina i luga o outou puipui o le fa'avavau, se'i ulu atu le Tupu mamalu. O ai ea lenei Tupu mamalu? O leova, Lē malosi ma le fitafita, o leova le fitafita i le taua. Inā fa'aea ia i luga o outou ūlu, outou faitoto'a e; ia fa'aeaina i luga o outou puipui o le fa'avavau e, se'i ūlu atu ai le Tupu mamalu. O ai ea lenei Tupu mamalu? O leova o 'au, o Ia lava le Tupu mamalu.

Salamo 24:7-10

Sa fa'atali le lagi uma e talia Āloā'ia le Fa'aola i maota o le lagi. A o Ia afio a'e, sa Ia ta'imua le ala a e mulimuli atu le to'atele o i latou na fa'apagotāina a e na tu'u fa'asa'oloto i Lona toe tū. O 'au o le lagi ua 'alalaga i fa'ane'ene'ega ma vi'iga fa'ale-lagi, ma ua 'au fa'atasi i le solo fiafia.

A o latou lata atu i le 'a'ai o le Atua, o le lu'i ua tu'uina atu e agelu fa'afeao,-

"Inā fa'aea iā i luga o outou ūlu, outou faitoto'a e;

Ia fa'aeaina i luga o outou puipui o le fa'avavau e,

Se'i ūlu atu ai le Tupu mamalu."

Sa tali ma le 'oli'oli leoleo faitoto'a o lo'o fa'atali,-

"O ai ea lenei Tupu mamalu?"

Ua fai mai i latou, e lē ona ua latou lē iloa o Ia, a e peita'i ina ia latou fa'alogo i le tali o fa'ane'ene'ega fa'aeaina,-

"O le Ali'i, Lē mālōsi ma le fitafita,

O le Ali'i le fitafita i le taua!

Inā fa'aea ia i luga o outou ūlu, outou, faitoto'a e;

Ia fa'aeaina i luga o outou puipui o le fa'avavau e;

Se'i ūlu atu ai le Tupu mamalu."

Ua toe lagona fo'i le lu'iga, "O ai ea lenei Tupu mamalu?" auā o agelu e lē mafai ona maua se vaivai e fa'alogo i le fa'aeaina o Lona suafa mamalu. O agelu fa'afeao ua tali atu,-

"O le Atua o 'au;

O Ia lava le Tupu mamalu!"

Ona tatalaina mai lea o faitoto'a o le 'a'ai o le Atua, ma ua ūlu atu ai i totonu o puipui le fa'apotopotoga a agelu a o fa'ateleina pesega fiafia.

(11) E FA'AFEFA ONA FA'AMATALA E IOANE, A O OSOFIA E LE AGAGA PA'IA, LE NOFOĀLI'I MATAGOFIE O LE ATUA I LE MEA O LO'O POTOPOTO FA'ATASI AI LE 'AU PA'IA MAMALU E FA'AFEILOĀ'I LO LATOU FA'AOLA?

O Lē ti'eti'e mai fo'i ua pei o le ma'a iasepi ma le salikea Lona tino mai; ua si'osi'oina fo'i le nofoali'i e le nuanua e pei o le samaraki lona tino mai.

Fa'aaliga 4:3

O lo'o ua tū mai le nofoāli'i, ua si'omia e le nuanua o folafolāga. O i ai kerupi ma serafi. Ua potopoto mai ai o ta'ita'i o 'au a agelu, o atali'i o le Atua, ma sui o lalolagi e le'i pa'ū'ū. O le fono fa'ale-lagi na molia ai e Lusifero le Atua ma Lona Ālo, o sui o ia lalolagi uma lē agasala sa manatu Satani e fa'avae ai lona mālō,- o lo'o fa'atasi ai uma e tali āloā'ia le Fa'aola. O lo'o latou naunau e molimauina Lona manumālō ma fa'amamaluina lo latou Tupu.

(12) O LE Ā LE FA'ANAUNUGA O LE FINAGALO O KERISO SA IA AUMAIA I LONA TAMĀ INA IA FA'ATAUNU'U AI LE FOLAFOLĀGA NA FAIA A E LE'I FA'AVAEINA LE LALOLAGI?

"Lo'u Tamā e, o Lo'u loto lenei iā i latou ua e foa'iina mai iā te A'u, ina ia latou fa'atasi ma A'u i le mea 'Ou te i ai, ina ia latou va'aia Lo'u manu'a na e foa'ia mai iā te A'u; auā ua e alofa mai iā te A'u a o le'i fa'avaeina le lalolagi."

Ioane 17:24

Peita'i sa Ia tālo 'ese i tua i latou. E lē o le taimi lenei; Na te lē mafai ona taliaina nei le pale mamalu ma le la'e'i fa'a-tupu. Ua Ia ūlu atu i le afio'aga o Lona Tamā. Ua Ia fa'asino i Lona ao manu'a, le itū na tu'ia i le tao, o 'a'ao sa fa'amanu'aina; ua Ia sisi'i ona 'a'ao, o lo'o i ai fa'aailoga o fao. Na te fa'asino i fa'aailoga o Lona manumālō; ua tu'u atu i le Atua le i'uga o le seleselega, o i latou na toe tutū ma Ia e faia ma sui o le to'atele o le a ō a'e mai tu'ugamau i Lona afio fa'alua mai. Sa Ia fa'alatalata atu i le Tamā, o Lē la te 'oli'oli fa'atasi ona o se to'atasi e salamō; o Lē faipesega ona o se to'atasi. A o le'i fa'avaeina le lalolagi, o le Tamā ma le Ālo sa fa'atasi i se feagaiga e fa'asaoina ai le tagata pe a fa'ato'ilaloina ia e Satani. Sa so'o fa'atasi o La 'a'ao i se ta'utinoga pa'ia ia tatau ona 'avea Keriso o le mea moni mo le aigā tagata. O lenei feagaiga ua uma ona fa'ataunu'u e Keriso. A o i ai o Ia i luga o le satauro ma Ia 'alaga atu, *"Ua taunu'u"* (Ioā. 19:30), sa Ia fetalai atu lava i le Tamā. O le fa'amaapoopoga ua 'ato'atoa ona fa'ataunu'uina. O lea ua Ia ta'utino atu: Tamā e, ua mae'a. Ua 'Ou faia Lou finagalo, Lo'u Atua e. Ua 'Ou fa'amae'aina le galuega o le fa'aolataga. Afai ua fa'amalieina

Lau fa'amasinoga tonu, "O Lo'u loto lenei iā te i latou ua E foa'iina mai iā te A'u, ina ia latou fa'atasi ma A'u i le mea 'Ou te i ai" (Ioa. 17:24).

(13) O LE Ā LE MEA SA TA'UINA I AGELU MA O LO'O LATOU FAIA MA LE FIAFIA?

Ua fa'apea mai fo'i o Ia i Lona toe aumai o Lana ulumatua i le lalolagi, "Ma ia ifo agelu uma lava a le Atua iā te Ia." Eperu 1:6

Sa fa'alogoina le si'ufofoga o le Atua o lo'o folafola mai ua fa'amalieina le fa'amasinoga. Ua to'ilalo Satani. O i latou o galulue ma o mafatia mo Keriso i le lalolagi ua "talia ona o Lē ua alofagia" (Efe. 1:6). I luma o agelu ma sui o lalolagi e le'i pa'ū'ū, sa fa'ailoa mai nei ua ta'uamionuina i latou. O le mea e i ai o Ia, e i ai fo'i Lana ekalesia. "O le alofa ma le fa'amaoni ua la fetaia'i; o le amiotonu ma le filemū ua la feāsogi" (Sala. 85:10). O 'a'ao o le Tamā ua si'osi'omia ai Lona Ālo, ma o le afioga ua tu'u atu, "Ia ifo agelu uma lava a le Atua iā te Ia" (Epe. 1:6).

Ona o le 'oli'oli ua lē mafai ona fa'aleoina, o ta'ita'i ma itūmālō ma mālō ua latou fa'ailoa atu le silisili 'ese o le Āloali'i o le ola. Ua ifo le 'au agelu i Ōna luma, a o le 'alaga fiafia ua fa'atumulua ai maota o le lagi, "Ua tataua lava le Tama'i mamoe na fasia, ina ia tu'uina atu iā te Ia le mana, ma le 'oa, ma le poto, ma le mālōsi, ma le fa'ane'ene'ega, ma le vi'iga, ma le fa'amanū" (Fa'aal. 5:12).

(14) O LE Ā LE VI'IGA O LE MANUMĀLŌ O LO'O 'ALAGAINA I FAITOTO'A UMA O LE LAGI MA O LE A TOE FA'ALOGOINA PE A FA'AI'UINA LE FINAUGA MA UA FA'ATO'ILALO LE AGASALA E LE ALOFA TUNOA E FA'AVAVAU?

Na 'ou fa'alogofa'i i mea uma na faia o i le lagi ma le lalolagi, ma lalo ifo o le lalolagi, ma mea fo'i o i le sami, atoa ma mea uma o i ai i ia mea, o lo'o fa'apea atu, "Ia iā te Ia o Lē ti'eti'e i le nofoali'i atoa ma le Tama'i Mamoe le fa'amanū, ma le fa'ane'ene'ega, ma le vi'iga, ma le malosi e fa'avavau, fa'avavau lava."

Fa'aaliga 5:13

O vi'iga o le manumālō ua tu'u fa'atasi ma la'au pese a agelu se'ia o'o ina ua pei ua fa'atumulua ai le lagi i 'oli'olisaga ma vi'iga. Ua manumālō le alofa. Ma ua maua lē na lē iloa. O le lagi ua tumu i leo 'ese'ese o lo'o vivi'i, "Ia iā te Ia o Lē ti'eti'e i le nofoali'i 'atoa ma le Tama'i Mamoe le fa'amanū, ma le fa'ane'ene'ega, ma le vi'iga, ma le mālōsi e fa'avavau, fa'avavau lava."

(15) O LE Ā LE FOLAFOLAGA PELE E MAFAI ONA TAOFIMAU MA LE FIAFIA MA LE FA'AFETAI E TATOU O LO'O OLA PEA A O LATALATA LE TOE AFIO MAI O LO TATOU FA'AOLA?

O le mea fo'i lea e mafai ai iā te Ia ona fa'aola pea lava i ē fa'alatalata atu i le Atua ona o Ia, auā o lo'o soifua pea Ia e fautua mo i latou.

Eperu 7:25

Mai lea va'aiga fiafia i le lagi, ua toe talia mai iā i tatou o i le lalolagi le si'ufofoga mai afioga matagofie a Keriso lava ia, "'Ou te alu a'e i Lo'u Tamā ma lo outou Tamā, o Lo'u Atua ma lo outou Atua" (Ioa. 20:17). O le aiga i le lagi ma le aiga i le lalolagi ua tasi lea. Sa afio a'e lo tatou Ali'i mo i tatou, ma e mo i tatou o lo'o soifua ai pea o Ia. "O le mea fo'i lea e mafai ai iā te Ia ona fa'aola pea lava i ē fa'alatalata atu i le Atua ona o Ia, auā o lo'o soifua pea Ia e fautua mo i tatou."

Ou te naunau mo le toe afio mai o Iesu Keriso, ma e ala i Lona alofa tunoa, ou te filigā e ala i lo'u olaga ia gatasi ma Lana tulafono o le alofa.		
Li'o le Tali:	Ioe	Lē Mautonu
Ou te fa'anaunau ia feiloa'i ma talanoa ma agelu o le lagi sa fa'atasi mai pea ma sauni e fesoasoani ma fa'amafanafana iā te a'u i taimi ou te mana'omia ai.		
Li'o le Tali:	Ioe	Lē Mautonu

Lē Mautonu

120